




159-L







PRIMI TOMI  
QVINTA  
CONTROVER-  
SIA GENERALIS,

DE MEMBRIS ECCLE-  
SIAE MILITANTIS,

TRIBVS LIBRIS  
explicata.

A R.P. ROBERTO BEL-  
LARMINO POLITIANO  
Societatis IESV.

~~Ex libris Ambrosij Krebll.~~

Ex Catalogo lib. PP. Ertanum Canadulen. ppe. Maganum



1891-1892

113



INDEX  
LIBRORVM ET  
CAPITVM.

LIBER PRIMVS,  
De Clericis.

PRÆFATIO.

*Ordo disputationis de Clericis.*

- CAP. I. *De nomine Clerici & Laici.*  
II. *Proponitur questio de institutione Ministrorum Ecclesie.*  
III. *Non pertinere ad populum ius ordinandi Pastores sive Ministros.*  
IIII. *Non esse populi, sed Episcoporum vacare Ministros.*  
V. *Electionem Ministrorum non fieri à solo Deo.*  
VI. *Non decuisse Christianos Sacerdotes carnali successione propagari.*  
VII. *Ius eligendi Pontificem, ceterosq; Ecclesie Ministros, non conuenire populo iure diuino.*  
VIII. *Electionem Episcoporum, non pertinere iure diuino ad Clerum, sed ad summum Pontificem.*  
IX. *Rationem eligendi summum Pontificem, per solos Cardinales, esse omnium optimam.*



# INDEX LIBRORVM

- X. *Ad quos electio summi Pontificis pertine-  
ret, si Cardinales nulli essent, &c.*
- XI. *De numero Ordinum Ecclesiasticorum.*
- XII. *De antiquitate Ordinum.*
- XIII. *De officiis Ministrorum.*
- XIIII. *De distinctione Episcopi & Presbyteri.*
- XV. *Soluuntur obiectiones.*
- XVI. *De Cardinalibus.*
- XVII. *De Chorepiscopis.*
- XVIII. *De coelibatu Sacerdotum; Sitne iure diui-  
no annexus sacris ordinibus coelibatus,  
an non?*
- XIX. *Coelibatum iure Apostolico rectissime an-  
nexum ordinibus sacris.*
- XX. *Soluuntur argumenta Caluini.*
- XXI. *Soluuntur argumenta Philippi.*
- XXII. *Soluuntur argumenta Magdeburgen-  
sium.*
- XXIII. *De bigamia.*
- XXIIII. *Soluuntur obiectiones Lutheri.*
- XXV. *De decimis.*
- DVBIVM I. *An praeceptum de soluendis decimis possit  
contraria consuetudine abrogari.*
- II. *An Laici pauperes teneantur decimas dare  
Clericis diuitibus.*
- III. *An excusari possint à peccato, qui nullas  
decimas solvunt, ubi non est consuetudo  
soluendi.*
- IIII. *Qua ratione ostendi possit, iustam esse de-  
terminationē Ecclesia, quod Christiani  
deci-*



# ET CAPITVM.

3

*decimam partem suorum fructuum Ecclesia tribuant.*

**CAP. XXVI.** *De possessionibus, quae dono Laicorum possidentur à Clericis.*

**XXVII.** *De donis secularibus.*

**XXVIII.** *An Clerici sint liberi à iugo potestatis secularis.*

## LIBER SECVNDVS,

### De Monachis.

#### PRÆFATIO.

**CAP. I.** *De nomine Monastices.*  
**II.** *De natura siue definitione Religionis.*  
**III.** *De variis Ordinibus Religiosorum.*  
**IIII.** *De confirmatione Religionum.*  
**V.** *De origine Religionum.*  
**VI.** *Mendacia deteguntur, & calumniare-*  
*futantur.*

**VII.** *Quid sit Concilium perfectionis?*  
**VIII.** *Ponuntur variae sententiae de Consiliis.*  
**IX.** *Asseruntur Consilia Evangelica testimo-*  
*niis Scripturae.*

**X.** *Idem asseritur exemplis.*  
**XI.** *Idem asseritur testimoniis Patrum.*  
**XII.** *Idem confirmatur naturali ratione.*  
**XIII.** *Soluntur obiectiones.*  
**XIIII.** *Explicatur nomen & definitio voti.*  
**XV.** *Explicatur status quaestionis.*

**XVI.** *Omne quod sit ex voto, esse cultum Dei.*  
**XVII.** *Non fuisse Indaeorum proprium vota fa-*



*cere, sed cum Christianis id etiam esse commune.*

- XVIII. *Soluantur obiectiones.*  
 XIX. *Non esse propriè votum promissionem, quæ fit in Baptismo.*  
 XX. *Paupertatem voluntariam rectè Deo voueri.*  
 XXI. *De voto obedientia.*  
 XXII. *Afferitur votum continentia ex illis verbis Luca 1. Quomodo fiet istud? &c.*  
 XXIII. *Idem afferitur ex illis verbis Matthæi 19. Sunt eunuchi, qui se castrauerunt, &c.*  
 XXIII. *Idem afferitur ex verbis Apostoli 1. Timoth. 5. Damnationē habent, quia primam fidem irritam fecerunt.*  
 XXV. *Idem afferitur ex Conciliis.*  
 XXVI. *Idem afferitur ex responsis Pontificum & Imperatorum.*  
 XXVII. *Idem afferitur testimonio Patrum.*  
 XXVIII. *Idem afferitur ratione.*  
 XXIX. *Soluitur obiectio prima aduersariorum.*  
 XXX. *Soluitur secunda obiectio.*  
 XXXI. *Soluitur tertia obiectio.*  
 XXXII. *Soluitur quarta obiectio ex ratione naturali.*  
 XXXIII. *Soluitur obiectio quinta ex Conciliis.*  
 XXXIV. *Soluitur obiectio sexta ex Patribus.*  
 XXXV. *Quòd iuniores vouere possint.*  
 XXXVI. *Licere filiis ingredi Religionem parentibus inuitis.*

XXXVII.



ET CAPITVM. 5

- XXXVII. *Licere coniugatis ex consensu vouere continentiam.*
- XXXVIII. *Per vota solennia solui Matrimonium ratum, non consummatum.*
- XXXIX. *De Eremitis.*
- XL. *De habitu & tonsura Monachorum.*
- XLI. *Licere Monachis manibus laborare.*
- XLII. *Non teneri Monachos ad laborem manuum.*
- XLIII. *Licetum esse Monachis viuere ex bonis patrimonialibus in communi.*
- XLIV. *Licetum esse Monachis viuere ex rebus sponte oblati & donati.*
- XLV. *Licere Monachis ex Mendicatione viuere.*
- XLVI. *Soluuntur obiectiones.*

LIBER TERTIVS,

De Laicis, siue Secularibus.

- CAP. I. *Ordo totius Disputationis.*
- II. *Proponitur prima questio; An politica potestas sit bona, & Christianis licita.*
- III. *Ex Scripturis asseritur politicus Magistratus.*
- IIII. *Idem asseritur exemplis Sanctorum.*
- V. *Idem asseritur ex fine principatus.*
- VI. *Idem asseritur ratione ducta ab efficiente.*
- VII. *Idem asseritur ex antiquitate.*
- VIII. *Principatum siue dominium in impiis esse posse.*



## 6 INDEX LIBRORVM ET CAP.

- IX. *Proponitur questio de potestate magistratus.*
- X. *Licere Christiano Principi leges condere.*
- XI. *Legem civilem non minus obligare in conscientia, quàm legem diuinam.*
- XII. *Judicia publica exercere non esse illicitum Christianis.*
- XIII. *Licere Christiano magistratui, gladio punire perturbatores Reipublica.*
- XIV. *Licere Christianis aliquando bella gerere.*
- XV. *Quot sint, & qua iusti belli conditiones.*
- XVI. *Licere bellum gerere Christianis contra Turcas.*
- XVII. *Ad magistratum non pertinere iudicium de Religione.*
- XVIII. *Ad magistratum pertinere defensionem Religionis.*
- XIX. *Non posse conciliari Catholicos cum hereticis.*
- XX. *Libros hereticorum abolendos esse.*
- XXI. *Posse hereticos ab Ecclesia damnatos temporalibus pœnis, & etiam morte mulctari.*
- XXII. *Soluantur obiectiones.*





## P R Æ F A T I O

# IN LIBROS TRES DE MEMBRIS ECCLE- SIÆ MILITANTIS.

**E**CCLESIA CATHOLICA, optime Lector, uniuersis, Deo militans, atque, ut Scripturæ loquuntur, terribilis, velut castrorum acies ordinata, tribus potissimum ordinibus militum, Christo auctore, distinguitur. Alij siquidem in hoc diuino exercitu Clerici, alij Laici dicuntur: Quidam etiam sunt, tum ex Clericis, tum ex Laicis, qui certis symbolis ac functione ab utrisque distincti, tertium ordinem faciunt, ac Regulares, siue Monachi nominantur.

Ordo primus ac nobilissimus Clericorum, vel Duces habet, vel Ducum ipsorum famulos & administratos. licet enim Imperator Ecclesiæ primus ac summus, Christus ipse sit, tamen quod non solum in terris, sed etiam in cælis, & apud inferos magnos exercitus habeat, quodque solis cælestibus præsentiam suam, ut par est, aspectabilem præbeat, Vica-



rium Imperatorem, ac Ducem exercitui, qui est in terris, Apostolum Petrum, eiusq<sup>ue</sup> successores summo cum imperio, & potestate praefecit. Ergo Romanus Pontifex haeres Apostolorum Principis, castra caelestia in terris ducit, Christumq<sup>ue</sup> ipsum nobis mortalibus quodammodo representat.

Proximi sunt Episcopi, qui Tribunorum militarium locum sortiti, imperant etiam ipsi, non totis castris, sed agmini quisque suo. Siquidem in partem sollicitudinis, ut nostri loquuntur, vocati sunt, non in plenitudinem potestatis. Sub his Presbyteri, quos Parochos dicimus, quasi quidam Centuriones singulis cohortib<sup>us</sup> praesunt; Diaconi, Subdiaconi, Lectores, atque Administri ceteri, vel signa atque aquilas gerunt, vel tubis, ac tympanis accendunt ad praelium, vel huc atque illuc celeriter discurrentes, mandata Imperatoris ac Ducum ad milites perferunt.

Porro Laici, hoc est, populus ipse fidelis, longe lateq<sup>ue</sup> toto campo diffusus, atque aduersus Diabolum sub Christi signis in acie constitutus, quasi quadratum agmen efficit, atque statarias legiones. Omnes enim in Baptismo ad Christi militiam nomen dederunt, eiusq<sup>ue</sup> caractere insigniti, Sacramentum perceperunt. Omnes per sacram confirmationem ad praelium inuncti, crucis signo muniti, atque armis caelestibus donati instructiq<sup>ue</sup> sunt.

Deni-



Denique, omnes de mensa Domini opulentissimo commeatu, amplissimaq; mercedis pignore in Eucharistia percepto, bellum aeternum Diabolo atque omnibus eius copiis indixerunt.

Iam verò Regulares ac Monachi, neque uno in loco degunt, neque iisdem muneribus distinentur; sed alij in montibus & turribus quasi vigiles quidam perpetuò excubant, & clamore propè astu duo hostes exterrent; alij tanquam deuoti milites ante ipsam aciem longè progrediuntur, castraque hostilia audacter infestant; quidam etiam sunt, quos Anachoretas nominare solemus, qui diuina quadam virtute præditi, seorsim à ceteris in aperto campo, locisq; desertis ad singulare certamen hostem prouocant, nec raro eundem Christi ope gloriosè prosternunt.

Hæc igitur est Ecclesia Dei viui, hæc sunt castra Sanctorum, tribus militum ordinibus ab ipsa Dei sapientia diuino planè consilio disposita atq; distincta, quæ quidem licet aduersus omnes hostiles acies insuperabilia atq; inuicta consistant, neq; vllam siue humanam, siue diabolicā vim sub omnipotentis Imperatoris presidio pertimescant: non tamē Satanas sibi ipse deest, circuit, quarit, obseruat, insidiatur, nullam nocendi elabi sinit oportunitatem: non potest ille Dei exercitum profligare, conatur tamē: non sperat victoriam, at non desinit laceffere: non  
fundet



fundet unquam Christi copias, nec delebit; at confundere & perturbare nouis ac variis stratagematum formis, & libris, & sermonibus hæreticorum, non cessat. Hinc enim hæretici huius temporis planè omnes Clericos cum Laicis ita confundunt, ut ne nomen quidem Clericorum (de qua re paulo post agemus) superesse patiantur.

Designant illi quidem certos homines, quibus docendi munus, Sacramentorumq; administrationem permittunt, quos etiam Ecclesiæ Ministros vocant: At eos nec populis cum potestate præesse, nec legibus continentie astringi, nec à tribunali-bus politicis liberos esse volunt: Sed Laicorum more, iungere connubia, filios procreare, seculi huius negotia exercere, ad forum & iudicia pertrahi, inuitis etiam summis Antistitibus, iubent. Nam de consecratione atq; vnctione Pontificum, de tiaris, infulis, pedis, de palliis, tunicisq; sacratis, de corona capillorum, de reliquo apparatu, qui ad officium exornandum Ministrorum Dei, atq; ad ornatum Ecclesiasticum à cultu prophano distinguendum pertinet, nihil commemorare necesse est. Hæc enim omnia adeò confidenter aspernantur, ac de medio tollunt hæretici, ac si ea certissimis rationibus, cum ne probabiles quidem attulerint, superstitionem redolere Iudaicam demonstrassent. Monachos autem in vniuersum omnes, siue Anachoreta, siue



*Cænobitæ illi sint, nec minus omnia Monastica instituta, ritus, vota, consuetudines, vestes, functiones, & ipsa etiam vocabula execrantur. Neque aliud esse vult Calvinus lib. 4. Instit. cap. 13. Monasteria Cænobitarum, nisi lupanaria sceleratorum, vel conuenticula schismaticorum: Anachoretas autem, Magdeburgenses Centuriatores Centur. 4. cap. 6. & 10. monstra quædam humana, vel vrsos potius, ac Mysanthropos appellandos censuerunt.*

*Soli restant Laici, quibus etsi mirum in modum adulentur Lutherani, ut ea ratione maior Clericis ac Monachis consletur inuidia; veruntamen adsunt Anabaptista, qui nec Laicis parcunt, dum iurisdictione magistratus, magistratibus vrbes, urbibus genus humanum spoliant, atque ad eam formam regimen vniuersum reuocant, quæ non modò Reipublicæ ipsorum, sed ipsi etiam generi humano, si passim usu recipiantur, extremam ruinam, atq; exitium possit afferre. Sedenim haud scio, plûsne Laicis Anabaptista noceant vexando, ac detrahendo; an cumulando, & blandiendo Lutherani. Detrahunt illi populo Christiano politicam potestatem, sine qua salus Reipublicæ terrene in apertum discrimen, interitumq; vocatur: Augent contrà Lutherani eundem populum etiam Ecclesiastica potestate, ut nimirum ducantur*

*Pasto-*



Pastores ab ouibus, & imperent Imperatoribus milites, atque interim pereat res Christiana, pereat Christi regnum, pereant animæ, quarum salutem propria vita, & sanguine Dei Filius emerat.

Quæ cum ita sint, ad omnes pertinet, qui in Ecclesia Catholica Doctoris munere funguntur, impiis hereticorum conatibus, vel Satana potius cōsiliis & furori occurrere, & omnes Ecclesiæ partes, omnia membra, omnes ordines pro viribus protegere, actueri: à nobis verò non modò caritas Christiana, & onus à maioribus impositum flagitat, sed etiam cogit ordo disputationum, ut ad eas controuersias explicandas aggrediamur, quæ sunt de tribus illis Ecclesiæ partibus; id est, Clericis, Laicis, Monachis, ab hereticis huius temporis excitata. Quando enim pro capite militantis Ecclesiæ, proq<sup>ue</sup> ipsa Ecclesia, tum in Conciliis congregata, tum etiam diffusa toto orbe terrarum, pro nostrarum virium tenuitate pugnauerimus: Illud vnum est reliquum, ut pro membris eiusdem Ecclesiæ, pro nostra virili parte dimicemus, & Christo duce, atque Imperatore, omnia hostium tela clypeo veritatis, & gladio verbi Dei discutiamus.

### Ordo disputationis de Clericis.

**I**GITUR disputatio de Clericis (nam ab ea exordium esse, tum antiquitatis, tum etiam dignitatis



gnitatis ordo nos admonet ) octo partibus continetur. PRIMVM enim, de ipso nomine Clericorum differendum erit. DEINDE, de vocatione, siue electione ad sacram Ministerium. TERTIO, de distinctione, numero, & officio Ministrorum. QVARTO, de cœlibatu hominum sacratorum. QVINTO, de solennibus precibus, & laudibus, certis horis, certoq; ordine concinendis. SEXTO, de Ecclesiastica tonsura, vel rasura capillorum. SEPTIMO, de possessione temporalium bonorum, siue politico, siue Ecclesiastico iure acquisitorum. OCTAVO, de exceptione Clericorum à tribunalium ciuiliū potestate. Nihil autem de Sacramento Ordinis, nihil item de Ecclesiastica Iurisdictione hoc loco dicendum erit, quòd ea partim ad quæstiones de Sacramentis, partim ad quæstiones de Pontifice, & Conciliis pertinere videantur.







# LIBER PRIMVS DE CLERICIS.

10

## CAPVT PRIMVM.

### *De nomine Clerici & Laici.*



VID HAEC NOMINA CLERICI ATQVE  
Laici sibi velint, nemini dubium esse puto: ta-  
met si enim Græcam originem habeant, ta-  
mē trita sunt, ac peruulgata. Quis enim igno-  
rat idem esse λαοὺ Græcis, quod populum  
Latinis? Idem illis κληροῦ, quod sortem, siue hæreditatem  
nobis? Inde igitur laici dicti sunt quasi plebei, ac populares,  
quibus nulla pars functionis Ecclesiasticæ demandata est;  
Clerici autem quasi Domini fors, & hæreditas, qui diuino  
cultui consecrati, procurandæ religionis, ac rerum sacra-  
rum, Deo ipso iubente, prouidentiam, ac sollicitudinem sus-  
ceperunt: *Clericus*, inquit S. Hieronymus in epistola ad Ne-  
pot. interpretetur primo vocabulum suum, & nominis definitio-  
ne prolata, nitatur esse quod dicitur; si enim κληροῦ Græcè, fors  
Latinè appellatur; propterea vocantur Clerici, vel quia de sorte  
sunt Domini, vel quia ipse Dominus fors, id est, pars Clericorum  
est. Cur autem hæreditas sortis nomine appelletur, illa ra-  
tio reddi solet, quod hæreditas in plures sorte plerunque di-  
uidatur; vnde est illud Prophetæ Psal. 77. *Sorte diuisit eis ter-  
ram in funiculo distributionis.*

Accedit quod licet ad vnum aliquem hæreditas tota per-  
ueniat, id tamen non electione, sed sorte fit; nascuntur enim  
vt plurimum, non fiunt hæredes. quis autem laborauit, quis  
operam dedit, vt huius potius quàm illius filius & hæres na-  
sceretur? Atque huc Apostolus Paulus, Chrysostomo teste,  
respexit, cùm ait, scribens ad Colossenses: *Dignos nos fecit in  
partem*



*partem sortis sanctorum.* Et rursus ad Epheseos. *In quo nos sorte vocati sumus.* Non quod (vt Lutherani volunt) æterna beatitudo nullis meritis acquiratur, sed quod ad gratiam & adoptionem filiorum Dei sine vlllo opere nostro vocemur. Falluntur enim Pelagiani, qui priores partes homini, posteriores verd Deo tribuunt in conuersione ac pœnitentia peccatoris. Quomodo enim sorte vocamur, si nos ipsi Deum vlllo nostro vel opere vel conatu perueniamus?

Nemo igitur gratiam inuocat, nisi præuentus à gratia, nemo eligit Deum, nisi prius electus à Deo, nemo diligit, nisi prius dilectus, auersos ille conuertit, errantes reuocat, inuenitur à non quærentibus, palàm apparet non interrogantibus. quia tamen quod nobis fors est, Deo prouidentia, & prædestinatio est, propterea sapienter Apostolus simul iungit vtrumq; , cùm ait: *In quo nos sorte vocati sumus, prædestinatus secundum propositum voluntatis eius.* Sed de his hæctenus.

Habemus igitur quid Clericorum ac laicorum nomen significet. Hinc autem prima inter nos, & hæreticos quæstio nascitur, rectè ne, an secus quidam inter Christianos Clerici, quidam laici nominentur. Lutherani enim & Caluinistæ tamen minimè negant, quod ad rem attinet, ministerium verbi, & Sacramentorum non ex æquo ad omnes pertinere, & habent ipsi quoque suos quosdam Ministros & Pastores, siue (vt ipsi loquuntur) Superintendentes, quibus totam ferè religionis suæ curam permittunt: tamen quod eorum contentiones, & schismata ab odio Clericorum, & laicorum fauore initium duxerint, & vocabulum Cleri non obscure excellentiam quandam, ac dignitatem præ se ferre videatur, nullo modo ferunt, vt Ministri Ecclesiastici, Clerici; ceteri, laici appellentur.

Itaque LUTHERVS in libro illo planè tartareo de abroganda Missa priuata, parte I. tractans illud D. Petri, Non dominantes in cleris: *Quod, inquit, nostra translatio habet, non dominantes in Cleris, interpretis incuria fuit, qua fecit & Clerum hoc loco intelligerent quos nunc à laicis discreuit impia hominum traditio.* Et infra: *Hoc dixisse contenti sumus, Christianum populum esse simplicem, in quo prorsus nulla secta, nulla differentia personarum, nullus clericus, nullus laicus, nullus sanctus, nullus rufus, nullus monachus esse debeat.* Et CALVINVS in 4. lib. suæ Instit. cap. 4. §. 9. *Hæc, inquit, appellatio aut errore, aut*



certè ex praua affectione nata est, cum tota Ecclesia clerus, id est, hereditas Domini à Petro dicatur. Et in comment. c. 5. prioris epistolæ B. Petri: *Unam*, inquit, *nunquam Patribus Venisset in mentem, si hac voce uterentur.* Hæc illi, à quibus ego libenter quærerem, quo tempore, quo loco, quibus auctoribus hanc appellationem natam esse putent?

Si enim paucis antè aënis, in angulo nescio quo, ab aliquo ambitioso atque indocto artifice vocabulorum fabricatam esse hanc vocem demonstrare possent Lutherani, possemus  
 10 & nos vicissim facillè credere, ex errore, aut prauo affectu, aut etiam impia traditione natam esse: sin autem ex diuinis literis deprompta hæc appellatio, in ore omnium Conciliorum, omnium Patrum, totius Ecclesiæ, orbis terrarum vniuersi, omnibus ætatibus, ac seculis fuit, quis poterit satis hominum istorum audaciam, impudentiamq; mirari?

Et quidem si de Conciliorum decretis, & sanctorum Patrum voluminibus agitur, non tam quærendum est, vbi Clericorum & laicorum nomen & distinctio habeatur, quam  
 20 vbi non habeatur. ita passim in singulis propè paginis tum Patrum, tum Conciliorum veterum appellatio illa occurrit, quam ex errore, aut prauo affectu, vel impia traditione natam esse Lutherus & Caluinus affirmant.

Prodeat ex vetustis scriptoribus TERTULLIANVS, qui non modò antiquissimus, sed etiam doctissimus fuit. Is igitur in libro de Monogamia hoc modo loquitur: *Cum extollimur*, inquit, *& inflamur aduersus Clerum, tunc & nunc omnes sumus, tunc omnes Sacerdotes, quia Sacerdotes nos Deo & Patri fecit: cum ad peræquationem disciplina sacerdotalis prouocamur, deponimus infulas, & impares sumus.* Et infra: *Laicis Verò*  
 30 *quia Monogamia non conuenit, cetera quoq; aliena sunt.* Quid potuit clarius aduersus Lutherum & Caluinum Tertullianus dicere, quàm arrogantes ac superbos esse laicos, qui extolluntur, atque instantur aduersus Clericos? Sed fortasse singulorum hominum testimonium sine temeritate contemnitur.

Prodeat igitur, non ex hominibus singulis, sed ex cæteris hominum, Concilium I. NICAENVM, œcumenicum, vetustissimum, frequentissimum, celeberrimum, cuiusque auctoritas tanta semper apud omnes veteres fuit, ut ab Eusebio lib. 3. de vita Constantini, & Augustino libro 1. de Baptismo, cap. 18.



cap. 18. orbis terræ Concilium appelletur; ab Athanasio in epistola ad Episcopos Africæ, & Leone epist. 53. ad Anatholium, cum oraculis Spiritus sancti; à Gregorio verò li. i. epist. 24. cum ipso Evangelio conferatur. In ea igitur tanta Synodo, quam neq; erroris, neq; prauis affectus, multò etiam minus impietatis possumus reprehendere, nisi vitiorum eorundem Ecclesiam totam, & orbem terræ vniuersum reprehendamus: in ea, inquam, Synodo appellatio Clericorum in singulis ferè canonibus inculcatur. Sic habet Canon primus: *Si quis in agnitum vel à Medici sectus vel à Barbaris castratus est, placuit ut iste permaneat in Clero: si quis autem sanus se ipsum abscepsit, hic etiam si est in Clero, cessare debet. & ex hoc nullum talem oportet ordinare.* In II. verò canone III. VIII. in XVII. in XVIII. & XIX. nihil ferè tractatur aliud, quàm de ordinationibus Clericorum. quod idem in omnibus omnino Conciliis passim occurrit.

Quid, quòd in ipsis etiam Apostolorum canonibus à S. Clemente descriptis, distinctio, & nomen Clericorum, & laicorum non semel legitur? Can. XII. *Si quis cum damnato Clerico, & cum Clerico, orauerit, damnetur.* Can. XIII. *Si quis Clericus aut laicus à cõmunionis suspensus, &c.* Can. XV. *Si quis Presbyter, aut Diaconus, aut quislibet de numero Clericorũ relinquens propriam parochiam pergat ad aliam, hunc Clericus ministrare non patimur, præsertim si vocatus ab Episcopo redire contempserit, & erunt ament anquam laicus ibi communicet.*

Quid hîc Calvinus, & Lutherus dicent? ignorabant Patres Nicæni, ignorabat Clemens Pontifex, ignorabant Apostoli Christianum populum simplicem esse debere, ut nullus in eo Clericus, nullus sit laicus? An potius impia traditione, errore, prauoq; affectu Ecclesiæ Ministris eiusmodi nomen indiderunt?

At, INQUIVNT, non multum nos laboramus quid homines dicant, iam dudum enim valere iussimus verba hominum. Verbum Dei proferatur ad medium, si controuersia finienda est. Videamus igitur quid habeat verbum Dei, quam opus non esset, cum de re constet, magnopere de nomine litigare. Apud Hierem. c. 12. ita Spiritus sanctus loquitur: *Cleri eorum non proderunt eis.*

Ac ne forè de istis ipsis verbis Dei litigandum sit, profero testes omni exceptione maiores, Origenem, Epiphanium,



Hieronymum, qui non modò Scripturarum diligentissimi tractatores fuerunt, sed etiam penè soli inter omnes Ecclesie Patres Hebraicæ linguæ, qua Hieremiæ volumen scriptum esse constat, scientiam habuerunt. Sic igitur ORIGENES hom. 7. in Hier. exponit hæc verba, Cleri eorum non proderunt eis: Hæc, inquit, ante me alij exposuerunt, & quia non improbo interpretationem eorum, consentiens eandem profero; Nos qui putamur aliquid esse, id est, qui in clericatus vobis ordine præsidemus, in tantum, Et quidam de minori gradu ad hunc locum cupiant pervenire, nosse debetis, non statim in eo esse salvandos, quia Clerici sumus, multi enim & Presbyteri pereunt, & lat-  
 10 ci beatissimi reperiuntur.

S. autem EPIPHANIVS ad initium eius epistolæ, quam ad Ioannem Episcopum Hierosolymæ scripsit: Oportebat, inquit, nos dilectissime, clericatus honore non abuti in superbiâ, sed custodiam mandatorum Dei, & observatione diligentissima hoc esse quod dicimur; si enim sacra Scriptura loquitur, Cleri eorum non proderunt eis, quæ arrogantia clericatus conducere nobis poterit, qui non solum cogitatione & sensu, sed etiam sermone peccamus?

Eodem modo S. HIERONYMVS in commentario huius  
 20 loci: Dicitur, inquit, hoc & Ecclesiasticis; quid enim eos iuvare poterit Episcopi nomen, & Presbyteri, vel reliquus ordo Ecclesiasticus; cum magis grauentur dignitatibus suis, & potentes poterint tormentari patiuntur? Idem quoque Hieronymus in epistola ad Nepotianum: Obsecro, inquit, te, & repetens iterum, iterumque monebo, ne officium clericatus, genus antiquæ militiæ putes, id est, ne lucra sæculi in Christi quaras militia, ne plus habeas quàm quando Clericus esse cœpisti, & dicatur tibi, Cleri eorum non proderunt eis. Habemus igitur verbum Dei, in quo, Origene, E-  
 30 piphanio & Hieronymo testibus, Episcopi & Presbyteri, ceterique ordines Ecclesiastici, clerici nominantur.

Sed accedat postremò Dei ipsius grauissimum testimonium, non solum verbo prolatum, sed etiam horribili quodam prodigio quasi sigillo proprio consignatū. Quod enim hoc tempore Lutherus & Calvinus aduersus Clericos clamant, idem olim Datan & Abyron aduersus Sacerdotes Testamenti veteris clamabant: Sufficiat vobis, aiebant illi Num. cap. 16. quod omnis multitudo sanctorum est, & in ipsis est Dominus, cur eleuamini super populum Domini? Quid verò Lutherus & Calvinus dicunt? Sufficiat vobis quod omnis Ecclesia cle-  
 rus,



rus, id est, hæreditas Domini est, cur eleuamini super laicos. cur soli vobis Cleri vocabulum vsurpatis?

At qualem exitum reperit contentio illa veterum schismaticorum? Acerbum omnino, & fluctuosum: siquidem continuò, vt Scriptura eodem loco narrat, ad imperium Domini, qui schismata, & seditiones aduersus ministros suos ferre non potest, *dirupta est terra sub pedibus eorum, & aperiens os suum deuorauit illos, cum vxoribus, cum liberis, cum tabernaculis, cunctisq; opibus, descenderuntq; in infernum, operiti humo, & perierunt de medio multitudinis.* Hæc videlicet iustissima pœna illorum est, qui diuersos in Ecclesiâ gradus, ordinemque pulcherrimum, ab ipsa Dei sapientia constitutum, confundere, ac perturbare nituntur, vt ad ea inferorum detrudantur loca, vbi vmbra mortis, & nullus ordo, sed sempiternus horror inhabitat.

Sed eorum obiectiunculas, licet frigidæ, & ieiunæ, breuiter diluamus. Christianus populus, inquit Lutherus, simplex debet esse, vbi nemo sit clericus, nemo laicus; nam vt Apostolus ait ad Galat. 3. *Non est Iudeus neq; Græcus, non est seruus neq; liber, non est masculus neque femina, omnes enim Vos unum estis in Christo IESU.*

Vnum & simplicem Christianum populum esse debere, negari non potest, sed interest qua vnitate, qua simplicitate: *Vnus Dominus*, inquit Apostolus ad Ephes. 4. *Vna fides, Vnum Baptisma, Vnus Deus & Pater omnium.* Hæc est vnitas, hæc simplicitas populi Christiani, vt vnus sint omnes fidei, idem dicant, idem sentiant omnes, nec sint in eis schismata. Quia simplicitate cum omnino careant Lutherani, quippe quibus tot penè sunt sectæ quot ciuitates; tot symbola quot capita, viderint ipsi quàm bene Christianus populus dici possint.

Porro distinctio Clericorum & laicorum cum hac simplicitate non magis pugnat, quàm pugnet membrorum distinctio cum corporis vnitate. Vnum est corpus humanum, nec tamen totum est oculus, nec totum est auris, nec totum manus, nec totum pedes, alioqui, vt verbis vtat Apostoli 1. Cor. 12. *Si totum corpus oculus, vbi auditus? si totum auditus, vbi odoratus? & si essent omnia vnum membrum, vbi corpus? Nunc autem multa quidem sunt membra, vnum autem corpus.* Sic prorsus in Ecclesiâ alij Clerici, alij Laici, alij Monachi sunt; & rursus Clericorum, alij Sacerdotes, alij Ministri, Laicorum alij



Principes, alij priuati; Monachorum alij anachoretæ, alij cœnobite. Sed hæc membrorum ac partium varietas est, corpus verò vnum, quoniam vnum omnes Dominum habemus, vnā fidem, vnum Baptisma, vnum Deum Patrem, vnā Ecclesiam matrem, vno spiritu viuimus, vno pane nutrimur.

Neq; verò his repugnant verba illa Pauli: *Non est Iudæus neq; Græcus, non est seruus neq; liber, non est masculus neq; femina.* Tamen si eadem ratione dicere potuisset, non est laicus neque clericus. Neque enim illis verbis excludere voluit

- 10 Apostolus ab Ecclesia diuersitatem sexuum, nationum, conditionum, sed admonere, non ista esse quæ filios Dei faciant, sed fidem quæ per dilectionem operatur, sic enim ait: *Omnes Vos Filij Dei estis per fidem, quæ est in Christo IESU; Quicumque enim in Christo IESU baptizati estis, Christum induistis, non est Iudæus neque Græcus, non est seruus neq; liber, non est masculus neq; femina.* Itaque nihil obest sexus, si adsit fides: nihil prodest, si absit; & laicus cum caritate, Dei Filius est, & Clericus sine caritate mancipium Diaboli est: Sunt igitur in Ecclesia clerici, sunt laici, sunt liberi, sunt serui, sunt masculi, sunt femina: sed hæreses regni sempiterni, non istæ graduum, siue conditionum, siue sexuum differentiar, sed fides cum spe & caritate constituit.

- 22 At B. Petrus in epistola sua priore cap. 5. totam Ecclesiam  
23 Clerum appellat, cum ad Episcopos ait: *Pascite qui in vobis*  
24 *est gregem Dei, prouidentes non coactè, sed spontaneè, neq; tur-*  
25 *pis inquit gratia, sed voluntariè, neq; vt dominantes in clericis, sed*  
26 *forma facti gregis ex animo.* Ex errore igitur, inquit, im-  
27 piaue traditione, aut prauo affectu ab honore Clerici nomi-  
28 nis deiectioni sunt laici.

- 30 Sed hæc obiectione nec difficulter, nec vno modo soluitur.  
Primum omnino probabile est, quod S. Hieronymus in epistola ad Nepotianum, & Oecumenius in commentario huius epistolæ docent, Cleri appellationem hoc loco positam, non ad Ecclesiam vniuersam, sed ad eos tantum esse referendam, qui propriè Clerici vulgò nominantur. tamen enim ad Episcopi gregem tum Clerici, tum laici pertinent, tamen quia tantò maius periculum erat, ne Episcopi Clericis dominari vellent quam laicis, quantò Clerici magis subiecti, atq; obsequentes Episcopis, vt proprij eorum administri, ex ipsa sua professione debent esse, quam laici, propterea B. Pe-



trus Episcopos monet, vt vniuersum quidem gregem diligenter pascant, sed in pascendis laicis caueant turpe lucrum, in Clericis regendis fugiant dominandi cupiditatem.

Adde, quod nomen Cleri deriuatum est ad Christianos à Iudæis, & sine dubio S. Petrus alludit ad Leuitas Iudæorum, qui Numer. 18. & Deut. 18. dicuntur esse de sorte Domini, & Dominus dicitur esse eorum fors & hæreditas, quia donauit eis quodammodò partem suam, id est, decimas, & oblationes filiorum Israël. Porro Leuitis non respondent in Ecclesia noui Testamenti omnes Christiani, sed soli sacerdotes, eorumq; ministri. Petrus igitur nomine Cleri non omnes Christianos, sed solos ministros Ecclesiasticos intellexit.

Quod si hæc interpretatio ab aduersariis obstinatè reii- ciatur, nihil est cur magno pere contendamus. potest enim eadem appellatio Cleri diuersa ratione cum vniuersæ Eccle- siæ, tum solis templi Ministris aptissimè conuenire. Nam vt Ecclesia vniuersa, fors atque hæreditas Christi est, quod eam acquisierit sanguine suo, & simul tamen quædam certa Ec- clesiæ portio, altaris ministerio consecrata, magis propria ratione fors, & hæreditas eiusdem Christi dici potest, non se- cus atque olim Synagoga Iudæorum vniuersa in libris Pro- phetarum passim hæreditas Domini vocabatur, quod eam vniuersam Deus ex Ægypto liberasset, & quodammodò re- demisset, & tamen solam tribum Leuiticam, quam rebus sa- cris præfecerat, speciali quadam ratione sortem suam & hæ- reditatem idem Dominus appellabat.

CAPVT SECVNDVM.

*Propositur questio de institutione Ministro- rum Ecclesiæ.*



EDQUITUR altera questio de institutione Episcoporum, aliorumque Ecclesiæ Mini- strorum, quæ sanè cum grauissima, tum etiam vtilissima est, non ad id modò, de quo agimus in præsentia, sed etiam ad veram Dei Ecclesiam cognoscendam. Illud autem ini- tio præmittendum est; appellatione creationis Episcopo- rum tria contineri; electionem, ordinationem, & vocatio- nem seu missionem; Electio nihil est aliud, quàm designatio certæ personæ ad Ecclesiasticam præfecturam; Ordinatio,



sacra carimonia est, qua certo ritu futurus Episcopus inungitur & consecratur; Missio seu vocatio iurisdictionem tribuit, ac re ipsa Pastorem, ac Præsulem facit.

Existit igitur inter nos & aduersarios controuersia, cui potissimum ius sit in Ecclesia Episcopos creandi, id est, eligendi, vocandi, atq; initiandi. Rursus obseruandum est, electionem multis ac variis modis fieri posse; nam aut Deus solus eligit, quomodo Aaron, & Petrus electi fuere; aut Deus per homines. Cùm autem per homines Deus eligit, aut id facit naturali propagatione, quomodo filij Aaron, & nepotes olim ad sacerdotium perueniebant, aut certè voluntaria electione. Quòd si voluntaria electione, aut vnus, qua ratione Clemens a Petro electus dicitur, aut plurium; & si plurium, aut populi, aut cleri, aut vtriusquè.

Sunt autem tres de hac tota quæstione sententiæ. PRIMA Ioannis VViclef, & Ioannis Hufs, qui teste Thoma VValdesili. 2. doct. fidei, cap. 39. & 40. docebant, solius Dei munus esse eligere Pastores Ecclesiæ; quod soli pij, & prædestinati, Episcopi & Pastores esse possint, & solus Deus nouerit, qui sint pij, & prædestinati. Vide in Concilio Constantienfi sess. 8. & 15. articulos horum hæreticorum.

ALTERA sententia est Martini Lutheri, Ioannis Caluini, Matthiæ Illyrici, Ioannis Brentij, Martini Kemnitij, aliorumq; huius temporis Sectariorum, qui electionem, & vocationem, iure diuino ad Ecclesiam vniuersam, hoc est, ad Clerum & populum spectare volunt, ita prorsus vt sine populi consensu ac suffragio nemo legitimè electus, aut vocatus ad Episcopatum habeatur. Porro ordinationem, quæ per manus impositionem fieri solet, solis Pastoribus tribuunt. Nec enim fieri posset vt totus populus manus imponeret, sed ita tamen ad solos Pastores munus hoc referunt, vt illi nomine totius Cleri ac populi nouis pastoribus manus imponant, ac verè dici possit totus Clerus ac populus non solum eligere ac vocare Pastores, sed eosdem etiam initiare, & ordinare. Sed verba ipsorum audiamus.

Martinus LUTHERVS in libro de potestate Papæ: *Hunc ritum*, inquit, *per multas epistolas Cyprianus commemorat, semper suffragium populi, & iudicium propinquorum Episcoporum, ita allegans, Et hanc ex Deo ordinationem esse cum fiducia pronunciet. Et infra: Nec referre est necesse quanto felicius hodie is*



ritus diuinus seruaretur, praesertim tot sacerdotibus malis regnā-  
tibus, & in uero populo impositis. Idem fusè atq; ex verbo Dei,  
ut ipse iactat, in eo libro demonstrat, quem inscripsit de insti-  
tuendis ministris, ad Boëmos. Ioannes CALVINVS li. 4. Instit.  
Christ. c. 3. §. 15. *Habemus, inquit, esse hanc legitimam ex verbo*  
*Dei ministri vocationem, ubi ex populi consensu & approbatione*  
*creantur, qui si fuerint idonei. Praesse autem electioni debere*  
*alios Pastores, ne quid vel per leuitatem, vel per mala studia, vel*  
*per tumultum à multitudine peccetur.* Matthias Flaccius ILLI-  
RICVS præter eum librum quem scripsit de electione Episco- 10  
porum, in quo totis viribus contendit, ius eligendi, atque  
instituendi Episcopos, neque summo Pontifici, neque Regi-  
bus, neque Canonicis permittendam esse, sed multitudini  
fidelium, cui conuenit iure diuino, esse restituendam. Scri-  
psit etiam multa cum collegis suis Magdeburgensibus Cen-  
turiatoribus in hist. Eccles. Centur. 1. lib. 2. cap. 4. col. 391.  
*Habet, inquit, Ecclesia in qualibet loco, hoc est, totus cætus, tum,*  
*Et nunc vocamus, laicorum, tum clericorum consensum potestatem*  
*eligendi, vocandi, & ordinandi ministros idoneos.* Non dif- 10  
fimilia sunt quæ scribunt Ioannes Brentius in Prolegome-  
nis aduersus Petrum à Soto, & Martinus Kemnitius in ex-  
amine Concilij Tridentini in disputatione de Ordinis Sa-  
cramento. Hæc igitur eorum sententia est, ex qua non ob-  
scure colligi putant, nullos esse apud nos Episcopos ritè vo-  
catos, quod iam dudum nostri in Episcoporum electionibus  
plebem excluserint à ferendo suffragio.

CONTRA autem, Doctores Catholici summa consen-  
sione docent, ius Episcopos ordinandi ac vocandi ad ple-  
bem nullo modo pertinere posse; ius autem eligendi fuisse 30  
aliquando, & aliquo modo penes populum, sed Pontificum  
concessione vel conuiuentia, non lege diuina; ex quo nos  
longè verius colligemus, nullam esse apud hæreticos veram  
ordinationem, nullam vocationem, nullam electionem,  
proinde, nullos Episcopos, nullam Ecclesiam; ut autem  
hæc omnia distinctè, atque ordine demonstremus, propo-  
sitis aliquot sententiis seu propositionibus, dispu-  
tabimus primùm de ordinatione, tum  
de vocatione, postremò de  
electione.



## CAPVT TERTIVM.

*Non pertinere ad populum ius ordinandi Pastores. siue Ministros.*

**S** I igitur hæc prima nostra propositio seu sententia. *Ordinationem tum Episcoporum, tum aliorum Ecclesia Ministrorum, non ad plebem, sed ad solos Episcopos pertinere.* Testantur id passim diuinæ Scripturæ, testantur decreta Conciliorum, testantur veteres Patres, testantur denique mos populi Dei, & exempla maiorum. Aaronem, & filios eius sacerdotes primos Testamenti veteris solus Moses Sacerdos, & Pontifex ordinavit, & consecrauit, Leuitic. 8. Mosem autem Sacerdotem fuisse, testatur Dauid in Psal. 98. *Moses, inquit, & Aaron in sacerdotibus eius.* Testatur Philo lib. 3. extremo de vita Moysis: *Hæc, inquit, fuit vita, obitusq; Moysis Regis, Legislatoris, Vatis, & Pontificis.* Testatur Hieronymus libro 1. in Iovinianum, testatur

10 Augustinus in commentario Psalm. 98. testatur Gregorius Nazianzenus oratione ad Gregorium Nyssenum, testatur denique S. Leo epist. 88. ad Episcopos Germaniæ & Galliæ.

In Testamento nouo, vbicunque mentio fit manus impositionis, quo ritu etiam apud aduersarios ordinatio celebratur, semper ea Apostolis, ceterisque Episcopis, nunquam verò plebi tribuitur. Actor. 6. Soli Apostoli per manus impositionem Diaconos ordinarunt. 1. ad Timoth. 4. *Noli, inquit Apostolus, negligere gratiam, quæ in te est, quæ data est tibi*

30 *per impositionem manuum Presbyterij.* Quo loco Presbyterium, Episcoporum cœtum significat, vt testantur omnes fere interpretes, ac præsertim Græci, Chrysostomus, Theodoretus, Oecumenius, Theophylactus: *Non de Presbyteris, inquit Chrysostomus, hic loquitur sed de Episcopis, neq; enim presbyteri ipsum ordinarunt.* Item in eodem loco loquitur Apostolus ad Episcopum: *Manus citò nemini imposueris.* Acturus 2. ad Tim. 1. *Resuscites, inquit, gratiam quæ data est tibi per impositionem manuum mearum.*

Itaque ex diuinis literis satis probatur, munus ordinandi proprium esse Episcoporum, quod idem ex plurimis Conciliorum



liorum decretis confirmari posset: sed quoniam res est perspicua, & notissima, eum solum canonem hoc loco ad memoriam reuocabo, quo Episcopum à tribus Episcopis ordinandum esse, definitum est, qui canon primus est inter canones Apostolorum, & rursus 4. est inter canones Concilij I. Nicæni, œcumenici, maximi, ac celeberrimi. Denique 12. est Concilij II. Carthaginen. tricesimus nonus III. secundus IV. & quartus VI. Que Concilia etsi non œcumenica, sed nationalia fuerint, fuisse tamen frequētissima, & S. Augustini præsentia ac suffragio illustrata.

Accedat, quodd veteres Patres constanter docent, solius Episcopi esse initiare sacris, siue Presbyteros, siue Diaconos, siue ipsos etiam Episcopos, neque id vllō modo Presbyteris licere. Vide Epiphanium hæresi 75. quæ est Aërij. Ioannem Chrysostomum cum ceteris Græcis in commentario 3. & 4. capituli prioris epistolæ ad Timotheum. Hieronymum in epistola ad Euagrium. Augustinum in breuiculo, collat. 3. capite 5. Quodd si Presbyteris non licet Episcopos aut Presbyteros ordinare, quodd id munus solis Episcopis conueniat, quodd minus id clericis inferioris gradus aut etiam laicis licebit?

Accedat postremò antiquissima, ac perpetua Ecclesiæ vniuersæ consuetudo, quæ optima iuris interpret esse solet. Nam, vt verbis vtatur Euangelicis, à seculo non est auditum, vt Episcopum non Episcopus ordinarer, neque huiusce rei vllum vnquam vel institutum ex disciplina, vel exemplum ex historiis, vel etiam vsurpatio ex hæretica licentia proferetur. Nam apud Lutheranos quoque & Caluinistas, qui rursus Ecclesiasticos penè omnes sustulerunt, ij solum manus imponunt, & Pastores, seu Ministros faciunt, qui Pastores, & Episcopi, licet re vera non sint, tamen haberi & appellari volunt. Quare quodd attinet ad ordinationes, non Clerus, & populus vniuersus, sed soli Pontifices Episcopos & Presbyteros creant.

Sed, inquit: Etsi Clerus ac populus per se manus Episcopis non imponat, id tamen non eo fit, quodd desit multitudini auctoritas, sed quodd ad vitandam confusionem, quæ necessariò existeret, si tot manus super vnius hominis caput imponendæ essent, visum est melius, vt paucis Pastoribus ea cura demandaretur. Itaque auctoritas ordinandi ministros,

totius



„ totius multitudinis est, exequutio est verò Pastorum: sed  
 „ cū Pastores, quod faciunt, totius Cleri, ac populi auctori-  
 „ tate, & nomine faciant, ipse etiam Clerus & populus ordi-  
 „ nare, & consecrare ministros dici potest.

At certè falluntur, vel fallere volunt aduersarij, dum ita  
 ratiocinantur. Nam tribus modis potest intelligi, quod ipsi  
 dicunt, auctoritate, ac nomine totius Cleri, & populi a Pa-  
 storibus ordinari Pastores. PRIMVM, quomodo nomine toti-  
 us corporis lingua loquitur, oculi vident, aures audiunt, &  
 10 de ceteris membris ad eundem modum. quod enim pars  
 corporis facit, toti etiam corpori tribui solet, licet reliquum  
 corpus neque præstet vnquam, neque præstare possit, quod  
 est illius partis proprium: Videt oculis totus homo, sed ita  
 videt, vt nulla ratione queat lingua, manibus, pedibus, aliò-  
 ue membro videre. Quod si hoc modo vellent aduersarij ab  
 vniuersa multitudine per suos Pastores ordinari ministros,  
 non esset cum eis magnopere contendendum. Nihil enim  
 potestatis vel auctoritatis in ipsa multitudine ponerent, præ-  
 ter eam quam habent Pastores, qui in membris, ac partibus  
 20 eiusdem multitudinis numerantur. Sed non id solum illi  
 quærunt, neque hac moderatione contenti sunt.

ALTERO igitur modo potest intelligi, auctoritate populi  
 Antistites à Pastoribus ordinari, vt videlicet in ipso populo,  
 remotis etiam omnibus Pastoribus, sit vera ordinandi pote-  
 stas, neque aliud impediat, quò minus populus re ipsa Pasto-  
 ribus manus imponat, quàm cōfusio multitudinis; quomo-  
 do prætores in vrbibus, auctoritate ac nomine Principis, pro  
 tribunali sedent, ac ius ciuibus dicunt. Ita enim prætor in iu-  
 re dicendo locū Principis obtinet, vt possit tamen Princeps,  
 30 si velit, per se ius dicere.

At neque hic modus aduersariis probari debet, si ipsi sibi  
 constare velint. Nam si sola confusio multitudinis impedi-  
 ret, quò minus populus ordinaret ministros, posset certè  
 idem populus munus ordinandi paucis hominibus de suo  
 corpore, id est, etiam non Pastoribus demandare; at id non  
 modò Conciliorum decretis, & perpetuæ consuetudini, &  
 omnium Patrum testimoniis, sed etiam aduersariorum ex-  
 emplis, & verbis, & ipsi rationi repugnat. Nam, vt paulò antè  
 diximus, in hæreticorum cœtibus non quouis è populo, sed  
 soli Pastores manus imponere ordinandis ita solent, vt si  
 secus



secus fiat, irrita censeatur ordinatio. & Ioannes Calvinus lib. 4. Instit. cap. 3. §. 16. Ita omnino faciendum esse ex Apostolorum consuetudine his verbis docet: *Licet nullum exstet certum preceptum de manuum impositione, quia tamen fuisse in perpetuo & su Apostolis videmus, illa tam accurata eorum observatio precepti vice nobis esse debet.* Et infra: *Hoc postremo habendum est, non universam multitudinem manus imposuisse suis ministris, sed solos pastores.* Hec ille. & sanè cum potestas ordinis, quæ ad ordinandos ministros necessaria est, per ordinationem accipiat: quis capere potest, ut vel populus univ-  
sus, vel pauci de populo, nulla prius ordinatione accepta,  
manus imponere, & ordinare ministros possit?

Restat igitur modus TERTIUS, quo possit intelligi quod aduersarij dicunt, auctoritate multitudinis Pastores à Pastoribus ordinari, nimirum, licet non habeat multitudo ordinis potestatem, habeat tamen iurisdictionis, & proinde ius Pastoribus imperandi, ut certis hominibus à se designatis manus imponant.

Sed quoniam de hac potestate iurisdictionis, quam aduersarij populo tribuunt, in sequenti capite disputandum  
erit, nunc solum ex iis quæ dicta sunt, quæque ab aduersariis affirmantur, argumentum, ni fallor, indissolubile colligemus, Ecclesiam eos nullam habere; est autem hoc argumentum. Non sunt veri Pastores, qui non sunt per manus impositionem à veris Pastoribus ordinati. Id Calvinus ex Apostolorum perpetua consuetudine, quæ nobis pro lege, ut ipse ait, esse debet, rectissime collegit. Lutherus autem, Zwinglius, Calvinus, & ceteri, qui Pastores primi apud suos habentur, non fuerunt per manus impositionem à veris Pastoribus ordinati. Nam si secus, à quibus obsecro? à suis ne? an  
à nostris? non à suis, ipsi enim sunt primi, neque enim ante Lutherum ulli fuerunt Lutherani, neque ante Zwinglium Zwingliani, neque ante Calvinum Calvinistæ, qui eos Pastores ordinare possent. Nō item à nostris, siquidem in Ecclesia Catholica, unde recesserunt, neque Lutherus, neque Zwinglius, neque Calvinus Episcopi fuerunt, sed tantum Presbyteri. Porro Presbyteri, qui Caluino Ministri sunt, non Pastores, non habent ordinandi potestatem: *Quid facit*, inquit Hieronymus in epistola ad Euagrium, *excepta ordinatione Episcopis, quod Presbyter non faciat?* Et Calvinus Hieronymo subscribens paulò



paulò antè dixit, à solis Pastoribus, id est, Episcopis Ministris ordinari.

Adde etiam, quòd ordinationem Catholicam aduersarij nihili faciunt; sicut enim Caluinus de nostra ordinatione loquitur lib. 4. Instit. cap. 5. §. 3. *Ordinatio autem nihil aliud est, quàm merù ludibrium.* Et Martinus Kemnitius loco notato, non magis ratas esse contendit hoc tempore Catholicorum Episcoporum ordinationes, quàm olim fuisse Apostolicis temporibus Annæ & Caiphæ Pontificum Iudæorum.

10 Quod si primi illi aduersariorum Episcopi & Pastores, veri Pastores & Episcopi nò fuerunt, certè nec secundi, nec tertij, nec ceteri, qui primis illis successerunt. At Ecclesia sine Episcopis & Pastoribus esse non potest, vt idem Caluinus verè affirmat lib. 4. Instit. cap. 3. §. 4. *Sequuntur*, inquit, *Pastores & Doctores, quibus cavere nunquam potest Ecclesia.* Hæc ille. *Est enim Ecclesia*, vt S. Cyprianus eam definit in epist. 9. li. 4. *plebs Episcopo adunata, & Pastori suo grex adherens.* Sequitur igitur, vt aduersarij, qui veros Episcopos & Pastores non habent, neque veram Ecclesiam habeant.

20 Hoc argumento S. Hieronymus in Dialogo aduersus Lucifer. Hilarium quendam hæresiarcham apertissime confutauit: *Hilarius*, inquit, *cum Diaconus de Ecclesia recesserit, solusq; & putat, turba sit mundi: neq; Eucharistia conficere potest, Episcopos & Presbyteros non habens, neq; Baptisma sine Eucharistia tradere; & cum iam homo mortuus sit, cum homine pariter interit & secta, quia post se nullum Clericum Diaconus potuit ordinare, Ecclesia autem non est quæ non habet Sacerdotes.*

Vnum duntaxat effugium inuenit Caluinus; scribit enim lib. 4. Instit. cap. 3. §. 4. Ecclesia constituta, non nisi à Pastoribus 30 Pastoribus ordinandos esse. At cum Ecclesia vel primum constituitur, vel iterum renouatur, ac restituitur, solere Deum extraordinario modo excitare Apostolos, & Evangelistas, in quorum numero se & Lutherum sine dubio vult haberi: *Quamquam*, inquit, *non nego, quin Apostolos postea quoque, & saltem eorum loco Evangelistas interdum excitarit Deus, & nostro tempore factum est; talibus enim, qui Ecclesiam ab Antichristi defectione reducerent, opus fuit: munus tamè ipsum nihilominus extraordinarium appello, quia in Ecclesiis ritè constitutis locum non habet.* Sed hoc miserum est perfugium: nam Ecclesia semel à Christo bene constituta non potest ruerè,

nec



neq. deficere ad Antichristum, cum non sit fundata super arenam, sed supra firmam petram, Matth. 16. quocirca non eget nouis Apostolis, & architectis.

Deinde, si Lutherus, & Calvinus noui Apostoli fuissent, venissent omnino cum signis, & miraculis Apostolorum, sic enim veri Christi Apostoli legationem suam probauerunt. Alioqui cur potius Lutherum recipimus, quam Manichæum? Calvinum, quàm Arium? Eodem enim modo omnes venerunt. Adde, quod primi Apostoli omnes per impositionem manuum ordinati fuerunt, Petrus quidem à Christo, 10 ceteri à Petro, vt Ioannes de Turrecremata ostendit lib. 2. cap. 32. & nos in 1. lib. de Pontifice, cap. 23. docuimus, dum S. Petri prarogatiuas enumeraremus.

CAPVT QVARTVM.

*Non esse populi. sed Episcoporum, vocare Ministros.*

**S**EQVITVR altera Propositio. *Vocatio seu missio Ministrorum non ad populum pertinet, sed ad Episcopos, & potissimum ad summum Pontificem.* De hac propositione satis multa dicta sunt in lib. de Pontifice, vbi demonstrauimus Ecclesiasticam iurisdictionem non esse in ipso cœtu fidelium, sed in capite, id est, in summo Pontifice, & ab eo ad Episcopos ceteros deriuari. Probatur igitur hæc propositio primū ex verbo Dei; legimus enim Petro collatam potestatem, Matth. 16. & Ioan. 21. *Tibi dabo claues. Et, pascue oues meas.* 30 Et rursum Apostulis Ioan. 20. *Ego mitto vos, & quorum remiseritis peccata, remittuntur eis.* Multitudini autem fidelium Christus auctor omnis Ecclesiasticæ iurisdictionis nihil vnquam tribuisse legitur.

Deinde idem hoc probatur ex Apostolica consuetudine. Nam Act. 14. Paulus & Barnabas Episcopi & Apostoli constituebant per ciuitates Presbyteros, & ad Tit. 1. *Huius rei gratia, inquit Apostolus, reliqui te Crete, vt constituas per ciuitates Presbyteros, sicut ego cōstitui tibi.* Et ipsi etiā Centuriatores Cent. 1. li. 2. c. 2. fatentur primos Episcopos post Apostolos ab Apostolis constitutos.

De-



Denique idem colligitur ex sequentibus. Demonstrari enim sumus paulò infra, electionem Ministrorum populo non convenire; ex quo certè sequitur maiori ratione, vocationem eidem populo non convenire. obiectiones aduersariorum omnes simul tum refellentur, cum de electione disputabitur.

## CAPVT QVINTVM.

10 *Electio nem Ministrorum non fieri à solo Deo.*

Is igitur de ordinatione, & vocatione præmissis, ad electionem, de qua præcipua quaestio est, veniamus. sitque hæc tertia Propositio. *Electio Ministrorum Ecclesie non fit à solo Deo.* Hæc propositio asseritur aduersus errores Ioannis VViclef, & Ioannis Huls, qui damnati sunt in Concilio Constantensi; nam sess. 8. damnatur hic articulus VViclef, qui est octauus: *Si Papa sit præscitus & malus, non habet potestatem super fideles.* Et rursus iste, qui est articulus 40. qui quæ ex octauo deducitur: *Electio Papa à Cardinalibus, per Diabolum est introducta.* Sess. autem 15. damnantur hi articuli Ioan. Huls, Articulus 12. *Papa vel Prælati malus, & præscitus, est æquiuocè Pastor.* Articulus 26. qui deducitur ex 22. *Non eo ipso quo electores, vel maior pars eorum consenserit vna voce secundum ritum hominum in personam aliquam, eo ipso illa persona est legitime electa. Unde siue electores bene vel malè elegerint, operibus electi debemus credere.* Hæc ille.

Refellitur iste error, ac sententia nostra comprobatur. 30 PRIMVM exemplo ipsius Dei, qui non semper eligit prædestinatos ad gubernacula politica, vel Ecclesiastica. Nam 1. Reg. 10. Saulem Deus elegit, qui tamen postea reprobis fuit. & Christus Ioan. 6. Iudam elegit, quem constat minimè prædestinatum fuisse: *Nonne, inquit, ego vos duodecim elegi, & vnus ex vobis Diabolus est?*

SECUNDO exemplis Apostolorum, qui Act. 6. elegerunt Diaconos, & inter eos Nicolaum, qui postea fuit hæresarcha. ex quo apparet, eos non laborasse in electione, essentne prædestinati, an reprobi, quos eligebant, cum satis intelligerent id sciri non posse.

TERTIO



TERTIO ex Patribus. ORIGENES hom. 4. in librum Iudicum docet, ac demonstrat, saepe diuinam prouidentiam ad puni-  
enda peccata populorum efficere, vt impij sedeant ad guber-  
naculum Regnorum, tum etiam Ecclesiarum. Chrysosto-  
mus autem homil. postrema in epist. ad Hebræos. Augusti-  
nus lib. 2. cap. 4. contra epistolam Parmeniani. & Bernardus  
serm. 66. in Cantica, docent, homines malos veros Episco-  
pos esse posse si legitimè eligantur. id quod etiam confirmat  
S. Bernardus ex testimonio illo Ioan. 11. de Caipha: *Cum esset*  
*pontifex anni illius prophetauit.* Fuit enim Caiphas, et si ini-  
quus & reprobus, verissimus Pontifex, cum eius dignitatis  
gratia Deus ei dederit, vt prophetaret.

QUARTO ratione. Si solus Deus eligeret Pastores Ec-  
clesiæ, aut id faceret sola sua voluntate, sine vlllo signo exte-  
rio & visibili, aut certè visibili aliquo signo; si primum affir-  
metur, quid nobis eiusmodi electio prodesset? nunquam  
enim sciremus quis Ecclesiæ esset Pastor; si secundum, aut  
signum illud esset prodigiosum, ac præter ordinem naturæ,  
vt columbæ descensus; aut celestis aliquis fulgor, aut certè  
loco signi accipiendæ essent sortes, quomodo Apostoli Actor. 1.  
cupientes S. Matthiam eligi à solo Deo, sortibus vsi sunt.  
At prodigia illa columbæ, & luminis rarissima esse solent;  
certè hoc tempore minimè ea videmus.

Sortibus autem vti, cum humano consilio res transigi po-  
test, nullo modo licet. Nam aut sortes existimantur guber-  
nari à casu, aut à cælo, aut à Diabolo, aut à Deo. Si à casu,  
stultum est homines ratione præditos velle sortibus eligere  
Pastores suos, & committere fortunæ temeritati, quod po-  
terant consilij maturitate definire: si à cælo, superstitionis  
virium est vti sortibus in eiusmodi electionibus. neque enim  
cælum vim habet moderandi liberas actiones, quales sunt  
iacere sortes, vel educere: si à Diabolo, impium & sacrilegū  
est, rerum sacrarum auctorem Diabolum facere: si denique  
à Deo, peccatum est tentationis Dei, expetere atque exspe-  
ctare à Deo, vt ipse sortes dirigat, quando neque ipse idē fa-  
cturum promissit, neque deest humanum consilium. Quo-  
circa Ecclesia rationem eligendi prælatos sortibus, meritò  
improbauit; capite Ecclesia, extra de Sortilegis. quam ra-  
tionem reprehendunt etiam Hieronymus in cap. 1. Ionæ, &  
Beda in cap. 1. Actor.



AT, INQVIES, Salomon Prouer. 16. asserit, sortes à Deo gubernari, cùm ait: *Sortes mittuntur in sinu, à Domino autem temperantur.* RESPONDEO, Salomonem dicere voluisse omnia gubernari à diuina prouidentia, etiam si nobis planè casu quodam fieri videantur, vt id quod sorte alicui contingit. Porro diuina prouidentia in sortibus cernitur, non quod semper qui sorte eligitur sit melior, sed quod siue melior siue peior sit, non sine Dei prouidentia eligatur; qualis prouidentia in omnibus aliis euentibus, quamuis maximè fortuitis, cernitur. Proinde non tollit ista communis prouidentia casum; neque facit vt melius sit sorte præpositos Ecclesiæ eligere, quàm suffragiis.

Neque his repugnat exemplum S. Matthiæ, qui sorte electus fuit. nam in primis non fuerunt fortasse illæ sortes propriè dictæ, sed cœleste aliquod lumen super Matthiam à Deo effusum, vt indicare videtur Dionysius Arcopagita de Ecclesiastica hierarchia, cap. 5. parte 3. Aut certè sortes illæ veræ, ac propriæ fuerunt, sed priuilegium, atque inspiratio Dei peculiaris causâ fuit, cur iis Apostoli vterentur. Quia enim Apostoli ceteri à Christo electi fuerant, ne videretur S. Matthias ceteris inferior, voluit fortasse idem Christus per se illum eligere. Itaque inspirauit Apostolis, vt sorte vterentur. Sed priuilegium, vt Hieronymus notauit in caput. 1. Ionnæ, non debet trahi in exemplum ordinariarum electionum. Aut postremò sine vlllo priuilegio sortibus Apostoli in ea electione vti voluerunt, quod Matthias & Barfabas adeo essent pares sanctitate, & doctrina, vt humano iudicio discerni non posset vter præponendus esset. In eiusmodi enim casibus licitus est sortium vsus, tum quia non tentatur Deus, cum id ab eo exquiratur, quod humano iudicio declarari nō potest, tum quia nullum est periculum, quicumque sorte exeat, etiam si planè casu exiret, quando pares sunt, de quibus præficiendis agitur, & tollitur materia querimoniarum, nullique fit iniuria.

Quapropter sortibus vtendum esse in eiusmodi casibus, docet S. Augustinus lib. 1. doctrinæ Christianæ, cap. 28. & in epist. 180. ad Honoratum. quomodo apud Iudæos ex multis sacerdotibus sorte eligebatur vnus, qui certo tempore thus Domino adoleret; vnde est illud Lucæ 1. *Sorte exiit, vt Zacharias incensum poneret, &c.* Atque ad hunc ritum respexisse Apo-



Apostolos in electione S. Matthiæ, testantur Ambrosius in caput I. Lucæ, & Beda in caput I. Actorum.

CAPVT SEXTVM.

Quarta Propositio.

**N**ON decessisse Christianos Sacerdotes carnali successione propagari. Confirmatur hæc sententia PRIMVM ex figura, quæ in lege naturæ præcessit; nam Melchisedech, secundum cuius ordinem Christus & Christiani sacerdotes esse dicuntur; idcirco sine patre, sine matre, sine genealogia fuisse describitur ad Hebræos 7. vt intelligeremus sacerdotes Christianos non debere nasci, sed fieri.

SECUNDO idem probatur ex prophetia Isaïæ 66. *Assumam, inquit Dominus, ex eis Sacerdotes & Levitas.* In quem locum obferuat S. Hieronymus, ideo dixisse Prophetam, assumam ex eis, quia in Testamento nouo, de quo apertissimè eo loco loquitur Isaïas, non erant Sacerdotes nascituri ex vna aliqua familia, sed assumendi ex omnibus Gentibus.

TERTIO idem probatur ex differentia Testamenti noui, ac veteris; vt enim in Testamento veteri populus Dei propagabatur per carnalem generationem ex Iacob, in nouo autem propagatur per spiritualem regenerationem ex Christo: ita quoque par erat vt in Testamento veteri Sacerdotes carnali successione propagarentur, in nouo autem spirituali electione assumerentur. Item, quemadmodum sacerdotium Aaronicum carnale fuit, quippe quod totum in bobus, & omnibus mactandis occupabatur, Christianum autem sacerdotium spirituale est, cum in hostia spirituali, ac diuina sacrificanda occupetur, sic etiam æquum erat, vt sacerdotum propagatio in Testamento veteri carnalis, in nouo spiritualis esset. Adde, quod illi vxores, & liberos habebant, proinde facile potuit illa ratio institui, vt parentibus filij succederent; nostri autem coelibes esse debent, præsertim secundum ritum Ecclesiæ purioris: quare non potest villo pacto fieri, vt sacerdotium Christianum successionem carnalis generationis consequatur.

QUARTO idem probatur naturali ratione, Christiani enim



enim Reipublicæ (quæ sanè perfectissima est) perfectissima ratio conuenit instituendi Ministros: At longè melior est ratio per electionem, quàm per generationem; nam si electio valeat, semper optimi & doctissimi Pastores præfici possunt Ecclesiis; si autem generatio locum habeat, cogemur non rarò pueros habere Episcopos, aut viros improbos, & imperitos.

Neque verò rectè obiici potest, etiam nunc eligi sæpe improbos, & imperitos, aut adolescentulos, ac penè pueros. id enim non accidit ex natura rei, sed vitio eligentium, quod facile emendari potest. At generatio naturaliter affert secum eiusmodi incommoda, quæ nullum omnino remedium admittunt. Maneat igitur, melius esse Pastores Ecclesia eligi, quàm nasci.

## CAPVT SEPTIMVM.

## Quinta Propositio.

**U**S eligendi summum Pontificem, ceterosq; Ecclesiæ Pastores, & Ministros, non conuenit populo iure diuino: Sed si quid aliquando in hac re populus potuit, id totum habuit ex conuenientia, vel concessione Pontificum. Hæc propositio propriè statuitur aduersus Lutheranos, & Caluinistas. & probatur PRIMO exemplo Aaronis, & testimonio D. Pauli. scribit enim Apostolus ad Hebr. 5. Neminem assumere sibi debere honorem, nisi vocetur à Deo, tanquam Aaron; atqui Aaron à solo Moysè fuit electus in Pontificem, sine vllò vel consensu, vel consilio multitudinis.

SECUNDO idem probatur exemplo, & verbo Christi; Christus enim Ioan. 20. Apostolis ait: *Sicut misit me Pater, & ego mitto Vos.* Quocirca voluit, vt ea potestate, eaque ratione Apostoli gubernarent Ecclesiam, qua ipse eam gubernauerat eo tempore, quo præsentiam suam mundo exhibuerat. At ipse Apostolos primùm duodecim, ac deinde discipulos septuaginta duos elegit, sine consilio, aut suffragio vllò multitudinis.



TERTIO ex iure diuino, tum naturali, tum etiam scripto; nam iure diuino scripto Episcopi sunt Pastores populi; populi sunt oues, Ioan. vlt. Actor. 20. r. Petri 5. Ratio autem naturalis apertissime docet, ouibus non conuenire, vt pascant, ac regant, sed regantur, atque pascantur. At eligere Pastores, ad gubernationem & regimen pertinere certissimum est; non igitur populo conuenit Pastores eligere.

Obiicies fortasse, quoddam in terrena Republica populi dicantur oues; reges, pastores, & tamen regis electio ad populum spectet. RESPONDEO, aliam esse rationem terrenam, aliam cœlestis, id est, Christianæ Reipublicæ. Nam in terrena Republica nascuntur omnes homines naturaliter liberi, & proinde potestatem politicam immediatè ipse populus habet, donec eam in regem aliquem non transtulerit. At Christiana Respublica nunquam habuit eiusmodi libertatem, siquidem cum ipsa natus est & Pastor ipsius; Christus enim simul Ecclesiam instituit, & Petrum ei præfecit. Deinde populus in terrena Republica tum solum potest regem eligere, cum rege caret; at Ecclesia nunquam rege caret, semper enim Christus uiuit, semper etiam sunt in Ecclesia Episcopi aliqui, qui Pastores nouos eligere & creare possunt.

QUARTO idem probatur exemplo Apostolorum, qui Episcopos passim eligeabant sine ullo suffragio multitudinis, vt vel ex eo constet, quod Episcopos à se creatos mittebant ad populos absentes, & infideles. Neque valet quidquam responsio KEMNITII, qui in examine Tridentini Concilij in disputatione de Sacramento ordinis scribit, Episcopos, quos Apostoli mittebant ad infideles, eligi solitos à plebe illius Ecclesiæ, vbi ordinabantur. Nam qui dicunt iure diuino pertinere electiones ad populum, eam rationem reddunt, ne populus accipiat Pastorem, quem neque nouit, neque cupit. Proinde volunt iure diuino pertinere ad populum Episcopi proprii, non alieni electionem. Deinde quo iure vnus populus Episcopum alterius populi eligere potest? Denique vnde probat Kemnitius, Episcopos, quos Apostoli mittebant, à populo eius Ecclesiæ electos fuisse, vbi ordinabantur?

QUINTO probatur eadem nostra conclusio ex Conciliorum veterum decretis, ac I. LAODICENVM Concilium can. 13. sic habet: *Non est permittendum turbis electionem eorū facere,*



qui sunt ad sacerdotium promouendi. Nec valet CALVINI responsio, qui canonem istum ita interpretatur, vt velit non excludi eo canone turbas ab electione, sed solum constitui vt non solæ turba eligant, sed intersint etiam seniores. Cum enim semper interfuerint seniores, nihil omnino Concilium statuisset, si vera esset Caluini interpretatio.

Ad hæc in Conc. Martini Papæ apud Martinum Bracarensem, cap. i. decretorum ita legimus: *Non licet populo electionem facere eorum, qui ad sacerdotium promouentur, sed in iudicio Episcoporum sit.* Item Concilium NICAENVM II. can. 3. sic habet: *Omnem electionem, qua fit à magistratibus, Episcopi, vel Presbyteri, vel Diaconi, irritam manere. Oportet enim eum, qui est promouendus ad Episcopatum, ab Episcopis eligi.*

Deniq; Concilium IV. CONSTANTINOPOLITANVM, quod est octauum generale can. 28. Sancta, inquit, & vniuersalis Synodus definit, neminem laicorum Principum, vel potentium semet inferere electioni, vel promotioni Patriarchæ, vel Metropolitani, aut cuiuslibet Episcopi, præsertim cum nullum in talibus potestatem, quemlibet potentium, & ceterorum laicorum habere conueniat, sed potius silere, ac attendere sibi, & quod regulariter à collegio Ecclesiæ suscipiat finem electio futuri Pontificis.

SEXTO idem probatur exemplis, seu testimoniis veterum, qui post Apostolos floruerunt. S. HIERONYMVS in epist. 85. ad Euagrium: *Alexandria, inquit, à Marco Evangelistâ & quæ ad Heraclum & Dionysium Episcopos Presbyteri, semper solum ex se electum, in excelsiori gradu collocatum, Episcopum nominabant.* Hæc ille, quo satis apertè docet, Alexandria antiquissimis temporibus Episcopos non à populo, sed à Presbyteris eligi solitos, RUFFINVS lib. 10. hist. cap. 9. scribit, Frumentium à S. Athanasio creatum Episcopum Indorum, Indis ipsis ea de re nihil neque scientibus, neque cogitantibus. EPIPHANVS in epistola ad Ioannem Episcopum Hierosolymæ scribit à se Paulinianum S. Hieronymi fratrem Presbyterum ordinatum, & directum ad monasterium, vt in eo fungeretur munere sacerdotali, cum tamen de ea re nihil ad se eiusdem monasterij fratres scripsissent. S. AVGVSTINVM Anglorum Apostolum B. Gregorius Episcopum designauit, atq; ab Arelatenfi Episcopo ordinari iussit, si Angli fidem reciperent, neque electionem, aut postulationem vllam Anglorum expectauit.

Vide



Vide Bedam lib. i. historiae Gentis suae. B. quoque Gregorius II. S. Bonifacium Germanis Episcopum ordinavit nihil ea de rescientibus, cogitantibusue Germanis. Vide ipsius vitam nuper editam. atque eiusmodi exempla plurima possent afferri.

SEPTIMO idem probatur ex incommodis, quae popularem electionem consequuntur. PRIMVM, populares imperiti sunt, nec possunt, etiamsi maxime velint, iudicare an aliquis sit idoneus sacerdotio nec ne. Valentinianus Augustus, ut refert Theodoretus lib. 4. hist. cap. 6. cum ad eum deferretur ab Episcopis electio Episcopi Mediolanensis, respondit: *Maiores est quam sit nobis conveniat, vos autem gratia divina praediti, et illius splendore fulgentes melius eligeatis.* Hae ille. At quanto magis id posset ac deberet dicere imperita multitudo, si sciret? Quo pacto enim, quæso, iudicabunt mercatores, agricola, camentarii, ceterique opifices, num quis habeat eruditionem, & prudentiam Episcopo necessariam?

DEINDE, si populus ius habeat eligendi, necesse erit, ut semper ij praeficiantur quos praefici cupient peiores, & stultiore; nam maior pars vincet, plures autem sunt in qualibet ciuitate mali, quam boni; plures stulti, quam sapientes. Quare S. Chrysostomus lib. 3. de sacerdotio grauiter queritur, quod suo tempore Episcoporum electiones in manu populi essent, ac dicit non esse mirandum, si pessimi quique praeficiantur, & optimi viri interim negligantur, cum eorum sit eligere, qui nihil norunt nisi de rebus temporalibus iudicare.

DEINQUE, electio popularis obnoxia est tumultibus, ac seditionibus; ut S. Augustinus dicit in epist. 110. & 225. ubi refert historiam turbulentissimae commotionis popularis in electione Piniani; Ruffinus quoque lib. 11. hist. cap. 11. narrans dissensionem populi Mediolanensis in Episcopo designando: *Dissensio, inquit, grauis, & periculosa urbi propria maturum parabat exitum.* Sed insignis contentio praeter ceteras fuit in electione S. Damasi; tanto enim ardore animi partes concurrerunt, ut in quodam templo C. XXXVII. homines necarentur, ut scribunt Ammianus Marcell. lib. 27. Hier. in Chronico, & Ruffin. lib. 11. hist. cap. 10.

At, inquit Caluinus, si tam est incommoda haec ratio eligendi, cur eam veteres patiebantur? Quod ergo eam non tollerent medio, argumento est non potuisse tolli, propterea quod esset iure diuino constituta.



RESPONDEO, eam rationem eligendi ad suffragia populi, paulatim in Ecclesiam irrepsisse, proinde debuiffe etiam paulatim sua interque de medio tolli; initio enim, hoc est, Apostolicis temporibus, insciente populo, Pastores eligebantur. deinde cœpit populus adhiberi ad testimonium dandum de vita & moribus eligendi. Vnde est illud Terruliani in Apolog. cap. 39. *Præsumt probati quique seniores, honorem non precio sed testimonio adepti.* Tum ut populi magis diligerent suos Episcopos, cœpti sunt ij tantum ordinari, quos populus postulasset. Vnde est illud S. LEONIS in ep. 87. vel 89. *Expectarentur vot acinuum, testimonia populorum, honorum arbitrium, electio Clericorum, quæ in sacerdotum solent ordinationibus ab his, qui norunt Patrum regulas, custodiri.* Vbi S. Leo populis tribuit vota, id est, desideria, & testimonia, Clericis autem electionem.

Tandem obtinuit in quibusdam locis consuetudo, ut etiam ius suffragij sibi populus usurparet, ut intelligi potest ex lib. 3. Chrysostomi de sacerdotio. Sed posteaquam hoc aliquandiu toleratum est, & apparuit eius rei confusio, & indignitas, tum etiam paulatim sublata est populo electio, & postulatio, solumque relictum est testimonium vitæ & morum. Nam etiam nunc ordinantur Episcopi & Presbyteri coram populo, & Episcopus, qui ordines collaturus est, per Diaconum populū alloquitur, ac petit, ut si quis est, qui aliquid habeat aduersus ordinandos, accedat, & dicat. Superest argumenta soluere.

Matthias ILLYRICVS in lib. de electione Episcoporum collegit omnia fermè argumenta, quæ à Luthero, Brentio, Caluino, & aliis excogitata fuerant. Sex autem primo loco ex verbo Dei argumenta depromit. PRIMVM eiusmodi est; Claues regni cœlorum non soli Papæ, aut Episcopis, sed toti Ecclesiæ datæ sunt. Nam quod dicitur Matth. 16. *Tibi dabo claves, &c.* S. Augustinus tract. 124. in Ioan. interpretatur dictum esse Petro, ut is personam gerebat Ecclesiæ. Præterea Matth. 18. toti multitudini dicitur: *Quacumque alligaueritis super terram, &c.* Illis enim hoc dicitur, quibus dicitur paulò antè: *Si peccauerit in te frater tuus, vade corripe eum, &c.* At nomine clauium significatur omnis potestas Ecclesiastica, igitur tota multitudo fidelium potestatem habet à Christo eligendi, & vocandi, atque etiam ordinandi Ministros.

RESPON-



RESPONDEO, de hoc argumento multa diximus in l. lib. de Pōtifice, idcirco paucis hoc loco rem totam expediemus. Igitur verba illa Matth. 16. *Tibi dabo claves*, sententiæ nostræ manifestè fauent, neque illi repugnat S. Augustini interpretatio. Nam propterea S. Augustinus dicit, Apostolum Petrum in persona totius Ecclesiæ accepisse claves, quia in totius Ecclesiæ commodum & vtilitatem eas accepit, & etiam quia non ipse solus illis vsurus erat, sed transmissurus ad successores, & communicaturus cum aliis omnibus Episcopis & Presbyteris.

10

In altero autem loco: *Quaecumq; alligaueritis, &c.* promittitur Ecclesiæ potestas ligandi & soluendi, sed quæ in Prælatis sit, non in reliqua multitudo. Verè enim dicitur Ecclesiæ soluere & ligare, quia Prælati eius soluunt & ligant, quemadmodum dicitur homo loqui & videre, licet non nisi lingua loquatur, & oculis videat. Id autem ita esse, ex ipso illo loco deducitur; nam posteaquam iusserat, vt qui correptione fraterna, adhibitis etiam duobus aut tribus testibus, non moueretur, deferretur ad Ecclesiam, & ne quis Ecclesiæ tribunal contemnendum putaret, adiecit eam promissionem: *Quaecumque alligaueritis, &c.* quare illi Ecclesiæ dicitur: *Quaecumque alligaueritis*, de qua dictum est: *Dic Ecclesiæ.*

20

Illud autem: *Dic Ecclesiæ*, exponitur à Chrysostomo in commentario eius loci, ac si dictum esset; *Dic Prælato Ecclesiæ*; ceteri quoque Doctores per Ecclesiam eo loco positam, intelligunt Prælatum, aut Concilium Prælatorum. & vsus Ecclesiæ idem confirmat; semper enim qui ad Ecclesiam deferuntur, ad Episcopum aut Concilium deferuntur.

SECUNDVM argumentum tale est; Imperat Dominus, Ioan. 10. vt non audiamus vocem alienorum. Et rursus Matth. 7. vt fugiamus falsos Prophetas; & Apostolus ad Gal. 1. iubet anathematizari eos, qui docent aliquid præter Euangelium: Igitur populus Christianus diuinum habet mandatum, quo tenetur bonos Pastores quærere, & vocare, & perniciosos reiicere.

RESPONDEO, populum debere quidem discernere verum à falso Propheta, sed non alia regula, quàm diligenter attendendo, an is, qui prædicat, dicat contraria iis, quæ dicebantur à prædecessoribus, vel iis, quæ dicuntur ab aliis ordinariis Pastoribus, & præsertim ab Apostolica sede, & Ec-



clesia principali; nam imperatum est populo, vt audiat Pastores suos, Luc. 10. *Qui vos audit, me audit.* Et Matth. 23. *Qua dicunt, facite.* Non igitur debet populus iudicare suū Pastorem, nisi noua audiat, & à doctrina aliorum Pastorum aliena.

PRÆTEREA, hoc est quod Paulus monet ad Galat. 1. vt anathematizemus, qui docent noua, & contraria iis, quæ antea euangelizata sunt. Adde, quod populus cum sit rudis, non potest aliter iudicare de doctrina Pastoris. si enim per se posset iudicare, non egeret prædicatoribus: ex quo deducitur, debuisse hominibus huius temporis suspectam esse doctrinam Lutheri, Caluini, & similium, qui per se veniebant, & prædicabant noua & pugnantia cum doctrina omnium Pastorum Ecclesiæ. Nam cum Pastor ordinarius, & aliquis alius, qui prædicat non vocatus, contraria docent, debet omnino populus Pastorem suum potius sequi, quam illum alterum, qui non est Pastor, etiam si fortè contingeret, vt Pastor erraret. Nam cum ipse populus non possit de ea re iudicare, cur non potius credet illi, cui iussus est obedire? Quanquam non est credibile, Deum permissurum, vt ordinarius Pastor ita erret, vt decipiat simplicem populum; facile enim appareret, an doceat contraria ceteris Pastoribus.

Observandum est præterea, populum posse quidem ea regula, quam posuimus, internoscere verum Prophetam à falso, sed non propterea posse falsum Pastorem, si is sit Episcopus, deponere, & alium eius loco substituere. Nam Dominus & Apostolus tantum iubent, vt falsi Prophetæ non audiantur à populo: non autem vt populus eos deponat. & certè vsus Ecclesiæ semper hoc habuit, vt hæretici Episcopi à Conciliis Episcoporum, vel à summis Pontificibus deponerentur. Ex his secundum argumentum manet solutum.

TERTIUM argumentum est hoc. Episcopi non sunt Domini, sed Ministri Ecclesiæ, 1. Cor. 3. & 1. Petr. 5. Et præterea, Ecclesia est columna & firmamentum veritatis, 1. Timoth. 3. Igitur summum tribunal est penes Ecclesiam, non penes Episcopos, proinde ipsa potest eligere & vocare Ministros.

RESPONDEO, Episcopos esse Ministros Ecclesiæ, quia pro ea laborant, non illi obediendo, sed eam regendo, ei que præsidendo, vt alias diximus. Duplex enim est genus Ministrorum, cum alij seruiant obediendo, vt mancipia; alij imperando, vt pædagogi, & omnis magistratus; porro Episco-



pos servire populis regendo & imperando, pater A<sup>ctor</sup>. 20. & ad Hebr. 13. Est autem Ecclesia columna veritatis, quia semper audit Petrum, pro quo Dominus oravit, ne deficeret fides eius.

Argumentum Q<sup>UARTVM</sup> sumunt ex A<sup>ctor</sup>. 1. vbi non soli Apostoli, sed tota Ecclesia elegit Matthiam & Barsabam, ut ex eis Deus vnum assumeret.

RESPONDEO cum Chrysostomo in hunc locum, id factum esse ex concessione Petri, non ex necessitate: Quid, inquit CHRYSOSTOMVS, an non licebat ipsi Petro eligere? licebat, & quidem maxime; Verum id non fecit, ne cui videretur gratificari. Præterea illa non tam electio fuit, quam postulatio quadam, qua cupiuerunt à Deo aliquem eligi in locum Iudæ. Denique, ab exemplo vno non deducitur aliquid esse de iure diuino. nos quidem efficaciter probamus, non esse de iure diuino, ut populus eligat; quando exemplis ostendimus, aliquando sine populi suffragio Episcopos fuisse electos, quia non potest rectè fieri contra ius diuinum. At non efficaciter probamus esse de iure diuino id omne, quod aliquando factum legimus.

Argumentum Q<sup>UINTVM</sup> ex A<sup>ctor</sup>. 6. vbi de multitudinem credentium dicitur: Et elegerunt Stephanum, &c.

Respondeo P<sup>PRIMO</sup>, ab hoc exemplo non probari, id esse de iure diuino. S<sup>ECUNDO</sup> dico, id etiam esse tributum populo ex concessione Apostolorum, ut Lucas ipse aperte testatur. T<sup>ERTIO</sup> dico, locum hunc non esse ad propositum: Nos enim agimus de electione Pastorum, qui præficiuntur Ecclesiæ regendæ; isti autem Diaconi erant præficiendi mensis.

Argumentum S<sup>EXTVM</sup> A<sup>ctor</sup>. 14. Et cum construxissent illis per singulas ciuitates Presbyteros, verbum Græcum Χειροτονῶντες, significat, cum elegissent per suffragia. Nam Χειροτονέω, est quasi χεῖρας τένω, id est, manus tendo, seu attollo in signum suffragij; ut enim constat ex M. T. in oratione pro Flacco, signum suffragij apud Græcos erat, attollere manus. Cum ergo Paulus & Barnabas elegerint Episcopos ad suffragia populi, manifestum est, eos præfuisse quidem electioni, sed non solos elegisse.

RESPONDEO ad hoc argumentum, quod est præcipuum fundamentum Illyrici, Caluini, Kemniti, & aliorum, verbum



bum  $\chi\epsilon\rho\omicron\tau\omicron\nu\epsilon$   $\omega$  tria significare posse. PRIMO, eligere per suffragia, ut ratio ipsa etymologia docet, & usus etiam prophanorum auctorum.

SECUNDO, eligere ac decernere quocunque id fiat modo: Nam etiam si etymologia ab extensione manuum sumpta sit, tamen deriuatur postea verbum ad omnem electionem & sanctionem, ut multis aliis verbis accidit. Nam ACT. I. Lucas dicit: *Cecidit fors super Matthiam, & annumeratus est cum undecim Apostolis.* Græcè est  $\kappa\epsilon\iota\ \sigma\upsilon\gamma\lambda\omicron\tau\epsilon\ \iota\eta\phi\iota\ \omega\eta$ , id est, suffragiis additus est. Nam  $\iota\eta\phi\iota\ \zeta\epsilon\omega\zeta$  est dare suffragium, &  $\iota\eta\phi\iota\omicron\mu\alpha$  est ipsum suffragium, & tamen B. Mathias non suffragiis, sed sorte electus est. Itaque  $\iota\eta\phi\iota\ \zeta\epsilon\omega\zeta$  eo loco accipitur pro cooptare, quocunque modo id fiat. Et ACT. IO. *Dedit eum manifestum fieri non omni populo, sed testibus præordinatis à Deo.* Græcè,  $\alpha\ \mu\acute{\alpha}\ \mu\acute{\alpha}\rho\tau\upsilon\rho\iota\ \tau\omicron\iota\varsigma\ \pi\rho\omicron\kappa\epsilon\iota\ \chi\epsilon\rho\omicron\tau\omicron\nu\mu\epsilon\iota\ \nu\omicron\iota\varsigma\ \alpha\pi\ \tau\omicron\varsigma\ \theta\epsilon\omicron\varsigma$ . Nec tamen Deus suffragiis elegit, quibus ostenderet Christum rediniuium.

TERTIO, significat apud Ecclesiasticos, ordinare per manuum impositionem. Nam Chrysostomus hom. 14. in ACTA, exponens illud: *Et cum orassent, imposuerunt illis manus.* Sic ait:  $\tau\omicron\varsigma\ \tau\omega\ \gamma\alpha\rho\ \delta\epsilon\iota\ \chi\epsilon\rho\omicron\tau\omicron\nu\iota\alpha$ . Et hom. 10. in 1. Timoth. quaerit, cur Apostolus, cum præcepit de Episcopis, transit ad Diaconos, omisissis Presbyteris. & respondet, quia Episcopi & Presbyteri sunt iidem, nisi quod Episcopi ordinant, Presbyteri non ordinant.  $\tau\eta\mu\ \gamma\alpha\rho\ \chi\epsilon\rho\omicron\tau\omicron\nu\iota\alpha\ \mu\acute{\omicron}\nu\eta\mu\ \alpha\ \nu\alpha\beta\epsilon\beta\eta\ \kappa\alpha\iota\ \iota$ . Eodem modo Concilium Nicænum in epistola ad Alexandrinos apud Theodoretum lib. 1. hist. cap. 9. utitur voce

14.  $\chi\epsilon\rho\omicron\tau\omicron\nu\iota\alpha\ \alpha\ \nu\tau\epsilon\varsigma$ , secundo modo, vel tertio, argumentum solutum est; si autem accipiamus primo modo, tunc notandum est,  $\chi\epsilon\rho\omicron\tau\omicron\nu\epsilon\mu$ , non significare eligere per suffragia ab aliis data, sed eligere proprio suffragio, ut patet ex etymologia, & ex usu auctorum. Nam Demosthenes in oratione contra Timocratem, tribuit populo  $\chi\epsilon\rho\omicron\tau\omicron\nu\epsilon\mu$ . Sic enim ait:  $\acute{\omicron}\ \delta\eta\mu\omicron\theta\ \tau\alpha\varsigma\ \epsilon\mu\acute{\alpha}\varsigma\ \gamma\acute{\nu}\omega\mu\alpha\varsigma\ \pi\epsilon\rho\iota\ \sigma\omega\tau\eta\rho\iota\alpha\varsigma\ \tau\eta\varsigma\ \pi\acute{\omicron}\lambda\epsilon\omega\varsigma\ \epsilon\ \chi\epsilon\rho\omicron\tau\omicron\nu\epsilon\iota$ . Similiter Cicero in oratione pro Flacco, de populo dicit; Porrexerunt manus, pfephisma natum est.

Cùm



Cum ergo Lucas dicit de Paulo & Barnaba, *χειροτονήσαντες δὲ αὐτοὺς πρεσβυτέρους κατὰ ἐκκλησίαν*, non vult dicere, Paulum & Barnabam ad suffragia populi creasse Episcopos, sed ad suffragia propria tantum, nisi velint aduersarij illud, *χειροτονήσαντες* referri ad populum, repugnante tota sententia Scripturæ. Nam de quibus dicitur; cum constituerent Presbyteros, de iisdem dicitur: *Commendauerunt illos Deo, in quem crediderant*; quæ sine controuersia ad Apostolos tantum referuntur.

Argumentum SEPTIMUM sumunt Lutherus, Calvinus, Kemnitius, & Illyricus ex Cypriano, qui lib. I. epist. 4. sic ait: *Propter quod plebs obsequens præceptis Dominicis, & Deum metuens, a peccatore præposito separare se debet, nec ad sacrilegi Sacerdotis sacrificia miscere, quando ipsa maximè habeat potestatem, & eligendi dignos Sacerdotes, & indignos recusandi, quod & ipsum videmus de diuina auctoritate descendere, & Sacerdos, plebe præsentē, sub omnium oculis deligatur, & dignus atq; idoneus publico iudicio ac testimonio comprobetur, &c.*

RESPONDEO dupliciter. PRIMO, Cyprianum non velle dicere, descendere ex iure diuino, vt Episcopus à populo eligatur, sed ab exemplis diuinis, vt patet ex sequentibus. Nam probare volens, hoc descendere de diuina auctoritate, probat solum tribus exemplis Scripturarum; quia nimirum Eleazarus, Num. 20. coram populo ordinatus est, & similiter Matthias, Actor. 1. & septem Diaconi, Actor. 6. At exempla Scripturarum non faciunt, rem esse de iure diuino, sed præcepta Dei sunt, quæ hoc faciunt.

SECUNDO dico, Cyprianum hoc loco nihil tribuere populo circa electiones Sacerdotum, nisi vt ferat testimonium de vita & moribus ordinandorum, quod etiam nunc seruatur in Ecclesia Catholica. Dicit autem Cyprianus, populum habere potestatem eligendi, & suffragium ferendi, quia potest dicere, si quid nouerit boni vel mali de ordinando, & sic testimonio suo efficere, vt eligatur, vel non eligatur. Itaque habet populus secundum Cypriani sententiam, potestatem eligendi & suffragandi per testimonium, non per calculum, more testis non iudicis. id quod ex eodem loco perspicuum fieri potest; dicit enim debere in Ecclesia eligi Episcopum, quomodo Scriptura docet. fuisse electum Eleazarum. At

Scriptura



Scriptura Num. 20. dicit, Eleazarum electum à Mose, & nihil tribuit populo, nisi coram eo fuisse Eleazarum electum; & Cyprianus explicans hoc, ait: *Coram omni Synagoga iubet Deus constitui Sacerdotem, id est, instruit, & ostendit ordinationes sacerdotales, non nisi sub populi assistentis conscientia fieri oportere, ut plebe presente, vel detegantur malorum crimina, vel bonorum merita prædicentur.* Et infra: *Propter quod diligenter de traditione diuina & Apostolica obseruatione seruandus est, & tenendum, quod apud nos quoque, & fere per prouincias vniuersas tenetur, ut ad ordinationes rite celebrandas ad eam plebem, cui Præpositus ordinatur, Episcopi eiusdem prouincie proximi quisque conueniant, & Episcopus deligatur, plebe presente, quæ singulorum vram plenissime nouit, & vniuscuiusque actum de eius conuersatione perspexit.*

Argumentum OCTAVVM sumit Illyricus ex Nicæno Concilio; nam in epistola eiusdem Concilij ad Alexandrinos, apud Theod. li. I. c. 9. hist. habentur hæc verba: *Dignum est, vos potestatem habere, & eligendi quemlibet, & nomina eorum dandi, qui Clero sunt digni, & absolute facere omnia secundum leges & sanctiones Ecclesiæ: si quæ verò contigerit requiescere in Ecclesiâ, tunc prouehi in honorem defuncti eos, qui nuper assumpti sunt, solummodo si videantur digni, & populus eos elegerit, condecernente simul & designante maxime Alexandrina ciuitatis Episcopo.*

RESPONDEO, ex hoc testimonio nihil aliud colligi posse, nisi iam tum cœpisse consuetudinem, ut populus electioni admisceretur, quod nos minimè negamus. Non autem inde colligitur, id esse de iure diuino, quod aduersariis erat probandum. Sed NOTANDA est hoc loco duplex fraus Illyrici. Nam Concilium Nicænum initio huius testimonij ab Illyrico citati, non loquitur de plebe, sed de Episcopis, atque illos dicit habere debere potestatem eligendi, & omnia faciendi secundum Ecclesiæ sanctiones: Illyricus autem sic peruertit, & immutauit verba, ut videatur Concilium tribuere plebi omnem potestatem gubernandi Ecclesiâ; deinde ad finem eius testimonij Concilium dicit debere eligi Episcopum à populo, sed confirmari electionem ab Episcopo Alexandrino (nam de Episcopis Ægypti agitur) & proinde tribuit Concilium præcipuam auctoritatem Episcopo in electionibus: Illyricus autem immutauit verba, ut videretur Episcopus nihil amplius posse, quàm populus. vide totum locum.



Argumentum NONVM Illyrici, Caluini, & Kemnitij, sumitur ex epistola Concilij II. generalis ad Damas. quam recitat Theod. lib. 5. hist. c. 9. vbi sic legimus: *Reuerendissimum & Deo amabilem Nectarium Episcopum ordinauimus coram vniuersali Concilio cum omni concordia, sub aspectu etiam Deo amabilis Imperatoris Theodosij, vniuersiq; Cleri, cuncta decernente pariter ciuitate.* Similia profert Caluinus ex Leone epistol. 89. & Gregorio lib. 2. epistol. c. 69. Addit Kemnitius vnum testimonium ex Ambrosio lib. 10. epistol. 82. & alia, quæ non ex fontibus citat, sed ex decreto Gratiani, d. 23. 24. 62. 63. 65. 67. & 8. q. 1. can. Licet. multa etiam eiusdem generis citat Illyricus in suo libro de electione Episcoporum.

RESPONDEO PRIMO, ex nullo horum testimoniorum colligi, esse de iure diuino, vt populus eligat. SECUNDO, in his omnibus, vno vel altero exceptis, nullam fieri mentionem electionis, sed solum postulationis vel testimonij. TERTIO, nos non negare, quin aliquando populus elegerit, sicut etiam nunc in quibusdam locis eligunt Reges, sed id iuris habere eos, vel habuisse ex concessione Pontificum, non ex iure diuino. Ex quibus apparet, quam splendide mentiatur Caluinus lib. 4. Instit. c. 5. §. 2. cum dicit, ritum eligendi Episcopos sine suffragio populi pugnare cum verbo Dei, & cum multis Conciliorum decretis, quæ statuerunt, irritam esse electionem si aliter fiat. Nam nec vllum verbum Dei attulit, nec vllum Concilij decretum, nec vllum afferri potest, in quo habeatur quod ipse dicit.

Argumentum DECIMUM Illyrici, sumitur à consuetudine Ecclesiæ. Dicit enim, fuisse vsum istum in Ecclesia per annos ferè M. CCC. & solum à tempore Friderici II. qui obiit anno M. CCC. L. introductum, vt Laici excluderentur ab electione. Probat autem, quod tam diu durauerit consuetudo eligendi ad suffragia populi, ex Gregorio IX. qui sedit tempore Friderici. Exstat enim in decretalibus epistolis à Gregorio IX. editis, tit. de electione, cap. Messana, mentio huius rei; nec non in epistola eiusdem Gregorij ad Episcopum Bremensem, apud Krantzium lib. 8. Metropolis, cap. 3. Denique ita concludit Illyricus hoc argumentum. Quare nullum prorsus est dubium, quin electio ante annos CCC. & deinceps quoque aliquandiu à Laicis citra omnem controuersiam sit factitata.



RESPONDEO, Illyricum egregiè mentiri. Nam in primis, Apostolorum tempore, & deinceps multis annis nihil potuit in electionibus populus, nisi testimonium vitæ dare, vt ex suprâ dictis patet; deinde consequentibus seculis irrepsit plebs ad suffragia, sed nec tam lōgo tempore, nec citra controuerſiam, vt Illyricus dicit. Nam Gregorius IX. in epistola citata ad Bremensem Episcopum clarissimè dicit, Canonico-  
rum fuisse electionem, licet accesserint etiam vota, id est, desideria & postulationes populi.

10 PORRO caput Messana, est contra ipsum Illyricum; nam illud caput non est Gregorij IX. vt Illyricus falsò dicit, sed Honorij II. Gregorio antiquioris, & in eo capite prohibetur seuerissimè, ne Laici eligant: *Edicto*, inquit Honorij, *perpetuo prohibemus, ne per Laicos cum Canonicis Pontificis electio presumatur, quod si fortè presumpsa fuerit, nullam obtineat firmitatem, non obstante contraria consuetudine, qua dici debet potius corruptela.* Hæc ille. Non igitur citra controuerſiam Laici ante annos trecentos eligebant. PRÆTEREA, electio Alexandri III. ante annos C D. per solos Cardinales facta  
20 est, vt cognosci potest ex Radeuico lib. 2. de rebus gestis Frederici I. cap. 50. & sequentibus. Item electio Gregorij VII. ante annos quingentos, per solos Cardinales facta est, vt patet ex decreto electionis illius apud Platinam. DENIQUE, quomodo citra controuerſiam vsq; ad annum M. C C. Laici elegerunt? cū, vt suprâ citauimus, Concilium octauum ante annos D C C. & Concilium septimum ante annos D C C C. & Concilium Martini Papæ ante annos D C C C C. & Concilium Laodicensem ante annos M. C C. interdixerint, ne Laici eligant.

30 Argumentum VNDECIMUM est eiusdem Illyrici, qui politicas rationes quasdā profert, sed ineptissimas, qualis illa est, quòd Canonici & Monachi ferè semper eligant Episcopos, aut Abbates Papistas, rarò aut nunquam Lutheranos. scilicet, valde expediret Ecclesiis & Monasteriis, vt ab iis gubernarentur, qui nihil oderunt magis, quàm Clericos & Monachos. Addit etiam, valde esse incommodum, quòd cū Episcopi & Abbates Germaniæ sint etiam Principes temporales, à sex tantum aut octo interdum hominibus eligantur; quasi Imperator non sit Princeps longè maior, qui tamen à sex tantum aut septem Electoribus creatur.



CAPVT OCTAVVM.

Sexta Propositio.

**L**ECTIO Episcoporum non pertinet iure diuino ad Clerum, sed ad summum Pontificem, ut vel ipse eligat, vel praescribat eligendi modum.

Probatur PRIMO, quoniam ex Euangelio nihil aliud habemus, nisi Ecclesiam vniuersam S. Petro esse commissam, Ioan. vlt. Itaque ad illum pertinet, providere Christianis de iis, qui curam eorum gerant. DEINDE, si ad Clerum pertineret electio iure diuino, ad totum Clerum pertineret. Non enim ius diuinum definiuit, ut hi potius, quam illi ex Clericis eligant, at non omnibus Clericis conuenire electionem, satis probatur ex eo, quod eadem ferè incommoda acciderent ob multitudinem Clericorum, quæ accidebant in electione populari. Quocirca multis iam seculis soli Clerici primarij eligunt, quod tamen fieri non potuisset, si iure diuino omnes Clerici electores fuissent. DENIQUE, S. Petrus, qui ius diuinum certè non ignorabat, non solum in Ecclesia Romana successorem sibi delegit Clementem, neque expectauit, ut is à Clericis eligeretur, sed etiam ad plurimas prouincias Episcopos misit. Vide Damasum in Pontificali, Innocentium I. in epistola ad Decentium, & Ioannem III. in epistola ad Germanos. Vide etiam de tota Caietanum de potestate Papæ & Concilij, cap. 13.

CAPVT NONVM.

Septima Propositio.

**R**ATIO eligendi summum Pontificem per solos Cardinales, est omnium optima, & merito conseruanda, etsi absolute posset Pontifex eam mutare, si vellet.

Secunda pars est euident, quia de iure positum est, ut Cardinales eligant. Probatur prima pars huius conclusionis; PRIMO, inductione. Non debet Pontifex creari per sortes,



nec per carnalem successionem, nec per solius prædecessoris nominationem, nec ad suffragia populi, nec ad suffragia totius Cleri, ut iam probatum est; ergo ad suffragia primorum ex Clero: Tales sunt Cardinales, sunt enim præcipui Episcopi, Presbyteri, & Diaconi Romanæ Ecclesiæ.

SECUNDO, nulli melius iudicare possunt, qualis debeat esse Episcopus eligendus, quam ij, qui sunt Episcopi Consiliarii, & cum eo Ecclesiam regunt, & optimè norunt Ecclesiastica negotia; tales sunt Cardinales, igitur ad eos rectissime  
10 mē pertinebit electio.

TERTIO, ex duratione; nulla enim forma electionis diu durare potuit, præter istam per solos Cardinales. Constat enim ab anno M. C. LXXIX. vsq; ad hoc tempus per annos CD. semper electos Pontifices à duabus partibus Cardinalium iuxta decretum Alexandri III. promulgatum in Concilio Lateranensi, ut habemus cap. Licet, extra de electione; nec tamen tunc cœpit electio fieri per solos Cardinales, sed diu antea videtur incœpisse. Nam in illo cap. Licet, Alexander III. apertè indicat, iam antè cœpisse morem istum, ut soli  
20 Cardinales eligerent, & solum se constituere, ut non sufficiat maior pars Cardinalium, sed requirantur duæ partes. Porro ante hoc tempus per M. C. annos, XVII. mutationes inveniuntur in electione Romani Pontificis, ut quidam annotarunt.

QUARTO probatur experientia, quia nunquam fuerunt pauciora schismata, quàm hoc tempore. Annotavit Onuph. in libro de Pontificibus Romanis, schismata XXIX. in Ecclesia Romana, ex quibus XXVI. fuerunt vsque ad Alexandrum; toto reliquo tempore solum tria, ex quibus etiam tribus  
30 vnum solum accidit vitio Cardinalium, nimirum illud, quod factum est tempore Urbani VI. Nam illud alterum, quod accidit tempore Ioannis XXII. ab Imperatore Ludouico IV. excitatum est; postremum verò temporibus Eugenij à Concilio Basileensi.

QUINTO probatur; nam hæc forma eligendi temperata est ex omnibus aliis bonis & legitimis formis; sciendum est enim quinque modis præcipue consuevisse eligi Episcopos. PRIMVS modus fuit, ut ipse summus Pontifex per se eligeret, qui modus præsertim seruabatur olim in nouis Episcopopatibus erigendis, nouisque Episcopis mittendis.



**SECUNDVS** modus fuit, vt Episcopum eligerent Episcopi eiusdem prouinciæ, vel maior eorum pars, postulato tamen testimonio, & consensu Cleri & populi eius loci, cui Episcopus dabatur: & eodem modo eligebantur Metropolitanæ, & Patriarchæ, & ipse summus Pontifex nimirum ab Episcopis vicinis, seu prouincialibus. & hic modus antiquissimus fuit, & durauit satis diu. De hoc modo loquitur Cyprianus lib. I. epistol. 4. *Apud nos, inquit, & ferè per vniuersas prouincias tenetur, & ad ordinationes rite celebrandas, ad eam plebem, cui Præpositus ordinatur, Episcopi eiusdem prouinciæ proximi quique conueniant, & Episcopus deligatur plebe præsentis, qua singulorum vitam plenissime nouit, & vniuersusque actum de eius conuersatione perspexit.* Idem lib. 4. epistol. 2. testatur, Cornelium Papam electum fuisse à plurimis Episcopis, de testimonio & suffragiis totius Cleri & populi. De eodem modo legimus in Concilio Nicæno can. 4. Episcopum debere constitui ab omnibus Episcopis prouinciæ, & si id fieri nequit, saltem per literas debere haberi consensum absentium omnium, vel maioris partis, vt exponit can. 6. eiusdem Concilij. Idem habetur in Concilio Antiocheno can. 19. & in decretis collectis à Martino Bracar. cap. 3.

**TERTIVS** modus fuit, vt eligeret Clerus & populus ciuitatis. Hic modus fuit in vsu tempore Chrysostomi, Ambrosij, Augustini, Leonis, Gregorij, vt patet ex locis suprà citatis.

**QUARTVS** modus fuit, vt Imperatores & Reges, vel soli, vel cum Clero & populo eligerent. Constat enim, Iustinianum Seniore post recuperatam Italiam, noluisse quenquam creari Romanum Pontificem, sine sua approbatione, quod seruatum est vsque ad Constantinum I V. qui iuri suorum prædecessorum in hac parte cessit, vt ex Platina, & aliis cognosci potest. Constat item, Carolo Magno ius eligendi Romanum Pontificem & alios Episcopos concessum ab Adriano I. & deinde simile ius concessum Othoni à Leone VIII. vt patet ex Gratiano d. 63. can. Adrianus, & can. in Synodo.

**QVINTVS** modus fuit, vt soli Canonici, id est, primarij Clerici Episcopum eligerent, qui modus seruatur à longo tempore in multis Germaniæ locis.

Ex his quinque formis **PRIMA** non potest reperiri in electione summi Pontificis, quia non expedit, vt prædecessor



eligat successorem: reperitur tamen aliquo modo, quatenus hæc forma electionis ab ipsius Pontificis decreto manauit. SECUNDA reperitur in hac forma, quantum ad id, quod erat in ea præcipuum; nam eligunt nunc Episcopi vicini, ut tunc eligeant, nimirum sex Episcopi Cardinales. TERTIA non reperitur, quia erat omnium maximè incommoda, ut supra ostendimus. QUARTA non reperitur etiam, quia quoddam Imperatores se miscuerint electioni, factum est vel vi, & quasi tyrannide Imperatorum, ut quando Græci Imperatores nolebant creari Pontificem sine suo iussu, immò etiam nisi pecuniariam summam acceperint; quam consuetudinem tyrannicam fuisse affirmat S. Gregorius in comment. Psalm. 4. poenitentialis; vel quia Pontifices ipsi id necessarium iudicabant ad Ecclesiæ defensionem, ut quando Carolo Magno & Othone id Pontifices concesserunt. At nunc nec Imperatores tyrannicè se ingerunt electioni, nec id requiritur ad Ecclesiæ defensionem. Immo etiam vix inuenitur aliquis pius Imperator, qui hoc iure sibi concessio uti voluerit, & è contrario exstat aperta renunciatio huic iuri facta à Ludouico Caroli filio, can. Ego Ludouicus. d. 63. & ab Othone I. canon. Constitutio, eadem distinctione. QUINTA denique reperitur; nam quoddam sunt Canonici in aliis urbibus, id sunt Presbyteri & Diaconi Cardinales in Vrbe.

## CAPVT DECIMVM.

## Octaua Propositio.

**S**I nulla exstaret pontificia constitutio de electione summi Pontificis, vel casu aliquo omnes electores à iure designati, id est, omnes Cardinales simul perirent, ius electionis ad Episcopos vicinos & Clerum Romanum pertineret, cum dependentia tamen aliqua à Concilio generali Episcoporum.

In hac propositione non videntur omnes conuenire; quidam enim existimant, secluso iure positiuo, ius eligendi deuolui ad Concilium Episcoporum; ut Caietanus tractat. de potestate Papæ & Concilij, cap. 13. & 21. & Franciscus victoria relect. 2. q. 2. de potestate Ecclesiæ. Alij, ut refert Syluester verbo



verbo Excommunicatio, §. 3. docet, ad Clerum Romanum pertinere ius eligendi in illo casu. Sed conciliari possunt hæc duæ opiniones. Nam ad Episcoporum Concilium pertinet sine dubio primaria auctoritas eligendi in illo casu; si quidem, mortuo Pontifice, non est in Ecclesia vlla maior auctoritas, quam generalis Concilij: & si Pontifex non esset Episcopus Romanus, nec alicuius particularis loci, sed solum generalis Pastor totius Ecclesiæ, ad Episcopos pertineret, vel eligere successorem, vel designare electores: tamen posteaquam vnitus est Pontificatus orbis Episcopatu vrbis, immediata auctoritas eligendi in illo casu deberet ab Episcopis totius orbis permitti Episcopis vicinis, & Clericis Romanæ Ecclesiæ, quod probatur dupliciter:

PRIMO, quia ab omnibus Episcopis vicinis, & Clericis Romanis translatum est ius eligendi ad Cardinales, qui sunt quædam pars Episcoporum & Clericorum Romanæ Ecclesiæ; ergo Cardinalibus deficientibus deberet redire ius eligendi ad omnes Episcopos & Clericos Romanæ Ecclesiæ.

SECUNDO, quia hæc est antiquissima consuetudo, vt ex Cypriano supra ostendimus, vt Episcopum tam Romanum, quam alios eligant Episcopi vicini, præsentem Clero. Nec vnquam est auditum, quod Episcopi, aut Archiepiscopi totius orbis convenirent ad electionem summi Pontificis, nisi in casu, in quo dubitatur, qui sint legitimi electores. Hoc enim dubium a Concilio generali explicari debet, vt factum est in Concilio Constantiensi.

## CAPVT XI.

### De numero ordinum Ecclesiasticorum.



EQVITVR tertia quæstio de distinctione Clericorum, seu Ministrorum Ecclesiæ; quæ sanè quæstio tribus in rebus posita est. Dissentimus enim ab aduersariis de numero, de antiquitate, & de officio Clericorum. Ac, vt a numero incipiamus, Ioannes Calvinus li. 4.

Instit. cap. 4. & cap. 19. & Martinus Kemnitius in examine 23. sess. Concilij Tridentini, reprehendunt numerum septenarium ordinu, quem Catholici passim asserunt; ac docent, tres tantum esse veros ordines, Episcoporum, quos ipsi Pastores



libentius vocant, Presbyterorum, quos Seniores, vel Doctores, vel Ministros verbi appellant, & Diaconorum.

Ex ceteris ordinibus simpliciter auferunt ordinem Exorcistæ, reliquos agnoscunt quidem, sed neq; ordines esse volunt, neque certo numero contineri. Dicunt enim, Lectores Acolutos, Ostiarios, & similes, fuisse ministros quosdam, quos Pastores liberè assumebant pro necessitate Ecclesiæ, id est, plures aut pauciores, prout Ecclesiæ magnitudo, aut paruitas requirebat. Id verò probant ex eo, quòd variè à Patribus isti ordines numerantur. Et quidem Calvinus lib. 4. cap. 4. §. 1. Hieronymum producit testem, qui in commentario, cap. 19. Isaia, quinq; ordines numerat, Episcopos, Presbyteros, Diaconos, Fideles, & Catechumenos.

KEMNITIUS autem testes producit; PRIMO, Dionysium Areopagitam, qui in 5. cap. Ecclesiasticæ Hierarchiæ, tres tantum facit ordines, Pontificum, Sacerdotum, & Ministrorum. SECUNDO, Canones Apostolorum, ubi numerantur quinque ordines, Episcoporum, Presbyterorum, Diaconorum, Lectorum & Cantorum. TERTIO, Ambrosium, qui in commentario cap. 4. ad Ephesios, numerat etiam quinq; sed loco Cantorum ponit Exorcistas. QUARTO, Ignatium in epistola ad Antiochenos, & Epiphanium in fine Panarij, qui plures numerat, quam septem; addunt enim *κοπιῶντες*, id est, laborantes. Addit etiam Ignatius Confessores. QUINTO, Canonistas, qui apud Gratianum d. 23. & 25. addunt Psalmistam: *Non igitur*, inquit Kemnitius, *Catholicum dogma est, de septem illis ordinibus.* Hæc illi.

Porro Catholici certum ac statum numerum esse volunt eorum, qui propriè ordines Clericorum nominantur. Est autem observandum, duobus modis accipi solere apud auctores ordinem Ecclesiasticum; Vno modo propriè, alio modo communiter. Propriè illi dicuntur ordines, qui certo ritu sacro & solenni conferuntur ab Episcopo, & ad certum ministerium sacrificio diuino exhibendum referuntur. Quæ ratione septem duntaxat ordines numerantur; videlicet, Sacerdos, Diaconus, Subdiaconus, Acolutus, Lector, Exorcista, & Ostiarius. Etsi enim Episcopus & Presbyter distinguuntur, tamen quantum ad sacrificium, idem omnino mysterium exhibent, proinde vnum ordinem, non duos faciunt, sicut etiam Lector, & Cantor, seu Psalmista.

Quare



Quare Cornelius Papa in epistola ad Fabianum apud Eusebium lib. 6. hist. c. 33. dicit, in Ecclesia Romana suo tempore, id est, ante annos M. CCC. fuisse Presbyteros XLVI. Diaconos septem, Subdiaconos septem, Acolutos XLII. Exorcistas cum Lectoribus, & Ostiariis, LII. ubi nullam facit mentionem Cantorum, vel laborantium, vel aliorum quos alij numerant; quia nimirum illi nec habent propriam ordinationem, nec referuntur distincta ratione ad sacrificium.

In Concilio item Romano, sub Sylvestro; cap. 3. numerantur iidem septem ordines. In Concilio autem Carthaginiensi IV. can. 2. & sequentibus, præter ordines iam nominatos, in epist. 5. Cornelij, & in Concilio Romano additur ultimo loco Psalmista, seu Cantor, sed ibidem Concilium monet, Psalmistam non ordinari ab Episcopo, sed etiam sine licentia Episcopi, sola iussione Presbyteri, posse officium canendi suscipere. Isidorus lib. 7. etymologiarum, cap. 12. & in epistola ad Ludifredum; Rabanus li. 1. de institutione Clericorum, cap. 6. & sequentibus; Amalarius lib. 2. de officiis Ecclesiasticis, cap. 7. & sequentibus; Hugo de S. Victore li. 2. de Sacramentis, part. 3. cap. 5. eosdem septem ordines numerant, & explicant; Idem facit Magister sententiarum, quem omnes Theologi sequuntur in 4. d. 24.

Deniq;, eosdem numerat Concilium Florentinum in instructione Armenorum, & Tridentinum sess. 23. cap. 2. & Ecclesie usus idem testatur; non enim alij ordines præter istos conferri solent: Nam prima tonsura non est ordo, cum nullum habeat officium annexum, sed est præparatio ad ordines, ut est Catechismus ad Christianismum.

Communiter autem dicuntur ordines illi omnes, qui quomocunq; dedicantur diuinis obsequiis, etiam si non referantur ad sacrificium, & hoc modo etiam Monachi, virgines, & viduæ Deo sacratæ, necnon laborantes in sepeliendis defunctis, ordines aliquando dicuntur à Patribus; nam de ordinatione Monachi scribit Dionysius cap. 6. Ecclesiasticæ Hierarchiæ; de ordine verò laborantium in sepeliendis mortuis, Epiphanius in Compendiaria doctrina: Habebatur enim actio quædam religiosa, sepultura mortuorum. De ordine Diaconissarum, virginum, aut viduarum, quæ seruebant Ecclesie in instructione mulierum, quæ baptizandæ erant, idem Epiphanius ibidem.



Ex his autē facile erit explicare loca, quæ ab aduersariis afferuntur contra numerum septenarium ordinum. Ac PRIMVM ad locum Hieronymi, à Caluino adductum, respondeo, S. Hieronymū eo loco non loqui de ordinibus Clericorum, sed de ordinibus Christianorum, idēd ponit primo loco Clericos, deinde Laicos, quos fideles vocat, vltimo Cathecumenos; Porrd ex Clericis nominat tres tantū, id est, Episcopos, Presbyteros, Diaconos, quia volebat perficere numerum quinarium: Explicabat enim illud Esaia: *Erunt*

10 *quinque ciuitates in terra Aegypti loquentes lingua Chanaanide*, ac per eas ciuitates Ecclesiam Christianam intelligi volebat; Itaq; ad perficiendum quinarium numerum, ex omnibus Clericis tres primos posuit, in quibus omnes alij continentur, quos idem Hieronymus alibi distinctē ponit: Nam Subdiaconorum meminit in epist. 91. in primis verbis: Acolutorum meminit ac Lectorum in epist. 2. ad Nepotianum: Deniq; Exorcistarum & Ostiariorum in commentario cap. 2. epist. ad Titum in postremis verbis.

Ad LOCVM Dionysij, à Kemnitio productum, respondeo, Dionysium non voluisse exponere numerum ordinum, sed numerum Hierarchiarum: Tres enim sunt Hierarchiæ in Ecclesia militante, vt etiam tres sunt in Ecclesia triumphante; Prima est Pontificum; Secunda Sacerdotum; Tertia Diaconorum. Diaconi enim, etiam si ministri dicuntur & sunt, si comparentur ad Sacerdotes; tamen sunt etiam Principes, & Præsules, si comparentur ad plebem, & idēd dicuntur Hierarchæ; Ordines autem inferiores non præsent populis, sed tantū ministrant Diaconis, & Sacerdotibus.

30 Quodd autem Diaconi præsent, docet IGNATIUS in epistola ad Trallianos: *Subiecti*, inquit, *estote Episcopo, similiter & Presbyteris atq; Diaconis*. Item HIERONYMVS in 2. caput ad Titum: *Non solum*, inquit, *Episcopi, Presbyteri & Diaconi debent magnopere prouideri, vt cunctum populum, cui præsent, conuersatione, sermone, ac scientia præcedant, verum & inferior gradus, Exorcistæ, Lectores, Aeditur, & omnes omnino, qui domus Dei seruiunt*. Docet id etiam Ioannes CHRYSOSTOMVS, qui hom. 83. in Matth. Diacono suadens, vt Imperatorem arceat à communione, si indignē adeat: *Cohibe*, inquit, *& coërce, maiorem tu illo habes potestatem*. Et hæc etiam ratio est, cur

Epi-



Episcopi ordinariè assumerentur ex Presbyteris, aut Diaconis Ecclesiæ, non ex inferioribus ordinibus, vt patet ex Leone, epistola 84. ad Anastasium, cap. 6. quam etiam puto causam esse, cur in Romana Ecclesiâ soli Episcopi, Presbyteri, & Diaconi sint Cardinales.

Ad locum ex Canonibus Apostolorum respondeo, Clementem in canonibus Apostolorum nusquam voluisse omnes ordines numerare, sed data occasione, modo vnũ, modo alium ordinem nominasse; eundem autem Clementem plures ordines agnouisse, perspicuum est ex can. 15. vbi dicit: 10  
*Si quis Presbyter, aut Diaconus, aut quislibet de numero Clericorum, &c.*

Ad testimonium Ambrosij respondeo, Ambrosium in comment. cap. 4. ad Ephesios, solum quinq; ordinum mentionem fecisse, quia volebat de ordinibus explicare verba illa Pauli; Alios dedit Apostolos, alios Prophetas, alios Euangelistas, alios Pastores, & Doctores. & quia Paulus solum quinque nomina posuit, idcirco conatus est etiam ipse quinque ordines numerare: Itaque per Apostolos intellexit Episcopos; per Prophetas Presbyteros; per Euangelistas Diaconos; per Pastores Lectores; per Doctores, vel, vt ipse legit Magistros, Exorcistas.

Ad testimonium Ignatij & Epiphaniij respondeo, illos Patres numerasse non solum ordines propriè dictos, sed etiam alios.

Ad testimonia Canonistarum respondeo, illos facere nouem ordines, quia distinguunt Episcopum à Presbytero, & Lectorem à Cantore, quod Theologi non faciunt; sed in re non est dissensio. Theologi enim solum considerant ordines, vt se habent ad sacrificium, quomodo (vt diximus) Episcopus & Presbyter; Lector & Cantor non distinguuntur;

Canonistæ autem considerant ordines, vt Hierarchiam constituunt, & idcirco rectè distinguunt Episcopum à Presbytero. atque hæc de primo.





## CAPVT XII.

## De antiquitate Ordinum.



**D**OANNES CALVINVS, de Ordinum, præcipue minorum, antiquitate ita loquitur libro 4. In-  
stit. cap. 19. §. 27. *Primitiua*, inquit, *Ecclesia in-*  
*cogniti fuerunt, & multis postea annis excogitati-*  
*Sed falsam esse hanc Caluini sententiam testantur Cle-*  
*mens, & Ignatius, Apostolorum Discipuli: Vterque enim*  
*eorum ordinum meminit. CLEMENS lib. 8. Constit. o-*  
*mnium ferè ordinum etiam minorum ritus declarat. IGNA-*  
*TIVS autem in epistola ad Antiochenes ita concludit: Sa-*  
*luto, inquit, sanctum Presbyterum Sestrum, saluto sanctos Dia-*  
*conos, saluto Subdiaconos, Lectores, Cantores, Ostiarios, Laboran-*  
*tes, Exorcistas.*

Ad hæc, tempore sancti Cypriani, omnes ordines erant  
in Ecclesia, nec tamen tunc cœperunt: Nam vt de re anti-  
qua, & vbiq; recepta loquuntur auctores illius temporis,  
qui sanè non multum aberant ab Apostolicis temporibus.  
**CYPRIANVS** lib. 2. epist. 10. *Exemplaria*, inquit, *eadem nunc*  
*quoque per Mettium Hypodiamum à me missum, & Nicepho-*  
*rum Acolutum transmissi.* Libro 2. epist. 5. & lib. 4. epist. 5. scri-  
bit se ordinasse Lectores Autelium, & Celerinum. Lib. 5. e-  
pist. 14. *Presbyter*, inquit, *de Clero, & Exorcista, & Lector Lucian-*  
*us scripsit.*

Eodem tempore scripsit epistolam sanctus Cornelius, ad  
Fabianum Antiochenum, ex qua hæc sunt verba apud Euse-  
bium lib. 6. hist. Eccles. cap. 33. *Is ergo qui Euangelium vendica-*  
*bat, nesciebat in Ecclesia Catholica vnum Episcopum esse debe-*  
*re, vbi videbat esse Presbyteros XLVI. Diaconos septem, Subdia-*  
*conos septem, Acolutos XLII. Exorcistas, & Lectores cum Ostiariis*  
*LII.* Omitto Concilium Laodicenum canone 24. & Cartha-  
ginense IV. canone 2. & sequentib. in quibus omnium ordi-  
num mentio fit, quorum hoc celebratum est ante annos

M. C. illud antè annos M. CC. ex quibus satis  
colligitur rem esse longè antiquio-  
rem, quàm putat Cal-  
uinus.



## CAPVT XIII.

## De officiis Ministrorum.

**R**ESTAT officium, in quo etiam non parum à nobis Kemnitius, & Calvinus dissentiunt. Dicamus de singulis seorsim. Exordium in Ecclesia sumitur à prima tonsura, quæ quidem non est ordo, cum nullum habeat certum officium annexum, sed est quædam dispositio, ac præparatio ad ordines; Profitentur enim se ordinibus initiandos, & à seculi negotiis ad militiam Ecclesiasticam transiuros, qui ita tondentur. Porro de ritu tonsuræ, & rasuræ erit infra propria disputatio.

PRIMVS igitur ordo, Ostiariorum est, de quo ordine ferè convenimus: Fatetur enim Calvinus lib. 4. Instit. cap. 4. §. 9. Officium Ostiariorum apud veteres fuisse aperire, & claudere fores Ecclesiæ, proinde curam habere ipsius templi; ceterum postea libro eodem, cap. 19. §. 27. reprehendit, quod solenni ritu Ostiarios ordinent Episcopi apud nos. Existimat enim ipse non esse certum ordinem Ecclesiasticum, sed officium tantum, quale est eorum, qui Ianitores sunt in prophetis domibus. At nihil ipse affert, quo sententiâ suam probet: Nos autè habemus testimonia supra citata, in quibus Ostiariorū ordo inter ordines Ecclesiæ numeratur; ac præterea in Concilio Carthaginens. 4. can. 9. præscribitur forma, & ritus ordinandorum Ostiariorum, & est ille ipse, quo nunc utitur Ecclesia: *Ostiarius*, inquit Concilium, *cum ordinatur postquam ab Archidiacono instructus fuerit, qualiter in domo Dei debeat conuersari, ad suggestionem Archidiaconi tradat ei Episcopus claves Ecclesiæ de altario dicens; Sic age, quasi redditurus Deo rationem pro his rebus, quæ his clauibus reconduntur.* Itaq; Calvinus dum hæc ridet, non solum modernos Papistas, ut ipse loquitur, ridet, sed etiam Ecclesiam Catholicam, quæ est, & quæ erat in CHRISTO, ante annos M. C.

SECUNDVS est ordo Lectorum, quorum officium erat legere ex pulpito in Ecclesia quidquid legendum erat ex utroque Testamento; nam etiam Euangelia legi à Lectoribus consueuisse, testatur CYPRIANVS lib. 2. epist. 5. ubi loquens de Aurelio ordinato Lectore: *Nihil*, inquit, *magis congruit voci, quæ Dominum gloriosa prædicatione confessa*  
est.



est, quam celebrandis diuinis lectionibus personare, & post solum a serba, qua Christi martyrium proloquunt a sunt, Euangelium legere, unde Martyres fiunt. Hæc ille. Credibile tamen est, Lectoris officium non fuisse, vt legeret Euangelium tempore sacrificij, (id enim Diaconorum fuisse paulo post ostendimus) sed solum extra illud tempus.

CALVINVS fatetur quidem hoc fuisse officium Lectorum, lib. 4. cap. 4. Instit. §. 9. Sed dicit non fuisse gradum, neque ordinem certum in Ecclesia, sed solum solitos Episcopos quibusdam ex domesticis suis ministris iniungere, vt in Ecclesia legerent Scripturas, vt eo modo innotescerent plebi, & discerent ferre conspectum hominum.

AT NON solum Concilium Carthaginense IV. can. 8. præscribit ritum solennem ordinandi Lectores, sed etiam S. Cyprianus lib. 2. epist. 5. lib. 3. epist. 22. & li. 4. epist. 5. aperte significat, Lectoratum fuisse ordinem, & gradum in Ecclesia; nam passim vocat gradum, & honorem Ecclesiasticum. Item dicit, Celerinum initio ex humilitate refugisse eum gradum, sed tandem diuina reuelatione admonitum acquisuisse. Ad hæc excusat multis verbis, quod quosdam ordinauerit Lectores, urgente necessitate, sine consilio, & consensu expresse Cleri. Denique dicit, se prius quendam Saturnum nomine fecisse Clero proximum, quod ei permisisset in Paschate legere in Ecclesia, cum ordinatus non esset; deinde verò eum in Clerum cooptasse, atque ad ordinem Lectoris promouisse. Vbi vides aliud esse legere in Ecclesia, quod solum Caluinus agnoscit; aliud verò promoueri ad ordinem Lectoris.

TERTIVS ordo Exorcistarum est, ad quorum officium pertinet exorcismos Ecclesiæ legere super Energumenos, & eo modo præparare illos, vt sacrificij diuini participes fieri possint. Olim siquidem, quia frequentissimè demones pellebantur de corporibus humanis, concurrebant plurimi Energumeni ad Ecclesiam, ita vt essent quasi greges Energumenum, ac propterea iste ordo institutus fuit.

Fuisse reuera ordinem certum Ecclesiasticum Exorcistarum, & non solum donum, & gratiam gratis datam, vt vult Caluinus, patet ex testimoniis supra citatis, Ignatii in epistola ad Antiochenos, Cornelij Papæ in epistola ad Fabianum, apud Eusebium lib. 6. histor. cap. 33. & Cypriani lib. 5. epist.



epist. 14. Concilij Romani sub Syluestro can. 3. & Concilij Laodicensi canone 24. vbi Exorcista inter ordines numerantur; sed præcipue id ostenditur ex Concilio Carthageniensi, IV. can. 7. vbi sic legimus: *Exorcista cum ordinatur, accipiat de manu Episcopi libellum, in quo scripti sunt exorcismi, dicente sibi Episcopo; Accipe, & commenda memoria, & habeto potestatem imponendi manum super Energumenum, siue baptizatum, siue catechumenum.* Concilium item Laodicense can. 26. prohibet, ne quis exorcizet, neque publicè, neque priuatim, nisi ab Episcopo ad eum ordinem prouectus sit.

Ex quibus Conciliis intelligimus, quàm aperte mentiat<sup>10</sup>ur Caluinus, cum ait lib. 4. Institut. cap. 19. §. 24. *Fingitur illis Exorcistis potestas data imponendi manus super Energumenos.* Quomodo enim fingimus, quod ex tam antiquis Conciliis comprobamus? Adde etiam testimonium Sulpitij, qui in libro de vita D. Martini, cap. 4. ita scribit: *Tentaui Hilarium imposito Diaconis officio sibi Martinum artius implicare, & ministerio sincere diuino, sed cum sapissime restitisset, indignum se esse vociferans, intellexit vir altioris ingenij, hoc eum modo posse constringi, si id ei officij imponeret, in quo quidam locus iniuria<sup>20</sup> videretur, itaq; Exorcistam eum esse præcepit, quam ille ordinationem ne despexisse tanquam humiliores, videretur, non repudiavit.*

Quartus ordo Acolutorum est, quorum id est proprium, vt cum cereo accenso sequantur Diaconum ad locum Evangelij; & vireolos, atque ampullas ad sacrificium præparent, ac Subdiacono porrigant. Inde enim dictus est Acolutus, quasi pedisequus ab ἀκολούθῳ, quod est sequor, & etiam ceroferarius à gestando cereo.

Hic verò Caluinus risum tenere non potest; sic enim ait lib. 4. Institut. cap. 19. §. 23. *Sed, inquit, imprimis spectabilis est arguita, qua in Acoluti nomine philosophantur, ceroferarium appellantes, Verbo, & arbitrò, magico, cerè inaudito Genibus ac linguis omnibus.* Et supra cap. 4. §. 9. *Vocabant, inquit, Acolutos, qui Episcopo in domesticis obsequiis adessent, eumq; perpetuò comitarentur, primum honoris causa, deinde ne qua suspicio oriretur.* Hæc ille. Itaque vult Acolutos nihil aliud olim fuisse, nisi Episcoporum quasi Cubicularios. At ipse quidem nullo teste probat quod dicit, proinde viderit ipse, an non sinxerit

Aco-



Acoliti officium ex capite suo: Nos autem Acolutatum ordinem fuisse, & gradum Ecclesiasticum, probamus ex testimoniis plurimis supra citatis, Cornelij, Cypriani, Concilij Romani, & Concilij Carthaginensis.

Porro ad officium eius pertinuisse cereos, & vrecolos, quæ Calvinus ridet; testatur Concilium Carthaginense IV. can. 6. *Acolutus*, inquit Concilium, *cum ordinatur, ab Episcopo quidam doceatur, qualiter in officio suo agere debeat sed ab Archidiacono accipiat ceroferarium cum cereo, & sicut se ad accendenda Ecclesia lumina mancipari: Accipiat & vrecolum sacrum, ad suggerendum vinum in Eucharistiam sanguinis Christi.* Hæc ibi. Vbi etiam vides nomen ceroferarij non esse magicum, neque omnibus Gentibus, & linguis inauditum, nisi tot sanctos Patres, & cum eis D. Augustinum, qui Concilio intererat, Magos, & nullius Gentis aut linguæ homines esse velis. Idem quoque nomen est apud Isidorum lib. 7. etymolog. cap. 12. apud Amalarium lib. 2. cap. 10. apud Rabanum libro 1. de Institut. Clericorum, cap. 9. apud Hugonem libro 2. de Sacramentis, par. 3. cap. 5. & apud alios multos, qui nec Magi erant, nec nullius Gentis, aut linguæ.

QVIN TVS ordo Subdiaconorum est, ad cuius officium propriè pertinet ministrare Diacono in sacrificio, ac propterea dum ordinatur, accipit calicem vacuum, & parinam, ut habemus in Concilio Carthaginensi IV. can. 5. & in Concilio Tolerano IV. canone 27. Eiusdem est epistolas B. Pauli ad Missam legere, ut Concilium Remense canone 4. docet. Meminerunt huius ordinis omnes auctores supra citati. Proinde falsum est quod scribit Calvinus lib. 4. Institut. cap. 4. §. 5. Subdiaconorum officium nihil aliud fuisse, nisi iuvare Diaconos in eleemosynis distribuendis, pauperibusque curandis.

SIXTVS ordo Diaconorum est, quos oblationibus colligendis, & opibus Ecclesiæ administrandis præpositos fuisse, inter Catholicos, & hæreticos constat; id enim testatur Acta Apostolorum, cap. 6. Idem patet ex Leone in sermone de sancto Laurentio: ex quo officio fortasse factum est olim, ut Diaconi insolecerent aduersus Presbyteros; semper enim officia pecuniaria adamata præ ceteris fuisse videntur. Reprehendunt Diaconorum arrogantiam Concilia nonnulla, Nicænum can. 14. Laodicenum canone 20. &

Tole-



Toletanum IV. canone 38. Item Patres, Cyprianus lib. 3. epist. 9. Hieronymus in epistola 83. ad Euagrium, & lib. 14. in Ezechielem exponens cap. 48. & Bernardus lib. 4. de consideratione.

Sed præter hoc officium habebant etiam Diaconi alia nonnulla, quæ aduersarij non agnoscunt. PRIMO, Diaconorum erat Sacerdoti sacrificanti assistere, ac ministrare, & populo distribuere Eucharistiam: ac propter sacrum hoc ministerium, potissimum sacram ordinationem accipiunt. Videmus enim Actor. 6. per impositionem manuum ordina-  
 10  
 ri Diaconos. quæ sacra cærimonia non est credibile Apostolos vsuros fuisse, si solum ministerium mensarum Diaconis committere voluissent, antea enim viduæ ministrabant mensis, nec tamen certo ritu ordinabantur.

Præterea Clemens lib. 2. cap. 14. Constituit. significat Diaconos Sacerdoti ministrare solitos in sacrificij oblatione: quod etiam apertè docet Cyprianus in sermone 6. qui est de lapsis: Idem cognoscimus ex historia sancti Laurentij, apud Ambrosium lib. 1. de officiis, cap. 41. Inducit enim S. Laurentium sic loquentem ad D. Sixtum: *Quò progredere sine filio pater? Quò Sacerdos sancte sine Diacono properas? Tu nunquam sine ministerio sacrificium offerre consueueras.* Et infra: *Cui commisisti consummandorum consortium Sacramentorum, huic consortium tui sanguinis negas?* Idem patet ex liturgia Chrysostomi, & ex homil. 83. super Matthæum. Idem ex sancto Gregorio, qui in epistola ad Leandrum, quæ præfigitur libris eius in Iob, nihil aliud Diaconatum, nisi sacri altaris ministerium vocat: Denique Isidorus, Rabanus, Amalarius, Hugo, & alij suprà citati, qui describunt officia omnium ordinum, hoc docent, quod nos diximus.

SECUNDO, Diaconorum erat tempore sacrificij Evangelium legere: Id testatur præter suprà dictos auctores S. Hieronymus in epist. 48. ad Sabinianum: *Tu, inquit, ex angustis & pallidus, & suffusione omni careres, Evangelium Christi, quasi Diaconus lectu abas.* Testatur etiam S. GREGORIUS in Synodo Romana, quæ habetur lib. 4. epist. cap. 88. ubi prohibet, ne Diaconi contenti in Ecclesia, excepto Evangelio, tempore sacrificij: Idem etiam testantur Concilia antiqua, Vatese can. 4. & Remense can. 5.



TERTIO, Diaconorum erat baptizare, prædicare, reconciliare publicos pœnites, Eucharistiam deferre, & præbere Laicis, ac breuiter omnia facere, quæ Episcopi & Presbyteri faciunt, excepta consecratione corporis Domini, & ordinatione Clericorum, & aliis officiis, quæ requirunt potestatem ordinis. nam Diaconos baptizare posse, pater exemplo Philippi Diaconi, Actor. 8. vnde TERTULLIANVS in libro de Baptismo: *Ius, inquit, dandi Baptismum summus sacerdos habet, dehinc etiam Presbyteri, & Diaconi.* Posse item Diaconos prædicare, docet exemplum Stephani & Philippi Diaconorum, Actor. 7. & 8. Item exemplum sancti Vincentij Martyris, qui cum Diaconus esset, prædicabat tamen, vt Augustinus testatur serm. 2. de S. Vincentio.

Denique Gregorius lib. 4. epist. cap. 88. docet, ad Diaconum etiam pertinere officium prædicationis, & ipsum etiam Gregoriũ adhuc Diaconum prædicasse testatur Ioãnes Diaconus in eius vita lib. 1. cap. 41. Rursus Diaconos aliquando reconciliare solitos pœnites in absentia Episcopi & Presbyterorum, docet Cyprianus lib. 3. epist. 17. Item Eucharistiam præbere Laicis in absentia Presbyterorum posse Diaconos, docet Concilium Nicænum can. 14. Testatur item Iustinus in Apologia secunda extrema, Diaconos deferre solitos Eucharistiam ad absentes.

Est tamen obseruandum, hæc omnia, ac præcipuè officium prædicandi, propria Episcoporum esse, ita vt ne Presbyteris quidem prædicare liceat, nisi ex Episcopi mandato, aut consensu. Episcopi enim propriè Apostolis succedunt, Apostoli autem sunt, qui Actor. 6. dicunt: *Non est bonum nos derelinquere Verbum Dei, & ministrare mensis.* Scribit etiam Possidius in vita B. Augustini, cap. 5. Valerium Episcopum concessisse sancto Augustino Presbytero suo prædicandi potestatem, quod ipse cum Græcus esset, minus commodè Latino populo prædicare posset. Legimus quoque in Concilio Valensi, can. 4. factam ab Episcoporum Concilio Presbyteris potestatem prædicandi. In Concilio autem Varsensi, can. 4. præcipitur etiam vt Diaconi, quando non est Presbyter, qui prædicet verbum, Homilias sanctorum Patrum loco concionis recitent.

SEPTIMVS ordo, Sacerdotum est, de quo grauis controuersia inter nos, & hereticos versatur, quæ in sequenti capite disputanda est,



## CAPVT XIII.

## De distinctione Episcopi &amp; Presbyteri.

**E**XISTIT igitur quæstio: Sine Presbyter idem omnino quod Episcopus, ac præsertim iure diuino. Fuit antiqua hæresis Aërij, teste Epiphanio, hæ. 75. & August. lib. de hæresibus, cap. 53. nihil interesse inter Episcopum & Presbyterum, quam hæresim propterea ille videtur excogitasse, vt se ipse consolaretur, quod Episcopus factus non esset, vt apertè significat Epiphanius. Eandem hæresim postea sequutus est Ioannes VViclefus, teste Thoma VValdensi lib. 2. doct. fidei, art. 3. cap. 60. & nostris temporibus Lutherani & Calvinistæ. siquidem Ioan. CALVINVS lib. 4. Inst. ca. 4. §. 2. sic loquitur: *Quibus docendi munus iniunctum erat, eos omnes nominabant Presbyteros, illi ex suo numero in singulis ciuitatibus vnum eligebant, cui specialiter dabant titulum Episcopi, ne ex æqualitate, vt fieri solet, dissidia nascerentur, neq; tamen sic honore, & dignitate superior erat Episcopus, et dominum in collegas haberet, sed quas partes habet consul in senatu, vt referat de negotiis, consulendo, monendo, hortando, aliis præcat, auctoritate sua totam actionem regat, & quod decretum communi consilio fuerit, exequatur.* Id muneris sustinebat Episcopus in Presbyterorum catu, atq; id ipsum pro temporum necessitate fuisse humano consensu inductum, fatentur ipsi veteres. Hæc ille. Non dissimilia habent Martinus Kemnitus in examine sess. 23. Concilij Triden. Necnon & Erasmus annotatione ad 4. caput, ad Timotheum.

At Ecclesia Catholica distinctionem agnoscit, ac docet, iure diuino Episcopatum Presbyterio maiorem esse, tum ordinis potestate, tum etiam iurisdictione: sic enim loquitur Concilium Triden. sess. 23. cap. 4. *Proinde sacrosancta Synodus declarat præter ceteros Ecclesiasticos gradus, Episcopos, qui in Apostolorum locum successerunt, ad hunc hierarchicum ordinem præcipuè pertinere, & positos, sicut Apostolus ait, à Spiritu sancto regere Ecclesiam Dei, eosq; Presbyteris superiores esse, &c.* Et canon. 6. *Si quis dixerit in Ecclesia Catholica non esse hierarchiam diuinam ordinatione institutam, quæ constat ex Episcopis, Presbyteris, & Ministris, anathema sit.* Et can. 7. *Si quis dixerit Episcopos non esse Presbyteris superiores, &c. anathema sit.* Eandem sententiam



tentiam docent, & defendunt Theologi Doctores apud Magistrum in lib. 4. sent. d. 24. & S. Thom. in 2. 2. q. 184. art. 6.

Nos igitur omiſſa illa quaſtione, qua ad diſputationem de Sacramentis pertinet; Sit ne vnus ordo, vnūue Sacramentum Episcopatus, & Presbyterij, an duo: tria demonſtrare conabimur. PRIMO, iure diuino maiorem eſſe Episcopum Presbytero, quod attinet ad ordinis poteſtatem. SECUNDO, maiorem eſſe etiam quantum ad iuriſdictionem. TERTIO, Episcopos in veteri Eccleſia non fuiſſe in cœtu  
 10 Presbyterorum, quaſi Conſules in ſenatu, ſed quaſi Reges ac Principes in cœtu Conſiliariorum.

Quod ad PRIMVM attinet, facile probari poteſt, Episcopum maiorem eſſe Presbytero, quantum ad ordinis poteſtatem, idque iure diuino; Nam ſolus Episcopus ordinare poteſt Presbyteros, & eo modo generare Patres Eccleſiæ, vt Epiphanius ratiocinatur aduerſus Aërium: Presbyteri autem ordinare non poſſunt, ſed ſolū baptizare, & eo modo filios Eccleſiæ generare. id autem ita eſſe docet Damafus in epiſt. 3. Item Concilium Antiochenum, cap. 10. & Ancyranum canone 12. Epiphanius hæ. 75. Chryſoſtomus, Theodoretus, Theophylaſtus, & Oecumenius, in 3. & 4. cap. 1. ad Timoth. Item S. HIERONYMVS in epiſt. 85. ad Euagrium: *Quod facit, inquit, Episcopus excepta ordinatione, quod Presbyter non faciat?* Denique S. LEO epiſt. 88. idem docet, & Eccleſiæ conſuetudo. Nunquam enim eſt auditum, quod Presbyteri Presbyteros, aut Diaconos, nedum Episcopos ordinauerint.

Eſſe autem ex iure diuino, vt ſoli Episcopi ordinent, inde colligitur, quod habebatur irritum, ſi quid in ea reſeciſſent,  
 30 qui veri Episcopi non erant. Sic enim ſcribit Gregorius III. in epiſt. ad Bonifacium: *Presbyteri quos reperiſti, ſi incogniti fuerint ſiri illi, qui ordinant, & dubium eſt eos Episcopos fuiſſe, aut qui eos ordinauerint, ſi bona actionis, ſiriq; Catholici ſint, & ipſi Presbyteri in miniſterio Chriſti Dei ſancta lege edoſti, ab Episcopo ſuo benedictionem Presbyteratus ſuſcipiant, & cōſecrentur, & ſic miniſterio ſacro fungantur.* Et ante eum DAMASVS in epiſt. 3. loquens de Chorepiscopis, qui cū ſolū Presbyteri eſſent, Pontificum more ordinate audebant: *Vacuum, inquit, eſt & inane, quidquid in prædiſto ſacerdotij ſummi egerunt miniſterio.* At certè ſi iure diuino Presbyteri ex ipſa ſua  
 ordi-



ordinatione, id est, ex caractere suo sacerdotali haberent, vt ordinare possent, non esset irritum quod facerent, tametsi prohibente Ecclesia facerēt. Prætereacū ordinatio Sacramentum sit (vt etiam Calvinus admittit) & Sacramenta omnia à Deo sint instituta, certè qui maior est ordinis potestate, quæ per Sacramentum ordinationis accipitur, is quoque maior sit ex diuina institutione necesse est.

Idem argumentum fieri potest ex confirmatione baptizatorum, & templorum atque altarium consecratione. Constat enim solos Episcopos, vt ordinarios Ministros, confirmationis Sacramentum posse conferre, necnon templa & altaria consecrare, neque id Presbyteris licere, vt S. Leo docet in epist. ad Episcopos Germaniæ & Galliæ, & ante eum Damasus in epist. 3. de Chorepiscopis, & ante vtrumque Dionysius, cap. 4. & 5. Ecclesiasticæ hierarchiæ, vbi dicit solum Episcopum diuina ordinatione Chrisma consecrare; quin etiam videmus Actor. 8. Apostolos ipsos, quibus Episcopi succedunt, missos, vt per manus impositionem, darent Spiritum sanctum iam baptizatis.

Quod ad SECUNDVM attinet de potestate iurisdictionis, Episcopos iure diuino Presbyteris esse maiores. Probamus PRIMO ex figura Testamenti veteris, quanquam hoc argumentum, vt etiam sequens de distinctione Apostolorum & discipulorum, probat etiam de potestate ordinis; nam in Testamento veteri erat vnus summus Sacerdos Aaron, & quæ ei succedebant; erant præterea minores Sacerdotes, omnes videlicet filij Aaron, & qui ab illis descendebant; ac denique erant Leuitæ ceteri, quia Leui originem ducebant, sed non per Aaronem. Constat autem iure diuino fuisse distinctos hos tres gradus, Pontificum, Sacerdotum, & Leuitarum; ita vt Pontifex maior esset Sacerdotibus, & Sacerdotes Leuitis; nam & consecrationes eorum distinctæ erant, & vestes, & officia, vt patet Exod. 28. & 40. Leuit. 8. & Numeri 3. 4. & 20.

Quod autem iurisdictioni penes Pontificem esset, non autem penes cæterum minorum Sacerdotum, patet ex lib. Deut. cap. 17. *Qui superbiauerit nolens obedire Sacerdotis imperio, ex sententia iudicis moriatur.* quod etiam fatentur Centuriatores Magdeburgen. Cent. 1. lib. 1. cap. 7. col. 257. *In Ecclesia, inquit, populi Iudaici, vnus tantum erat lege diuina Sacerdos sum-*



mus, quem omnes cogebantur agnoscere, eiq; parere. Idem quoque fatetur Calvinus lib. 4. Instit. cap. 6. §. 2. *Illic, inquit, unum Antistitem præsedit, quem omnes respicerent, quò melius in Unitate continerentur.* At Episcopi id sunt in Ecclesia, quod erant Pontifices in Testamento veteri, id Presbyteri apud nos, quod illic minores Sacerdotes, vt etiam id Diaconi nostri, quod illorum Leuitæ, vt docent Damasus in epist. 3. de Chorepiscopis, Hieronymus in epist. ad Euagrium 85. Leo epist. ad Episcopos Germaniæ & Galliæ 88. Concilium Hispalense II. canone 7. & alij permulti grauissimi auctores.

Et sanè nulla ratio permittit, vt distinctior fuerit hierarchia in Testamento veteri, quàm in nouo, cum illud umbræ, istud imagini comparetur ab Apostolo ad Hebr. 10. Sequitur igitur, vt sicut in Testamento veteri iure diuino Pontifices Sacerdotibus minoribus auctoritate præstabant, ita etiam Episcopi in Ecclesia Presbyteris præstent.

SECUNDO, probatur hoc idem ex distinctione Apostolorum & discipulorum LXX. Nam Episcopos Apostolis succedere, Presbyteros autem septuaginta discipulis, docent constanter omnes Patres. Vide Concilium Neocæsariense can. 13. Damasus in epist. 3. de Chorepiscopis, Anacletum epist. 2. Hieronymum in epist. ad Marcellam de erroribus Montani, Augustinum tract. in Psalm. 44. Leonem epist. 88. Isidorum lib. 2. de diuinis officiis, Bedam in caput 10. Lucæ, & alios. Porro, Apostolos iure diuino maiores fuisse discipulis septuaginta, satis apertè colligitur. Primum, ex institutione distincta, & diuersa. Apostolos enim solum duodecim Dominus esse voluit, Luc. 6. & eos semper ferè secum habebat, ac priuatim instituebat; Discipulos autem LXXII. Lucæ 10. instituit. Præterea Ioan. 20. solis Apostolis dixit: *Sicut misit me Pater, & ego mitto vos.* Denique Act. 1. Cum ex Iudæ apostasia numerus duodenarius imminutus esset, assumptus est Matthias, nec sine solenni quadam cærimonia, cum tamen esset ille antea ex numero discipulorum.

TERTIO, probatur hoc idem ex illis Domini verbis Matthæi 24. *Fidelis seruus & prudens, quem constituit Dominus super familiam suam.* Hæc enim verba S. Hilarius & ceteri Patres in hunc locum, de Episcopis dicta esse volunt, ex quo intelligimus, ipso Domino instituyente, Episcoporum



propriam esse curam, & gubernationem Ecclesiæ, quo etiam pertinet locus ille Actorum 20. *Attendite vobis, & universis gregi, in quo vos Spiritus sanctus posuit Episcopos, regere Ecclesiam Dei.*

QUARTO, probatur ex antiquitate; nam si iure humano Episcopi Presbyteris præessent, inueniretur certè principium aliquod huius institutionis post Apostolica tempora. At ipso tempore Apostolorum is erat Ecclesiæ usus, ut Presbyteri Episcopis subessent; nam 1. Timoth. 5. Apostolus ita scribit: *Adversus Presbyterum accusationem noli recipere, nisi sub duobus, aut tribus testibus.* Vbi videmus Episcopum Apostolorum tempore, iudicem Presbyterorum, proinde verum Principem, ac superiorem fuisse.

Item IGNATIUS Apostolorum discipulus in epist. ad Philadelphienfes ita scribit: *Boni sunt Sacerdotes, & sermonis Ministri, melior autem est Pontifex, cui credita sunt sancta Sanctorum, cui soli commissa sunt secreta Dei.* CLEMENS quoque Ignatii æqualis, in Apostolorum canonibus, can. 40. Presbyter, inquit, & Diaconi præter Episcopum nihil agere perentent; nam Domini populus illi commissus est, & pro animabus eorum hic redditurus est rationem. Denique DIONYSIUS Areopagita Pauli Apostoli discipulus, cap. 5. Eccles. hierarch. describens hierarchiam diuinitus institutam; primo loco Pontifices, secundo Sacerdotes, tertio Ministros ponit. IRENAEVS, qui proximus Apostolicis temporibus fuit, lib. 3. cap. 3. *Habemus, inquit, annumerare eos, qui ab Apostolis instituti sunt Episcopi, & successores eorum. Nam si recondita mysteria scissent Apostoli, quæ seorsim & latenter ab reliquis perfectos docebant, iis vel maxime traderent ea, quibus etiam ipsas Ecclesias committebant, &c.* Vbi Episcopis dicitur commissas esse Ecclesias, ut Apostolorum successoribus. TERTULLIANVS antiquissimus Latinorum, in libro de Baptismo: *Ius habet, inquit, dandi Baptismum summus Sacerdos, qui est Episcopus, dehinc Presbyteri, & Diaconi, sed non sine Episcopi facultate.*

Quantum ad TERTIVM, quodd Episcoporum auctoritas non sit in cœtu Presbyterorum, quasi Consul in senatu, sed ut Principis in Concilio Consiliariorum sibi subiectorum, primum colligitur ex testimoniis iam citatis B. Pauli, in epist. ad Timotheum, Clementis, Irenæi, Tertul-



liani; deinde ex Conciliis. omnia siquidem Concilia, tum generalia, tum prouincialia, etiam antiquissima, quorum meminit Eusebius lib. 5. hist. cap. 23. & 25. à solis Episcopis celebrata sunt.

Constat autem in Conciliis maximè exerceri iurisdictionem, cum leges in eis ponantur, & pœnæ prauaricatoribus decernantur: Item ex eo, quod multis in locis legitur, Presbyteros ab Episcopis excommunicatos, nusquam autem Episcopos à Presbyteris. Vide Concilium II. Carthaginense, can. 8. & 9. Denique ex eo, quod soli Episcopi solium, siue thronum habent in Ecclesia, quod est potestatis indicium, unde & imperare Principum more dicuntur à Patribus. Vide Chrysostomum in libro de sacerdotio, Ambrosium in libro de dignitate sacerdotali, & Gregorium Nazianzenum in oratione ad Principem irascentem, & populum timore perculsum. Sed iam obiectiones diluamus.

## CAPVT XV.

## Soluuntur obiectiones.

**P**RIMO loco obiiciunt testimonium B. Pauli, ex quo iidem videntur esse Episcopi & Presbyteri. Philip. 1. *Paulus & Timotheus serui Iesu Christi, omnibus sanctis, qui sunt Philippis, cum Episcopis & Diaconibus.* Certè hoc loco Presbyteri dicuntur Episcopi; non enim in vna vrbe multi fuissent Episcopi, si Episcopi nomen summum aliquem Sacerdotem significaret: Deinde quare non dixit Paulus, cum Episcopo, Presbyteris, & Diaconibus, si Presbyteri ab Episcopis eo tempore distinguebantur?

RESPONDEO; Ambrosij commentarius non refert illud, cum Episcopis & Diaconibus, ad eos quibus scribitur, sed ad eos qui scribunt, ita vt Episcopi hoc loco dicantur Paulus & Timotheus, & hic sit sensus: *Paulus & Timotheus serui Iesu Christi, omnibus sanctis, qui sunt Philippis, cum Episcopis*, id est, cum Paulo & Timotheo, & eorum Diaconibus, gratia vobis, & pax, &c. Sed nimis dura expositio videtur.

EPIPHANIUS in libro de hæresibus, hæresi septuagesima quinta, dicit Paulum ita scribere solitum, quod eo tempore



pore ob ministrorum penuriam multis in locis non essent Presbyteri vlli, sed Episcopi solum Diaconibus: Possunt enim Episcopi etiam Presbyterorum officio fungi. At hæc Epiphaniij explicatio tum haberet locum, si Paulus diceret, cum Episcopo & Diaconibus, aut si non ad vnam ciuitatem, sed ad multas simul scriberet: Sed cum ipse ad vnam urbem Philippensem scribat, & dicat se scribere ad Episcopos & Diaconos; quomodo, quæso, illa explicatio locum habere potest? Si enim in vna urbe multi Episcopi esse poterant, quantò facilius vnus Episcopus, & aliquot Presby-

THEODORETVS in commentario huius loci, & fusius in caput 3, primæ ad Timotheum scribit, Apostolorum tempore veros Episcopos, non Episcopos, sed Apostolos dici solitos; Presbyteros autem Episcopi nomine tunc appellari consueuisse. Nam ad Romanos 16. Paulus Andronicum Apostolum vocat, & Philip. 2. Epaphroditum Apostolum Philippensium appellat, qui videlicet Episcopi erant; postea tamen omisso Apostoli nomine, Episcopos solum Episcopos, Presbyteros autem solum Presbyteros appellari cœpisse. Quæ obserua-  
tio Theodoretæ si vera sit, non solum obiectioni desumptæ ex hoc loco, sed etiam ex omnibus aliis locis satisfacit; semper enim dicere poterimus, Paulum nomine Episcoporum Presbyteros accepisse.

Faciliore est sancti Ioannis CHRYSOSTOMI & aliorum multorum commentarius, qui docent, Apostolorum tempore nomina illa, Episcopus & Presbyter, communia fuisse omnibus Sacerdotibus, tam maioribus, quos nunc Episcopos dicimus, quàm minoribus, quos Presbyteros appellamus, licet res ipsæ & potestates distinctæ essent. Itaque Paulum nomine Episcoporum complexum est omnes Sacerdotes, vt hic sit sensus: *Paulus & Timotheus serui Iesu Christi, omnibus sanctis, qui sunt Philippis, cum Episcopis & Diaconibus*, id est, cum Sacerdotibus, & eorum Ministris?

Adde, quod videtur Paulus vniuersum Clerum salutare voluisse, sed ne cogeretur singulos ordines numerare, generatim id fecit; omnes enim ordines ad duo primaria genera reuocantur, ad Sacerdotes, & Ministros, quorum illud subdividitur in duas species Analogas, in summos Sacerdotes, & simplices Sacerdotes: Istud vero in sex alias



Species, in Diaconos, Subdiaconos, Acolutos, Lectores, Exorcistas, & Ostiarios. Quamuis autem nunc nomen Episcopi tantum principali analogato, id est, summo Sacerdoti, tribui soleat, & nomen Diaconi, tantum principali Ministro; tamen conuenit suo modo nomen Episcopi minoribus etiam Sacerdotibus; nam & illi superintendunt, & regunt populum saltem in foro conscientiae, & ex delegatione Episcopi, & nomen Diaconi conuenit suo modo ordinibus etiam inferioribus, cum omnes ministrent Sacerdoti.

10 ALTERA obiectio sumitur ex capite primo epistolae ad Titum, ubi sic Apostolus loquitur: *Huius rei gratia reliquit te Creta, ut constituas per ciuitates Presbyteros, sicut ego disposui tibi.* Et paulò infra: *Oportet enim Episcopum irreprehensibilem esse, &c.* quo loco videmus Presbyteros Episcopos esse. Sed eadem adhiberi potest responsio, quae ad locum superiorem adhibita est; nomina enim eo tempore communia erant.

TERTIA obiectio sumitur ex 3. cap. prioris epistolae ad Timotheum, ubi B. Paulus posteaquam praecepta quaedam Episcopis dederat, continuo Presbyteris omiſſis transiit ad Diaconos; quare videtur pro iisdem habuisse Episcopos, & Presbyteros. RESPONDEO, B. Paulum generatim instruere voluisse Clerum vniuersum, ac propterea sub nomine Episcoporum comprehendisse etiam Presbyteros, sub nomine Diaconorum omnes inferiores Ministros; eadem enim praecepta omnibus conueniebant.

QUARTA obiectio ex capite 4. prioris ad Timotheum, ubi Paulus ait: *Noli negligere gratiam Dei, quae in te est, quae data est tibi per impositionem manuum Presbyterorum.* Ex quo loco 30 KEMNITIUS affirmat, S. Hieronymum demonstrasse, posse Episcopum à Presbyteris ordinari: proinde nihil interesse inter Episcopum & Presbyterum, sed impudenter mentitur Kemnitius. Nam S. Hieronymus in epistola ad Euagrium (quam Kemnitius citat) disertis verbis affirmat Presbyteros ordinare non posse: *Quid facit, inquit, Episcopus, excepta ordinatione, quod non etiam faciat Presbyter?* Adduxit autem S. Hieronymus locum illum Apostoli, ut ostenderet Episcopos in Scripturis interdum appellari Presbyteros, sic enim exposuit verba illa: *Per impositionem manuum Presbyterorum, ac si dictum esset, per impositionem manuum,* qua



qua Presbyteratum accepisti, cum tamen constet, Timotheum non Presbyterum simplicem, sed Episcopum fuisse; quo modo etiam exposuit Anselmus, & quidam alij Latini, & ipse etiam Calvinus lib. 4. Institut. cap. 3. extremo. Quamquam nobis verior videtur Græcorum expositio, qui nomine Presbyterij intelligunt chorum, siue cœtum Presbyterorum, id est, Episcoporum, qui nouo Episcopo manus imponunt; sic enim exponūt Chrysostomus, Theodoretus, Theophylactus, & Oecumenius.

QVINTA obiectio ex cap. 20. Actor. vbi B. Paulus mit-<sup>10</sup> tens Ephesum, vocauit ad se maiores natu Ecclesiæ, id est, Presbyteros, & tamen dum eos alloquitur, Episcopos appellat, dicens: *Attendite vobis, & vniuerso gregi, in quo vos Spiritus sanctus posuit Episcopos, regere Ecclesiam Dei.* Item ex cap. 5. prioris epistolæ B. Petri, vbi Petrus Presbyteros sic alloquitur: *Seniores, qui in vobis sunt, obsecro consenior & testis Christi passionum, &c. Pascite, qui in vobis est gregem Dei. prouidentes non coacte, &c.* Vbi illud *Seniores* in Græco textu est *πρεσβυτερος*, illud autem *Prouidentes*, in Græco est *πρωτοπρεσβυτερος*. Denique ex epist. 2. & 3. S. Ioannis, in quibus Apostolus se Presbyterum vocat, cum sine vlla dubitatione Episcopus fuerit. Sed ad hæc omnia vno verbo respondetur. Nomina eo tempore fuisse communia, & propterea in his omnibus locis veros etiam Episcopos Presbyteros appellari, his addunt Patrum testimonia.

Est igitur SEXTA obiectio ex S. Hieronymo, qui in comment. 1. cap. epistola ad Titum ita scribit: *Idem est Presbyter qui Episcopus, & antequam Diaboli instinctu studia in religione fierent, & diceretur in populis: Ego sum Pauli, ego Apollo, ego Verò Cepha, communi Presbyterorum consilio Ecclesia gubernabatur; postquam Verò vnusquisque eos, quos baptizauerat, suos putabat esse, non Christi, in toto orbe decretum est, ut vnus de Presbyteris electus superponeretur ceteris, ad quem omnis Ecclesia cura pertineret, & schismatum semina tollerentur.* Et infra: *Sicut ergo Presbyteri sciunt se ex Ecclesia consuetudine, et, qui sibi prapositus fuerit, esse subiectos, ita Episcopi nouerint se magis consuetudine, quam dispositionis Dominica Veritate Presbyteria esse maiores, & in commune debere Ecclesiam regere.* Similia habet idem Hieronymus in epist. 85. ad Euagrium.



Hæc S. Hieronymi verba aliquipie interpretari conatur, vt S. Thomas, qui in 2. 2. q. 184. art. 6. scribit Hieronymum loqui solum de nominibus Episcopi & Presbyteri, nō de ipsa re. At certè verba illa citata: *Communi Presbyterorum consilio Ecclesie gubernabantur.* Et illa: (*Magis consuetudine, quam dispositionis Dominica Veritate Presbyteris esse maiores, &c.*) aliud significant, quam solam communitatem vocabulorum.

Ioannes Antonius DELPHINVS lib. 2. de Ecclesia docet, ex Hieronymi sententia initio nascentis Ecclesiæ omnes  
 10 Presbyteros fuisse Episcopos. Non quod idem sit Episcopatus & Presbyteratus, sed quod vtraq; dignitas omnibus Sacerdotibus primo illo tempore daretur. Deinde autem ad schismata ieiunda cœpisse aliquos solum Presbyteros ordinari, & hoc modo ex Ecclesiæ consuetudine factum esse, vt Episcopi maiores Presbyteris essent.

At hæc etiam solutio non plenè satisfacit; S. enim Hieronymus tueri conatur Presbyterorum dignitatem, qualis erat suo tempore aduersus insolentiam Diaconorum, vt patet ex epistola ad Euagrium; inde autem demonstrare niti-  
 20 tur dignitatem Presbyterorum esse maximam, quod eadem sit cum Episcopali: Nihil autem ad hoc probandum afferret, si solum doceret primos Presbyteros idèd fuisse Episcopis pares, quod haberent etiam Episcopalem potestatem, nec essent simplices Presbyteri. DEINDE, si idèd primi Presbyteri fuissent pares Episcopis, quòd essent etiam ipsi veri Episcopi: distinctio, quæ ex Hieronymi sententia postea exorta est, inde accidisset, quod aliqui simplicem Presbyteratum in ordinatione postea accepissent. At S. Hieronymus contrarium significat, docet enim Episcopatum esse nouum, & ex  
 30 Ecclesiæ consuetudine, non simplicem Presbyteratum; sic enim ipse ait: *Communi Presbyterorum consilio Ecclesia gubernabantur. postquam Verò unusquisque, &c.*

Michael MEDINA in lib. I. de sacrorum hominum origine, & continentia, c. 5. affirmat S. Hieronymum idem omnino cum Aërianis sensisse, neque solum Hieronymum in ea hæresi fuisse, sed etiam Ambrosium, Augustinum, Sedulium Primasium, Chrysostomum, Theodoretum, Oecumenium & Theophylactum: *Atque ita, inquit Medina, isti Viri alioque sanctissimi, & sanctarum Scripturarum consultissimi: quorum tamen sententiâ prius in Aërio, deinde in Valdensibus, postremo*



in Ioanne VViclefo, damnauit Ecclesia. Et infra: Ergo in Hieronymo & Græcis illis Patribus olim propter eorum honorem & reuerentiam hæc sententia aut dissimulabatur, aut tolerabatur in illis: contra in hæreticis, quod in aliis quoque multis ab Ecclesia declinarent, tanquam hæretica semper est damnata. Hæc ille.

Ceterum hæc Medinæ sententia (vt leuissimè dicam) valde est inconsiderata. Nam PRIMVM iniuriam facit tot clarissimis Patribus, quos sine vlla causâ, vt mox ostendam, Aërianos facit. DEINDE iniuriam facit Ecclesiæ, quam acceptionis personarum nota inurit. Nam cum omnes citati 10 auctores post Aërium vixerint, cur, quæso, Ecclesia vnam atque eandem sententiam in Aërio damnauit, in Patribus tolerauit? Nonne Aërio potius signoscendum fuit, qui ante definitionem Ecclesiæ peccasse videbatur, quam Patribus illis, qui damnatam iam hæresim sequuti sunt? DENIQUE iniuriam facit communi causâ Doctorum Catholicorum. Quam enim fronte sanctos Patres aduersus hæreticos adferemus, si eam sententiam ab Ecclesia damnatam dixerimus, quam omnes ferè Patres, tum Græci, tum Latini docuerunt?

At (inquit Medina) VValdenses hæretici Hieronymi testimo- 20 nio stuebantur, idem igitur illi, & Hieronymus senserunt. Egregium profectò argumentum. hoc modo concludere licebit etiam idem sentire Lutherum, & Paulum; nam Pauli testimonii passim vitur Lutherus. Mentuntur igitur VValdenses, cum Hieronymum auctorem sequi se dicunt.

SED instat Medina, Aërius non ignorabat, secundum Ecclesiæ leges Episcopum Presbytero esse maiorem, sed iure diuino pares esse affirmabat. Quare cum Hieronymus apertissimè dicat, non Dominicæ dispositionis veritate, sed sola consuetudine Ecclesiastica Episcopos maiores Presby- 30 teris esse, nihil omnino inter Aërij & Hieronymi sententiam interesse videtur.

RESPONDEO, tantum distare Hieronymum ab Aërio, quantum Catholicus ab hæretico, & cœlū ab inferis distat. Nam in primis S. Hieronymus ubiq; agnoscit Episcopum esse maiorem Presbytero, quantum ad ordinis potestatem, & hoc sine dubio iure diuino, vt patet ex epistola ad Euagrium, ubi sic ait: *Quid facit Episcopus, excepta ordinatione, quod non faciat etiam Presbyter?* At Aërius id discrimen non agnoscebat, vt ex Epiphanio potest intelligi, hæresi 73.

Deinde



Deinde quantum ad potestatem iurisdictionis, Aërius, vt etiam Lutherani, & Calvinistæ, non modò negabat iure diuino maiorem esse Episcopum Presbytero, sed etiam contendebat non rectè facere Ecclesiam, quæ Episcopos Presbyteris anteponat. At S. Hieronymus, etsi iure diuino agnoscere non videtur discrimen inter iurisdictionem Episcopi & Presbyteri, tamen agnoscit hoc ipsum discrimen tanquam legitimè, immò & necessariò ad schismata vitanda ab Apostolis introductum. Nò enim vult S. Hieronymus ante paucos annos ex temporum corruptela natum esse Episcoporum principatum, sed ab eo tempore, quo cœpit dici in Ecclesia: *Ego sum Pauli, ego Apollo, ego autem Cepha*. quæ verba Apostoli Pauli sunt. 1. Corint. 1. Proinde in ipsis Ecclesiæ primordiis, cum adhuc viuerent Apostoli, in toto orbe ab ipsis Apostolis, Ecclesias tum regentibus, vult S. Hieronymus iurisdictionem Ecclesiasticam ad Episcopos esse delatam. Itaque nihil commune est Aërio & Hieronymo. Neq; vllò modo credibile est, S. Hieronymum Aërij sententiam fuisse sequuturum, quam sciebat iam à sancto Epiphanio refutam.

Est autem hoc loco obseruandum, S. Hieronymum in illa sua sententia non aded constantem videri, vt valdè probabile sit, eum non omnino certum fuisse: Docuit enim in explicatione capitis primi ad Titum, consuetudinem, quæ Episcopos Presbyteris anteposuit, cœpisse ab eo tempore, quo dictum est: *Ego sum Pauli, ego Apollo, ego autem Cepha*, & tamen Presbyteros Episcopis pares esse colligere nititur ex epistola ad Titum, & ad Philipenses, & ex epistolis Petri & Ioannis, quæ scriptæ sunt post epistolam priorem ad Corinthios, vbi illa verba habentur: *Ego sum Pauli, ego Apollo, &c.* Deinde in libro de scriptoribus Ecclesiasticis in Iacobo, dicit Iacobum continuò à Christi ascensione ordinatum Episcopum Hierosolymorum: Non igitur fuit vnquam illud tempus, quo Ecclesiæ sine Episcopis a Presbyteris gubernabantur.

Præterea idem Hieronymus in epistola ad Euagrium, comparat Episcopum Aaroni, Presbyteros filiis Aaronis. & in epistola ad Marcellam de erroribus Montani, Episcopos Apostolis succedere dicit. At certè Aaron iure diuino maior erat ordine & iurisdictione, filiis suis, & Apostoli omnibus aliis Christi discipulis.



Denique in lib. I. aduersus Iouinianum, idem Hieronymus affirmat ab ipso Christo vnum electum ex duodecim, id est, Petrum, *Et capite constituto, schismatum tolleretur occasio.* At si Christus voluit inter ipsos Apostolos vnum eminere, cur non credemus etiam voluisse eum, vt inter Presbyteros vnus emereret? Ac de S. Hieronymo satis, vt etiam de Anselmo & Sedulio, qui in commentario, cap. I. epistolæ ad Timum, ad verbum Hieronymi sententiam retulerunt.

SEPTIMA obiectio sumitur ex Ambrosio, qui in commentario, cap. 4. ad Ephesios ita scribit: *Timotheum Episcopum à se creatum, Presbyterum vocat, quia primi Presbyteri Episcopi appellabantur, et recedente eo, sequens ei succederet; denique apud Aegyptum Presbyteri consignant, si praesens non sit Episcopus: sed quia ceperunt sequentes Presbyteri indigni inueniri ad primatus tenendos, immutata est ratio, prospiciente Concilio, et non ordo, sed meritum crearet Episcopum, multorum sacerdotum iudicio constitutum, &c.*

Sed hic locus non habet difficultatem. Nam (vt interim omittam, commentaria illa non videri ab Ambrosio edita) auctor eorum commentariorum loquitur solum de ratione 20 successionis Episcoporum, ac docet, initio nascentis Ecclesiæ, antiquissimum Presbyterum consueuisse ordinari Episcopum, eoq; mortuo succedere solitum, sine alia electione, antiquissimum item Presbyterum: sed non negat auctor iste primum illum Presbyterum, cum Episcopo succedebat, debuisse iterum consecrari, & nouam potestatem ac iurisdictionem accipere. Neque semel idem auctor clarissime docet, multum interesse inter Episcopum, & Presbyterum; nam in eodem commentario, cap. 4. ad Ephesios sic ait: *In Episcopo omnes ordines sunt, quia primus Sacerdos est, hoc est, Princeps 30 est Sacerdotum.* Et in caput 3. prioris ad Timotheum: *Episcopi, inquit, & Presbyteri vna ordinatio est, uterq; enim Sacerdos est, sed Episcopus primus est, et omnis Episcopus Presbyter sit, non tamen omnis Presbyter Episcopus; hic enim Episcopus est, qui inter Presbyteros primus est; denique Timotheum Presbyterum ordinatum significat, sed quia ante se alterum non habebat, Episcopus erat, unde, & quemadmodum Episcopum ordinet, ostendit: neq; enim fas erat, aut licebat, et inferior ordinaret maiorem; nemo enim tribuit quod non accepit.* Hæc ille. Vbi vides maiorem esse Episcopum Presbytero, & idè à Presbytero Episcopum



pum ordinari non posse, quodd Presbyter non habeat Episcopalem ordinationem.

OCTAVA obiectio ex Chrysostomo in commentario, cap. 3. prioris ad Timotheum, ubi sic legimus homil. 11. *Inter Episcopum atq; Presbyterum interest ferme nihil, quippe & Presbyteris Ecclesia cura permissa est, & quæ de Episcopis dixit, ea etiam Presbyteris congruunt: sola quippe ordinatione superiores illi sunt, atq; hoc tantum plusquam Presbyteri habere videntur.* Idem docent, & verbis ferè iisdem, Primasius, Theophylactus, & Oecumenius, in commentario eiusdem loci.

RESPONDEO, ex istis ipsis verbis apertè colligi, maiores esse Episcopos Presbyteris, cum Episcopi ordinare possint, Presbyteri non possint, ut auctores citati vna voce testantur.

At, inquires, saltem quoad iurisdictionem pares sunt Episcopis Presbyteri, quandoquidè nihil habent Episcopi, quod Presbyteri non habeant, excepta ordinatione. RESPONDEO, hos auctores cum nihil tribuunt Episcopo, quod non sit cum Presbyteris commune, excepta ordinatione, loqui de iis rebus, quæ nullo modo Presbyteris conveniunt; tale autem nihil est, nisi ordinatio præcipuè Sacerdotum. Nam potestas iurisdictionis, ex commissione Episcopi, potest etià Presbyteris convenire, immò etiam confirmare baptizatos possunt Presbyteri ex dispensatione. At ordinatio Sacerdotum ita propria Episcoporum est, ut nullo modo Presbyteris permitti possit.

Quod autem Chrysostomus senserit, Apostolorum tempore Episcopum à Presbytero distinctum fuisse, colligitur etiam ex hom. 1. in epistolam ad Philippenses, ubi exponens illud, cum Episcopis, & Diaconibus: *Quid, inquit, hoc sibi vult? itane vniui civitatis plures erant Episcopi? Nequaquam; sed hoc titulo designat Presbyteros, tunc enim temporis adhuc vocabulum erat commune.*

NONA obiectio ex Theodoro, qui in commentario, cap. 1. ad Philippenses aliquoties repetit, Presbyteros fuisse, quos Paulus Episcopos appellat. Sed hoc iam antea explicatum est; Theodoretus enim docet quidem, olim Presbyteros Episcoporum nomen habuisse: sed ibidem addit veros Episcopos nomine Apostolorum, eo tempore appellari solitos; ita ut semper & re & nomine maiores fuerint Episcopi Presbyteris, ex sententia Theodoreti. Quare idem auctor in  
caput



caput tertium prioris ad Timotheum ita scribit: *Sed tamen, etiamsi Presbyteris has leges constituit diuinus Apostolus, clarum est, quod has leges oportet primos seruare Episcopos, et qui sint maiorem dignitatem assequeuti.*

DECIMA obiectio ex Augustino qui in epist. 19. ad Hieronymum, sic ait: *Quamuis enim secundum honorum vocabula, que iam Ecclesia vsus obrinuit, Episcopatus Presbyterio maior sit, in multis rebus tamen Augustinus Hieronymo minor est.*

RESPONDEO, illud (iam obrinuit) non opponi tempori antiquo ipsius Ecclesie, sed tempori quod fuit ante exortum 10 Ecclesie nostrae Christianae: Itaque non est sensus, olim Episcopi, & Presbyteri erant aequales, sed iam vsus obtinuit, vt Episcopatus Presbyterio maior sit; sed hic est sensus; Ante Christiana tempora, nomina ista Episcopus & Presbyter non erant honoris vocabula, sed officij, aut aetatis, nunc autem honoris ac dignitatis nomina sunt, & secundum haec nomina Augustinus Hieronymo maior est, quamuis aliis multis nominibus Augustinus Hieronymo minor sit.

VNDECIMA obiectio; Presbyteri succedunt Apostolis non minus quam Episcopi, vt patet ex Clemente lib. 2. con- 20 stit. cap. 32. & Ignatio in epistola ad Smyrneses: Non igitur sunt Presbyteri Episcopis inferiores.

RESPONDEO, Episcopos & Presbyteros variis modis a Patribus comparari, sed semper seruata proportionem, & distinctionem. Aliquando dicunt Episcopum tenere locum Dei; Presbyterum locum Christi, Diaconum locum Apostolorum: Ita Clemens lib. 2. constit. cap. 30. & Ignatius in epistola ad Trallianos. Aliquando Episcopo dant locum Christi, Presbyteris locum Apostolorum, Diaconis locum Discipulorum LXXII. Ita Clemens loco citato li. 2. cap. 32. & Ignatius ad Smyrneses. Aliquando Episcopis dant locum Apostolorum, Presbyteris locum LXXII. discipulorum, vt Patres supra citati.

VD DECIMA obiectio; Christus Presbyteros ordinauit in cena, vt Catholici omnes docent: at Episcopos nusquam legitur ordinasse: Non igitur Episcopatus iure diuino est introductus. RESPONDEO, a Christo B. Petrum ordinatum fuisse Episcopum, a B. Petro Iacobum & Ioannem, ab his tribus ceteros Apostolos, vt in lib. 1. de summo Pontifice supra ostendimus.



## CAPVT XVI.

## De Cardinalibus.

**D**E Cardinalibus Romanæ Ecclesiæ pauca quædam addenda sunt, vt Ioanni Caluino etiam de hoc ordine Clericorum breuiter respondeamus. Dicemus autem PRIMO, de antiquitate, & significatione nominis Cardinalium. SECUNDO, de antiquitate, & varietate officij Cardinalium. TERTIO, de comparatione Cardinalium cum Episcopis: Hæc enim tria Caluinus attingit lib. 4. Instit. cap. 7. §. 30.

Si quis autem plura cognoscere velit, legat ex Theologis Aluarum Pelagium lib. 2. de planctu Ecclesiæ, art. 16. Augustinum Triumphum in summa de potestate Ecclesiæ, q. 102. Thomam VValdensem lib. 2. doctrinalis fidei, art. 3. cap. 54. Ioannem de Turrecremata lib. 1. summæ de Ecclesiâ, cap. 81. 82. 83. & 84. S. Antoninum in summa Theologica, 3. parte, tit. 21. Ioannem Antonium Delphinum lib. 2. de Ecclesiâ. Ex  
 20 CANONISTIS, Andream Barbatium in tractat. de præstantia Cardinalium ad Bessationem, Martinum Laudensem in tractat. de Cardinalibus, Dominicum Iacobarium li. 1. de Conciliis, art. 12. & Ioannem Hieronymum Albanum in libro de Cardinalibus. Ex HISTORICIS, Onuphrium Panuinum in libello de Episcopatibus, Titulis, & Diaconiis Cardinalium.

Vtigitur à PRIMO incipiamus, Caluinus loco notato, ante Gregorij tempora dicit se non legisse nomen Cardinalium: At in Concilio Romano sub Syluestro canon. 6. legimus septem fuisse Diaconos Cardinales in Romanâ Ecclesiâ; præcessit autem Sylvester Gregorium annis ferè trecentis; neque tamen tunc primum cœpit hoc nomen; non enim Concilium illud instituit Cardinales, sed solum iussit vt præter Cardinales Diaconos Romanæ Ecclesiæ, essent etiam duo Diaconi ad examen Parœciarum.

Porrò nomen CARDINALIS idem ferè significare videtur quod Principalis, siue is à quo alij pendent, vt à cardine ostia dependere solent: Hinc enim & virtutes Cardinales, & venti Cardinales, & puncta cœli Cardinalia dici solent. & Augustinus lib. 1. de Baptismo, cap. 6. Primarios Donatistas,  
 Cardi-



Cardinales Donatistas appellauit. Cur autem Electores Pontificis Cardinales dicantur, non omnes explicant eodem modo.

CALVINVS loco notato docet, hoc nomen tempore S. Gregorij proprium fuisse Episcoporum, proinde non rectè nunc tribui Presbyteris & Diaconis, aut solis Episcopis Romanæ Curix: *Hic titulus*, inquit, *Gregorij etate in solos Episcopos compete- 10*  
*bat, nam quories meminit Cardinalium, non Romanæ Ecclesiæ, sed aliis quibuslibet eos attribuit, & in summa nihil aliud sit sacerdos Cardinalis, quàm Episcopus.* Hæc ille. At Cal-  
uinus in exploratum errorem incidit, nam S. Gregorius li. 5. epist. 11. ad Fortunatum Episcopum Neapolitanum meminit Diaconorum Cardinalium. & li. 11. epist. 34. ad Ioannem Episcopum Syracusanum meminit Presbyterorum Cardinalium. & Ioannes Diaconus libro 3. vitæ S. Gregorij, cap. 7. enumerat Episcopos, quos S. Gregorius ex Presbyteris Cardinalibus fecerat: Non igitur verum est, idem esse apud Gregorium, Episcopum & Cardinalem.

LEO IX. Pont. Max. in epistola ad Michaëlem, cap. 32. dicit, Clericos Romanæ Ecclesiæ Cardinales vocari, quodd 20  
summo Pontifici proximè adhæreant, qui est veluti cardo totius Ecclesiæ. Nam vt in Cardine ostium vertitur, & regitur, ac sustentatur, sic etiam à summi Pontificis prouidentia, & firmitate tota Ecclesia pendet. Hæc verò explicatio rectè docet, cur Cardinales Romanæ Ecclesiæ dicantur præ ceteris, & per Antonomasiæ Cardinales, at non explicat, cur simpliciter dicantur Cardinales, cum constet etiam ali-  
bi esse, & fuisse qui dicerentur Cardinales, vt patet ex Gregorio, locis citatis, lib. 5. epist. 11. & lib. 11. epist. 34. & ex Concilio  
Meldenſi can. 54. 30

ONUPHRIVS in libro de Cardinalium titulis existimat, Presbyteros & Diaconos Cardinales dictos esse eos, qui præerant aliis Presbyteris vel Diaconis eiusdem Ecclesiæ, quasi principales Presbyteri, vel Diaconi in illa Ecclesia, erant enim plures Presbyteri in eadem Ecclesia, sed Præses tantum dicebatur Cardinalis.

Hæc Onuphrij explicatio non videtur vera; nam in eodem titulo plures erant aliquando Cardinales, vt patet ex Synodo S. Gregorij, quæ habetur libro 4. regist. capite 88. ubi ponuntur subscriptiones Presbyterorum Cardinalium,



& inter eas tres inueniuntur tituli S. Balbinæ, duo S. Damasi, duo S. Syluestri, duo sanctorum Apostolorum: Non igitur istantùm Cardinalis dicebatur, qui præerat titulo. PRÆTEREA, tempore S. Syluestri, septem tantùm Romæ erant Diaconi Cardinales; nam adhuc recens erat eo tempore Canon XIV. Concilij Neocesariensis, vbi definitur, in qualibet ciuitate, quamuis magna, septem tantùm debere esse Diaconos, & tamen illi omnes Romæ dicebantur Cardinales, vt patet ex Concilio Romano sub Syluestro can. 6. Non igitur  
 10 Diaconus Cardinalis erat, qui præerat aliis Diaconis eiusdem Ecclesiæ. Adde postremò, quod iuxta hanc Onuphrij explicationem, nulla ratio reddi posset, cur dicerentur quidam Episcopi Cardinales; non enim dici possunt Episcopi Cardinales, quòd præfint aliis Episcopis suæ diocesis, sicut Presbyter Cardinalis, quòd præsit Presbyteris sui tituli; nam non sunt in vna diocesi plures Episcopi.

Existimo igitur nomen Cardinalis primò impositum esse loco, & à loco deriuatum ad personas: Dicebantur enim tituli Cardinales, quædam Ecclesiæ principales, vbi Baptisma  
 20 conferebatur; & dicebantur Ecclesiæ vel tituli Cardinales, ad differentiam aliorum locorum sacrorum minus principalium: Inde autem Presbyter, qui eam Ecclesiam regebat, dicebatur Presbyter Cardinalis. Pari ratione Diaconi Cardinales erant loca quædam principalia in vrbe distincta iuxta numerum regionum, & qui in eis residebant Diaconi, dicebantur Cardinales Diaconi, ab Ecclesia videlicet Cardinali, quam tenebant. Sic etiam postmodum dicti sunt Episcopatus Cardinales, & inde Episcopi Cardinales sex illi, qui ad eligendum Pontificem conueniebant, & eidem Pontifici  
 30 à consiliis erant præter ceteros orbis Christiani Episcopos.

Quod autem à loco cœperit hoc nomen, cognosci potest ex Concilio Meldensi can. 54. vbi sic legimus, vt titulos Cardinales in vrbibus, vel suburbiis constitutos Episcopus canonicè ordinet, & disponat. Item ex Ioanne Diacono in vita S. Gregorij lib. 3. cap. 11. vbi sic ait: *Cardinales violentè in Patriaci ordinatos forensibus, in pristinum Cardinem Gregorius reuocabat.* Vbi Cardinem vocat Cardinalem titulum siue Ecclesiam. Ac de nomine quidem hætenus. Si quis autem velit cognoscere nomina, & numerum titulorum, Diaconiarum, & Episcopatum Cardinalium, Onuphrium consulat in libro de Cardinalibus,



Iam de officio, & officij antiquitate breuiter dicamus. Tria sunt officia Cardinalium: Primum est commune cum Episcopis, Presbyteris & Diaconis ceteris; omnes enim Cardinales, aut Episcopale, aut Presbyterale, aut Diaconale officium habent: Alterum officium est, summum Pontificē eligendi: Postremum eidem Pontifici perpetuū assistere, eumq; in regenda vniuersa Ecclesia consilio, & industria adiuuare. Ex his officiis primum negari non potest, quin sit antiquissimum. Neq; id negat Calvinus, quin potius hoc solum agnoscat; sic enim scribit loco citato lib. 4. cap. 7. §. 30. *Et sanè nihil officij tunc habebant, nisi & in doctrina, & Sacramentorum administratione Episcopo adessent ac subessent.* Hæc ille.

At CALVINVS secum pugnare mihi videtur; nam eodem lib. 4. Instit. cap. 4. §. 2. docet, antiquissimis temporibus eum fuisse vsum in Ecclesia, vt Presbyteri eligerent Episcopum, & cum illo ita Ecclesiam communi consilio regerent, vt nihil plus Episcopus haberet in cœtu Presbyterorum, quam Consul in senatu: *Presbyteri, inquit, ex suo numero vnum eligebant, cui specialiter dabant titulum Episcopi.* Et infra: *Quas partes habet Consul in senatu, eas habet Episcopus in Presbyterorum cœtu.* Hæc ille. Quod si verum est, certè sequitur, vt quod nunc Romæ Cardinales faciunt, dum Episcopum ex suo numero eligunt, aut tanquam senatores quidam Ecclesiastici cum eo Ecclesiam regunt, antiquissimum sit, ac proinde omnia tria officia sint antiquissima.

Est autem hoc loco obseruandum; Omnia quidem tria Cardinalium officia esse antiquissima, & ab ipso tempore Apostolorum inchoata, sed tamen non esse eque antiquum, vt soli Cardinales duobus officiis posterioribus fungantur: Nam à tempore Apostolorū per multos annos, immo etiam per aliquot secula, quia pauci erant Presbyteri, & Diaconi, omnes simul ad electionē Episcopi, & ad Concilia vocabantur, neq; erat opus tunc distinguere à Cardinalibus nō Cardinales, sicut etiam in aliis Ecclesiis non distinguebantur Canonici à non Canonici. Quare Cyprianus cum aliquoties scribat ad Romanum Clerum, non scribit ad solos Cardinales, sed ad omnes Presbyteros & Diaconos Romanę Ecclesię. & similiter illi cum Cypriano respondent, Presbyteri & Diaconi omnes respondent. Vid. lib. 2. epistola 7. & lib. 3. epist. 5. & 21.



Deinde autem cum creuisset multitudo Cleri, vocabantur quidem omnes ad electionem faciendam, sed non omnes ad Concilia vocabantur, sed aliqui principales, qui Romæ, & aliis quibusdam in locis Cardinales dicebantur. Id constat ex Synodo Gregorij lib. 4. registri, cap. 88. Nam solum Concilio interfuerunt ex Presbyteris XXXIV. & ij Titulares omnes, id est, Cardinales. certum autem est, tunc Romæ fuisse multo plures Presbyteros, quam XXXIV. Nam si tempore S. Cornelij circa annum Domini C. C. L. in medio  
 10 persequutionum, regnantibus idololatriis, tamen erant Romæ XLVI. Presbyteri, ut ex epistola eiusdem Cornelij refert Eusebius lib. 6. historiæ, cap. 33. ceterum multo plures erant tempore S. Gregorij, circa annum Domini DC. quando nullus in vrbe erat Paganus. Denique, postremis quingentis annis neque ad Concilia, neque ad electionem admissi sunt omnes Clerici, quod nimis multi essent, sed soli Cardinales, ut supra ostendimus, cum de uocatione Ministrorum ageremus.

Quantum ad TERTIVM, de comparatione Cardinalium  
 20 cum Episcopis, fusè tractant supra citati auctores, sed in hoc tamen ferè omnes conueniunt, quod si consideremus ordinis potestatem, maior sit Episcopus Presbytero, vel Diacono Cardinali. Nam Episcopus ordinat Presbyteros, confirmat baptizatos, aliaq; id genus facit, quæ Cardinales Presbyteri, vel Diaconi facere non possunt. Quæ etiam ratione summus Pontifex Episcopum se vocat, non Cardinalem, & Episcopos omnes appellat venerabiles fratres, Cardinales autem dilectos filios, quomodo vocat etiam Laicos.

Pari ratione si consideremus iurisdictionem in propriam  
 30 Ecclesiam, id est, Episcopi in suam Diocesim, & Cardinalis in suum titulum, aut Diaconiam, maior est Episcopus Cardinali Presbytero, vel Diacono: Nam in primis maior est ordinariè Diocesis Episcopi, quam titulus Cardinalis, ac præterea Episcopus in sua Diocesi amplissimam habet iurisdictionem tanquam proprius & ordinarius Pastor, ferendi leges, dispensandi, puniendi, indulgendi, &c. At Cardinalis Presbyter & Diaconus, cum in suo titulo sit veluti Parochus Episcopo subiectus, nihil potest, nisi quantum Episcopus ei permiserit.

At si consideremus regimen Ecclesiæ vniuersalis, maior  
 est



est Cardinalis Presbyter, vel Diaconus Episcopo non Cardinali. Nam Episcopi simplices nunquam adhibentur ad regimen vniuersalis Ecclesiæ, nisi rarissimè, id est, cùm ad generale Concilium conuocantur. At Cardinales ferè quotidie præstò sunt Pontifici, neque vllum negotium maioris momenti sine eorum consilio peragitur. Et quia hinc fit, vt Episcopi à Cardinalibus, vt summi Pontificis cooperatores, iudicentur, creentur, deponantur, non autem contra Cardinales ab Episcopis; propterea absolūtè Cardinalis Episcopum non Cardinalem præcedit. atq; hanc rationem vt præcipuam affert etiam Eugenius Pontifex I V. in epistola ad Archiepiscopum Cantuariensem, quæ exstat apud Dominicum Iacobatum lib. 1. de Conciliis, art. 12. & ante Eugenium S. BERNARDVS lib. 4. de consideratione, de Cardinalibus loquens: *Veniamus, inquit, ad collaterales, & coadiutores tuos, hi seduli tui, hi intimi tui.* Et infra: *An non eligendi de toto orbe, orbem iudicaturi?* Et in epist. 188. ad Cardinales scripta: *Nulle dubium, inquit, quin ad vos specialiter spectet tollere scandala de regno Dei, surgentes succidere spinas, sedare querelas.* Et infra: *Agite pro loco quem tenetis, pro dignitate qua polletis, pro potestate quam accepistis, &c.* vbi apertissimè agnoscit S. Bernardus maiorem in Cardinalibus, quàm in Episcopis potestatem.

Sed occurrit Calvinus loco notato, lib. 4. cap. 7. §. 30. & obicit tria testimonia: *Videò, inquit Calvinus, fuisse tunc Episcopis minores, quos nunc longè antecellunt. Notum est illud Augustini epist. 19. ad Hieronymum; quanquam secundum honorum vocabula, qua iam Ecclesiæ usus obtinuit, Episcopatus Presbyterio maior sit, tamen in multis rebus Augustinus Hieronymo minor est.* Hic certè Romana Ecclesiæ Presbyterum ab aliis minimè discernit, sed omnes ex æquo postponit Episcopis: idq; eousque fuit obseruatum, vt in Concilio Carthagenensi, cùm duo adessent Legati Romana sedis, vnus Episcopus, secundus Presbyter, hic in vltimum locum reiectus fuerit. Verum ne nimis Vetera prosequamur, exstat Concilium sub Gregorio habitum Romæ, in quo Presbyteri vltimo loco sedent, & seorsum subscribunt, Diaconi locum nullum in subscriptione habent. Hæc ille.

Sed Augustini testimonium ad rem non facit; non enim negamus Episcopatum Presbyterio maiorem esse, sed dicimus, Presbyterum Cardinalem Episcopo nō Cardinali esse maiorem, non quòd Presbyter sit maior Episcopo, sed quòd



Cardinalis maior sit non Cardinali. Nam alioqui Episcopus Cardinalis Presbyterum Cardinalem, & Presbyter Cardinalis Diaconum Cardinalem semper præcedit.

*At, inquit Galuinus, Augustinus non quemuis Presbyterum, sed Hieronymum Presbyterum Romanæ Ecclesiæ Episcopo postponit.*

RESPONDEO, S. Hieronymum non Romanæ Ecclesiæ, sed Antiochenæ Presbyterum fuisse; id enim ipse testatur in epist. 61. ad Pammachium, de erroribus Ioannis Hierosolymæ Episcopi; neq; repugnat quod ipse aliquando Romæ fuerit, & Damasum Pontificem iuuerit in epistolis scribendis, ut ipse testatur in epist. ad Ageruchiam de Monogamia. Nam etsi Romæ fuerit, non tamen habuit Romæ titulum aliquem proprium, siue Ecclesiam regendam, ut Cardinales habent; quocirca cum iam ex Roma rediisset, & in Syria degeret, quando scripsit epistolam ad Pammachium aduersus Ioannem Hierosolymitanum, non tamen ait, se Romanum, sed Antiochenum Presbyterum fuisse. Et sanè, si potuisset verè dicere, se Romanæ Ecclesiæ Presbyterum Cardinalem esse, vel fuisse, libenter dixisset. Cupiebat enim Ioanni Episcopo Hierosolymæ demonstrare, se Presbyterum fuisse maioris cuiusdam Ecclesiæ, quam Hierosolymitana esset; & proinde se non reliquisse suam Ecclesiam, ut in Ecclesia Hierosolymitana aliquid quæreret: *Ob id, inquit, & ego Antiochiam, & ille Constantinopolim, Urbes celeberrimas, deseruimus, non ut te in populis prædicantem laudaremus, sed ut in agris & in solitudine adolescentia peccata deslentes, Christi in nos misericordiam desllecteremus.* Hæc ille. Cum igitur constet, semper Romanam Ecclesiam Antiochenæ prælatam fuisse, certè S. Hieronymus libenter dixisset, si id verè dicere potuisset, ob id & ego Romam, & ille Constantinopolim, &c.

Neque etiam testimonium Concilij VI. Carthaginensis valde est ad rem. Nam etsi in eo Concilio Presbyter Romanus federit post Episcopos, tamen in Concilio Nicæno, in Ephesino, in Chalcedonensi, in VI. VII. & VIII. Synodo generali, Romani Presbyteri federunt ante Episcopos; sed quanquam hæc ita se habent, fateor tamen, olim Episcopos quoscunq; prælatos fuisse Cardinalibus non Episcopis, imò etiam Cardinalatum gradum fuisse ad Episcopatum, ut Onuphrius rectè docet in libro de Cardinalibus, & apertissimè colligitur ex lib. 1. cap. 7. vitæ S. Gregorij. Postea tamen

muta-



mutatus est ordo, & cœpti sunt Cardinales Episcopis anteponi, & Episcopatus gradus esse ad Cardinalatum; cuius mutationis duplex ratio assignari potest. VNA, quòd ad solos Cardinales deuoluta sit electio summi Pontificis; Nam quo tempore Pontifices eligeabant Imperatores, vel Clerus & populus, non est mirum, si non tanti fierent Cardinales. At posteaquam cœperunt soli ipsi eligere, & etiam soli ipsi, vt plurimum, eligi, non sine causa cœpit dignitas Cardinalitia pluris fieri, quam antea.

ALTERA causa est, quòd soli Cardinales cœperint adesse se summo Pontifici in consiliis; Nam antea Cardinales neque soli, neque primarij Consiliarij Pontificis erant, siquidem primis sexcentis, vel octingentis annis, summi Pontifices ad grauiora negotia Ecclesiæ diiudicanda cogeabant Concilia nationalia Episcoporum Italiæ, quibus Conciliis intererant quidem Cardinales Presbyteri, sed tamen primus locus Episcoporum erat. Id cognosci potest ex tomis Conciliorum, vbi plurima inueniuntur Concilia Romana, siue Lateranensia, celebrata ab anno Domini CCC. ad DCCC.

Quocirca non erat ratio, cur eo tempore Cardinales Presbyteri Episcopis anteponerentur, cum eo tempore non minus, immò magis Pontificem iuuarent in Ecclesiæ vniuersali regenda Episcopi, quàm Cardinales. At postea creuerunt negotia Ecclesiæ Romanæ, præsertim cum accessisset principatus temporalis, tempore Pipini & Caroli Magni: proinde egebat summus Pontifex Consiliariorū ope multò sapius, quam antea. Neque poterat tam sæpe conuocare Concilia Episcoporum, quàm necesse erat; Concilia enim vix tertio quoque anno cogi poterant, Pontifex autem quolibet anno sapius egebat consilio. Itaque vsu docente, & necessitate cogente his postremis annis sexcentis vel septingentis cœperunt paulatim omitti Concilia Episcopalia, & res tota redigi ad senatum Cardinalium. Potuisse autem hoc fieri, & rectè factum esse, in dubium reuocari non potest; nam non teneretur Pontifex hos potius, quàm illos in consilium adhibere.

Deinde, hac ratione multa commoda consequuta sunt. PRIMVM, quòd habeat nunc summus Pontifex senatum in promptu, ita vt possit etiam singulis diebus, si velit, de rebus grauissimis deliberare. ALTERVM, quòd hoc fiat sine



detrimento Ecclesiarum particularium. Nec enim possent Concilia Episcoporum saepe cogi sine detrimento Ecclesiarum, quibus absentia Pastorum perniciosa est. TERTIUM, quod habeat Consiliarios magis instructos, & exercitatos, cum hæc sola & assidue tractent: facta autem legitimè hæc mutatione Concilij Pontificij ab Episcopis & Cardinalibus ad solos Cardinales, mirum esse non debet, si etiam facta est mutatio dignitatum.

Sed placet, ad finem huius loci repugnantiam verborum  
 10 Caluini in extrema disputatione cap. 7. lib. 4. Instit. annotare. Nam in vi. §. miratur Cardinalium amplitudinem: *Nescio, inquit, qui factum sit, & ita subito in tantam amplitudinem emergerint, Et mox infra: Nunc adeò mutata sors est, & facti sunt Regum & Caesarum cognati. Nec dubium est, quin & cum suo capite sensim creuerint, donec ad hoc dignitatis fastigium euecti fuerunt.* Hæc ille. Qui tamen continud subiungit contrarium: *Impleri, inquit, in illis oportuit quod de talibus ait Malachias; Vos recessistis de via, & offendere fecistis in lege plurimos; propterea ecce ego dedi vos contemptibiles & Giles omni populo.* At quomodo, quæso, ista cohererent, ut in summum fastigium amplitudinis creuerint Cardinales, ita ut Regum ac Caesarum cognati facti sint, & tamen contemptibiles acviles euaserint omni populo? Sed de his satis.

## CAPVT XVII.

## De Chorepiscopis.

30 **D**IXIMVS de distinctione & officio Clericorum eorum, qui etiam hoc tempore locum suum habent in Ecclesia; nunc addendum visum est aliud de Chorepiscopis, quorum nomen & officium olim in vsu erat, nunc autem penè interitisse videtur.

Igitur Chorepiscopi dicebantur olim Presbyteri quidam, qui in pagis, aut oppidulis curam animarum gerebant loco Episcoporum, ut nunc ferè Parochi faciunt. Dicebantur autem Chorepiscopi, vel, ut Damasus indicat in epistola 3. quasi villarum Episcopi, nam *Χωρε* Græcè oppidum ac regionem significat: vel potius, ut Concilium Neocæsariense canone decimo tertio, & Antiochenum canone 8. docent, quasi Vicarij Episcopi, vel Vicarij Episcoporum, seu loco

Episcopo



Episcoporum cōstituti; ὧς enim locum etiam significare potest. Porro eiusmodi Chorepiscopi non poterant Presbyteros & Diaconos ordinare, nec Chrismate fidelium frontes inungere, nec templa, aut altaria consecrare. cetera ferè omnia præstare poterant, quæ præstant Episcopi, ut cognosci potest ex Concilio Ancyrano can. 12. & Antiocheno can. 10. & Hispalensi II. can. 7. item ex Damaso in epist. 3. Leone epist. 86. alijs 88. & Ioanne III. in epistola ad Episcopos Germaniæ & Galliæ.

Sed quæstio hoc loco occurrit; An Subdiaconos ordinare Chorepiscopis aliquando licuerit. Nam in Concilio Antiocheno can. 10. id eis licuisse disertis verbis asseritur. Contra autem, id eis minimè licuisse, Damasus Papa in epist. 3. æquè disertis verbis affirmat; Concilia & Pontifices ceteri suprâ citati negât licere Chorepiscopis Presbyteros vel Diaconos ordinare; de Subdiaconis, ceterisque ordinibus nihil expresse dicunt.

RESPONDEO, quosdam fuisse Chorepiscopos, qui verè Episcopalem consecrationem acceperant, sed Chorepiscopi dicebantur, quòd non haberent propriam Ecclesiam, sed in aliena Diœcesi ministrarent, quales sunt hoc tempore Episcopi quidam Titulares, qui & Suffraganei dici solent. Alios verò Chorepiscopos fuisse, qui nihil aliud, nisi Presbyteri essent, sed, ut diximus, in pagis, ac villis, seu etiam oppidulis Episcopum aliquo modo repræsentarent. De prioribus loqui videtur Concilium Antiochenum, ut etiam Damasus annoravit in epist. 3. nam ita incipit Canon: *Chorepiscopi, qui manus impositionem ab Episcopis acceperunt, & Et Episcopi sunt ordinati, &c.* ubi non de omnibus Chorepiscopis loquitur, Concilium, sed de illis tantùm, qui à pluribus Episcopis, ritu Pontificum, sunt cōsecrati: præterea in eodem canone Concilium non solum his Chorepiscopis permittit, ut Subdiaconos absolute ordinent, sed etiam ut Presbyteros & Diaconos ordinare possint, si id Episcopus loci permiserit. ex quo certè sequitur, eos Chorepiscopos veros Episcopos fuisse.

Porro in fine illius canonis, ubi legimus (*Chorepiscopus ab Episcopo loci ordinandus est*) non de iisdem Chorepiscopis agitur, sed de illo altero genere; voluit enim Concilium le-



gem statuere, vt deinceps Chorepiscopus ordinetur ab vno Episcopo, & proinde Presbyter sit, non Episcopus. De quo genere Chorepiscoporum loquitur Damasus in epist. 3. cum dicit, non licere Chorepiscopis ordinare Subdiaconos.

Cetera autem Concilia & Patres, qui negant, Chorepiscopis licere ordinare Diaconos, & de Subdiaconis nihil dicunt, videntur nomine Diaconorum etiam Subdiaconos accepisse, cum sit vterque sacer ordo, & sæpe apud veteres eodem nomine appellantur. Quod si euidenter ostendi possit, concessum aliquando fuisse Chorepiscopis secundi generis, vt Subdiaconos ordinarent; dicendum erit, id fuisse priuilegium, & dispensationem quandam, qualis etiam fuit quibusdam in locis, vt Presbyteri, absente Episcopo, Confirmationis Sacramentum exhiberent; vt Ambrosius scribit de Sacerdotibus Ægypti, in commentario, cap. 4. epistolæ ad Ephesios. Atque hæc de distinctione & officio Clericorum.

## CAPVT XVIII.

29

*De cœlibatu Sacerdotum; Sitne iure diuino  
annexus sacris ordinibus cœlibatus, an  
non?*

**S**EQVITVR quarta Disputatio, quæ est de cœlibatu, seu continentia hominum sacra-  
torum, quæ quidem trimembris erit. Primùm enim explicandum occurrit; Sitne iure diuino annexus cœlibatus ordinibus sacris. Deinde, si constiterit non ita esse, vtrum saltem iure Apostolico, ac rectissimè id factum sit. Postremò, num digami Apostolica lege arceantur à sacris ordinibus.

Ac, vt à primo incipiamus, Ioannes Maior in 4. dist. 24. quæst. 2. de iure diuino esse putauit, quodd votum Sacerdotum solenne sit, ac proinde indispensabile esse. Idem ferè docuit Glichtouæus libro de continentia Sacerdotum, cap. 4. & sequentibus, vbi duo dicit, quæ nescio, an inter se bene cohæreant. Vnum est, de iure diuino esse, vt qui est sacris ordinibus initiatus, non possit uxorem ducere, neque in hoc vl-

lam



Iam dispensationem cadere posse. Alterum est, eos, qui vxores duxerunt, non posse sacris ordinibus initiari, nisi deinceps continere velint, esse præceptum Ecclesiæ, & à Siricio Papa primum editum, nec vnquam ab Ecclesia Orientali receptum fuisse. Itaque licuisse in tota Ecclesia Sacerdotibus vti vxoribus, quas ante ordines duxerant, vsque ad tempora Siricij; in Ecclesia autem Orientali, & nunc licere, & semper licuisse.

At beatus Thomas in 2. 2. quæst. 88. art. 11. disertè docet, votum continentię esse annexum ordinibus sacris ex solo Ecclesiæ decreto, ac proinde dispensabile esse. Idem docet Caietanus in opusculis, tomo 1. tract. 27. & Sotus lib. 7. de iustitia, quæst. 6. art. 2. vbi etiam docet, quod ego verissimum puto, decretum hoc, quo votum est annexum ordinibus, non quidem propriè diuinum esse, sed tamen esse Apostolicum, & in tota Ecclesia à temporibus Apostolorum longo tempore esse seruatum; sed quia hoc multis rationibus in sequenti capite contra hæreticos cõfirmabimus: nunc solùm breuiter probandum est, non iure diuino, sed humano duntaxat prohibitum esse coniugium Sacerdotibus, & proinde in hoc dispensari posse.

Probatur PRIMO, ex altero eorum, quæ Clichtouæus asserit: non est de iure diuino, vt coniugati, si ordinentur, ab vxoribus suis abstineant; igitur neq; est de iure diuino, vt Sacerdotes non ducant vxores. Nam Matrimonium non pugnat cum ordinibus ratione essentię suæ, sed ratione officij seu exercitij coniugalis; si enim Deus prohibuisset Sacerdotibus coniugium, certè prohibuisset propter actum coniugalem, qui hominem reddit totum carnalem, & ineptum ad diuina; necnon propter sollicitudinem domus, & libero-  
rum, quæ plurimas parit distractiones, non autem propter solum Sacramentum coniugij, vel propter contractum Matrimonij, qui celebratur solo consensu animorum, & est res breuissima & honestissima. Si ergo licuit Sacerdotibus iure diuino habere vxores, quas ante ordinationem duxerant, & eis vti maritorum more: Cur, quæso, non licuisset etiam post ordinationem ducere? Adde, quodd rationes, quas Clichtouæus pro se adducit, omnes sumuntur à puritate munerum sacerdotalium, cui certè non repugnat, vxorem ducere, vel duxisse, sed ei cohabitare.

Non



Non esse autem iure diuino prohibitum, ne Sacerdotes vtantur vxoribus, quas duxerant ante ordinationem, conceditur à Clichtouæ: sed propter quosdam alios, qui de ea re dubitant, probatur apertissimè ex eo, quòd Ecclesia Romana multis iam seculis permittit Græcis Sacerdotibus vsum vxorum, quas ante ordinationem duxerant, vt patet ex cap. Cum olim, de Clericis coniugatis. Adde Gregorij testimonium lib. 1. epist. 42. vbi permittit Subdiaconis, vt libere vtantur vxoribus suis, quas duxerant ante ordinationem, licet prohibear deinceps eiusmodi ordinari, nisi continentiam voueant.

SECUNDO probatur, quia in tota Scriptura nullum tale existat præceptum. Nam in Testamento veteri Sacerdotibus licitum erat vxores ducere: In nouo autem nihil de hac re Dominus loquutus est. Apostolus quidem in epistolis ad Timotheum, & Titum, iubet Episcopos & Diaconos eligi castos, sed quod Apostolus præcipit, non diuinum, sed Apostolicum præceptum est, de quo postea agemus.

Proferunt illi ex Deut. cap. 33. benedictionem Moysis, in qua dicitur de Leuitis, id est, vt ipsi exponunt, de Sacerdotibus Christianis: Qui dixerunt patri suo & matri, Nescio vos, & filios ignorauerunt. At istud, diuinum vaticinium, non diuinum præceptum est; siue enim lege diuina, siue humana fiat, vt Sacerdotes vxoribus carcant, impletur vaticinium Moysis.

Proferunt deinde illud Christi Luca 21. *Videte, ne grauentur corda vestra crapula, & ebrietate, & curis huius mundi.* quod ad Sacerdotes præcipuè spectare, testatur Leo serm. 8. de ieiunio decimi mensis. Sed in hoc aperte falluntur, qui hoc argumentum adducunt. Nam Leo in isto ipso loco, ad omnes fideles, Christi præceptum pertinere dicit: sed ad nos præcipuè, quibus dies Domini iam est vicinior. Deinde, cum Paulus 1. Timoth. 3. iubeat Episcopum eligi: *Qui domus sue bene præsit, & filios habeat subditos in omni castitate;* nec tamen contraria CHRISTO doceat: certè non iubet CHRISTVS vlli, ne habeat curam vxoris ac liberorum, sed ne grauetur nimia sollicitudine.

At, inquiunt, ratio naturalis dicat, ministerium purissimum à continentibus esse peragendum. RESPONDEO, dicere id quidem rationem, sed vt rem cōuenientem, non vt omnino necessariam.

TER-



TERTIO probatur, ex Concilio Ancyrano, cap. 10. vbi dicitur posse Diaconos cum licentia Episcopi vxores ducere, etiam post susceptum Diaconatum; ergo non est de iure diuino; nec enim Episcopi in iure diuino dispensant. Estque hoc Concilium antiquissimum, & confirmatum à Leone Papa dist. 20. can. de libellis. ACCEDAT postremò, quòd Concilia, & Patres in sequenti capite producendi, passim testantur, hanc legem esse Ecclesiasticam; quod etià legimus in Concilio Tridentino, sess. 24. can. 9.

CAPVT XIX.

*Cœlibatum iure Apostolico rectissime annexum ordinibus sacris.*



AM VERO de altera quæstione; An rectè factum sit, vt cœlibatus perpetuus sacris ordinibus annexeretur, duo sunt refutandi errores; Vnus Græcorum, alter Lutheranorum. PRIOR error est; Oportere Clericos, antequam ordines sacros suscipiant, vxores ducere, quia post sacros ordines susceptos, non licet id facere, & nimis magno periculo fornicandi se exponit, qui sine vxore viuit.

Huius erroris aliqui auctorem faciunt Nicolaum, vnum ex septem primis Diaconis; sed quidquid de hoc sit, constat, Vigilantium hunc errorem expressè docuisse; de quo sic beatus Hieronymus initio libri contra Vigilantium: *Prò nefas, inquit, Episcopos susceles dicitur habere consortes, si tamen Episcopi nominandi sunt, qui non ordinant Diaconos, nisi prius vxores duxerint, nulli cœlibi credemus pudicitiam.* Hunc errorem receperunt Patres Concilij Trullani, circa annum Domini DCC. vt patet ex can. 13. vbi prophana illa Synodus damnat nominationem canones Romanæ Ecclesiæ, & contrarium statuit, nimirum vt Clerici ante Subdiaconatum vxores ducant, & cum eis viuant postea, in sacris ordinibus constituti. Tempore huius Synodi cœpit mos Græcorum, qui nunc est. Auctus autem est & confirmatus tempore Leonis IX. quando dissidium Græcorum à Latinis maximè creuit in multis aliis articulis. Vnde exstat liber Humberti Cardinalis eo tempore scriptus de hac re, contra Nicetam Abbatem, qui hunc morem Græcorum tunc acerrimè defendebat.

POSTE-



POSTERIOR error longè grauior est; Non solùm licere ante ordinationem, sed etiam post ordinationem, vxorem ducere. Huius erroris fundamenta quædam iecit Iouinianus, qui docuit, virginitatem non præstare Matrimonio; inde enim sequebatur, frustra Sacerdotes velle carere vxoribus. Vnde etiam quædam Sanctimoniales, Iouiniano audito, nupserunt, vt beatus Augustinus refert libro de hæresibus, cap. 82. Hæc tamen hæresis mox extincta fuit, nec vsque ad deceptionem alicuius Sacerdotis peruenit, vt ibidem Augustinus ait.

PRIMVS autem qui docuit apertè, licere post ordinationem vxorem ducere, fuit Ioannes VViclefus, vt refert Thomas VValdensis tom. 2. de Sacramentis, cap. 128. & 129. & tomo 3. de Sacramentalibus, cap. 62. & 67. Eum sequuti sunt Lutherus in libro de abroganda Missa priuata, Pomeranus in libro de cōiugio Episcoporum, Magdeburgenses in Centuriis singulis, cap. 7. & nominatim Centuria 11. cap. 7. col. 389. vbi dicunt, hanc esse hæresim maximè pestiferam omnium, quæ vnquam Christianum regnum perturbauit. Idem Beza, & Martyr in primam ad Corinthios 7. Philippus Melancthon in Confessione Augustana, art. 23. & in Apologia eiusdem articuli, Caluinus lib. 4. Institut. cap. 12. §. 23. Brentius in Confessione VVirtembergensi, capite de coniugio; Præterea Erasmus in declamatione de laudibus Matrimonij, vtile esse iudicat, si Sacerdotibus ius coniugij concedatur, & idem sensisse videtur Panormitanus, Catholicus alioqui & doctus auctor, in cap. Cùm olim, de Clericis coniugatis. Audio Kemnitium in tertia parte examinis Concilij Tridentini, de cœlibatu Sacerdotum copiosè tractasse, sed cum librum nondum videre potui. Ac si ex alijs eius operibus coniectura facienda est, nihil aut parum admodum addit ad ea, quæ Centuriatores & Caluinus collegerunt.

Contra hos errores probandum nobis est, votum continentiae annexum esse ordinibus sacris, ita vt nec ducere vxores, nec vxoribus antea ductis vti liceat post ordinationem; positiuo quidem iure, sed antiquissimo & æquissimo, & quod nullo modo expediat, vt hoc tempore relaxetur.

Probatur PRIMO, Scripturis; ac primùm Paulus in epist. ad Titum, ca. 1. Oporteret, inquit, esse Episcopum hospitalem, benignum, sobrium, iustum, sanctum, continentem. Vbi notandū



pro eo, quod nos habemus sobrium, Græcè esse *σωφρονα*, quod, vt Hieronymus in hunc locum dicit, ambiguum est, & prudentem, sobrium, castum significare potest; hoc autem loco significat castum. Quia verò castitas etiam coniugatis cōmunis est, ideo Apostolus addit etiam, *continentem*; quod ibidem beatus Hieronymus exponit, ab vxoris amplexibus. Idem in epistola 2. ad Timoth. cap. 2. *Labora*, inquit, *sicut bonus miles CHRISTI IESU, nemo militans Deo implicat se negotiis secularibus*. Hic Apostolus Episcopo præcipit, vt strenue militet Deo; deinde dicit, non posse eum bene militare Deo, si se implicauerit negotiis secularibus, qualia certè esse nuptias, nemo negare potest. Nam, vt sanctus Basilius pulchrè docet in proœmio constitutionum Monasticarum: *Nuptia pudice sunt*. Idem Apostolus 1. Corinth. 7. iubet, coniugatos vacare ex consensu ad tempus ab opere nuptiarum, vt orationi instare possint; ex quo per bonam consequentiam deducit B. Hieronymus in cap. 1. ad Titum, & lib. 1. in Iovinianum, eum præcipere Episcopis, & aliis hominibus sacris, vt perpetuò a nuptiarum opere vacent, cū quotidie orationi insistere debeant. Quo eodem argumento ex hoc loco vtuntur Origenes homilia vicesima tertia in Numer. & Epiphanius hæresi Catharorum.

Præterea, in veteri Testamento, continentiam ab vxoribus videmus in primis fuisse requisitam in iis, qui Deo propinquaturi, vel rem aliquam sanctam tractaturi erant. Nam Exodi 12. præcipitur, vt comesturi agnum Paschalem renes suos accingerent, quo significabatur, vt Gregorius exponit hom. 22. super Euangel. debere eos carnis voluptatem edomare, qui agnum Paschalem comedunt. Exodi 19. cū populus legem a Deo accepturus esset, ait illis Moyses: *Estote parati in diem tertium, & ne appropinquetis vxoribus & sororibus*. Quo testimonio vtitur Ambrosius lib. 1. de officiis, cap. vlt. ad probandam continentiam Clericorum.

Item Exodi 28. præcipit Deus, vt Aaron & filij eius cū ingrederentur tabernaculum, fœminalibus lineis à renibus vsq; ad fœmora tecti essent; quo exponit Beda li. 3. de tabernaculo, ca. 9. significatū esse, debere Sacerdotes noui Testamenti aut virgines esse, aut contracta cū vxoribus fœdera dissoluisset. Item 1. Reg. 21. noluit Achimelech Sacerdos dare Dauidi panes propositionis comedendos, nisi prius intellexisset, cum



cum ab vxore aliquandiu se continuisse. Ex quo deducit B. Hieronymus in caput primum ad Titum, perpetuam requiri in Sacerdotibus continentiam, etiam ab vxoribus, qui corpus Christi, quo ille panis propositionis significabatur, conficiunt, edunt, aliisque tradunt.

Denique, ex lib. I. Paralip. cap. 24. & Luc. I. colligitur, Sacerdotes veteris Testamenti per vices suas ministrare solitos, & toto eo tempore, quo ministrabant in tabernaculo, à domo & vxore abfuisse. Ex quo deducunt Siricius Papa in epistola ad Himericum, & Innocentius I. in epistola ad Victorium, necnon Beda in caput primum Lucæ, quòd si illi tempore, quo ministrabant, ab vxoribus abstinebant, omnino decere, vt Sacerdotes nostri, qui non per vices, sed semper ministrant, semper ab vxoribus se contineant.

Hoc vltimum argumentum soluere conatur Calvinus lib. 4. cap. 12. §. 25. ac dicit, Sacerdotes *ἀντίτυποι* Christi fuisse, id est, figuram Christi gessisse, & quia Christi excellentiam & sanctitatem exactè referre non poterant, iustos fuisse vltra humanum morem se purificare. Nunc autem id necessarium non esse, cùm per Christi aduentum figura atque vmbra cessauerint.

At solutio parum valet; nam sicut Leuitici Sacerdotes Christi venturi figuram gerebant, ita nunc Sacerdotes Christiani Christum, qui venit, representant. Sacerdos enim, dum sacra mysteria peragit, Christi personam sustinet, & propterea sacrificans, non dicit; Hoc est corpus Christi, sed; Hoc est corpus meum. Ipse enim Christum eo loco agit, id quod etiam vestium sacrarum ornatus designat. Deinde, non est illa primaria causa, cur Sacerdotes Leuitici deberent abstinere ab vxoribus, quia gerebant Christi figuram, sed quia Domino ministrabant. Exodi 19. *Sacerdotes, qui accedunt ad Deum, sanctificentur, ne percutiat eos.* Nam alioqui David semper erat Christi figura, & tamen tunc solùm iustus est abstinere ab vxore, quando panem sanctum comesturus erat, vt diximus. Denique, si illi, quia Christum significabant, debuerunt vltra humanum modum se purificare, quanto magis purificari debebunt, qui Christum ipsum quotidie tractant?

Probatur SECVNDO, testimoniis Conciliorum antiquorum totius Ecclesiæ. Ac primum Ecclesiæ Orientalis: habemus



mus Concilium ANCYRANVM celebratum ante años M. CC. canone 10. vbi dicitur, Diaconos qui in ipsa ordinatione non protestantur se velle vxorem habere, non posse post ordinationem eam ducere. Si autem protestentur, posse ducere, quia tunc censetur Episcopus cum eis dispensasse. Item Concilium NEOCAESARIENSE paulò post celebratum, cap. 1. *Presbyter, inquit, si vxorem duxerit, ordine suo moneatur.* Concilium NICAEIVM I. can. 3. interdicir Episcopo, Presbytero, & Diacono ne domi mulierem vllam habeat præter matrem, sororem, amitam. Nulla vxoris mentio fit, quæ tam primo loco poni debuit, si cum ea habitare liceret. Item, cur prohibetur Clericis cohabitatio mulierum, si vxorati esse possunt? Nõne vxores ancillas habere possunt in eadem domo? Denique Synodus TRVLLANA can. 6. prohibet, ne Episcopi, Presbyteri, Diaconi, aut Subdiaconi post ordinationem suam, vxorem ducant, & can. 48. præcipit, vt Episcopus non cohabitet vxori.

Ecclesiæ Africanæ habemus insigne testimonium. Concilium enim CARTHAGINENSE II. can. 2. *Omnibus placet, inquit, Et Episcopi, Presbyteri, Diaconi, vel qui Sacramenta contrectant, pudicitia custodes etiam ab vxoribus se abstineant.* Et ratio ibi redditur: *Ut quod, inquit, Apostoli docuerunt, & ipsa seruauit antiquitas, nos quoque custodiamus.* Hoc testimonium non solum refellit Lutheranos, sed etiam eos ex Catholicis, qui volunt hoc decretum de sacerdotum continentia à Siricio incepisse; isti enim Patres ab Apostolis incepisse dicunt. Item Conciliũ Carthaginense V. can. 3. & Concilium Africanum can. 37. idem constituunt.

Ecclesiæ Italicæ habemus Concilium ROMANVM sub Syluestro I. quod canone 8. prohibet Subdiaconis ne vxores vllæ modo ducere audeant.

Ecclesiæ Gallicæ habemus Concilium ARELATENSE II. ante annos M. CC. celebratum. in quo can. 2. cauetur, ne vllus coniugatus ad sacerdotium assumatur, nisi continentiam ab vxore promiserit. Item Concilium TYRONENSE I. canone 1. & 2. & Turonense II. can. 20. Agathense, cap. 9. & AVRELIANENSE II. canone 2. *Ut nullus, inquit, Clericorum à Subdiacono & supra, propria, si fortè iam habeat, misceatur vxori.*

Ecclesiæ Hispanicæ habemus Concilium ELIBERTINVM



ante tempora Syricij canone 33. *Placuit, inquit, in totum prohibere Episcopis, Presbyteris, Diaconis, ac Subdiaconis abstinere se à coniugibus, & non generare filios.* TOLETANVM II. cap. 1. & Toletanum IV. cap. 26. & Toletanum VIII. cap. 6. etiam Subdiaconis vsum vxorum prohibent.

Denique Ecclesiæ Germanicæ habemus Concilium A-  
 QVISGRANENSE tempore Ludouici I. cap. 6. Concilium VVormatiense, cap. 9. *Placuit, inquit, si Episcopi, Presbyteri, Diaconi, & Subdiaconi abstineant se ab vxoribus, & non generent filios.*  
 10 Denique Concilium MOGVNTINVM tempore Arnulphi Imperatoris, cap. 10. statuit, vt nulla penitus mulier, ne soror quidem, aut mater, cum Ecclesiasticis habitare permittatur.

Ex his apparet mendacium esse apertissimum, quod Philippus dicit in ipsa Confessione Augustana, art. 23. cui tot Principes subscripserunt, in Germania ante annos CD. primum esse legem cœlibatus impositam Clericis. Nam Concilia citata, sunt in Germania ante annos DCC. celebrata, vel etiam amplius. Nec minus mendacium est, quod in Apologia dicit, legem de cœlibatu Clericorum in nullo Concilio reperiri, sed à solo Romano Pontifice contra Synodorum  
 20 sententiam inductam esse.

Probat TERTIO, testimoniis veterum Pontificum; CLEMENS I. in Canonibus Apostolorum canone 27. in nuptiis autem qui ad Clerum prouecti sunt, præcipimus, vt si voluerint, vxores accipiant, sed lectores, cantoresque tantummodo, quod autem de lectoribus, & cantoribus dicitur, idem de aliis minoribus ordinibus intelligitur, cum sit omnium eadem ratio. Calixtus I. apud Gratianum distinct. 27. canone Presbyteris: *Presbyteris, inquit, Diaconis, Subdiaconis, & Monachis concubinas habere seu Matrimonia contrahere penitus interdiciamus.* SYRICIUS in epistola ad Himericum, ca. 7. (quod etiam Caluinus fatetur) prohibet cum vxore commercium  
 30 iis qui sunt in sacris. Idem paulò pòst confirmauit INNOCENTIUS I. in epistola ad Victricium, cap. 9. & in epistola ad Exuperium, cap. 1. Idem LEO I. in epistola 82. ad Anastasium Episcopum Thessalonicæ, cap. 4. & in epistola 90. ad Rusticum Narbonensem, cap. 3. Idem GREGORIUS I. in epistola 42. lib. 1. & epist. 34. lib. 3. Idem ZACHARIAS Papa in epistola vltima ad Bonifacium Episcopum Germanicæ, ante annos DCCC. Vnde etiam apparet clarius Philippi mendacium;



Sed placet verba referre LEONIS I. in epistola ad Anastasium, quia non solum Lutheranos, sed etiam Græcos, euidenter coarguunt. Ad Græcos enim scribit hoc modo: Omnium, inquit, sacerdotum tam excellens est electio, ut hæc, quæ in aliis membris Ecclesiæ vacant à culpa, in illis tamen habeantur illicita. Cum enim extra Clericorum ordinem constitutis nuptiarum societati, & procreationi filiorum studere sit liberum, ad exhibendam tamen perfectam continentiam puritatem, nec Subdiaconis quidem carnale connubium conceditur, ut & qui habent, sint tanquam non habentes, & qui non habent, permaneant singulares & innupti. Quod si in hoc ordine, qui quartus exstat à capite, dignum est custodiri, quanto magis in primo, vel in secundo, tertioque seruandum est, ne aut Leuitico ministerio, aut Presbyterali honore, aut Episcopali excellentia quisquam idoneus existimeretur, qui se à Voluptate & xoria, necdum frenasse detegitur? His adde expressa testimonia veterum Imperatorum, quæ exstant Codice de Episcopis & Clericis, lege eum qui, & sequentibus; item in Authenticis de Monachis.

ProbatUR QUARTO, testimoniis veterum Patrum Græcorum & Latinorum. ORIGENES homilia 23. in libro Numeri: 10  
Certe est, inquit, quia impeditur sacrificium indefinens iis, qui conjugaliibus necessitatibus seruiunt. Unde videtur mihi quod illius solius est offerre sacrificium, qui indefinenti & perpetua se deuouerit castitati. EVSEBIUS lib. I. demonstrat. Euang. cap. 9. Veruntamen, inquit, eos qui sacrati sint, atque in Dei ministerio, cultuque occupati, continere deinceps seipsos à commercio xoris decet, &c.

EPIPHANIVS ad finem operis contra hæreses: Sanctum, inquit, sacerdotium ex virginibus, ut plurimum, aut ex solitariis, aut si hi ad ministerium non suffecerint, de his qui se à propriis xoriis continent, & si quis ab initio continens viduus fuerit, habere potest locum Episcopi, Presbyteri, Diaconi, Hypodiaconi. Itæ hæresi 59. quæ est Catharorum: Sed, inquit, & adhuc viuentem & liberos gignentem vnius xoris virum Ecclesiæ non suscipit, sed eum, qui se ab vna continuit, aut in viduitate vixit, Diaconum, & Presbyterum, & Episcopum, & Hypodiaconum: maxime ubi sinceri sunt Canones Ecclesiastici. At dices mihi, in quibusdam locis adhuc liberos gignere Presbyteros, & Diaconos, & Hypodiaconos: At hoc non est iuxta Canonem, sed iuxta hominum mentem, quæ per tempus elanguit.



CHRYSOStOMVS hom. 2. de patientia Iob: *Dixit, inquit, Vnius vxoris virum, non ea ratione, et id nunc in Ecclesia obseruetur, oportet enim omni prorsus castitate Sacerdotem ornatum esse.* GREGORIUS NYSSENVS lib. de virginitate, capite ultimo: *Quomodo, inquit, Dei sacerdotio fungeris, qui ad hoc ipsum, et munus offerres, vinctus es? Quomodo hac ipsa Deo offeres, qui legi non obtemperas prohibenti, ne sacra impurus faciat? ac si Deum tibi apparere expetis, quid causa est cur Moysen non audias, qui populo edicit, et à nuptiis purus sit, quo Dei aspectum*  
 10 *comprehendat? CYRILLVS catechesi 12. Si, inquit, qui apud IESVM bene fungitur sacerdotio, abstinet à muliere: ipse IESVS quomodo ex viro, et muliere proditurus esset? OECYMENIVS in caput 3. primæ ad Timoth. in illud; Vnius vxoris virum: Non statuit, inquit, et ab vxore pendeat Episcopus, aut vxorem necessario habeat, sed si fiat, inquit, è mundanis, non saltem bigamus, ita tamen et vocatus ad Episcopi munus, illud compleat; quod qui habent vxores, sint tanquam non habentes.*

Iam ex Latinis. CYPRIANVS, siue quicumque est auctor, in libro de singularitate Clericorum, affirmat sibi à Domino  
 20 *reuelatum, non debere Clericos domi suæ habere mulieres, id quod etiam toto eo libro probat. Neque obstat, quod in extremo libro (vt Petrus Martyr notauit) sic loquitur: Si quis habet matrem, vel filiam, vel sororem, vel coniugem, vel cognatam, sic habeat, et nulla ancilla intersit, &c. Nam loquitur de coniuge, quæ simul vouerit continentiam. Similis habetur locus in Concilio II. ARELATENSI can. 3. Si quis de Clericis à gradu diaconatus in solatio suo mulierem præter auiam, matrem, sororem, filiam, neptem, vel conuersam secum vxorem habere præsumperit, à communione alienus habeatur. Alioqui si*  
 30 *Cyprianus vxorem Clericis concederet, qua vti liceret, puniret cum toto suo libro, & cum ipso titulo: De singularitate Clericorum.*

AMBROSIVS lib. I. de officiis, cap. ultimo: *Inoffensum, inquit, exhibendum, et immaculatum ministerium, nec ulla coniugali coitu violandum cognoscitis, qui integro corpore, incorrupto pudore, alieni etiam ab ipso consortio coniugali, sacri ministerij gratiam recepistis. quod ideo non præterimus, quia in plerisque abditioribus locis, cum ministerium gererent, vel etiam sacerdotium, filios susceperunt. Idem in epit. 82. ad Ecclesiam Vercellensem: Habentem, inquit, filios, dixit Apostolus, non facientem, &c. Et*  
 in



in caput i. epist. i. ad Timotheum: *Deinceps, inquit, ab & su-  
mina cohibentur, &c.*

HIERONYMVS libro in Vigilantium circa initium: *Quid  
facient, inquit, Orientis Ecclesiar quid Aegypti, & sedis Aposto-  
lica, quae aut Virgines Clericos accipiunt, aut continentes, aut si  
uxores habuerint, mariti esse desistant? Idem in fine Apologiae  
pro libris contra Iovinianum: Episcopi, inquit, Presbyteri,  
Diaconi, aut Virgines eliguntur, aut vidui, aut certe post sacer-  
dotum pudici.*

AVGVSTINVS lib. 2. de adulterinis coniugiis, cap. 20. *Sole-  
mus, inquit, eis proponere continentiam Clericorum, qui plerum-  
que ad eandem sarcinam subeundam capiuntur inuiti, eamque  
susceptam & qd ad debitum finem, Domino adiuvante, perducunt.  
Vide totum locum. AVCTOR quaestionum veteris & noui Te-  
stamenti, qui non est Augustinus, ut titulus pra se fert, sed a-  
liquis antiquior, quaestione vltima sub finem: *Si licet, inquit,  
& bonum est nubere, cur sacerdotibus non licet uxores habere?*  
Et prolixè causam reddit.*

GREGORIUS praeter decreta supra citata lib. 6. cap. i. in lib.  
Regum errare dicit eos, qui propter verbum Pauli: *Vnusquis-  
que uxorem suam habeat*, putant licere Ecclesiasticis uxores  
habere. GREGORIUS TYRONICVS lib. 4. hist. cap. 4. refert quen-  
dam comitem, qui dimissa vxore fuerat sacris initiatus, quia  
postea ad uxorem redire voluit, ab omnibus Episcopis ex-  
communicatum fuisse.

ISIDORVS lib. 2. de officiis diuinis, cap. 10. *Placuit, inquit,  
sanctis Patribus, ut qui sacra mysteria contrectant, casti sint &  
continentes ab uxoribus, & ab omni carnali immunditia sint li-  
beri.* Haec de Subdiaconis dicit, similia docet de Diaconis, &  
Presbyteris, cap. 5. & 8. ex quibus locis intelligi possunt ea 30  
verba capitis secundi: *Castimoniam corporis perpetuò seruent,  
aut vnius Matrimonij vinculo fœderentur.* Haec enim dicuntur  
de Clericis in vniuersum, tum maioribus, tum minoribus.  
Debent enim omnes Clerici aut perpetuò esse continentes,  
si maioribus ordinibus initiati sint, aut vnius Matrimonij  
vinculo copulari, si minoribus.

D. ANSELMVS in epistola 8. asserit rectè à Gregorio VII.  
prohibitum fuisse, ne vlli interessent sacris sacerdotum con-  
iugatorum. BEDA lib. 3. de tabernaculo, cap. 9. *Nemo potest,  
inquit, vel sacerdotium suscipere, vel ad altaris ministerium*



*consecrari, nisi aut Virgo permanserit, aut contracta cum Vxor Matrimonij fœdera soluerit.* DENIQUE, vt recentiores omit-  
tam, ARATOR Subdiaconus Vigilij Papæ ante annos mille li-  
bro in Acta Apostolorum, cap. 30. posteaquam explicuit ra-  
tionem, cur sacerdotibus veteris legis permitteretur, vt lo-  
lū ad tempus ab vxoribus se continerent, subdit:

*Ecclesiæ nunc alma fides sine sine pudicos  
Pontifices iubet esse suos, &c.*

- 10 His testimoniis accedât exempla eorundem; nam à tem-  
pore Apostolorum, omnes Episcopi, Presbyteri, aliq̃ue Ec-  
clesiastici, quorum vitas habemus, & quos vnquam lauda-  
tos audiimus, continentes fuerunt, neque vllum exem-  
plum probati viri in contrarium afferri potest. MAGDEBUR-  
GENSES quidem diligentissimè quæsierunt omnibus secu-  
lis aliquos, qui vxorem duxerint post susceptos ordines, &  
multa exempla proferunt, Centuria 4. 5. 6. 7. 8. 9. 10. & 11. ini-  
tio capitis septimi, sed nullum eorum aliquid valet. Nam vel  
exempla illa debent intelligi de vxoribus, quas antea duxe-  
rant, vt de Gregorio patre Gregorij Nazianzeni, vel intelli-  
guntur de minoribus Clericis, vt quod proferunt ex Conci-  
lio Toletano IV. capite 42. vel sunt exempla eorum qui re-  
prehenduntur, vt quæ proferunt exempla Zachariæ ad Bo-  
nifacium, vel sunt expressa mendacia, vt cū dicunt Cent.  
5. cap. 7. Presbyteros Macedoniæ duxisse vxores, teste Inno-  
centio I. epistola 22. nihil enim tale Innocentius dicit. PHIL-  
IPPVS in libro de cœlibatu ad Regem Angliæ, probat, vete-  
res Episcopos Matrimonio vsos ex epistola Polycratis, apud  
Eusebium lib. 4. hist. cap. 24. scribit enim Polycrates septem  
30 ex parentibus suis fuisse Episcopos, seq̃ue octauum esse. At  
deceptus Philippus est ex versione Rufini. Græca enim vox  
ὄννενος, quæ est apud Eusebium, nō parentes, sed cognat-  
os significat. Sed fac esse parentes, num propterea sequitur  
eos in Episcopatu Matrimonio vsos?

Ex hac autem tanta nube testium tria deducuntur. PRI-  
MO, errare Clichtouæum, & alios, qui putant legem conti-  
nentiæ impositam Clericis primum à Siricio. Nam Cle-  
mens, Origenes, Eusebius, Epiphanius, & aliqua Concilia  
citata, antiquiora sunt Siricio. SECUNDO, morem Græco-  
rum, quem nunc habent, non fuisse primis sexcentis annis,



ut patet ex iisdem auctoribus, necnon ex Chrysostomo, Hieronymo, & Leone locis citatis. TERTIO, mendacium esse, & quidem impudentissimum Caluini lib. 4. Instit. cap. 12. §. 25. ubi dicit omnes veteres Patres approbasse coniugium in ordine Episcopali; nam Patres plurimi citati, & Concilia plurima contrarium statuunt, & nullum exemplum in contrarium adferri potest.

Probatum iam QUINTO ratione; cum enim coniugium vehementer impediat Ecclesiastica munera, æquum fuit, ut sacerdotibus, aliisque sacris hominibus coniugia prohiberentur; nam Ecclesiasticorum munera sunt sacrificare, orare, docere, exhortari, Sacramenta ministrare, curam pauperum gerere, & similia, quæ ritè exerceri non possunt, ut Apostolus ad Titum, cap. 1. docet, nisi sacerdos sit hospitalis, benignus, sobrius, iustus, sanctus, continens, doctus, &c.

Iam verò Matrimonium impedit in primis, ut Hieronymus dicit lib. 1. in Iovinianum, munus sacrificandi, quia summa quædam puritas, & sanctitas in eo requiritur, ut Chrysostomus explicat lib. 6. de sacerdotio; in actu verò coniugij negari non potest, quin admixta sit quædam impuritas & pollutio, non quæ peccatum sit, sed quæ ex peccato tamen nata sit. Quamuis enim Calvinus, loco notato, vociferetur contra Siricium, qui coniugium sacerdotum pollutionem vocauit, tamen non solum coniugium sacerdotum, quod sacrilegium est, non coniugium, sed etiam sanctorum Matrimonium sine pollutione quadam, & turpitudine non exerceri, satis testatur rebellio membrorum, & verecundia humana in illo actu, quæ secretum semper quærit, ut notauit B. Augustinus lib. 14. de ciuitate Dei, cap. 17.

DEINDE, impedit studium orationis, & lectionis, in quo 30 assidue sacerdos versari debet. Oratio enim requirit mentem eleuatam, purgatam, & tranquillam; actus autem coniugij, ut B. Augustinus docet lib. 14. de ciuitate Dei, cap. 16. maximè hebetat aciem mentis, & deprimit ad inferiora, & perturbat, & animam ipsam carnalem quodammodo facit.

TERTIO, impedit efficaciam prædicationis, ut Ambrosius docet lib. 1. de officiis, capite ultimo. quomodo enim efficaciter exhortabitur viduas, & virgines, qui liberis perpetuo operam dat?

QUARTO, impedit curam pastorem; nam qui uxorem & liberos



liberos habet, de illis semper cogitat, & affectus, quo oves suas prosequi deberet, in vxore & filiis totus consumitur, & tamen (vt Ambrosius docet lib. 1. de officiis, cap. 7.) plus diligendi essent filij spirituales, quàm carnales.

QVINTO, impedit curam pauperum, & illam hospitalitatem, & benignitatem, quam Apostolus tantoperè commendat; nam qui vxorem, & liberos habet, debet eis thesaurizare, & rarò inueniuntur coniugati qui superfluum habeant. Adde, quòd cum Clericus non possit filiis relinquere beneficia, & tamen omnis Pater cupiat bene prospectum filiis suis, cogentur esse auarissimi, & vendere Sacramenta.

SEXTO, impediret Sacramentorum administrationem; tunc enim vix distinguerentur Clerici à Laicis, & esset sicut populus, sic sacerdos. Quòd experientia testatur; nam tempore Gregorij VII. cum in Germania cœpissent sacerdotes vxores ducere, tantus contemptus Sacramentorum sequutus est, vt passim Laici Sacramenta administrarent, vt Ioannes Nauclerus, & alij referunt. Itaque merito D. Epiphanius hæresi 59. dicit, propter honorem sacerdotij necessarium esse continentiam. Superest argumenta soluere. Ac primùm solua argumenta Caluini eodem ordine quo ipse proponit.

## CAPVT XX.

*Soluantur argumenta Caluini.*

ARGVMENTVM PRIMVM. Deus reliquit Matrimonium liberum, ergo nulli homini licuit id prohibere, & confirmatur ex Apostolo 1. Timot. 4. vbi notam hæreticorum esse dicit prohibere nuptias.

RESPONDEO, concedimus totum argumentum; neque enim Ecclesia prohibet Matrimonium, aut cogit vllum ad cœlibatum absolutè suscipiendum, sed solum requirit eam conditionem in iis, qui initiari volunt sacris mysteriis, quam si quis nolit accipere, potest nō accipere, sed non initiabitur. Quemadmodum non censetur Ecclesia prohibere iudicia forensia, nec officium tortoris, etiam si nolit talia ab Ecclesiasticis fieri. Ad locum Apostoli dicimus cum Hieronymo lib. 1. in Iouinianum, & Augustino lib. 30. contra Faustum,

cap.



cap. 4. & 6. Ambrosio, Chrysostomo, aliisq; in hunc locum, notari ab Apostolo eos, qui absolutè nuptias vt malas prohibebant, quales fuerunt Tatianus, Marcion, & Manichæus.

SED fortè obiicient, quia Apostolus dicit id futurum in nouissimis diebus. RESPONDEO, nouissimos dies intelligi totam hanc vltimam etatē, quæ est à Christo vsq; ad iudicium. Nam Apostolus ait: *Nos sumus in quos fines seculorū deuenerūt.* I. Corin. 10. Et: *Filioli nouissima hora est.* I. Ioan. 2. Adde, quod vox Græca non est *ἐν τοῖς*, sed *ὅτε ποῖς*, id est, non in vltimis, sed in posterioribus temporibus; neq; id negare possunt <sup>10</sup> aduersarij, nisi velint Manichæos, & Encratitas ab Apostolo notatos non fuisse, qui tamen apertissimè nuptias prohibebant, nec enim illi in vltimis temporibus fuerunt.

Sed obiicit Petrus MARTYR in libro de cœlibatu, & votis monasticis, S. Augustinum, qui lib. 2. de moribus Manichæorum, cap. 18. & in epist. 74. ad Deuterium, testatur Manichæos non prohibuisse nuptias nisi electis suis, qui erant apud eos, quasi Sacerdotes, & Monachi: & tamen dicit eos notari ab Apostolo, cū ait, doctrinam esse dæmoniorum, prohibitionem nuptiarum. <sup>20</sup>

RESPONDEO; idem Augustinus lib. 30. contra Faustum, cap. 6. scribit, à Manichæis interdictas nuptias simpliciter, quia etsi eas permittebant auditoribus suis, id faciebant, quia non poterant aliud obtinere: *Nec ideo, inquit, vos dicatis non prohibere, quia multos vestros auditores in hoc obedire nolentes, aut non valentes, salua amicicia toleratis.* Hæc ille. Nos autem non solū toleramus Christianos coniugatos, sed etiam laudamus. Ac præterea Manichæi auditoribus suis sic nuptias permittebant ad explendam libidinem, vt tamen conceptum, & liberorum procreationem cauendam esse <sup>30</sup> monerent. Quod est nuptias apertissimè detestari. Catholici autem ideo potissimū nuptias laudat, quod ad procreationem liberorum à Deo institutæ fuisse noscantur.

Argumentum SECVNDVM. Apostolus I. Tim. 3. & Tit. 1. cū absoluti Episcopi ideam exprimeret, inter reliquas doctes, & virtutes, quas in eo requirebat, ausus est coniugium ponere: ait enim, vnus vxoris virum esse eligendum.

RESPONDEO, falsissimum est, quod Apostolus inter doctes, aut virtutes absoluti Episcopi ponat coniugiū: ad quod probandum sufficere deberet, quod quotquot SS. Episcopi



hactenus fuerunt, omnes continentes fuerunt, vt supra diximus: quos certè nullo modo credibile est, aut non intellexisse verba Pauli, aut ei obtemperare noluisse. Præterea cùm idem Paulus I. Corint. 7. hortetur ad continentiam, & dicat bonum esse innuptis & viduis, vt sic permaneant; &: *Qui nubit benefacit, qui non nubit melius facit*; quomodo credibile est eundem Paulum inter dotes, & virtutes Episcopi posuisse vt vxorem habeat? Adde, quod non solum Chrysostomus, & alij Patres in hunc locum, docent, Paulum non tulisse legem, vt Episcopi habeant vxores, sed solum vt non habeant, vel habuerint plures quàm vnā: sed etiam Martinus Lutherus in propositionibus de digamia, contendit ista verba; *Vnus vxoris virum*, esse accipienda negatiuè, non positiuè, ita vt non teneatur Episcopus habere vnā, sed teneatur non habere plures fœminas vnā cū vxore.

At, inquit Caluinus, Paulus ibidem, vbi descriperat quales debeant esse Episcopi & Diaconi, describit etiam quales debeant esse eorum vxores. RESPONDEO, Paulum, vbi dicit: *Mulieres similiter pudice, &c.* vel loqui de mulieribus generatim, vt Ambrosius exponit, vel de Diaconissis, quæ viduæ erant, vt Chrysostomus & Theophylactus docent, vel si loquatur de vxoribus Episcoporum, & Diaconorum, loqui de vxoribus, quas acceperant ante ordinationem, non quas postea accepturi essent.

Argumentum TERTIVM. Apostolus Hebr. 13. citra exceptionem securè pronunciat, honorabile esse inter omnes coniugium: Cur non etiam inter Sacerdotes?

RESPONDEO, argumentum faciliè in ipsum retorqueri posse; si enim coniugia omnium sunt honorabilia, etiam coniugia consanguineorum in primo aut secundo gradu erunt honorabilia, & coniugia adolescentium iniussu parentum contracta, erunt honorabilia, quæ tamen Caluinus improbat lib. 4. cap. 19. §. 37. Instit. Dico igitur, tribus modis posse exponi illud: *In omnibus*, Græcè ἐν παντί. PRIMO, vt in omnibus, idem sit, quod omni ex parte, id est, coniugium honorabile est in omnibus, quæ coniugij sunt, siue Sacramentum, siue fidem, siue prolem consideres. ita Oecumenius in hunc locum. SECUNDO, vt in omnibus, significet, apud omnes, id est, nemo debet coniugium reprehendere, etiam si virginitatem ipse profiteatur; ita videtur accepisse Fulgentius



tius libro de fide ad Petrum, cap. 3. *DE NI QVE*, in omnibus, id est, in omnibus legitimè coniunctis, quicumq; illi sint, siue senes, siue iuuenes, siue nobiles, siue obscuro, siue Græci, siue Hebræi, &c. Ita Theophylactus in hunc locum, & hæc videtur magis literalis expositio, sed parum refert.

Argumentum *QVARTVM*. Apostoli exemplo suo docuerunt, nullius quamuis excellentis functionis sanctitate indignum esse coniugium; nam eos vxores non solum habuisse, sed etiam circumduxisse, testatur Paulus 1. Corinth. 9. cui loco etiam addi potest illud Philip. vlt. *Roga te etiam Germane compar adiuua illas, &c.* Posset enim commodè verti, Germana coniunx, quod Græcè scriptum est.

*RESPONDEO*, non esse omnino certum, qui ex Apostolis vxorem habuerint, & qui non habuerint. *TERTVLLIANVS* libro de Monogamia, & beatus Hieronymus libro 1. in Iouinianum existimant præter Petrum, cuius socrum in Euangelio legimus, nullum alium Apostolorum vxorem habuisse. *S. IGNATIVS* in epistola ad Philadelphienfes dicit, Petrum & Paulum, & reliquos Apostolos coniugatos fuisse, excepto Ioanne, quanquam in Vaticano codice, & 20. quibusdam aliis vetustis non habetur nomen Pauli. *CLEMENS* quoque Alexandrinus libro 3. Stromatum circa medium, aliquos Apostolorum, & nominatim Paulam vxorem habuisse asserit ex locis citatis. Sed quidquid de hoc sit, certum est eos ex Apostolis, qui vxorem habuerunt, postquam vocati à Christo fuerunt, officio coniugali renunciasset, vt beatus Hieronymus docet lib. 1. in Iouinianum, & satis colligitur ex cap. 19. Matth. *Ecce nos reliquimus omnia, & sequuti sumus te.* Statim enim Dominus explicans, quid sit relinquere omnia; adiicit: *Omnis qui reliquerit patrem, aut matrem, aut vxorem, &c.*

Ad locum igitur illum 1. Corinth. 9. vbi dicitur: *Nunquid non habemus potestatem sororem mulierem circumducendi, sicut ceteri Apostoli, & fratres Domini, & Cephas?* Dico Apostolum non de vxoribus, sed de piis fœminis loqui, quæ sequebantur Apostolos, & eis ministrabāt, sicut etiam Dominum sequebantur Luc. 8. Ita ferè omnes Græci & Latini exponūt, vt Chrysostomus, Theodoretus, Oecumenius, Theophylactus, Ambrosius, Haymo, & alij in hunc locum. Necnon Tertullianus libro de Monogamia, B. Hieronymus libro 1.



in Iovinianum, B. Augustinus libro de opere Monachorum, cap. 4. & 5. Et certè proprietas linguæ Græcæ hoc satis ostendit. Nam dicitur *ἡ ἀφ' ἧς γυναικὶς περιέγερται*, sine vlllo articulo. Si enim de vxore loqueretur, diceret *τῇ γυναικὶς*; vxorem enim certa quædam mulier est. Adde, quod CLEMENS Alexandrinus, qui vnus ex veteribus exposuit hunc locum de vxoribus Apostolorum, ibidem addit, quod etsi vxores erant, tamē cessauerat inter eos coniugale officium, & loco  
 16 sororum, non loco vxorum ab Apostolis habebantur, quod nobis sufficit contra hæreticos.

Occurrit Petrus MARTYR in cap. 9. primæ ad Cor. vbi probat tripliciter Apostolum loqui de vxoribus. PRIMO, quia alioqui non diceret, sorores mulieres, sed sorores tantum, cum constet omnem sororem esse mulierem. SECUNDO, quia non diceret, potestatem circumducendi mulierem, quod sonat auctoritatem, sed diceret consueuisse mulieres sequi, vt legimus Luc. 8. TERTIO, quia si illæ mulieres aluissent Apostolos ex suis facultatibus, falsum esset quoddam Apostoli accepissent sumptus à populis, ergo loquitur de vxoribus, quæ sequebantur Apostolos viros suos, & non eos alebant, sed ab eis alebantur ex sumptibus populorum.

Ad PRIMVM dico, sic vocari sorores mulieres, sicut A&I. dicuntur viri fratres, nisi quod Paulus, vt sæpe solet, mutauit ordinem, & dixit sororem mulierem, pro mulierem sororem. Ad SECUNDVM dico, potestatem, de qua Paulus loquitur, non fuisse in mulieres, sed in actionem eas circumducendi, si sequi vellent, vel si in mulieres erat potestas, dicam, Apostolos habuisse auctoritatem in eas mulieres, non viro-  
 30 rum in vxores, sed doctorum in discipulas. Ad TERTIVM dico, vel eas mulieres non fuisse diuites, & non ministrasse pecunias, sed obsequium tantum, accipientes pecunias à populis, quibus Apostoli prædicabant, vel fuisse diuites, & aluisse Apostolos, sed non semper fuisse cum Apostolis, & ideo Apostolos aliquando fuisse nutritos à populis, aliquando ab illis mulieribus.

Ad locum ex Phil. 4. dico duo. PRIMO, non de vxore Pauli hîc agi, sed de viro aliquo, quem Paulus vocat Germanum comparem, seu coniugem, aut coniugalem; *σύνυγρον* enim significat eum, qui idem iugum trahit. vocat autem eum  
 coniu.



coniugem, vel quia erat maritus alicuius ex fœminis antea nominatis, id est, Euodix aut Synthiches, vt Chrylostomus & Theophylactus dicunt, vel quia erat socius suus in Euangelij prædicatione, vt Theodoretus, & Haymo docent, vel certè est nomen proprium viri, vt vult Oecumenius.

Quod autem ita sit, id est, quòd non loquatur de vxore, suadent hæ rationes. PRIMÆ, quia plurimi veterum asserunt Paulum non habuisse vxorem, vt Hieronymus in epistola ad Eustochium de virginitate, Hilarius in Psal. 127. Augustinus libro de gratia, & libero arbitrio, cap. 4. Epiphanius hæresi 58. Valerhorum, Ambrosius in cap. 7. prioris ad Corinth. & in exhortatione ad virgines, Tertullianus in vtroque libro ad vxorem. Item Chrylostomus, Theodoretus, alique veteres omnes in hunc locum, excepto Clemente Alexandrino. SECUNDÆ, quia, vt Theophylactus notauit, si de vxore loqueretur, non diceret *ἡ πόλις*, sed in genere fœminino *ἡ πόλις*. non enim tam politus erat Apostolus vt Atticis inis vteretur. TERTIÆ, quia, vt dicit Oecumenius, non est credibile vxorem Pauli habitasse Philippis, & non potius in Iudæa, vel certè in Tarso Ciliciæ, vnde Paulus oriundus erat. QUARTÆ, 20 quia, vt Ambrosius notauit in 1. Cor. 7. Paulus adolescens à Domino vocatus est, quo tempore non est credibile eum vxorem habuisse, & certum est postea non accepisse. QUINTÆ, quia, vt notauit Theodoretus, Paulus 1. Cor. 7. ponit se inter eos qui non habebant vxores: *Innuptis, & viduis*, inquit, *disco, bonum est illis si sic permanserint. sicut & ego; quod si non se continent, nubant.* At epistola ad Corinthios scripta est ante epistolam ad Philipenses, vt idem Theodoretus ostendit in præfatione commentarij in epistolas: Igitur vel Paulus accepit vxorem postquam scripserat ad Corinthios, quod est 30 incredibile, aut non habuit vxorem cùm scriberet ad Philipenses.

Dico SECUNDO, quòd si constaret Paulum loqui de vxore sua, tamen certum etiam nobis esse deberet, eum ab vxore separatum fuisse, quoad torum. Quod enim Paulus vitam continentem duxerit cùm Euangelium prædicabat, euidenter deducit ex 1. Cor. 7. B. Augustinus libro de gratia & libero arbitrio, cap. 4.

Argumentum QUINTVM & vltimum Caluini sumitur ex historia Socratis lib. 1. cap. 8. & Sozomeni lib. 1. cap. 22. vbi dicunt,



dicunt, quòd cùm Nicænum Concilium legem ferre vellet, ne liceret Clericis cum vxoribus suis dormire, surrexit Paphnutius confessor, & contradixit, & Synodus tota in eius sententiam iuit, & continentiam ab vxore in arbitrio cuiusque reliquit.

RESPONDEO, hoc testimonium aliquid habere momenti pro sententia Græcorum, sed nullum penitus pro errore Lutheranorum. Nam vterque auctor in eodem loco testatur Paphnutium adiecisse, bonum sibi videri, vt secundum antiquos Canones prohibeatur Clericis, ne post ordinationem vlllo modo vxores ducant, sed solùm permittantur vti illis, quas ante ordinationem acceperunt. Nónne hoc totum contra Lutheranos est, qui post sacerdotium vxores ducunt?

At neque pro Græcorum errore magnum est præsidium in hoc testimonio Socratis, & Sozomeni; nam vel totum est falsum quod isti de Paphnutio tradunt, vel certè (quod magis credo) tale aliquid tunc accidit, sed non bene ab istis narratum est. Fortasse voluerunt Patres Concilij grauiores pœnas constituere in Clericos incontinentes, quales tunc aliquos fuisse ex Epiphanio, & Ambrosio locis notatis intelligi potest, & Paphnutius suasit non esse id faciendum.

At quòd Concilium statuerit, continentiam esse relinquendam in arbitrio Clericorum, nullam habet apparentiam, nec debet illis auctoribus credi. PRIMO, quia Sozomeni historia à S. Gregorio reprobatur lib. 6. epist. 31. *Quia*, inquit Gregorius, *multa mentitur*. Socrates autem, vt omittam cetera, lib. 5. suæ historiæ, cap. 21. tria clara mendacia dicit. PRIMO, licuisse suo tempore vnicuique celebrare Pascha quando vellet, nec de hac re Ecclesiam aliquid certi statuisse. At constat, Nicænam Synodum statuisse vt Pascha semper celebraretur prima Dominica post quartamdecimam lunam primi mensis; cuius Canonis meminerunt Epiphanius hæres. 70. Audianorum, & Ambrosius lib. 10. epistola 83. Eusebius in vita Constantini, Athanasius in libro de Synodis Arimini, & Seleuciæ. SECUNDO dicit, in Romana Ecclesia non ieiunari ante Pascha, nisi tres hebdomadas, & tamen vocari Quadragesimam. At S. Leo, qui eodem tempore vixit, quo Socrates, sermon. 4. de Quadragesima dicit, Romæ ieiunari XL. dies, & idem dicit Gregorius hom. 16. in



Euangelia, & certissimum est. TERTIO dicit, Romæ non ieiunari in Sabbatis, cum tamen contrarium sit certum ex Augustino epistol. 86. & 118. ad Ianuarium. Si ergo in historia sui temporis Socrates tam apertè mentitur, vel certè refert quæ non scit, quæ fides adhiberi illi potest in historia Concilij Nicæni, quod annis plusquam centum ante eius ætatem celebratum est?

PRAETEREA, historia ista de Paphnutio manifestè pugnat cum verbis Epiphaniij contra hæres. 59. ubi ait, esse contra Canones Ecclesiasticos, quoddam Sacerdos vel Diaconus 10 liberos gignat; & cum verbis Hieronymi libro contra Vigilantium, ubi dicit, in Oriente, & Ægypto non esse licitum Sacerdotibus & Diaconis vxoribus uti, quod sanè falsum est, si Nicæna Synodus, in Oriente paulò antè celebrata, vxorum usum illis concessit, vel ergo Epiphanius, & Hieronymus, vel Socrates, & Sozomenus mentiuntur. At certè magis credendum est Epiphanio, & Hieronymo viris sanctis, & qui vicini fuerant temporibus Concilij Nicæni, quàm Socrati, & Sozomeno hæreticis, & multò recentioribus.

DEINDE, quomodo cohæret ista narratio de Paphnutio 20 cum can. 3. Concilij Nicæni, ubi prohibetur Episcopis, Presbyteris, Diaconis, ne vllam domi mulierem habeant præter matrem, sororem, amitam? & hoc argumento conuictus Lutherus, in libro de Conciliis parte prima dicit, Patres Concilij noluisse sequi sententiam Paphnutij, quamuis etiam contrarium Lutherus alibi scripserit.

DEINQUE, quid fieri potest, ut nec Rufinus, qui multa de Concilio Nicæno & Paphnutio scripsit lib. I. historię Ecclesiasticę, nec vllus alius ex veteribus ante Socratem huius rei meminerit, nec vllum vestigium tantæ rei in actis Concilij 30 exstet? Quod autem quidam dicunt, Suidam, qui huius rei meminit in vita Paphnutij, fuisse paulò post tempora Constantini, apertè falsum est; nam Suidas aliquot seculis

Socrate posterior est, quippe qui scribit etiam vitam Ioannis Damasceni,





## CAPVT XXI.

*Soluuntur argumenta Philippi.*

**N**UNC ad argumēta Philippi veniamus. Argumētum PRIMVM; Coniugium est de iure diuino, Genes. I. *Crescite & multiplicamini*. Et de iure naturæ, vt patet ex naturali appetitu generandi; at ius diuinum & naturæ non potest tolli vlla humana lege, ergo, &c. Et confirmatur. Nam sicut nemo potest obligari à se  
 10 vel ab alio ad non comedendum, quia hoc esset contra naturalem inclinationem conseruādi indiuiduum, ita nemo potest obligari à se vel ab alio ad non ducendam vxorem, quia id esset contra naturalem inclinationem conseruandi speciem.

RESPONDEO, verbum Domini non præceptum sonare, sed naturæ institutionem exprimere; nam etiam auiibus, & brutis animātibus ibidem Deus dixit: *Crescite & multiplicamini*; quibus tamen nihil propriè præcipi potest. Præceptum autem naturale esse de coniugio ineundo, concedi potest,  
 20 sed quia est affirmatiuum, non obligat nisi in casu necessitatis, id est, quando periculum immineret, ne humanum genus periret. Et per hoc respondetur ad confirmationem.

Nam sicut non tenemur comedere, nisi quando periculum est, ne pereat indiuiduum, ita non tenemur ducere vxorem, nisi quando periculum esset, ne species humana periret. Ad quod respicientes Patres dixerunt, illud: *Crescite & multiplicamini*, tunc fuisse præceptum singulis hominibus, quando terra erat vacua, vt in exordio mundi, & mox à diluuiō. Nunc autem cūm terra plena sit, cœlum esse replendum,  
 30 quod melius continendo quàm nubendo sit; etsi enim hanc solutionem Philippus ridet, tamen est Tertulliani libro de Monogamia ante medium, Cypriani libro de habitu Virginum, Hieronymi lib. I. in Iouinianum, & Augustini de sancta Virginitate, ca. 9. & ipse textus hoc docet; nam postquam Deus dixit: *Crescite & multiplicamini*, subdit, quasi rationem reddens: *Et replete terram*. Itaq; tunc solum vim præcepti illa verba habent, cūm terra est vacua. Denique, si Philippus vult iure diuino & naturali, quocunq; tempore teneri homines omnes ad coniugium, iniuriam facit Christo, Mariæ, Ioanni, innumerisq; aliis sanctissimis viris.

Argu.



Argumentum SECUNDVM. Apostolus præcipit omnibus, qui donum continentie non habent, vt nubant i. Corinth. 7. *Propter fornicationem autem vnusquisque uxorem suam habeat.*

RESPONDEO, Apostolum loqui de coniugatis, qui cum in Paganismo vxores duxissent, post conuersionem ad fidem, dubitabant an deberent vxoribus vti; iis enim respondet, vt vnusquisq; vxorem suam retineat, & coniugale debitum inuicem reddant. Ita Tertullianus libro de Monogamia, & B. Hieronymus lib. i. in Iouinianum, & patet ex sequentibus. 10 Nam paulo post addit: *Dico autem non nuptis, & viduis, bonum est eis si sic permanserint.* Et: *Solutus es ab uxore, noli querere uxorem.*

Adde etiam, non esse hoc præceptum Apostoli, sed consilium, vel permissionem potius, sicut illa eiusdem capituli: *Si non se continet, nubat, & si nupserit virgo, non peccauit, &c.* Est enim sensus Apostoli, vt Hieronymus ibidem & Chrysostomus, & Ambrosius, & alij in hunc locum exponunt; Bonum est mulierem non tangere, & vel vxorem non ducere, vel post eam ductam ex consensu ab officio coniugali abstinere; ta- 20 men si timetis fornicationem, benefacitis vxori adherendo, quia melius est carere perfectione virginitatis, quam incidere in flagitia fornicationum.

Adde tertio, hæc omnia dici iis, qui votum continentie non habent. Qui enim vouerunt continentiam, iis non dicitur: *Vnusquisque uxorem suam habeat, & virgo si nupserit, non peccauit.* Sed dicitur: *Redde altissimo vota tua.* Et: *Damnationem habent, quia primam fidem irritam fecerunt.* Hanc exceptionem deferre ponunt Hieronymus lib. i. in Iouinianum in illud: *Si nupserit virgo, non peccauit.* Chrysostomus in com- 30 mentario eiusdem loci. Epiphanius hæresi 61. eadem verba exponens. Item Augustinus in Psal. 83. tractans eadem verba. & Gregorius lib. 6. cap. i. in librum Regum, tractans illud: *Vnusquisq; uxorem suam habeat.*

Argumentum TERTIVM. Lex pontificia, quæ cœlibatum sacerdotio adiunxit, dissentit à Conciliis antiquis, proinde iniqua censenda est. Quæ autem sint illa Concilia, ipse non dicit. Nos tamen adducamus quæcunq; adduci possunt. PRIMO est Canon Apostolorum sextus: *Episcopus aut Presbyter uxorem propriam nequaquam obtentu religionis abiciat.*



SECUNDO est Canon Concilij Gangrensis quartus: *Quicumque discernit à Presbyteris, qui uxorem habuit, quod non oporteat eo ministrante de oblatione percipere, anathemasisit.*

TERTIO est Canon 13. sextæ Synodi, qui disertè reprobatur morem Romanæ Ecclesiæ, quò iubentur profiteri continentiam, qui sacris initiantur.

QUARTO est Canon 3. Concilij V. Carthaginensis, in quo statuitur, ut Episcopi, Presbyteri, Diaconi se abstineant ab vxoribus in propriis terminis, id est, in ordine vicis suæ, ut exponunt Trullani patres Canone iam citato.

QUINTO est Canon Aliter, dist. 31. vbi Stephanus Papa dicit, in Orientali Ecclesia Ecclesiasticos viros Matrimonij copulari, nec eum morem reprehendit; ergo falsum est, quod sæpe diximus, nunquam esse auditum quod licuerit post sacram ordinationem uxorem ducere.

VLTIMO est Canon B. Augustini 35. q. 1. can. Cùm igitur, vbi dicitur: *Ecclesia, post Apostolica instituta, quædam consilia perfectionis addidit, & potest de continentia Clericorum, etc.* Ergo hoc, consilium, non præceptum est. Hæc fortè sunt omnia quæ  
20 exiure Canonico pro sententiâ hæreticorum adduci possunt.

Ad PRIMVM respondet Hubertus Cardinalis in libro contra Nicetam, & habetur hæc responsio sub nomine Leonis IX. dist. 31. can. Omnino, Apostolos iussisse ut non abiiciant Clerici vxores à cura sua, & si reliquerint quoad thorum: debent enim adhuc eas alere, & eis in omnibus prouidere. id quod exposuit Concilium Trullanum can. 48. vbi dicitur, quod Episcopi vxor debet in monasterio aliquo degere, & prouidentia Episcopi viri sui frui. Necnon Concilium Turonense II. canon. 8. vbi dicitur, quod Episcopus coniugatus  
30 debet habere uxorem ut sororem, & eius curam gerere, absque tamen vlla suspitione carnalis commercij. Ad DE, quod iste ipse Canon pro nobis facit; nam Græca vox pro qua habemus (religionis) est *ὑπακούω*, quæ cautionem propriè significat. Itaque sensus est, Episcopus aut Presbyter nequaquam prætextu cautionis uxorem abiiciat, id est, ne curam vxoris dimittat, eo prætextu quod tenetur ab ea se continere, &c.

Ad SECUNDVM dico, anathema dici eis, qui putant Matrimonium ex se esse malum, & propterea existimant non licere sacra facere ei qui uxorem habuit, etiam si ab illa se  
cont-



contineat. Id ita esse, patet, tum quia in ipso primo Canone dicitur anathema iis, qui putant nuptias absolute esse malas, & in hoc canon. 4. non dicitur, qui uxorem habet, sed qui uxorem habuit.

Ad TERTIUM dico, illos Canones non esse ullius approbati Concilij. Nam vera sexta Synodus nullos Canones edidit, ut patet ex VII. Synodo act. 4. & 5. sed post VI. Synodum quidam Episcopi conuenerunt Constantinopoli, & in palatio Imperatoris Iustiniani II. quod Trullum dicebatur, Canones istos ediderunt nomine sextæ Synodi. Ceterum hos 10 Canones non solum nullus Romanus Pontifex probauit, sed etiam aperte improbauit Sergius Papa, qui tunc sedebat, ut Beda scribit, in libro de sex ætatibus in Iustiniano, & Paulus Diaconus lib. 8. cap. 9. de rebus Romanis. Vocata autem Beda erraticam Synodum cœtum illorum Patrum, qui hos canones ediderunt. ADDE, quod etiam isti Canones aliquid valerent, nihil tamen iuuarent causam Lutherano- rum; non enim permittunt, ut ulli Clerico post sacrorum ordinum susceptionem liceat uxorem ducere, quod Lutherani faciunt, sed solum ut liceat uti uxore ante ordinem ducta, & hoc etiam non permittunt Episcopis, sed solum inferioribus Clericis, ut patet ex can. 6. 12. & 48. 20

Ad QUARTUM dico, verba Latina Concilij non esse, in propriis terminis, sed, secundum priorum statuta, vel, secundum propria statuta, id est, secundum legem conditam in Conciliis prioribus Carthaginensibus, ac præcipue in II. Carthaginensi can. 2. Græci autem hæc verba malè intelligentes verterunt, *ἡ τὴν ἐκ τῶν ὁρίων*. Quamquam etiam hæc ipsa Græca verba non malè reddi possent, secundum proprias definitiones. sed cum Latinum sit Concilium, nō Græcum, non multum laborandum est de Græca lectione. Prohiberi autem in hoc Concilio omnem usum vxorum sacris hominibus, patet ex Augustino lib. 2. de adulterinis coniugiis, cap. 20. qui Augustinus illi Concilio interfuit. Item ex eo quod iste Canon loquitur eodem modo de Episcopis, & de aliis. At Patres Trullani non permittunt Episcopos misceri vnquam suis vxoribus.

Ad QUINTUM dico; PRIMVM, Canonem illum fortè nullius esse auctoritatis; nam nec dicit Gratianus quorū sit Stephanus ille, qui cum Canonem edidit, cum plurimi



fuerint Pontifices eius nominis, nec vllius Stephani epistola  
 exstat, vbi ille Canon habeatur. Dico SECVNDO, absque vll  
 lo dubio auctorem eius Canonis, cum dicit Orientales Cle-  
 ricos Matrimonio copulari, non velle dicere, vxores ducunt,  
 sed matrimoniale officium exercent, vt glossa explicat. Nam  
 cum certum sit ex Conciliis plurimis, & ex ipsa praxi, & con-  
 fessione Græcorum, nunquam fuisse licitum, nec nunc ha-  
 beri licitum in Græcia, vt in sacris existentes, ducant vxores,  
 vel ille Stephanus falsum dicit, vel tantum intelligit, vt nos  
 10 diximus, Matrimonio copulantur, id est, Matrimonij copu-  
 lam exercent. Porro hoc ipsum etsi Romana Ecclesia non  
 probat, & abusum esse iudicat, tamen permittit Græcis; & si  
 errorum alium non haberent, facile pax componeretur.

Ad VLTIMUM dico, ea verba non esse beati Augustini, sed  
 Gratiani, qui sua verba cum verbis beati Augustini conti-  
 nuauit, vt sæpe facere solet. Legatur apud Augustinum lib.  
 15. de ciuitate Dei, capite 16. Præterea quod Gratianus di-  
 cit, bonum sensum habet; cum enim ait Ecclesiam addidisse  
 quædã consilia perfectionis, & in eis numerat continentiam  
 20 Clericorum, vult dicere, Ecclesiam imposuisse Clericis con-  
 tinentiam præcepto seruandam, quæ alioqui solum erat  
 consilium perfectionis, nec enim credibile est tam ineptum  
 fuisse Gratianum, vt putauerit continetiam non fuisse con-  
 silium perfectionis ante Ecclesiæ definitionem.

Alium Canonem profert Petrus Martyr in libro de cœli-  
 batu, & votis, ex epist. 87. aliàs 85. S. Leonis, vbi sic legimus:  
*Dicente enim Apostolo, Et inter alias Christianismi regulas is*  
*Episcopus ordinetur, quem vnus vxoris virum fuisse aut esse*  
*constaret, tam sacra semper est habitata ista præceptio, Et iam de*  
 30 *muliere sacerdotis eligenda, eadem intelligatur seruanda con-*  
*ditio: ne forte illa priusquam in Matrimonium eius veniret, qui*  
*aliam non habuisset vxorem, alterius viri esset experta consu-*  
*gium.* Ex hoc loco duo deducit Martyr, posse fieri Episco-  
 pum, non solum qui habuerit, sed etiam qui habeat vnã  
 vxorem: & posse Episcopum vxorem ducere, si non habeat.  
 At mira est impudentia huius hominis; nam idem Leo in epi-  
 stol. 84. ad Anastasium, cap. 3. & 4. disertis verbis iubet, Epi-  
 scopum ita vnus vxoris virum esse posse, vt tamen ab illa  
 perpetuò se contineat, quod verò in quibusdam exemplari-  
 bus legitur: *De muliere sacerdotis eligenda*, mendum est ma-  
 nife-



nifestum. Sic enim legi debet, & legitur in codicibus melioribus: *De muliere sacerdotis eligendi.*

Argumentum *QVARTVM* Philippi. Continentia re est difficillima, nec omnibus datur, ut patet Matt. 19. *Non omnes capiunt verbum hoc.* Ergo non debuit ita indifferenter omnibus Clericis imponi. *RESPONDEO*, sicut non omnium est donum continentiae, ita nec omnes debent esse sacerdotes; sed solum ij, qui videntur hoc donum habere.

Sed *DICES*. Quid si aliquis putet se posse continere, & postea experiat se non posse, quando ordines accepit? 10

*RESPONDEO*, illos habere donum continentiae, qui volunt, & cupiunt continere: quibus autem Deus dedit velle, dabit etiam perficere si ipsi velint. Proinde nemo potest dicere se non habere donum, quod se habere putabat; nam illa voluntas continendi propter Deum, est ipsum donum continentiae. *AD HAEC*, nonne etiam coniugati saepe coguntur, vel propter absentiam, vel propter aegritudinem longissimam coniugis, abstinere se ab vxore? & tamen non licet eis aliam vxorem ducere, quantumvis vrantur aestu libidinis: quod exemplum affert D. Augustinus lib. 2. de adulterinis coniugiis, cap. 19. & 20. contra eos, qui contra ius vxorem ducunt eo prae-textu, quod continere non possint.

Adde, quod nemo est qui continere non possit si velit, ut docent Patres, Tertullianus in fine libri de Monogamia, Nazianzenus oratione 31. Basilus de virgin. ultra medium, Chrysostomus & Hieronymus in cap. 19. Matth. & Augustinus lib. 6. confession. cap. 11. sed oportet remedia necessaria non negligere, quae tria sunt; oratio, ieiunium, & periculorum euitatio. Nam tentatio carnis vel oritur ex suggestione daemone, ut patet in Antonio, Hilarione, Benedicto, & similibus, qui in eremo, & perpetuis ieiuniis viuentes, tamen tentabantur, & tunc necessaria est oratio, quia daemon fortior nobis est, nec possumus eum vincere nisi auxilio fortioris, qui est Deus. propter hoc dicitur Sap. 8. *Nemo potest esse continens nisi Deus det.* Vel oritur ex abundantia cibi & potus; nam cum natura accepit quod sufficit ad nutritionem, reliquum conuertitur in materiam generationis, inde nascitur pruritus carnis; & contra hoc necessarium est ieiunium, ut carnis terat superbiam, potus cibi que parcitas. Vel denique oritur ex aspectu, & colloquio foeminarum; nam res visae



vel audita, si naturæ conueniant, imaginationem naturaliter mouent, & imaginatio appetitum. Hinc tot leges Conciliorum prohibentium Clericis sceminarum contubernium; de quo etiam vide Basilium cap. 3. monastic. constit.

Cum igitur Lutherani hæc tria abiecerint, videlicet orationem Canonicarum horarum, ieiunia omnia, & etiam seria carnibus vescantur, ac demum quisq; domi suæ mulierem habere velit, quid mirum si continere non possint? Certè Lutherus ipse in singulis prandis & cœnis, largissimè epulabatur, & vnum sextarium vini dulcis hauriebat, vt est in epistola quadam ad finem operis Ioannis Cochläi de vita Lutheri.

Argumentum QUINTVM & vltimum; Cœlibatus iste Clericorum prodigiosas libidines parit, mundum concubinis, & Ecclesiam scandalis replet, ergo, &c.

RESPONDEO, falsum esse, quod cœlibatus ista pariat, sed abusus est cœlibatus, qui ista parit. Apostolus enim 1. Cor. 7. fructus cœlibatus esse dicit, cogitare quæ Dei sunt, sanctum esse corpore & spiritu, sine intermissione Domino assidere: Non igitur vsus, sed abusus cœlibatus prodigiosas libidines parit. Si autem propter abusus res bonæ tollendæ essent, cœlum, & terra etiam tollendæ essent, quia eis quidam abutuntur, putantes esse Deos; nec non Decalogus tollendus esset, & omnia Sacramenta; quia etiam eis multi abutuntur. Ita respondet Gregorius NAZIANZENSIS oratione in Basilium non procul a principio, illis qui execrantur Philosophiam naturalem, & scripta gentilium, propterea quod quidam eis abutuntur. Nec tamen admittimus tot esse concubinos, & impuros inter Ecclesiasticos, quot hæretici dicunt, qui omnes alios ex se merientes, nullos putant esse castos; certè plurimi sunt qui quotidie celebrant, & de quibus nulla mala suspicio auditur.

PRAETER hæc argumenta respondendum videtur etiam querimoniam Philippi: *Olim, inquit, Canones suspendebant sacerdotes, qui vxores duxissent, ab officio, vos autem suspenditis ab arboribus.*

RESPONDEO in primis, hinc sequi Lutherum, & alios qui post sacerdotium vxores duxerunt, suspensos fuisse ab officio ex sententia veterum Canonum, & ideo cum officio fungi voluerint, & tamen coniuges retinere, rebelles & con-

tumaces



tumaces fuisse aduersus Ecclesiam, ac proinde merito ab arboribus suspendi potuisse. Dico praterea, Canones veteris Ecclesię, alios mitiores, alios seueriores fuisse; nam Concilium Neocæsariense can. i. iubet Presbyterum ordine moueri, si vxorem ducat; at Concilium Toletanum II. can. i. iubet sacerdotem, qui vxorem duxit, vt sacrilegij reum ab Ecclesia haberi extraneum, & Toletanum VIII. can. 6. iubet eiusmodi homines recludi in monasteriis, vt ibidem sub grauius pœnitentię oneribus vsq; ad finem vitę degant. Adde vltimò, Presbyteros nunquam in Ecclesia tam seuerè puniri, quia vxores ducunt, vt Philippus dicit: sed quia post votum solenne ducunt, & proinde non vxores, sed concubinas sub coniugij nomine ducunt, & Matrimonium simul ac sacerdotium polluant, cui intemperantię cum etiam hæresim addunt, ac dicunt, vota non esse seruanda; quid mirum si digni sunt, qui ab arboribus suspendantur?

Addamus HIERONYMI testimonium lib. i. aduersus Iovinianum: *Certe confiteris, inquit, non posse esse Episcopum qui in Episcopatu filius faciat, alioquin si deprehensus fuerit, non quasi vir tenebitur, sed quasi adulter damnabitur.* Hæc ille. Porro adulterij pœnam Hieronymi tempore, & quidem ordinariam, fuisse vltimum supplicium, patet ex epist. 49. eiusdem Hieronymi, de muliere septies icta, & ex li. i. contra Iovinianũ, vbi sic ait: *Quotidie mæchorum sanguis effunditur, & inter ipsas leges, secures, ac tribunaia flagrans libido dominatur.* Quare Hieronymi sententia, Episcopi liberis operam dantes, non solum suspēdi possunt ab officio, sed etiam, vt adulteri, capite cadi. Sed iam ad Magdeburgenses veniamus.

## CAPVT XXII.

*Soluuntur argumenta Magdeburgensium.*

**M**AGDEBURGENSES Cent. 9. cap. 10. col. 540. 541. & 542. colligunt decem argumenta contra cœlibatum Clericorum ex vna epistola S. Vdalrici Episcopi Augustani ad Nicolaum Papam, quæ nuper exenta est Basileæ, & inserta in illo opere, quod inscribitur, Orthodoxylogia sanctorum Patrum; sed ex iis argumentis nouem sunt eadem cum illis, quæ iam soluimus, à Caluino & Melancthone proposita; vnũ solum soluendum



superest, quod sumitur ex quadam miserabili narratione. Scribit enim iste S. Vdalricus hanc historiam: *B. Gregorius Magnus Papa I. aliquando suo quodam decreto vxores sacerdotibus ademit. Deinde paulo post cum idem Gregorius iussisset ex piscina sua pisces aliquot capi, piscatores pro piscibus sex millia capitum infantium suffocatorum reperiunt; quam eadem infantium cum intelligeret S. Gregorius ex occultis fornicationibus vel adulteris sacerdotum natam esse, continuo reuocauit decretum, & peccatum suum dignis penitentia fructibus purgauit.*

10 Hanc narrationem, quia vehementer odiosam reddit legem de cœlibatu Clericorum, saepe alibi inculcant iidem Magdeburgenses, vt Centuria 6. cap. 7. colum. 388. & cap. 10. colum. 686.

Respondeo PRIMO, si quid valet huius S. Vdalrici auctoritas, ea magis premi Lutheranos, quàm nos. Nam in hac epistola fatetur, Romanum Pontificem esse caput omnium, & ei ab omnibus deberi obedientiam. Item asserit, Pontificem debere cogere Presbyteros & Monachos, ne vlllo modo vxorem ducant, & si duxerint post votum continentia, debere separari.

20 Dico SECUNDO, eam epistolam videri confictam; & confictam ab aliquo imperito defensore coniugij Ecclesiasticorum; nam in primis tempora nullo modo coherant; nam S. Vdalricus creatus est Episcopus anno Domini D C C C C. XXIV. vt Hermannus Contractus, & Abbas Vrspergensis docent, vel anno D C C C C. III. vt dicitur scriptum esse in Chronico Augustanæ Ecclesiæ; Nicolaus autem Papa I. obiit anno D C C C. LXVII. vt Onuphrius annotauit in libro de Romanis Pontificibus: non ergo potuit scribere Episcopus Vdalricus ad Papam Nicolaum, qui iam dudum obierat.

30 DICENT, scripsit fortasse antequam fieret Episcopus. at in principio epistolæ se Episcopum vocat; præterea conueniunt auctores, S. Vdalricum LXXXIII. annos vixisse, L. in Episcopatu, & XXXIII. ante Episcopatum; ex quo sequitur eum natum esse anno Domini D C C C. LXX. vel D C C C. XC I. iuxta alios, ergo inter obitum Nicolai, & ortum Vdalrici sunt anni vt minimum tres; nam secundum alios sunt XXIV. Nisi ergo scripserit ipse antequam nasceretur, vel ad Nicolaum post eius mortem, nō potest esse epistola S. Vdalrici ad Nicolaum.

DICENT,



DICENT, non esse Nicolaum I. sed II. ad quem scribit S. Vdalricus, at id minus fieri potuit; nam obiit S. Vdalricus fere circiter centum annis ante initium Pontificatus Nicolai II. obiit enim S. Vdalricus anno DCCCC. LIII. vel DCCCC. LXXIV. & Nicolaus II. creatus est Papa anno M. LIX.

DICENT fortasse, duos esse Vdalricos Episcopos Augustanos. Vnum enim ponunt Magdeburgenses Centuria 9. cap. 10. col. 540. alterum Centur. 10. cap. 10. col. 602. Sed priorem illum confinxerunt ipsi Centuriatores; non enim aliunde probant illum aliquando existisse quàm ex epistola ad Nicolaum. MYNSTERVS enim lib. 3. de Germania Catalogum recensens Episcoporum Augustanorum, nullum Huldéricum, vel Vdalricum, ponit ante sanctum Vdalricum, qui vixit post tempora Nicolai, ut supra ostendimus. Quocirca Magdeburgenses illius prioris Huldérici à se conficti neque patriam, neque parentes indicant, neque auctorem vllum citant, qui de eius Episcopatu testetur, ut in aliis facere solent.

PRAETEREA, quod iste auctor dicit S. Gregorium ademitse vxores sacerdotibus, falsum est, & magis adhuc falsum 20 quod resciderit huiusmodi decretum. Quod verò in piscina Gregorij sex millia capita sint inuenta, falsissimum. Nec enim vllum exstat vestigium harum rerum in omnibus B. Gregorij operibus, immò ipse lib. 1. epist. 42. meminit decreti sui praedecessoris, qui iusserat, Subdiaconos Siculos separari ab vxoribus, & viuere coelibes, ut reliqui Subdiaconi in tota Ecclesia viuebant, & ibidem temperat rigorem decreti; iubet enim permitti vxores Subdiaconis, qui eas duxerant ante ordinationem, sed non ordinari rursus alios, nisi prius vouerent continentiam. Itaque nihil ipse noui statuit, sed so- 30 lum mitigauit rigorem sententiae sui praedecessoris.

PRAETEREA, si ex decreto Gregorij nata est illa caedes sex millium infantium, certè in Sicilia nata est, ad quam solum pertinet Gregorij decretum. Quomodo autem verisimile est paucissimos Subdiaconos Siciliae breuissimo tempore sex millia infantium genuisse? & quomodo illa sex millia capita ex Sicilia in Romanam piscinam Gregorij saltauerunt? quomodo autem intellectum est illa esse capita filiorum Clericorum, non Laicorum? denique cur de historia tam admiranda nihil scripsit Ioann. Diaconus, Beda, Sigebertus, Ado,



Freculphus, aliique tam multi? Itaque non immerito suspi-  
catur Staphilus hanc epistolam confictam sub nomine S. V-  
dalrici, in responsione ad fictas dissensiones, quas inter Ca-  
tholicos esse falsò criminatur Illyricus, qui etiam addit Au-  
gusta inter opera S. Vdalrici, nullam syllabam de hac re ex-  
stare.

De tota hac disputatione, vide Michaellem Medinam in  
libris quinque de continentia hominum sacrorum, Claudi-  
um Espencem in libris eiusdem argumenti, Iodocum Clich-  
10 rourum in libro de cœlibatu Sacerdotum, Hosium in Dia-  
logo de hac re, Aialam de traditionibus parte tertia, Dida-  
cum Payuam libro ultimo, Ioannem Cochlaeum de votis con-  
tra Caluinum, Alphonsum à Castro lib. 13. de hæresibus, ver-  
bo Sacerdotium, hæresi 4. Albertum Pighium controuersia  
15. Vide etiam solutiones aliorum argumentorum, quæ huc  
etiam referri potuissent, infra lib. 2. de Monachis, cap. 29. &  
sequentibus.

## CAPVT XXIII.

## De Digamia.



**P**OSTREMA restat quæstio; num Apostolica lege  
prohibitum sit, ne qui post primæ vxoris obitum  
alteram duxit, ad sacros ordines admittatur. To-  
ta autem controuersia de verbis illis beati Pauli  
est: *Oportet Episcopum irreprehensibilem esse, vnius vxoris vi-*  
*rum.* Et rursum: *Diaconi sint vnius vxoris viri.* 1. Timoth. 3. &  
Tit. 1. Tres autem eius loci expositiones præcipuè reperi-  
untur.

30 **P**RIMA Lutheri est in libro de captiuitate Babylonica, ca-  
pite de ordinis Sacramento, & fusiùs in propositionibus de  
digamia Episcoporum, vbi docet, B. Paulum illis verbis so-  
lùm prohibuisse scortationem, & adulteria, vt sensus sit: *O-*  
*portet Episcopum esse vnius vxoris virum;* id est, oportet Epi-  
scopum sola vxore legitima, siue vna, siue pluribus esse con-  
tentum, non indulgere scortationibus; ita vt vocabulum vi-  
ri, non significet maritum, sed aliquid cõmune ad maritum,  
& adulterum; & addit, nõ modò non esse prohibitam à Pau-  
lo pluralitatem vxorum successiuè, sed neque simul, nisi for-  
tè apud Gentiles propter scandalum; nam apud Iudæos, vbi  
erat



erat consuetudo plures vxores ducendi, non existimat Lutherus interdictum fuisse Christianis Episcopis multas simul vxores habere.

ALTERA sententia est aliorum, qui existimant à Paulo prohiberi multitudinem plurium vxorum simul, nō tamen successiuē. Ita docent Magdeburgenses, etsi alioqui rigidi Lutherani esse soleant, Cent. i. lib. 2. ca. 4. col. 451. & 452. & Caluinus in caput 3. prioris ad Timotheum, & in caput 1. epistolæ ad Titum.

TERTIA sententia Catholicæ Ecclesiæ est, quæ semper verba illa B. Pauli ita intelligenda esse docuit, vt prohibitum sit sacris ordinibus initiare eos, qui quouis modo bigami fuerint, quam sententiam probare possumus tribus argumentis.

PRIMO ex cap. 5. prioris ad Timotheum, vbi de viduis legimus: *Vidua eligatur non minus sexaginta annorum, quæ fuerit vnius viri vxor.* Ex hoc enim loco refellitur in primis Lutheri sententia; nam eadem phrasi dicitur, *vnus viri vxor*, & vnus vxoris vir: certum autem est illud: *Vnius viri vxor*, non posse significare, vt vidua nō fuerit adultera, vel scortatrix; nam scortum non dicitur vxor, si ad adulterum aut scortatorem referatur, sed adultera, vel meretrix. DEINDE continentia ab adulterio & scortatione, non solum requiritur in muliere quo tempore vir eius viuit, sed etiam postea dum in viduitate degit, & tamen Paulus non loquitur hoc loco nisi de tempore quo vir eius vidua viuebat, non enim dicitur vxor vnus viri fuisse, nisi quando virum habebat. igitur illis verbis: *Quæ fuerit vnius viri vxor*, non potest significari, vt eligatur vidua quæ non fuerit scortatrix, aut adultera, sed quæ vnum solum maritum habuerit.

Ex eodem loco refellitur etiam sententia Centuriatorum, Caluini, Pomerani, & aliorum, qui volunt Paulum prohibuisse, ne habeat Episcopus vel Diaconus duas simul vxores. Nam (vt diximus) eadem phrasi & in eadem epistola, & ab eodem Apostolo iubetur esse Episcopus vnus vxoris vir, & vidua vnus viri vxor; at nullo ratio permittit, vt Paulus iubere voluerit, ne vidua eligatur, quæ fuerit vxor multorum virorum simul. id enim frustra Paulus iussisset, cum nusquam, & nunquam fuerit eiusmodi vsus, vt vna mulier esset plurium virorum vxor. Habuerunt quondam Iudæi multas



multas vxores, vt etiam nunc habent Turcæ; at nunquam est auditum, vt vna mulier plures maritos habuerit. Nam vt ait S. Augustinus lib. 3. de doctrina Christiana, cap. 12. Cur vnus vir haberet plures vxores, ratio erat, vt plures filij nascerentur; at cur vna mulier sit vxor plurium virorum, nulla esse potest ratio; non enim pariet mulier nisi semel in anno, siue habeat vnum, siue centum viros, immò meretrices nullos pariunt ordinariè.

10 ALTERA ratio ducitur ex tempore, quo hæc Paulus scripsit; nam eo tempore non erat consuetudo, neque apud Iudæos, neque apud Gentiles, & multò minus apud Christianos, vt vnus vir duas simul vxores haberet; proinde quod non fiebat, non erat cur tam seriò prohiberetur. & quidem quod ad Gentiles attinet, satis patet ex eo quod in Imperio Romano, quo tunc orbis terrarum regebatur, semper infamis & prohibita fuit polygamia plurium vxorum simul. Vide ff. de his qui notantur infamia, lege prima. Item C. de ince-  
stis nuptiis, L. neminem, & ad L. Iuliam, de adulteriis, L. eum qui; tametsi enim leges istæ paulò posteriores sunt Apo-  
20 stolicis temporibus, tamen indicant prohibitionem polyga-  
miæ, multò esse antiquiorem.

Primus, qui publica lege concessit polygamiam plurium vxorum simul, fuit Valentinianus Senior, vt Socrates refert lib. 4. cap. 26. sed non diu ea lex durauit, cum constaret Imperatorem non alia de causâ eam legem tulisse, quàm vt re-  
geret intemperantiam suam.

Quod verò attinet ad Christianos, nec non etiam Iudæos, ex Testamento nouo facilè colligi potest, non fuisse apud  
eos consuetudinem, vt quis duas vxores haberet, semper e-  
30 nim de coniuge in numero singulari loquitur Scriptura Te-  
stamenti noui, Matth. 5. *Qui dimiserit vxorem suam.* Cap. 19. *Si licet homini dimittere vxorem suam.* Et ibidem: *Omnis, qui reliquerit domum, & agros, aut patrem, aut matrem, aut vxorem, &c. Lucæ 14. Qui non odit patrem, & matrem, & vxorem, & filios, &c. I. Corinth. 7. Vnusquisque suam vxorem habeat.* Item: *Alligatus es vxori, noli querere solutionem; solutus es ab vxore, noli querere vxorem.* Ad Ephes. 5. *Vnusquisque vxorem suam, sicut seipsum, diligat.* Quin etiam Lucæ 1. legimus, Zachariam vxore sterili vsque ad senectutem permanente, non ta-  
men superduxisse alteram, quod haud dubiè fecisset, si eo  
tem-



tempore id fieri licuisset. Scribit quidem Iosephus lib. 17. antiquit. cap. 2. Herodi Regi nouem vxores fuisse: At priuati homines etiam apud Iudæos iam dudum desierant plures vxores accipere.

TERTIA ratio est auctoritas Patrum, qui semper hunc locum de monogamia ita intellexerunt, vt non liceat cum Episcopum vel Diaconum creari, qui duas vxores, etiam diuersis temporibus, habuerit. TERTULLIANVS lib. 1. ad vxorem: *Quantum fidei detrahant, quantum obstrepanz sanctitatis nuptia secunda, disciplina Ecclesie, & prescriptio Apostoli declarat, 10* cum digamos non sint presidere, cum & iduam allegi in ordinationem, nisi & inuiram non concedit. Neque dubium est, quin per digamos intelligat eos, qui duas vxores habuerunt, non simul, sed vnā post alteram; nam de hac digamia in toto libro loquitur; hortatur enim vxorem suam, vt se mortuo non ineat secundas nuptias. Similia habet in lib. de monogamia, & in libro de exhortatione castitatis. Neque vix his repugnat, quod idem Tertullianus in libro de monogamia Catholici obicit, digamiam Sacerdotum: *Quot, inquit, ex digamia 10* president apud vos? Nam vel aliqui digami ex dispensatione presidebant: vel certè aliqui, qui alteram habuerant ante Baptismum, qui multorum opinione non habebantur digami, etsi apud alios, in quibus Tertullianus erat, digami censerentur: vel tandem vicio & abusu id fiebat, nec enim defendimus, nunquam esse factum id quod fieri non debere dicimus.

EPIPHANIVS hæres. 59. Catharorum: *Quæ ad sacerdotium tradita sunt, propter eminentiam celebrationis sacrorum; ea æqualiter ferri ad omnes putauerunt, cum audierint, quod oportet Episcopum irreprehensibilem esse, & inius vxoris virum, continen- 10* tem, similiter & Diaconum, & Presbyterum; reuera enim non suscipit sancta Dei prædicatio post Christi aduentum eos, qui à nuptiis, mortua ipsorum vxore, secundis nuptiis coniuncti sunt, propter excellentem sacerdotij honorem ac dignitatem, & hæc certò sancta Dei Ecclesia cum sinceritate obseruat. Hæc ille. Vbi apertissimè loquitur de digamia plurium vxorū successiua, cum eos digamos appellet, qui mortua vxore, aliam ducunt, & cum Catharos reprehendat, qui ex hoc loco Pauli etiam Laicis interdicebant secundas nuptias.

AMBROSIVS lib. 10. epist. 82. ad Ecclesiam Vercellens. fratrans



Etans hunc locum Pauli; Vnius vxoris vir: *Qui, inquit, coniugium iterauerit, culpam non habet coinquinati, sed prærogatiua exiuitur Sacerdotis.* Hæcille. Vbi apertissime reiicit Lutheri atque Caluini sententiam, qui volunt, ab Apostolo prohiberi vel duas simul vxores, vel adulteria; hæc enim qui admittunt, culpam habent coinquinati, & non solum prærogatiua exiuntur Sacerdotis. Similia habet Ambrosius lib. i. de officiis, cap. vlt. & lib. de dignitate sacerdotali, cap. 4.

10 HIERONYMVS in commentario primi capitis epistolæ ad Titum, per vnus vxoris virum monogamum intelligit. Quod autem monogami nomine intelligat eum, qui nec simul, nec successiue plures habuerit, perspicuum est ex illis verbis: *Apostolus, inquit, de Episcopis & Presbyteris hæc præcipiens, & tunc in ceteris relaxauit, non quod hortetur ad secunda Matrimonia, sed quod necessitati carnis indulgeat.* Hæcille. At certe non indulget Apostolus Laicis ut fornicentur, aut duas simul vxores ducant, sed solum, ut vxore defuncta, iterum in-  
 20 eant Matrimonium; igitur hoc ipsum Sacerdotibus prohibet, ne plures etiam successiue vxores habeant.

S. AVEGVS TINVS lib. de bono coniugali, capite 18. tractans hunc locum; Vnius vxoris vir: *Non absurde, inquit, visum est, eum qui excessit vxorum numerum singularem, non peccatum aliquod commississe, sed normam quandam Sacramenti amisisse, non ad vitæ bonæ meritum, sed ad ordinationis Ecclesiastica signaculum necessariam.* Hæcille. Vbi cum dicit, numerum singularem vxorum excedere, impedimentum esse ordinationis, nec tamen esse peccatum, apertè indicat, se loqui de multitudine vxorum, non vno tempore, sed diuerso.  
 30 Nam eodem tempore plures vxores habere, Christiano nullo modo licet ex Augustini sententia; sic enim loquitur idem Augustinus lib. 22. contra Faustum, cap. 47. *Quid, inquit, tandem criminis est, quod de pluribus simul habitis vxoribus, obicitur sancto viro Iacobi: si naturam consulas, non lasciuendæ, sed gignendæ causâ illis mulieribus stebatur: si morem, illo tempore, atque in illis terris hoc factitabatur, si præceptum, nulla lege prohibebatur, nunc vero cur crimen est, si quis hoc faciat, nisi quia, & moribus, & legibus non licet?* Idem quoque habet in libro de bono coniugali, cap. 7. & lib. 3. de doctrina Christiana, cap. 12.



Sanctus Ioannes CHRYSOSTOMVS homil. 2. in epist. ad Titum: Castigat, inquit, hoc ipso etiam impudicos, dum non eos permittit post secundas nuptias ad Ecclesie regimen, dignitatemque Pastoris assumi; nam qui defunctæ uxori benevolentiam nullam seruasseprehenditur, quo pacto hic Ecclesie praeceptor esse oportu-  
m potuerit? Nostis enim profecto omnes, quod etsi per leges secundæ nuptiæ permittuntur, multis tamen ea res accusationibus pater; nullam ergo occasionem præbere subiectis præfulem Sult.  
Hæc ille. Vbi clarissimè significat, vnius uxoris virum à beato Paulo dici eum, qui post obitum primæ uxoris, secundam non duxit, quomodo exponunt etiam ceteri, tum Græci, vt Theophylactus & Oecumenius, tum Latini, Sedulius, Anselmus, Primasius, Haymo, sanctus Thomas, & ceteri in commentariis huius loci. IDEM etiam disertis verbis docent veteres summi, sanctissimi que Pontifices; Siricius in epist. 1. ad Himericum, ca. 11. Leo 1. in epist. 85. alias 88. ad Episcopos Africæ, cap. 1. Gelasius 1. in epist. 1. ad Episcopos Lucaniam, Brutijs, & Siciliæ, cap. 5. Hilarius in Concilio Romano; & Innocentius in epist. 22. Vnus est Theodoretus, quantum legere potui, ex omni numero veterum, qui per vnius uxoris virum, intellexerit eum, qui duas aut plures simul uxores non habet; ita enim exponit in commentario, cap. 3. prioris epistolæ ad Timotheum; sed non est tanta eius auctoritas, vt tot sanctis Pontificibus, & omnibus alijs Patribus anteponi debeat.

His accedit QUARTO & vltimò, totius Ecclesiæ consuetudo. Nam, vt Innocentius scribit in epist. 22. cap. 1. in toto Oriente & Occidente hoc seruabatur, quod etiam nunc seruari videmus, vt bigami non ordinentur. Neque solum vbi-que, sed etiam semper hoc seruatum esse, planum esse potest ex Leone epist. 88. ad Afros, vbi dicit, semper hoc esse seruatum; necnon ex eo, quod huius rei mentio fit in Canonibus Apostolorum, can. 17. & 18. & in antiquissimis Concilijs, vt Neocæsariensi, can. 8. & in Nicæno 1. teste Ambrosio in epist. 82. Deinceps etiam semper esse seruatum, pater ex decreto Gratiani, dist. 26. & ex decretalium volumine, tit. de digamis, vbi multa ponuntur testimonia Pontificum, & Patrum diuersarum aetatum; quod autem semper & vbi-que seruatum est, sine dubitatione vlla ab Apostolica traditione descendit.



## CAPVT XXIV.

*Soluuntur obiectiones Lutheri.*

**S**ED IAM ad argumenta LUTHERI respondeamus. PRIMA OBIECTIO; Apostolus iubet, Episcopum eligi irreprehensibilem, siue, vt ad Titum loquitur, sine crimine, quod est Græcè ἀνεγκριματός. Is autem est eiusmodi, qui non potest palam argui alicuius criminis. Explicat verò statim Apostolus, quæ sint crimina, quibus carere debet Episcopus, & ait: *Vnius uxoris vir, filios habens fideles.* igitur vnius uxoris vir, non significat monogamiam, quæ opponitur polygamia plurium vxorum successiue, quæ nunquam fuit crimen, sed eam, quæ opponitur fornicationi & adulterio, quæ vera sunt crimina.

RESPONDEO, potest hoc loco nomine criminis non solum peccatum intelligi, sed quidquid ab hominibus reprehendi solet; neque enim sola peccata reprehenduntur, sed etiam ea, quæ signum præbent incontinentiæ, aut alterius vitij: talem autem esse quamlibet bigamiam certissimum est. Nam idcirco in Concilio Neocæsariensi can. 7. prohibentur Sacerdotes interesse nuptiis digamorum, & etiã apud Gentiles bigami Pontifices esse non poterant, vt Tertullianus refert lib. 1. ad vxorem, & Seruius in illud 4. *Æncidos*.

*Huic vni forsitan potius succumbere culpa.*

*Culpa, inquit, propter antiquum ritum, quo repellebantur à sacerdotio bis nuptiæ.*

Apostolus igitur vult, Episcopum nullius rei, quæ malam speciem præferat, apud homines posse notari, & ideo monogamum esse iubet. Ita hunc locum Chrysostomus exponit; possumus tamen nomine criminis intelligere etiam peccatum graue ac letale, vt vult sanctus Augustinus tract. 41. in Ioannem, & lib. 1. contra duas epistolas Pelagianorum, cap. 14. sed si ita accipiamus nomen criminis, non debemus exponere verba sequentia beati Pauli, quasi iis explicetur quid sit, esse irreprehensibilem, siue sine crimine; sed ita vt eis declaretur, Episcopum non solum sine crimine esse debere, sed etiam multis præclaris dotibus ornatum, vt monogamia, sobrietate, doctrina, &c.

SECUNDA OBIECTIO; Si Episcopus monogamus esse deberet,



beret, aut ratio huius rei esset moralis, videlicet ob maiorem continentiam, aut certe spiritualis siue mystica, videlicet ob significationem coniugij vnus Christi cum vna Ecclesia; at neutrum dici potest. Nam si ratio esset moralis, multo magis requireretur in Episcopo ne esset adulter, aut concubinaris, quam ne esset bigamus, & tamen videmus adulteros, & concubenarios non repelli a sacerdotio, digamos autem repelli, si verò ratio sit mystica, multa sequuntur absurda. Nam in primis ceteræ dotes Episcoporum, quæ à Paulo numerantur, omnes sunt morales, vt sobrietas, hospitalitas, doctrina, & ceteræ. Cur non etiam ista erit moralis; vnus vxoris vir?

SECUNDO, si ideo Episcopus debet esse monogamus, quia eius coniugium significat Matrimonium Christi cum Ecclesia, igitur etiam Laici debebunt esse monogami, quia eorum quoque coniugium significat Christi coniugium.

TERTIO, si illa est ratio, igitur debebit Episcopus ducere virginem, & eam semper virginem cōseruare, ita enim Christus fecit.

QUARTO, debebit Episcopus priorem vxorem repudiare, & posteriori adherere. Nam Christus, Synagoga repudiata, adhæsit Ecclesiæ. quocirca Episcopus, vt Christum imitetur, non monogamus, sed bigamus erit.

QUINTO, debebit idem Episcopus necessariò vxorem habere, eaq; ne ad punctum quidem temporis carere; Christus enim Ecclesiæ sponsa sua nunquam caret.

RESPONDEO, rationem, cur Episcopi, Presbyteri, & Diaconi debeant esse monogami, partim esse moralem, partim mysticam; tamen enim multæ rationes reddi solent à Patribus, tamen omnes reuocantur ad duas illas in argumeto aduersarij notatas. VNA igitur causa est moralis, videlicet minor suspicio incontinentiæ, siue perfectior continentia. Hanc reddit Tertullianus locis citatis, & Chrysostomus in commentario locorum beati Pauli; atque ad hanc reuocatur causa, quam reddit Epiphanius hæresi 59. vbi dicit, monogamum esse debere Episcopum ob excellentiam sacerdotij. Ad eandem reuocari potest ea, quam reddit Ambrosius li. i. de officiis, capite vltimo, vbi dicit, monogamum esse debere Episcopum, vt liberius hortari possit homines ad continentiam.



ALTERA caussa est mystica, videlicet perfecta significatio coniugij Christi cum Ecclesia; qui enim secundam uxorem duxit, significat quidem coniugio suo Christi coniugiū, sed non ita perfecte, ut is, qui vnam solam habuit; non enim significat, Christum esse vnum vnus Ecclesiæ sponsum.

DICES, peccat igitur, qui secundam uxorem ducit; nam falsum significat, Christum videlicet pluriam esse sponsum Ecclesiarum. RESPONDEO, id non sequi; Nam secundæ nuptiæ non sunt institutæ ad significandum, Christum bis maritum esse, ideoque id non significant; quanquam nec significant, eum vnum vnus, sed simpliciter significant ipsam coniunctionem, abstrahendo ab vna vel pluribus. Itaque nuptiæ digamorum nihil falsi significant, sed carent quadam perfectione significationis, quam habent nuptiæ monogamorum. Atque hanc causam reddunt sanctus Augustinus libro de bono coniugali, cap. 18. & sanctus Leo in epist. 88. ad Afros, & huc etiam pertinet ratio illa Epiphaniij de excellentia sacerdotij.

Ut igitur respondeamus ad singulas partes obiectionis:  
20 Si ratio, inquit, moralis est, igitur maiori ratione prohibentur adulteria & concubinatus, quàm digamia.

RESPONDEO, prohiberi, quidem etiam ista, non enim voluit adulteros, aut concubinarios Episcopos eligi, qui iussit eligi homines sine crimine, irreprehensibiles, sobrios, castos, &c. sed tamen negamus magis ista prohiberi, quàm digamiam in Episcopo deligendo. Nam ista prohibentur vna solùm ratione, & ea non primaria: digamia verò duabus rationibus prohibetur. quod autem primaria ratio non sit illa moralis, ob signum incontinentiæ, sed altera mystica  
30 ob significationem, patet ex eo, quòd digami censentur etiam illi, qui vnam uxorem habuerunt, sed viduam, vel alio modo corruptam, ut constat ex citatis locis canonum Apostolorum, Concilij Neocesariensis, Innocentij, Leonis, & aliorum, ac præterea etiam si longè turpior sit concubinatus, quàm digamia, tamen digamia ex natura sua signum est incontinentiæ magis diuturnæ, firmissque inhaerentis.

Ad PRIMVM alterius partis respondeo, rectè monogamiam numerari cum ceteris moralibus dotibus, tum quia etiam ipsa est moralis dos, tum etiam quia nihil incommodi habet,



habet, numerare dotem mysticam cum moralibus, cum omnes Episcopo necessariae sint.

Ad SECUNDVM, negamus id sequi, vt etiam Laici debeant esse monogami. Non enim necesse est, vt Laici ea perfectione sint praediti, qua praediti esse debent Episcopi; quare satis est, si Matrimonium Laicorum significet coniugium Christi cum Ecclesia, licet non significet illud, vt est vnus cum vna, vt supra diximus.

Ad TERTIVM, negamus etiam sequi, vt Episcopus debeat vxorem semper virginem seruasse. Nam Christi sponsa Ecclesia duo priuilegia habet; nam & virgo est, iuxta illud 2. Corinth. 11. *Despondi vos vni viro virginem castam exhibere Christo*; & simul fecundissima est, & plurimos quotidie filios parit per lauacrum regenerationis. Duo autem ista priuilegia simul, nullum coniugium humanum representare potest, illo excepto, quod fuit inter beatam Virginem & sanctum Iosephum. Idcirco satis est, si Episcopi coniugium, alterum eorum significet, nimirum aut fecunditatem Ecclesiae, si filios ex vxore habuerit, aut virginitatem, si fortè vxorè virginem conseruauit, vt aliqui sancti viri fecerunt.

Ad QVARTVM, negamus Christum repudiasse vnquam sponfam suam, vt acciperet aliam. Nam Christus, vt homo, non accepit vnquam, nisi vnā sponfam, id est, Ecclesiam Christianam, quam ipse ex latere suo perfosso sibi formauit, vt quondam Adam, vnā Euam ex latere suo eductam, vxorem accepit. Idem verò Christus, vt Deus, ab initio mundi Ecclesiam sibi coniunxit in Matrimonium, neque vnquam eam dimisit. Etsi enim videtur Christus repudiasse Synagogam, quia sunt hoc tempore Iudaei sine Deo, & quia beatus Paulus ad Galatas quarto, exponit de Testamento vetere 30 illud Genes. 21. *Erece ancillam & filium eius*. Tamen reuera Ecclesiam Testamenti veteris Christus non repudiavit, sed renouauit, & pulchram reddidit, & ex ancilla liberam fecit, & hoc modo eiecit ancillam, id est, statum illum seruilis, quomodo si aliquis ancillam vxorem acciperet, ac post aliquantum temporis eam liberaret. Quare beatus Paulus ad Roman. 11. *Nunquid, inquit, Deus repulit populum suum? Absit. Nam & ego israelita sum; non repulit Deus plebem suam, quam praesciuit, &c.* Itaque solum pars quaedam obstinatorum Iudaeorum recessit ab vnitatem veram



Synagoga: reliqui manserunt, & per eos continuatū est coniugium Christi cum Ecclesia.

Ad QUINTVM, negamus, Episcopum semper ac necessario vxorem habere debere, immo melius facturum dicimus, si nunquam vxorem duxerit. Nam cum Christus & virgo & maritus sit, si Episcopus vxorem non habeat, Christum virginem representabit, si vxorem habeat, Christi coniugium significabit. Itaque monogamia in Episcopo requiritur, si coniugatus fuerit, non absolutē.

10 TERTIA OBIECTIO, quod Paulus ait 1. Timoth. 3. Episcopum esse oportere vnus vxoris virum; simile est ei, quod idem ait 1. Corinth. 7. *Vnusquisque vxorem suam habeat*, at in his posterioribus verbis non prohibentur secundæ nuptiæ, sed adulteria, & scortationes.

RESPONDEO, probandam esse Luthero propositionem argumenti; non enim sunt omnino similes duæ illæ sententiæ. Nam in priori determinatur numerus cōiugij, cum vnus vxoris mentio sit; in posteriore nō determinatur; habebit enim verē vnusquisq; suam vxorem, si legitimam coniugem  
20 habeat, etiam si fortē non sit prima, sed secunda.

Sed instat LUTHERVS, & probat sententias illas esse similes. Nam 1. Timoth. 3. Paulus ait: *Diaconi sint vnus vxoris viri*. vbi illud, *Vnius*, non potest determinare numerum, alioqui sensus esset, vt multi Diaconi vnā vxorem communem haberent. Ponitur igitur illa vox, *Vnius*, pro, *Solius*, vt sensus sit, Diaconi solius vxoris suæ viri sint, non mulierum ceterarum. At indigna est obiectio, cui respondeatur. Quis enim non intelligit illud: *Diaconi sint vnus vxoris viri*, diuise accipi debere, nō coniuncte? Iste igitur sensus est, Diaconi, id est,  
30 quilibet Diaconus sit vnus vxoris vir.

QUARTA OBIECTIO. Apostolus Paulus 1. Corinth. 7. se in numero viduorum ponit, & tamen 1. ad Corinth. 9. ait: *Am non habemus potestatem sororem vxorem circumducendi, sicut Apostoli, & fratres Domini, & Cephas?* Poterat igitur Paulus, licet viduus esset, vxorem ducere; quomodo enim potuisset sororem vxorem circumducere, si non potuisset eam prius ducere?

RESPONDEO, hoc argumentum multis modis peccare. Primum enim, beatus Paulus non se inter viduos numerat, sed inter eos, qui vxore carebant, siue eam nunquam acceperant,



piſſent, ſiue iam amiſſent: *Innuptis*, inquit, & *Siduis dico*, quia bonum eſt, ſi ſi ſic permanſerint, ſicut & ego. Deinde, non dicit idem Apoſtolus, habere ſe poteſtatem ſororem vxorem circumducendi, ſed ſororem mulierem, vt interpretes omnes tradunt. de qua re ſuperiore quaſtione diſputauimus.

OBIECTIO QUINTA. Poterat Paulus, ſi voluiſſet, aperte dicere, Epiſcopum debere eſſe monogamum, ergo cum nō dixerit, Epiſcopum debere eſſe monogamum, ſed vnus vxoris virum, cogere voluit Lectores, vt intelligerent verba ſua, non de ſingularitate nuptiarum, quod ſonat nomen monogamiae, ſed de ſingularitate mulieris, quod ſignificat illud: *Vnus vxoris vir*. Non igitur interdicit Epiſcopo B. Paulus ſecundas nuptias, ſed aliarum mulierum commercium, præter commercium legitimæ vxoris.

RESPONDEO, ſi ita cauillari liceat, nunquam finiendas quaſtiones; dixit Apoſtolus, quod intelligeretur; non debuit omnes loquendi formas excutere. Adde vocem, *Monogamus*, apud Græcos non eſſe in vſu, ſed à Latinis primū vſurpari ceptam, et ſi ex Græcis vocibus compoſitam. Proinde non eſſe mirum, ſi Paulus, qui Græcè ſcripſit, ea non fuerit vſus. Adde etiam, hanc ipſam vocem, licet propriè ab vnis nuptiis deductam, tamen vſitatè etiam accipi pro eo, qui habet vnā vxorem, ſiue ea prima fuerit, ſiue ſecunda; ex quo ſequitur, vt idem omnino ſit Monogamus, quod vnus vxoris vir.

SEXTA OBIECTIO. Ambroſius libro de dignitate ſacerdotali, capite 4. illa verba, *Vnus vxoris vir*, expoſuit de coniugio ſpirituali Epiſcopi cum Eccleſia, atque ait, Apoſtolum id iubere, vt Epiſcopus vnā Eccleſiam regat, non multas. Non igitur, ſi Ambroſio credimus, interdicitur Sacerdotibus digamia.

Hieronymus quoque in epiſtola ad Oceanum, defendit acerrimè Carterium Hiſpanum Epiſcopum, qui duas vxores habuerat, & ad legem Apoſtoli, in quam peccaſſe Epiſcopus ille accuſabatur; reſpondet, poſſe illud, *Vnus vxoris vir*, multis modis intelligi. Nam primū hic poteſt eſſe ſenſus; Sit Epiſcopus vnus vxoris vir, id eſt, vnā habeat vno tempore, & licet ea mortua, alteram ducat, nunquam tamen ſimul habeat duas. Deinde etiam, nomine vxoris accipi



potest Ecclesia, vt ille sit vnus vxoris vir, qui vni præpositus Ecclesiæ est. Et rursus, nomine vxoris, mulier potest accipi, vt idem sit vnus vxoris vir, quod vnus mulieris vir, vt non tam secundæ nuptiæ, quàm multarum simul mulierum commercium prohibeatur.

Addere possumus testimonium S. Augustini libro de bono coniugali, cap. 18. vbi opponit Sacerdotem Testamenti veteris, qui multas vxores habere poterat, Sacerdoti Testamenti noui, qui vnâ solùm habere potest. At ille multas simul habere poterat, igitur iste plures vno tempore habere prohibetur, non autem vnâ post alteram.

Ad AMBROSII testimonium facile erit respondere, siquidem ipse in illo ipso loco, qui nobis obiicitur, scribit, ad litteram prohiberi digamiam vxorum Sacerdotibus. Mysticè autem posse etiam exponi de digamia Ecclesiarum; quocirca idem Ambrosius in ep. 82. & li. 1. de officiis, cap. vlt. & in commentariis in Paulum, non meminit huius mysticæ expositionis, sed exposuit simpliciter de vera monogamia.

Ad HIERONYMI verò, vt respondeamus, obseruandum est, controuersiam fuisse inter veteres Patres, An qui vnâ vxorem habuit ante Baptismum, eaque mortua, alteram duxit post Baptismum, bigamus censendus esset, nec ne? Nam sanctus Hieronymus in epistola ad Oceanum contendit, eiusmodi hominem non esse bigamum, propterea quod per Baptismum sit factus nouus homo ex veteri, & nihil ei nocere possit eorum, quæ fecit ante Baptismum. Et sanè huic sententiæ multum fauet canon. 17. Apostolorum, qui disertè prohibet Episcopum fieri, qui post Baptismum bis nuptias celebrauit.

Contrà verò, Ambrosius, Innocentius, & Augustinus locis citatis contendunt, omnino habendum bigamum, qui duas vxores habuit, siue ante Baptismum, siue post Baptismum. Nam Baptisma diluit peccata, non soluit coniugia; & renouat hominem, quantum ad vetustatem vitiorum, non quantum ad ea, quæ rectè se habent. Atque hæc sententia tandem præualuit, & ab vniuersa Ecclesia recepta est. Neque obstat canon Apostolicus; fortasse enim eo tempore propter hominum paucitatem dispensabant Apostoli cum illis, qui ante Baptismum vxorem vnâ, vel plures habuerant, modò non habuissent plures post Baptismum. Neque



enim est hoc præceptum Apostoli omnino indispensabile. Hieronymus igitur non defendit Episcopum polygamum, nec docet, à beato Paulo permissam polygamiam Sacerdotibus, sed solum contendit, eum, qui vnam tantum vxorem habuit, post Baptismum non esse polygamum, licet habuerit alteram ante Baptismum.

Et quamuis idem HIERONYMVS tres illas expositiones loci Paulini adducat, quæ in obiectione propositæ sunt, non tamen eas approbat, vt veras & germanas. Nam PRIMAM illam de polygamia plurium vxorum simul, dicit se adducere, vt malo cuneo malum nodum scindat. ALTERAM de polygamia Ecclesiarum, dicit esse coactam, & duram expositionem: *Quidam, inquit, coactè interpretantur Vxores pro Ecclesiis, viros pro Episcopis.* Denique TERTIAM illam de viro vnus mulieris, & simul duas superiores, reicit apertissime, cum sic ait: *Hæc vniuersa proferimus, non quo vera & simplici intelligentia resistamus, sed ut doceamus te Scripturas sanctas sic intelligere, ut scriptæ sunt, nec euacuare Baptismum Saluatoris, & totum patibuli Sacramentum irritum facere.* Hæc ille. Vbi tres illas expositiones vni simplici & veræ opponit; quam autem vocet simplicem & veram, intelligi potest ex commentario eius ad caput primum epistolæ ad Titum, vbi simpliciter exponit, vnus vxoris virum esse eum, qui post obitum primæ vxoris, secundam non duxit.

Ad locum AVGVSTINI respondeo, antithesim sacerdotum Testamenti veteris, & noui, in eo solum positam esse, quod illi habuerunt plures vxores, isti vnam; non autem in eo, quod illi habuerunt plures simul, isti non plures simul, id quod ex duobus colligi potest; nam Augustinus dicit, ideo Sacerdotes noui Testamenti non posse habere plures vxores, quia significant Christi coniugium cum vna Ecclesia; at Ecclesia vna est omnino, non vna post alteram. Deinde idem Augustinus ibidem dicit, non esse peccatum, habere nunc duas vxores, sed tamen esse impedimentum ordinationis. At habere duas simul tempore noui Testamenti, peccatum esse, idem Augustinus docet libro de bono coniugali, cap. 7. Igitur cum dicit, Sacerdotem Testamenti noui non posse habere, nisi vnam vxorem, intelligit, nec simul, nec successiue.



SEPTIMA OBIECTIO nostra est, ut res melius intelligatur, si bigamia prohibita esset Sacerdotibus ob defectum significationis, certè bigamus esset, qui plures uxores legitimas habuisset, licet cum vna tantum Matrimonium cōsummasset; nam Matrimonium integrum est & perfectum etiam sine copula coniugali. At contrarium definit ius canonicum, cap. Debitum, de bigamis.

Ad hæc, illa sola bigamia prohibita esset, quæ ex duobus veris Matrimoniis constaret, at non ira est; nam cap. Nuper, <sup>10</sup> de bigamis, censentur bigami etiam illi, qui vnam uxorem legitimè duxerunt, & alteram non legitimè, cum tamen posterius non fuerit verum Matrimonium; immò etiam qui post votum solenne vnam uxorem ducunt, bigami censentur, & illi quoque, qui fornicariam ducunt, licet vnam; ubi nullo modo fingere licet duo Matrimonia, nisi quis fornicationem Matrimonium appellet. & confirmatur; Nam si vir fornicarius ducat uxorem virginem, non est bigamus; si verò vir castus ducat fornicariam, bigamus est: Non igitur fundamentum bigamiæ est defectus significationis; nam in hoc <sup>20</sup> paria sunt illa coniugia, in quibus aut vir, aut mulier fornicationem admisit.

RESPONDEO, tres sunt species bigamiæ, ut interpretes iuris Canonici rectè docent in titulum de digamis. PRIMA species est digamia vera & propria, ea videlicet, quæ ex duobus veris Matrimoniis oritur. Contingit autem tribus modis hæc digamia. PRIMO, ex parte viri tantum, cum vir habuit duas veras uxores. SECUNDO, ex parte uxoris tantum, cum uxor habuit duos veros maritos. TERTIO, ex parte utriusque, cum viduus viduam ducit; & de hac specie nulla dubitatio <sup>30</sup> est. Constat enim, semper in ea defectum significationis adesse, cum aut vir non sit vnus vnius, aut uxor non sit vna vnius.

SECUNDA species est digamia interpretatiua, id est, quæ verè ex natura rei non est digamia, sed iuris interpretatione habetur ac reputatur digamia. Contingit autem hæc digamia quotiescunque aliquis ducit secundam uxorem, aut uxor secundum virum de facto, non de iure, siue primum coniugium de iure, siue tantum de facto fuerit, ut patet ex titulo de digamis; licet enim hic non sit verè defectus significationis, tamen Ecclesia extendit poenam bigamorum etiam



etiam ad istos. & forrè S. Paulus, cum ait: *Episcopi sint Vnius*  
*Vxoris Viri*, intelligi voluit id de iure, vel de facto, ita vt inter-  
dixerit, ne quis ordinetur, qui fuerit plurium vxorum vir, si-  
ue de iure, siue de facto.

TERCIA species est digamia metaphorica, id est, quæ con-  
surgit ex duplici coniugio, quorum alterum non verum, sed  
metaphoricum fuerit; sic enim Ancyranum Concilium can-  
19. inter digamos haberi iubet eos, qui post votum conti-  
nentia ad Matrimonium transierunt. siquidem votum con-  
tinentia genus est Matrimonij animæ cum Deo, licet meta-  
phoricum. Porro isti prohibentur ordinari, non quodd verè  
bigami sint, sed quia Ecclesia pœnam bigamorum ad eos  
extendere voluit.

Ex his ad PRIMVM respondeo, bigamiam non oiri, nisi  
ex Matrimonio consummato. Nam, vt rectè dicit Innocen-  
tius Papa cap. Debitum, de digamis, Matrimonium ratum,  
sed non consummatum significat coniunctionem Dei cum  
anima per gratiam; Matrimonium autem consummatum  
significat coniunctionem Christi cum Ecclesia per naturæ  
conformitatem. Nam Apostolus ad Ephes. 5. tum dixit: *Sa-*  
*cramentum hoc magnum est, ego autem dico in Christo & in Ec-*  
*clesia*, cum paulò antè dixisset: *Erunt duo in carne Vna*. Biga-  
mia verò nascitur ex defectu significationis coniugij Christi  
cum Ecclesia, non Dei cum anima.

Ad id verò, quod obiciebatur de bigamia eorum, qui ha-  
buerunt plures vxores de facto, non de iure, iam responsum  
est in explicatione specierum bigamiæ.

Ad illud verò de eo, qui ducit fornicariam, quidam re-  
spondent, ideo bigamum esse, qui ducit fornicariam, licet  
bigamus non sit fornicarius, qui ducit virginem, quia Epi-  
scopus repræsentat Ecclesiam, sponsa Episcopi repræsentat  
Christum; constat autem, in ipsa Ecclesia non deesse aliquas  
corruptelas, in Christo verò nihil eiusmodi esse posse. At  
HÆC solutio pugnat cum Apostolo Paulo, qui ad Ephes. 5.  
comparat virum cum Christo, & sponsam cum Ecclesia: *Viri*,  
inquit, *diligite Vxores Vestræ, sicut Christus Ecclesiam*. ALII,  
in quibus est Dominicus à Soto in 4. sent. dist. 27. q. 3. artic. 1.  
dicunt, causam illius discriminis esse, quia Matrimonium  
sumit speciem suam à termino ad quem, ac proinde Matri-  
monium viri tunc solùm vitatur, cum in vxore est vitium;



illa enim est terminus ad quem, respectu viri, & cōtrā, quando vitium est in viro, tunc vitiatum Matrimonium ex parte vxoris, & si illa esset capax ordinationis, fieret irregularis, si nuberet viro fornicario.

At hæc solutio acutior, quàm verior esse videtur; nam si ex termino ad quem, tantum nasceretur bigamia, certè qui duceret secundam vxorem virginem, nō esset bigamus; nam in eiusmodi Matrimonio nullum est vitium in termino ad quem, sed totum est in termino a quo, id est, in ipso viro, qui  
 10 bis Matrimonium contrahit: atqui nulla est magis propria bigamia, quàm ducere duas vxores, licet virgines. Sicut igitur æquè oritur bigamia, si viduus ducat virginem, & si virgo ducat viduum, vt patet; ita quoque bigamia esset, cum vir fornicarius ducit virginem, si bigamia esset, cum vir castus ducit fornicariam.

RESPONDEO igitur, prohibitum esse ne ordinetur, qui ducit fornicariam, non quod ea sit bigamia, neque ob illud Apostoli præceptum: *Vnus vxoris vir*, sed quia sic placuit Ecclesiæ ob dignitatem sacerdotij; nam indignum est tam gra-  
 10 ui persona Matrimonium cum fornicaria, non autem indignum est viro fornicario, si vxorem virginem ducat; esse autem huius rei causam, non bigamiam, sed dignitatem sacerdotij, ex eo probari potest, quod canon. 18. Apostolorum, vbi prohibetur sacerdos fieri qui duxit fornicariam, prohibetur etiam is fieri sacerdos, qui duxit ancillam, vel comædiarum æstricem, vbi nullum locum habet bigamia, sed sola infamia. Atque hæc de cœlibatu dicta sufficiant.

Sequerentur nunc disputationes, quinta & sexta videlicet; quinta de horis canonicis, & sexta de ritu tonsuræ, siue  
 30 rasuræ Clericorum; sed quia de horis canonicis in disputatione de oratione commodiùs tractari poterit, de ritu verò tonsuræ differemus in sequenti libro, qui erit de Monachis, nunc ad septimam disputationem nos conferemus.

## CAPVT XXV.

## De Decimis.



PRIMA quæstio erat de temporalibus bonis Clericorum; Sunt autem tria bonorum genera, de quibus ambigi potest, an Clericis conueniant.  
 PRIMO loco, sunt decimæ, quæ debentur Clericis

cis



et ex iustitia. SECUNDO, sunt agri, domus, ac possessiones ceteræ, quas dono Laicorum, maximè Principum, Ecclesia possidet. TERTIO, sunt bona, quæ habentur titulo planè seculari, ut hæreditate paterna, emptione, venditione, &c. de singulis ordine dicemus. Ac primum, de decimis quatuor inuenio errores.

PRIMVS error fuit Ioannis VViclef, qui, ut refert VVald. lib. 2. doct. fidei, art. 3. cap. 64. & 65. docebat decimas esse puras eleemosynas, & nullo iure deberi Sacerdotibus; Eundem errorem sequuntur hodie Anabaptistæ, Trinitarij: Nam in 10 libello, quem ediderunt anno M. D. LXVIII. Albæ Iuliæ de Antithesibus veri & falsi Christi, tertiam Antithesin faciunt hanc: *Falsus Christus, sicut ipse est Deus æternus, & dissimulus, sic dedit suis Sacerdotibus decimas, & multa bona temporalia. Christus autem Verus, qui homo temporalis, & pauper fuit, pauperes etiam vult Ministros.*

Error est manifestus, facile enim doceri potest, esse de iure nature & diuino, quod aliquid soluant laici Sacerdotibus, & præterea de iure Ecclesiastico, ut id quod soluitur sit pars decima. Quod sit de iure nature, probatur: Nam certè ratio dicat, ut is, qui pro populo laborant, populus alimenta præbeat, unde enim deducimus deberi Regibus tributa, & militibus stipendia, & iudicibus, alijsq; ministris publicis salaria, inde etiã deducere possumus, deberi sacerdotibus decimas, vel aliquid earum loco. Itaq; tempore legis naturæ videmus Abraham dedisse decimas Melchisede cho sacerdoti, qui tunc erat, Genes. 14. in quem locum scribens Chrysostomus hom. 35. in Gen. dicit Abrahamum hoc factò Doctorem nostrum fuisse, ac monuisse quid nos facere debeamus.

Quod autem de iure diuino sit, probatur ex utroq; Testamento; ac primum Leuit. ult. Num. 18. Malac. 3. & alibi, Deus iussit decimas Leuitis dari, quæ quidem præcepta licet non obligent Christianos, ut iudicialia erant, obligant tamen quatenus moralia, id est, quod pars aliqua fructuum sit Sacerdotibus danda; id enim apertè docet Clemens lib. 2. constit. Apostol. cap. 29. 38. & 39. & li. 8. cap. 36. ubi dicit, etsi Christiani sint liberi à cærimonijs legis veteris, non tamen à decimis, & oblationibus, immò nunc magis teneri ad hæc omnia Christianos, cum debeat eorū iustitia abundare plus quàm Scribarum & Pharisæorum.

Item



Item B. HIERONYMVS in cap. Malach. 3. sic ait: *Quod, inquit, de decimis primitiisq; diximus, quæ olim dabantur à populo Sacerdotibus, atq; Levitis, in Ecclesia quoq; populis intelligite, quibus præceptum est non solum decimas, & primitias dare, sed & vendere omnia quæ habent, & dare pauperibus: quod si facere nolumus, saltem Iudeorum imitemur exordia, Si pauperibus partem demus ex toto, & Sacerdotibus, ac Levitis honorem debitum deferamus: quod qui non fecerit, Deum fraudare, & supplantare conuincitur.* Vbi tamen nota, quod etsi B. Hieronymus dicat esse præceptum, vendere omnia, & dare pauperibus, tamen intelligit esse præceptum non absolute, sicut de soluendis decimis, sed si quis perfectus esse velit; nam de isto subdit: *Quod si facere nolumus, &c.* De decimis autem dicit: *Quod qui non fecerit, Deum fraudare, & supplantare conuincitur.*

Item B. AVGVSTINVS serm. 219. de tempore, eundem locum Malachiæ tractans: *Deus, inquit, qui dignatus est totum dare, decimam à nobis dignatur repetere, non sibi, sed nobis sine dubio profuturam: sic enim per Prophetam ipse promissit, dicens: Inferte omnem decimam in horreis meis, Si sit cibis in domo mea, & probate me in his, dicit Dominus.* Fortè non est B. Augustini iste sermo, tamen insignis est sine dubio, & antiqui alicuius Patris; nam inde tanquam ex Augustino multa sunt adscripta in decreto 16. q. 1.

Item B. GREGORIUS hom. 16. in Euangelia: *Sicut, inquit, offerre in lege iubemini fratres carissimi decimas rerum, ita ei offerre contendite, & decimas dierum:* Deinde in Testamento nouo habemus, Matth. 22. *Reddite quæ sunt Cæsaris, Cæsari, & quæ sunt Dei, Deo.* In quem locum Hieronymus & Augustinus lib. 50. homil. hom. 48. dicunt præcipere Dominum, ut reddantur Cæsari tributa, & Deo decimæ: præterea Matth. 10. *Dignus est operarius mercede sua.* 1. Corint. 9. *Nescitis, quoniam qui in sacrario operantur, quæ de sacrario sunt edunt, & qui altari deseruiunt, cum altari participant: ita & Dominus ordinauit iis, qui Euangelium annunciant, de Euangelio viuere.* Et ibidem: *Quis militat suis stipendiis? & si nos, & vobis spiritualia seminauimus, magnum est, si nos carnalia & vestra metamus?* De quo loco tractans Augustinus tract. in Psal. 146. & inde exponens illa verba Psalmi: *Qui parat terræ pluviam, producens in montibus fœnum,* dicit populos, qui tanquam terra



terra accipiunt pluuiam doctrinæ à Sacerdotibus, debere illis producere fœnum temporalium bonorum: *Accipe*, inquit, *pluuiam, & da fœnum, etenim ista omnia, quæ Ecclesiæ ad necessitates seruientium Deo dantur à diuitibus, quid sunt nisi fœnum?* Et infra: *Debetur pluuiæ fructus, debetur seruo cibus, sicut Dominus ait: Manducate quæ ab ipsis sunt; & ne putarent aliquid de suo donare, dignus est, inquit, operarius mercede sua.* Et infra: *Exime aliquam partem reddituum tuorum, decimas vis, decimas exime, quanquam parum sit; dictum est enim, quia pharisæi decimas dabant; & quid ait Dominus? Nisi abundauerit iustitia destra plus quam scribarum & pharisæorum, non intrabitis in regnum cælorum.*

NOTA, tempore B. Augustini multos in Africa non con-  
fueuisse decimas soluere, sicut modo in quibusdam aliis par-  
tibus, & id eo eos B. Augustinum ad decimas cohortari, sicut  
etiam facit homil. 48. ex lib. 50. homiliarum: *Maiores nostri,*  
inquit, *ideo copiosius omnibus abundabant, quia Deo decimas da-*  
*bant, & Casari censum reddebant, modo autem quia discit de-*  
*uotio Dei, accipit indictio fisci: Nolumus partiri cum Deo deci-*  
*mas, modo autem totum tollitur.*

20

SVPEREST, vt iura Ecclesiastica proferamus; Ac primùm  
multa sunt antiqua Concilia, in quibus id apertè præcipi-  
tur, vt Aurelianense I. cap. 17. ante annos mille. Item Matis-  
conense II. cap. 5. eodem seculo celebratum, dicit leges diui-  
nas de soluendis decimis longis temporibus in Ecclesia cu-  
stoditas, etiam deinceps esse custodiendas. Foroiulienſe cap.  
vlt. idem habet. Moguntinum tempore Caroli Magni, cap.  
38. Moguntinum sub Rabano, cap. 10. Moguntinum tempo-  
re Imperatoris Arnulphi, cap. 17. excommunicari iubet eos,  
qui decimas dare neglexerint, Remense cap. 28. tempore Ca-  
roli Magni, Valentini tempore Lotharij, cap. 10. Arela-  
tenſe IV. cap. 9. Cabilonenſe II. cap. 19. Metenſe cap. 2. Tri-  
buriense cap. 13. quæ omnia ante annos DCC. vel DCCC.  
vel mille acta sunt.

30

Præterea sunt Concilia generalia, Lateranense sub Inno-  
centio III. cap. 53. 54. 55. & 56. statuit, vt decimæ ante tributa,  
& census perfoluantur, & alia quædam. in Concilio Vien-  
nensi, vt habetur in Clement. cupientes, de pœnis, excom-  
municantur ipso facto religiosi, qui in concione aliquid di-  
cunt, vnde retrahant populum à soluendis decimis. Conci-  
lium



lium Constantiense session. 8. damnauit articulum VViclefi, quod decimæ sint puræ eleemosynæ, ac demum Concilium Tridentinum sess. 25. can. 12. docet solutionem decimarum debitam esse Deo, & iubet vt excommunicentur, qui eas subtrahunt, aut ne ab aliis dentur impediunt, nec debere absolui, donec integrè restituant. His accedant plurima decreta Pontificum summorum, quæ habentur 16. q. 1. & 7. & extra de decimis, necnon in Sexto & Clementinis, & extrauagantibus eodem titulo.

10 ALTER error est eiaſdem VViclefi, quod scilicet decimæ nō modò sint puræ eleemosynæ, sed etiam nullo modo dandæ sint malis Sacerdotibus; existimauit enim VViclefus, eum qui eleemosynam facit peccatori, in peccato eius communicare. de quo errore plura dicemus in tractatu de eleemosyna: nunc breuiter refellitur error præſens. PRIMO, ex illo Matt. 22. *Reddite quæ sunt Cæsaris, Cæsari; & quæ sunt Dei, Deo.* Vbi ita S. Hieronymus scribit: *Quod aut, inquit, reddite quæ sunt Cæsaris, Cæsari, nummum, tributum, & pecuniam; & quæ sunt Dei, Deo, decimas, primitias, & oblationes, ac victimas sentiamus.* At certum est tempore Domini non solum Cæsarem impium, & infidelem, sed etiam Sacerdotes improbiſſimos, ac deprauatissimos fuisse. SECUNDO ex Innocentio III. in epist. ad Episcopum Vercellensem, & habetur cap. Tu nos, de decimis: *Prætexu, inquit, nequitie Clericorum nequeunt decimas, nisi quibus ex mandato diuino debentur, pro suo arbitrio erogare, cum nulli sit licitum aliena cuique concedere præter Domini voluntatem.* Denique TERTIO, quia decimæ non dantur Clericis, quia boni sunt, sed quia Clerici sunt, sicut tributa dantur Regibus, non quia probi, sed quia Reges.

20 TERTIVS error est quorundam, qui dicuntur FRATRICELLI, siue Pseudoapostoli, qui inter alios errores, quos refert Ioannes Turrecremata lib. 4. p. 2. cap. 37. summæ, docebant non posse percipere decimas eos, qui nō viuunt in paupertate more Apostolorum; error est sine vlllo fundamento; nam ratio, cur debeantur Clericis decimæ, est, quia laborant in populi vtilitatem; hæc autem ratio non minus in diuite quam in paupere inueniri potest. Accedit quod Dominus Matth. 22. iussit dari decimas Sacerdotibus Iudæorum, qui in paupertate non viuebant.



QUARTVS error est multorum Canonistarum, qui contendunt decimas, etiam quoad determinationem quantitatis esse de iure diuino, nec posse vlla humana lege aut consuetudine aliam statui quantitatem. Ita Glossa in cap. i. de decimis, in Sexto, Innocentius in rubricam de decimis, Pannormitanus in cap. In aliquibus de decimis, & Hostiensis in sua summa tit. de decimis, §. 7. quos alij ferè omnes sequuntur. Argumentum eorum est, quia plurimi Canones, ac præfertim cap. In aliquibus, de decimis, dicunt decimas deberi iure diuino. At sine vlllo dubio error est manifestus, vt non solum Theologi omnes, sed etiam ex Canonistis docent Syluester, verbo Decima, quæst. 4. & Nauarrus cap. 21. Num. 28. nec semel tantum, sed bis peccant multi Canonistæ; semel, quia falsum defendunt: Iterum, quia damnant ferè hæreseos omnes Theologos, qui contrarium sentiunt; cum è contrario ipsorum sententia facillimè conuinci possit erroris.

Probat igitur præceptum de soluendis decimis, quantum ad determinationem talis quantitatis non esse nunc de iure diuino. Tale præceptum nusquam inuenitur Christianis impositum, nec in noua, nec in veteri lege; & quod non in noua, patet; quod nõ in vetere, probatur; nam præceptum legis veteris, quoad illam determinationem, non erat morale, nec propriè cærimoniale, sed iudiciale, vt Alexander docet 3. parte q. 51. in 3. & B. Thomas in 2. 2. q. 87. art. 1. quos omnes Theologi sequuntur.

Quod non sit morale, patet, quia moralia semper obligauerunt, lex autem de decimis non fuit ante tempora Moïsis, nec ratio dictat, vt sacerdoti dentur decem partes, sed vt detur quantum satis est ad eius sustentationem. Vnde Gen. 28. 30. Iacob vouit se daturum decimas Deo omnium quæ possideret, si Deus eum dirigeret in via, &c. At impium fuisset vouere decimas cum tali conditione, si absolute fuisset obligatus eas soluere. Præterea si moralis fuisset ista determinatio decimarum, certè etiam morale esset præceptum, quod ibidem additur, vt qui decimas habent, nullum aliud patrimonium habeant, atque ita iure diuino tenerentur Clerici dimittere patrimonium.

Quod autem non sit propriè cærimoniale, sed iudiciale, probatur; nam non ordinatur immediatè ad colendum Deum,



Deum, sed ad æquitatem inter homines constituendam; ideo enim iussit Deus dari decimam partem omnium bonorum Leuitis, non octauam aut vicesimam, vt esset proportio inter opes Leuitarum, & aliorum. Erat enim familia Leui vna ex duodecim tribubus Israël, vel potius ex tredecim; nam etiam si duodecim fuerint filij Israël, tamen Ioseph duas tribus fecit, id est, Ephraim, & Manasse; & secundum æquitatem tertiam decimam partem bonorum habere debuissent, tamen quia erant ceteris nobiliores, & quia Deus providebat, non defuturos transgressores, qui non integrè soluerent, idcirco attribuit eis partem decimam, id est, amplius quam ceteris, vt sic ad æqualitatem veniretur, non obstantibus transgressoribus.

Neq; obstat quod Innocentius Papa cap. Tuanos, de decimis, dicit decimas Deum requirere ad professionem supremi dominij, ex quo videtur sequi, quod sit preceptum ærimoniale; nam non dantur decimæ immediatè, & per se ad hunc finem, vt profiteantur, qui eas dant, se agnoscere supremum dominium Dei, sicut faciunt qui sacrificium offerunt, sed solum mediatè, & per aliud, quia nimirum dantur Deo per suos ministros; dantur enim Sacerdotibus vt ministris Dei; constat autem ex fide Catholica legem veterem post Christi aduentum esse abrogatam, quatenus positua erat, vt Apostolus Gal. 3. Ephes. 2. Hebr. 7. & alibi disertè docet, & idem confirmat decretalis Vnica de purificatione post partum, quam Canonistæ ignorare non possunt; non igitur lex illa de soluenda decima parte bonorum, cum sit ærimonialis, ad Christianos pertinet, ex vi Testamenti veteris.

Ad ARGVMENTVM ipsorum respondemus, quod cum sacri Canones dicunt, iure diuino deberi decimas, tribus modis intelligi possunt. Vno modo, vt sensus sit, deberi iure diuino quoad substantiam, non quoad quantitatem, siue iure diuino addita Ecclesiæ determinatione, sicut dicimus festa iure diuino sanctificanda esse etiam nunc: & hoc modo intelligo Concilium Matiscon. II. cap. 5. vbi dicit, legem diuinam de soluendis decimis esse seruandam.

ALTERO modo, vt sit sensus, Deum imposuisse decimam Christianis non verbo, sed exemplo; nam dum eas Iudæis imposuit, simul ostendit, quid etiam Christianos facere par esset; quomodo quidam Patres dicunt, Quadragesimam in-

dictam



dictam esse à Domino, quia nimirum exemplo nos docuit ieiunare Quadragesimam. Vide Ambrosium serm. 36.

TERTIO modo, vt sit sensus, deberi iure diuino, id est, iuxta determinationem quantitatis, quæ habetur in iure diuino, quanquam non ex vi iuris diuini, sed ex vi iuris Ecclesiastici; & hoc modo intelligi debent verba capituli, in aliis quibus, de decimis, quæ talia sunt: *Illæ quippe decimæ necessariò soluendæ sunt, quæ debentur ex lege diuina, vel loci consuetudine approbata.* Est enim sensus; Illæ decimæ necessariò soluendæ sunt, quæ debentur, vel iuxta quantitatem lege diuina determinatam, quam Ecclesia innouauit; vt fit, vbi soluntur integræ decimæ; vel iuxta quantitatem consuetudine loci determinatam; vt fit, vbi soluitur minus quàm decima, & tamen vocatur decima. Et nota ex hoc textu, quo Canonistæ maximè nituntur, sumi argumentum optimum contra ipsos; Si enim decimæ quoad quantitatem deberentur iure diuino, vbique integræ soluendæ essent, nec diceret textus iste, alicubi debere solui iuxta consuetudinem. Atq; hæc de erroribus. Sequitur vt dubia quædam explicemus.

## DVBIUM PRIMVM.

*An præceptum de soluendis decimis possit contraria consuetudine abrogari.*

**R**ESPONDEO, certum est, præceptum de soluendis decimis, qua parte diuinum & naturale est, non posse vlla lege humana vel cōsuetudine contraria aboleri: Ac proinde certum est, Ecclesiam habere ius petendi decimas, etiam vbi consuetudo est vt non soluantur; In hoc enim omnes Theologi & Canonistæ conueniunt. Dubium autem est, an præceptum de decimis, quatenus positium, & humanum est, possit mutari consuetudine. Sorus lib. 9. quæst. 4. art. 1. de iustitia, dicit non posse, & hanc putat mentem esse B. Thomæ.

Contrarium puro verum cum Syluestro, verbo Decima, q. 4. & Nauarro cap. 21. Num. 28. Nec dubito hanc esse mentem B. Thomæ; nam B. Thomas in 2. 2. quæst. 87. art. 1. docet, præceptum de decimis, quatenus humanum est, posse ab Ecclesia mutari, ita vt teneatur populus nō decimam, sed duodecimam, vel octauam soluere; At non minorem vim habet



consuetudo legitime præscripta, quàm lex qualibet humana, vt, cum ceteris, docet ipse etiam Sotus li. 1. q. 7. art. 2. de iustitia. Præterea B. Thomas quodlib. 2. art. 8. posteaquam docuit consuetudine nunquam abrogari legem de soluendis decimis, subiungit rationem, quia lex ista diuina & naturalis est; ergo B. Thomas non negat legem de decimis, quatenus Ecclesiastica est, posse mutari consuetudine, sed solum quatenus naturalis, & diuina est.

10 His accedit cap. In aliquibus, de decimis, vbi dicitur soluendas esse decimas secundum determinationem aut legis diuinæ, aut consuetudinis approbatæ. Hic tamen obseruandum est, quod sicut consuetudo tollit legem, ita lex tollit consuetudinem, si iustis de causis feratur ab eo, qui habet auctoritatem: Itaque vbi nunc est consuetudo soluendi solum tricesimam aut quinquagesimam, loco decimæ, non tenentur soluere quidquam amplius; tamen si nunc Pontifex, aut Concilium iustis de causis iterum legem ferat, vt integræ decimæ soluantur vbique, non obstante consuetudine, sine dubio tenerentur omnes soluere; sicut omnium iudicio te-  
20 nentur soluere, qui in eis locis agunt, vbi non est consuetudo soluendi minus, quàm decimam.

## DVBIVM SECVNDVM.

*An Laici pauperes teneantur decimas dare Clericis diuitibus.*

30 **R**ATIO dubitationis est, quia sicut laicus tenetur alere Sacerdotem, quia Sacerdos est, ita Sacerdos tenetur alere laicum, quia pauper est.

Respondet B. Thomas quodlib. 6. art. 10. sine dubio debere pauperem laicum dare decimas Clerico diuiti, quia obligatio decimarum ad iustitiam commutatiuam pertinet, in qua non consideratur conditio personæ, sed æqualitas rei ad rem; qui enim verbi gratia emit, debet soluere quantum res valet, siue ipse sit diues, siue pauper. Neque argumentum in contrarium valet, quia non tenetur

Clericus hunc pauperem potius alere, quàm alium.

DVBIVM



DVBIVM TERTIVM.

*An excusari possint à peccato, qui nullas decimas solvunt, ubi non est consuetudo solvendi.*

**R**ESPONDEO, tribus modis peccare posse, qui nullas decimas solvunt, ut Sylvester, ubi supra, & alij docent. PRIMO, si Ecclesia propter defectum decimarum notabiliter patiat, tunc enim siue ipsa decimas petat, siue non, tenetur populus omnino ei providere. SECUNDO, si Ecclesia iure petat decimas, siue egeat notabiliter, siue non, tenetur populus solvere, etiamsi consueverit non solvere. TERTIO, si populus eo animo esset, ut non solueret, etiamsi iustissime eas a se peti intelligeret.

Extra hos casus siue vlllo dubio excusantur, quia, ut B. Thomas dicit, Ecclesia dum non petit decimas, censetur eas condonare; non autem peccat, qui non soluit debitum sibi condonatū; Alioqui Apostolus peccare fecisset Corinthios, qui stipendia sibi debita ab eis accipere nolebat, ne impedimentum poneret Evangelio, 1. Corinth. 9. S. etiam Augustinus in peccato fouisset populum suum, quem ad solvendas decimas non cogebar, etiamsi hortaretur, ut patet extracta tu in Psal. 146. & ex hom. 48. ex 50. homiliis.

DVBIVM QVARTVM.

*Quaratione ostendi possit, iustam esse determinationem Ecclesie, quod Christiani decimam partem suorum fructuum Ecclesie tribuant.*

**N**ON disputamus, an hoc sit iustum, quod Ecclesia statuit; id enim insolentissime infantie esset, ut B. Augustinus scripsit in epist. 118. sed qua ratione id esse iustum ostendi possit; nam in veteri lege id iustum erat, quia Leuitæ erant pars duodecima, vel tertia decima totius populi Hebræorum: At Clerus in nota lege non videtur esse centesima pars Christianorum; qua igitur æquitate decimam partem habere debet omnium bonorum,



quæ sunt in orbe Christiano? Caietanus in 2. 2. q. 87. respondet, se non posse aliam rationem reddere, quàm ided iustum esse, vt Clerus habeat decimam partem, quia debet pauperes alere, qui sine vlllo numero sunt: sed quamuis hæc ratio optima sit, cùm videamus canones passim id præcipere, vt Clerici ex decimis alant pauperes, tamen non est hæc sola ratio, cur iustæ sint decimæ.

PRIMUM enim non est verum Leuitas fuisse tertiam decimam partem populi Iudaici, & nostrum Clerum non esse centesimam partem populi Christiani; nam Hebræi numerati sine Leuitis Num. 1. erant sexcenta tria millia, quingenti quinquaginta, & non numerabantur pueri ante annos viginti, neque senes; nam cum his sine dubio erant plus quàm duplo plures, id est, circiter mille millia, & trecenta millia: Leuitæ autem omnes ab infante vsque senem numerantur Num. 3. viginti duo millia tantum. Iam igitur addendo Leuitas ceteris Hebræis, & diuidendo totum numerum per viginti duo millia, efficiuntur partes diuisæ sexaginta, ergo Leuitæ non erant pars tertia decima, sed vix sexagesima totius populi; Porro Clerus Christianorum fortè maior est, quàm sexagesima pars Christiani populi. Nulla est enim fere ampla familia, ex qua non sit aliquis Ecclesiasticus, & nullus est pagus, vbi non sit templum vnum, aut plura, & aliquot Sacerdotes.

DEINDE, Christianus Clerus maioribus laboribus & sumptibus obnoxius est, quàm tribus Leuitica erat apud Iudæos, vt omittam dignitatem sacerdotij nostri incomparabiliter maiorem quàm sacerdotij Aaronici; tunc vnum erat templum, vnus Pontifex, & pauci quidam Sacerdotes ex sola familia Aaron, qui per vices in templo ministrabant, reliqui omnes erant turba famulorum: At nunc sunt innumera templa conseruanda sumptibus Ecclesiæ; sunt etiam plurimi Episcopi & Prælati, necnon innumeri Sacerdotes, qui docti esse debent, & proinde multum in studiis expatrimonio suo insumere, & postea non per vices, sed perpetuò Ecclesiæ ministeriis adesse, quos certè honestè pro status sui conditione viuere oportet ex Ecclesiæ bonis.

His accedit, quod multi sunt liberi à soluendis decimis, multi ex malitia non soluunt, aut certè non plenè & fideliter, sæpe etiam Reges & Principes non solum non soluunt, sed



sed etiam impetrant ab Ecclesia decimarum partem in subsidium belli, aliorumq; publicorum sumptuum.

DENIQUE, cū populus Christianus debeat esse perfectior, quā Iudaicus, vt dicitur Matt. 5. si ille decimam suorum bonorum dabat Deo, cur non tantundem saltem faciet Christianus? Itaque verum est, quod loco notato dicit B. Thomas, hanc determinationem Ecclesiæ respectu populi esse humaniorem ac benigniorem, quā rigori iustitiæ absolutæ pateretur.

CAPVT XXVI.

De possessionibus, quæ dono Laicorum possidentur à Clericis.

**D**E possessionibus Ecclesiasticis fuit error Ioannis VViclefii, apud Thomam VValdensē lib. 4. doctrin. fidei, art. 3. qui docebat non licere Clericis habere vllas possessiones, & peccasse tam qui eas donauerunt Ecclesiæ, quā qui eas receperunt. Fundamenta eius hæc sunt; PRIMVM, quia Sacerdotes Testamenti veteris prohibebantur habere possessiones, vt patet Num. 18. *Dixit Dominus ad Aaron, in terra eorum nihil possidebitis, nec habebitis partem inter eos, ego pars, & hereditas tua.* Item Deuter. 10. *Quamobrem non habuit Deus partem, nec possessionem eum fratribus suis, quia ipse Dominus possessio eius est.* Et Iosue 13. *Tribus autem Leui non dedit possessionem, quoniam Dominus Deus Israël ipse possessio eius.*

SECVDVM, quia Matth. 10. Dominus iubet Apostolis, vt nihil possideant, non pecuniam, nō duas tunicas, &c. Ibi dem dicit: *Non est discipulus super magistrum.* Christus autem nullam possessionem habuit. Item Lucæ 14. *Nisi quis renouauerit omnibus quæ possidet, non potest meus esse discipulus.* At certè discipuli Christi, Clerici omnes esse debent.

At hunc errorem manifestum esse, probatur; PRIMO, de Sacerdotibus, & Leuitis Testamenti veteris; nam et si in partitione terræ non erant habituri agros & vineas, erant habituri tamen & possessuri vrbes ad habitandum, & suburbana ad alenda pecora: poterant etiam agros & vineas emere, & etiam ex oblationibus populi habere, vt modo habet Ecclesia: Nam Num. 35. dicitur: *Præcipe filiis Israël, & dent Leuitis*



de possessionibus suis vrbes ad habitandum, & suburbana earum per circuitum, quæ à muris ciuitatum forinsecus per circuitum mille passuum spatium tenduntur. Et Iosue 21. id legimus implementum.

Neque obstat quod Lyranus in 35. Numer. dicit eas vrbes fuisse Sacerdotum quoad vsum, dominium autem earum fuisse penes alios: & probat de Hebron, quæ data est Sacerdotibus, Iosue 21. & tamen Dominus eius erat Caleb de tribu Iuda, Iosue 14. Hoc non obstat; nam Lyranus fallitur, vt  
 10 patet ex Leuit. 25. vbi legimus vrbes & suburbana Sacerdotum esse eorum possessionem, & posse illas vendere, & redimere domos, vt alij faciebant, & de Hebron legimus Iosue 21. solos agros, & vineas, quæ erant in territorio Hebron, fuisse Caleb; urbem autem & suburbana, Sacerdotum. Item Leuit. vlt. præcipitur, vt si quis agrum Domino vouerit, cum Sacerdotes possideant. 3. Reg. 2. dicit Rex Abiathar Sacerdoti: *Vade ad agrum tuum.* Item Hieremias Sacerdos erat, & tamen Hiere. 32. scribit ipsemet se emisse ac possedisse agrum, qui fuerat patruelis sui. Et Actor. 4. legimus Barnabam fuisse  
 20 se Leuitam, & vendidisse agrum quem habebat.

Ex his facile est respondere ad PRIMVM argumentum VViclefii. Quando enim Scriptura dicit, Sacerdotes non debuisse habere quidquam, sed Dominum esse eorum hæreditatem, vult dicere, non debuisse eos habere quidquam more aliorum, tanquam filios Iacob, & ex paterna hæreditate: sed solum habere debuisse ea, quæ debebantur Deo, cuius ipsi ministri erant; & sic factum est; nam tota terra Palæstinæ quasi quædam hæreditas diuisa fuit in duodecim partes pro numero tribuum, exclusa omnino tribu Leui, quæ erat deci-  
 30 ma tertia.

Nam etsi duodecim tantum fuerint filij Iacob, tribus tamen fuerunt XIII. quia Ioseph duas tribus faciebat, nimirum Ephraim & Manasse; deinde terra iam diuisa, & Leui ex hæredato, Deus voluit sibi tanquam proprio Regi Iudæorum dari loco tributi decimam partem omnium fructuum, & XLVIII. ciuitates cum suburbanis suis, & hæc omnia donauit ipse Leuitis: quæ portio Leuitarum, vt supra diximus, maior fuit quacunque portione aliarum tribuum; nam habuerunt decimam partem, cum ipsi vix essent sexagesima pars totius populi, & hoc significant illa verba: *Ego Dominus*

hæc



*hæreditas Leuitarum sum.* VBI NOTA miram Dei prouidentiam erga Sacerdotes; Iacob exhæredauit filium Leui, propter peccatum ipsius, ut patet Genes. 49. *Diuidam illos in Iacob, & dispergam eos in Israël.* Deus autem ratam habuit sententiam Israël, sed eam impleuit cum summo honore Leuitarum, & totius populi utilitate; nam dedit ipse Leuitis suam hæreditatem, & totus populus maximum commodum inde consequutus est; si enim fuissent Leuitæ collecti in vnum locum, ut erant alia tribus, non potuissent omnes populi facili ab eis doceri: dispersi autem in omnes tribus, facili omnibus adesse, eosque instituere in lege Domini potuerunt.

PROBATVR iam hoc idem de Sacerdotibus noui Testamenti; nam etsi in Scripturis nihil legimus de possessionibus Ecclesiarum, legimus tamen in antiquissimis Pontificum, & Conciliorum decretis, & in libris sanctorum Patrum. PIVS Papa I. in epist. 2. dicit, sacrilegum esse, qui Ecclesiæ prædia & donaria diripit. VRBANVS I. in epistola ad omnes Episcopos dicit, initio Ecclesiæ consueuisse pios homines vendere possessiones, & precium donare Ecclesiis; Deinde tamen iudicatum esse commodius, si possessiones ipsæ donarentur Ecclesiæ, ut eo modo non solum præsentibus, sed etiam futuris prouideretur.

Sunt etiam Concilia omnium Ecclesiarum, quæ prohibent alienari possessiones Ecclesiæ, & earum curam Episcopo committunt. Vide Concilium Antiochenum, cap. 25. & Ancyranum, cap. 15. Item Concilium Carthaginense IV. capite 32. & Carthaginense V. cap. 4. Item Concilium Hispalense I. cap. 1. Toletanum IV. can. 32. & 68. Item Agathense cap. 49. & 51. Item Moguntinum sub Arnulpho Imperatore, cap. 12. Denique Romanum VI. sub Symmacho. Præterea meminerunt Ecclesiasticarum possessionum Ambrosius epist. 32. Chrysostomus hom. 37. ad populum Antiochenum: Augustinus serm. 1. & 2. de communi vita Clericorum: Prosper lib. 2. de vita contemplatiua, cap. 9. Gregorius li. 4. epist. 33. & alij Patres passim.

Ad illud Matth. 10. *Nihil tuleritis in Via, &c.* Respondeo, illa verba dici Apostolis pro eo tempore, quo in itinere erant futuri in terra promissionis ante Christi passionem; tunc enim ut expeditiores essent, non debuerunt ferre secum quid-



quidquam, præsertim cum neq; pauperum, neq; Ecclesiarum tunc curam haberent. At ubi cœperunt Apostoli post Christi ascensionem figere sedes in certis locis, & habere curam Ecclesiarum, & pauperum, non timuerunt recipere bona temporalia, ut patet Act. 4. 5. & 6. ubi Apostoli recipiebant multas pecunias, ut inde alerent & se, & alios.

Ad illud: *Non est discipulus super magistrum*; Respondeo, Dominum loqui eo loco de tribulationibus, a quibus non fuerunt immunes Apostoli, cum eorum Dominus, & magister multa passus sit; neque esse ditio-  
 10 rem, est esse maiorem, sed potius minorem; nam apud Deum ille est maior, qui est melior, melior autem est, qui est pauperior, cum Dominus dicat: *Si vis perfectus esse, vade, vende omnia qua habes, &c.* Matth. 19.

Ad postremum respondet Augustinus epist. 5. ad Marcellinum, Dominum loqui de præparatione mentis; Nam ibidem explicans quid sit renunciare omnibus, dicit: *Si quis venit ad me, & non odit patrem, & matrem, & uxorem, adhuc autem & animam suam, non potest meus esse discipulus.* Et tamen  
 20 non tenemur, nec possumus, parentes, filios, uxore, & multo minus vitam odire, nisi in præparatione animi.

## CAPVT XXVII.

## De bonis secularibus.

**Q**UANTVM ad TERTIVM de secularibus bonis, Thomas VValdensis lib. 4. doctr. fidei, art. 3. cap. 42. docet, Clericos debere bona propria vel erogare pauperibus, vel in commune ponere, & probat aliquot sententiis Patrum, qui non permittunt Clericis,  
 30 ut habeant vlla bona propria, qualia sunt patrimonialia, sed solum bona communia, nimirum Ecclesiastica. ORIGENES homil. 16. in Genes. exponens cap. 47. de sacerdotibus Pharaonis. HIERONYMVS in epistola ad Nepotianum de vita Clericorum, ubi dicit Clericum, qui habet partem in terra, non futurum partem Domini, nec Dominum partem eius. Similia & duriora habet B. BERNARDVS in declamatione super illud Matthæi 19. Ecce nos reliquimus omnia: Clericus, inquit, *qui habet partem in terra, non habebit partem in calo.*



Veruntamen certum est, non obligari Clericos propter Clericatum ad dimittendum patrimonium. probatur PRIMO Scriptura: Nam 1. Tim. 3. iubet Apostolus eligi, *Episcopum hospitalem, & qui domui suae benè praesit, & filios subditos habeat*; at haec omnia praesupponunt diuitias proprias. Præterea Philemon habuit seruum, & diues erat, ut apparet ex epistola ad Philemonem, & tamen Episcopus erat, ut Hieronymus & Anselmus docent in eam epistolam; Hieronymus enim vocat eum Euangelistam, Anselmus verò nominatim Episcopum.

Præterea EVSEBIUS lib. 3. histor. cap. 19. scribit de consanguineis Domini, quod habuerint possessiones quasdam, licet modicas, ex paterna hereditate, & tamen fuerint Ecclesiae Duces, id est, Episcopi. Item can. 40. Apostolorum sic ait: *Sint manifestæ res Episcopi, sitamen habet proprias, & manifesta Dominica, Et potestatem habeat de propriis moriens Episcopus, sicut soluerit, & quibus soluerit derelinquere.* Idè habet Concilium Agathense can. 48. & Martinus Bracarensis can. 15. suorum decretorum, & Hispalense Concilium I. can. primo.

Præterea AMBROSIVS in epist. 33. ad Marcellinam, dicit se, cum rogaretur ut Ecclesiam vnam Arianis traderet, obtulisse patrimonium suum, patrimonium autem Christi se tradere noluisse. B. AVGVSTINVS serm. 1. de moribus Clericorum, dicit eos Clericos, qui professi fuerant vitam communem, si postea resiliant à proposito, & propria habere velint, grauius peccare propter voti violationem; ubi indicat alios Clericos, qui non vouerunt vitam communem, posse habere propria. B. PROSPER lib. 2. de vita contemplatiua, cap. 12. dicit siue illo peccato posse Clericum viuere ex proprio patrimonio.

Ad locum Origenis, Hieronymi & Bernardi responderi potest, loqui eos de illis Clericis, qui dant operam augendis opibus, & non contenti rebus necessariis, etiam superflua retinent: illi enim propriè dicuntur habere, vel quærere possessionem in terra, qui non contenti victu, & vestitu, semper flagrant habendi cupiditate; certè Hieron. cum dicit Clericum non debere quidquam in terra possidere, addit: *Ut possit, inquit, cum Propheta dicere: pars mea Dominus, & Et sit Seruus Lenita:* At Propheta Dauid, qui ait: *Pars mea Dominus, Rex*



ditissimus erat, & similiter veri Leuitæ diuites erant externis opibus, sed non affectu.

Posset autem dubitari, an qui bona patrimonialia habet, possit simul bona Ecclesiastica habere? Nam S. PROSPER lib. 2. de vita contemplatiua, cap. 9. 10. 11. & 12. docet, non posse Clericum sine grauissimo peccato viuere ex bonis Ecclesiasticis, si habeat bona propria, vnde sufficienter alatur, & probat hac ratione; Bona Ecclesiastica non dantur Clericis in præmium laboris, sed solum, vt sustententur, & necessaria ad vitam habeant, quia præmium laboris est vita æterna, & simonia esset dare spiritualia pro temporalibus; & confirmatur ex can. 41. Apostolorum, vbi dicitur, vt Episcopus accipiat ex bonis Ecclesiæ pro sua sustentatione, si tamen indiget; & idem reperitur in Concilio Antiocheno, cap. 25. quare qui ex patrimonio viuit, nec eget sustentatione, non potest percipere fructus bonorum Ecclesiasticorum. Ac contrarium docet Glossa, & Ioan. de Turrecremata in can. Clericos, 1. q. 2. & ratio est, quia Matth. 10. dicitur: *Dignus est operarius mercedo sua*, & 1. Corinth. 9. *Quis militat suis stipendiis* & quænam? Ergo potest Clericus laborans pro Ecclesia percipere alimenta, & parere suis propriis rebus. Adde, quod praxis est, & fuit pro hac opinione secunda; nam B. Prosper loco notato dicit sententiam suam visam esse duram permultis, & idè duram, quia noua esset; Itaque etiam tunc plurimi Clerici patrimonium suum seruabant, & nihilominus portionem decimarum habere volebant.

Ex his opinionibus prima est tutior, etsi secunda fortasse est verior, nisi hoc modo concilientur, vt dicamus sanctum Prosperum loqui de illis, qui planè sufficientem habent sustentationem ex patrimonio, aut beneficio; tunc enim alterum est superfluum, & proinde pauperibus debitum: Alios verò auctores loqui de illis, qui neque ex patrimonio, neque ex beneficio sufficientem omnino sustentationem habent; hi enim vtrumq; retinere possunt, modò ex vtroq; nihil accipiant ultra sustentationem.



CAPVT XXVIII.

*An Clerici sint liberi à iugo potestatis secularis.*

**E**XTREMO restat quæstio de libertate Ecclesiastica. Tres autem sunt in hac parte sententiæ. PRIMA hæreticorum multorum, quod Clerici sint & esse debeant iure subiecti potestati seculari, tum in soluendis tributis, tum in iudiciis, præsertim in causis non Ecclesiasticis. Marsilius de Padua, & Ioannes de Ianduno docuerunt, ipsum etiam Christum non fuisse liberum à soluendis tributis, & quod fecit Matt. 17. cum tributum soluit, id fecisse non voluntate, sed necessitate; ita refert Turrecremata lib. 4. summæ de Ecclesia, part. 2. cap. 37.

Ioannes CALVENVS lib. 4. Instit. cap. 11. §. 15. docet, Clericos omnes, præterquam in causis merè Ecclesiasticis, subiectos esse debere legibus, & tribunalibus secularium magistratuum. Idem docet Petrus MARTYR in cap. 13. ad Romanos, ubi etiam addit, Principes non potuisse concedere Clericis priuilegium ne subiicerentur magistratibus politicis, cum id sit contrarius diuinum; & ideo, non obstante concessione Principum, debere Clericos subiectos esse magistratibus secularibus. Ioannes BRENTIVS in prolegomenis, & Philippus in locis cap. de magistratu, etiam in rebus Ecclesiasticis subiiciunt Clericos politico tribunal.

SECUNDA opinio in altero extremo versatur, estq; multorum Canonistarum, qui putant iure diuino Clericos & eorum bona libera esse à potestate secularium Principum; ita docet Glossa in can. tributum 23. q. 8. & in cap. quamuis, de censibus in 6. Huic opinioni adherere videtur ex parte, Io. Driedonius lib. 1. de Christiana libertate, cap. 9. ubi dicit, bona secularia Clericorum non esse libera, nisi fortè Principum concessione; personas autem, & bona Ecclesiastica insinuat libera esse iure diuino.

TERTIA opinio, media est multorum Theologorum, quod liberi sint Clerici, partim iure diuino, partim iure humano, partim etiã neutro modo; ita Franciscus Victoria relectione 1. q. ult. de potestate Ecclesiæ; Dominicus à Soto in 4. d. 25. q. 2. a. 2. & Couarruias in lib. practicarum quæstionum, cap. 31.



Sit igitur PRIMA propositio. *In causis Ecclesiasticis, iure diuino, liberi sunt Clerici à secularium Principum potestate.* Explico; Vocantur causæ Ecclesiasticæ illæ, quæ non pendent ex legibus ciuilibus, sed ex Euangelio aut canonibus Conciliorum, & Pontificum, quales sunt cōtrouersia de ordinibus Ecclesiasticis, de Sacramentis, de fide, & alia id genus.

Probatur PRIMO, Iure diuino regimen Ecclesiasticum est distinctum à politico, & illo etiam sublimius, ergo causæ Ecclesiasticæ iudicari non debent à politicis magistratibus. præterea tota auctoritas regendi Ecclesiam à Christo commissæ est Apostolis, & præcipuè Petro, adeo ut omnes laici in rebus Ecclesiæ sint oues, & subditi, non pastores vel iudices, ut in lib. de summo Pontifice, demonstratum est.

SECUNDO, ex Concilis; Mileuitano can. 13. & Matifconensi can. 8. ubi puniuntur grauiter Clerici, qui causam Ecclesiasticam ad iudicium Imperatoris deferunt.

TERTIO, ex Patribus; Sulpitius lib. 2. sacrae historiae refert S. Martinum aliquando dixisse nouum esse, & inauditum nefas, ut causam Ecclesiæ iudex seculi iudicaret; Item Ambrosius epist. 78. ad Theophilum, & Augustinus epist. 162. reprehendunt eos qui causam Ecclesiæ terrenis iudicibus deferunt.

QUARTO, ex Apostolorum exemplo; Apostoli enim Ecclesias gubernauerunt, quo tempore nulli erant Principes Christiani, ac proinde nunquam ad eos causam Ecclesiæ iudicandam deferrebant. Nam si Apostolus 1. Cor. 6. iubet lites etiam ciuiles Christianorum non deferri ad iudicium Paganorum, quomodo permisisset ad eos deferri lites Ecclesiasticas?

ULTIMO, ex Iustiniano, qui idem asserit Nouell. 83.

SECUNDA propositio. *Non sunt exempti Clerici ullo modo ab obligatione legum ciuiliū, quæ non repugnant sacris canonibus, vel officio clericali.* Explico; Loquimur hic præcipuè de legibus politicis, quæ dirigunt actiones humanas in rebus temporalibus, ut cum Princeps lege sua constituit precia rebus venalibus, vel iubet noctu neminem incedere cum armis, aut sine lumine, aut non asportare frumentum



tum extra provinciam, &c. Nec volumus dicere his legibus teneri Clericos obligatione coactiua, sed solum directiua, vt sunt leges Principum; quanquam iisdem legibus, vt ab Ecclesia approbantur, & ratę habentur, etiam coactiua obligatione teneantur.

Probatur; nam Clerici præterquam quod Clerici sunt, sunt etiam ciues, & partes quædam Reipublicę politicę, igitur vt tales viuere debent ciuilibus legibus, non sunt autem alię, quàm quę à magistratu politico latę sunt, igitur illas Clerici seruare debent, alioqui magna confusio & perturbatio in Repub. oriretur, si Clerici non seruarent politicas leges in rebus humanis & politicis.

SECUNDO, probatur ex confessione Pontificum, & Imperatorum: Nam Nicolaus I. in epist. ad Michaëlem circa finem dicit, Deum diuississe Pontificiam auctoritatem ab Imperiali, vt & Christiani Imperatores pro æterna vita Pontificibus indigerent, & Pontifices pro cursu temporalium tantummodo rerum, imperialibus legibus vterentur. Et Imperator Valentinianus in epist. ad Episcopos Asię, quam refert Theodoretus lib. 4. cap. 7. hist. dicit, probos Episcopos non solum Dei, sed etiam Regum legibus obtemperare. Denique Chrysostomus in illud Rom. 13. *Omnis anima potestatibus sublimioribus subdita sit*; dicit Christi legem non tollere politicas leges, & ided debere etiam Sacerdotes & Monachos eis parere.

TERTIA propositio. *Et si Clerici teneantur leges ciuiles seruare, non tamen possunt à iudice politico puniri, vel villo modo trahi ad secularis magistratus tribunal.* Explico; Si Clericus violans ciuilem legem, vt carius vendendo, quàm lex patiatur, peccat, & restituere tenetur, non tamen poterit accusari apud iudicem secularem, sed apud Episcopum tantum.

Probatur PRIMO ex Conciliis, Chalcedonen. can. 9. *Si Clericus aduersus Clericum habet negotium, non relinquat Episcopum suum, & ad secularia iudicia non recurrat, &c.* Concilium Agathense can. 32. *Clericum nullus præsumat apud secularem iudicem Episcopo non permittente pulsare, &c.* Concilium Carthagin. III. can. 9. & Toletanum III. can. 13. Matisconense, cap. 8. idem habent.



SECVNDO probatur ex Imperatorū constitutionibus; nam eximit Iustinianus Clericos & Monachos à seculari iudicio in Nouellis constitutionibus 79. 83. & 123. quanquam non eximit in causis criminalibus, sed solum civilibus; in criminalibus autem vult à Prætorè cognosci causam, non tamen condemnari Clericum, nisi prius ab Episcopo fuerit degradatus; At nihilominus lex Canonica eximit simpliciter etiam in causis criminalibus, cui cedere debet lex Imperialis, cum possit Pontifex Imperatoribus iubere in iis, quæ ad Ecclesiæ auctoritatem spectant.

10 TERTIO ex Pontificum decretis. CAIVS Papa epist. ad Felicem Episcopum: *Nemo, inquit, Episcopum, aut reliquos Clericos apud iudicem secularem accusare presumat.* MARCELLINVS in epist. 2. *Clericum cuiuslibet ordinis absq; Pontificis sui permisso, nullus presumat ad secularem iudicem trahere.* GREGORIUS 1. lib. II. epist. 14. ad Ioannem defenforem: *De persona, inquit, Presbyteri hoc attendendum est, si quam causam habuit, non ab alio teneri, sed Episcopum ipsius adire debuit.*

20 QUARTO ratione, nam absurdū videtur, vt ouis pastorem suum iudicet quocunq; modo. Deinde adhuc absurdius esset, si hodie Prætor posset vocari ad tribunal Episcopi, & cras Episcopus ad tribunal Prætoris. Præterea absurdū etiam videtur, vt terrenus iudex summi Iudicis seruos, sacrosq; homines capiat, vel puniat; vnde laudatur ab omnibus vox illa Cōstantini Magni, qui ad Episcopos quosdam, qui collegas suos de nescio quibus criminibus accusauerant, ait: *Vos Dii estis, à summo Deo constituti, conueniens non est, et homo iudicet Deos.* Refert Rufinus lib. 10. hist. cap. 2. & post eum D. Gregorius lib. 4. epist. 75. ad Mauritium.

30 AT OBIECIT Caluinus lib. 4. Instir. cap. 11. §. 15. epistolam Constantini ad Nicomedienfes, quam refert Theodoretus lib. 1. hist. cap. 20. vbi dicit Constantinus, se Eusebium Nicomediensem Episcopum eiecisse in exilium; & subiungit: *Si quis Episcoporum inconsulte tumultuatus sit, Ministri Dei, hoc est, mea executione illius audacia coercetur.*

RESPONDEO, more solito Caluinum imponere simplicibus; nam Constantinus in illa epistola dicit se eiecisse in exilium Eusebium Episcopum, sed addit, eum prius fuisse à Nicæno Concilio depositum ab Episcopatu propter hæresim; nec enim negamus, quin debeat magistratus punire Cle-



Clericos, quando ab Ecclesia degradantur, & iudicibus secularibus traduntur; verba autem Cōstantini, quæ Calvinus subiungit, ab ipso deprauata sunt; non enim Constantinus minatur eo loco Episcopis, sed laicis; dicit enim se grauer puniendum plebem Nicomediensem, si iterum redire velit ad Episcopos hæreticos à Concilio damnatos, & non acquiescat suscipere probum, & Catholicum Antistitem. Hæc enim sunt verba eius: *Si autem quisquam*, non dicit Episcoporum, *temeritate & audacia accensus eas Ecclesie pestes, id est, Episcopos Arianos à Concilio damnatos, vel memoria, vel laudibus celebrare aggrediatur, confestim opere ac diligentia Mini-* 10  
*stri Det, hoc est, mea, pœnas sua inflicta dabit.*

Obiicit SECUNDO Petrus MARTYR, iure diuino subiecta est omnis anima sublimioribus potestatibus, id est, Regibus, ergo non potuerunt Reges eximere à sua potestate vlllos Christianos. Et confirmatur argumentum ex doctrina Catholicorum, qui ea ratione probant, non posse vllum eximi à potestate Papæ, quia iure diuino omnes subiiciuntur Papæ in spiritualibus.

RESPONDEO, negando consequentiam; nam etiam si 20 de iure diuino est, vt pareamus superioribus nostris, & proinde Regibus, dum superiores sunt, tamen potest fieri, vt qui nunc est superior, paulò pōst nō sit, nimirum si ipse subiiciat alteri partem sui regni, vel si iure belli amittat regnū, aut regnum ipsum vertatur in Rempub. quoniam ergo partim Principes ipsi Clericos, alioqui sibi subiectos in rebus temporalibus, subiecerunt in omnibus Episcopis suis; partim etiam summus Pontifex eosdem Clericos exemit à subiectione Principum; non sunt amplius Reges Clericorum superiores, & proinde non tenentur iure diuino, nec iure humano 30 eis parere, nisi quantum ad leges directiuas, vt suprà diximus.

Ad confirmationem respondeo, nō esse simile; nam regna nō sunt de iure diuino, sed de iure Gentium, & proinde mutabilia sunt: Pontificatus autē de iure diuino est, nec potest, vel ab ipso Pontifice, vel ab Ecclesia tota immutari.

QUARTA propositio. *Bona Clericorum, tam Ecclesiastica, quam secularia, libera sunt, ac merito esse debent, à tribus Principū secularium. Quod sint exempta, patet* 42



ex Concilio Lateranensi, sub Alexandro III. par. 1. cap. 19. Ex Concilio Lateranensi sub Innocentio III. cap. 46. Item ex capite Ecclesia S. Mariæ, extra de cōstitutionibus, ex ca. Quamquam de censibus, in Sexto, & cap. Quia nonnulli, & cap. Clericis, de immunitate Ecclesiarū, in Sexto, & ex Extrauaganti, Quod olim, de immunitate Ecclesiarum. Item ex legibus Principū aliquorum, quæ habentur in Codice Theodosiano lib. 16. tit. 2. lege 16. & 26. & in Codice Iustiniani L. Sancimus tit. de sacrosanctis Ecclesiis, & li. 10. hist. Eusebij ex versione  
 10 Christophorsoni, cap. 7. ubi tamen est obseruandum ante Iustiniani tempora legibus priorum Principum immunes fuisse Clericos a tributis personalibus, vt etiam indicat S. Hieronymus in commen. ad cap. 17. Matth. non tamen fuisse liberos à tributis, quæ pendi solent ratione possessionum, vt colligitur ex S. Ambrosio, & aliis quæ infra citabimus pro sequenti propositione.

Quod autem hoc æquum fuerit, probatur, nam in primis habemus exemplum hominum viuentium in lege naturæ; nam Genes. 47. Ioseph subiecit Pharaoni omnes Ægyptios,  
 10 voluitque eos certum tributum pendere, exceptis solum Sacerdotibus, quos immunes & liberos esse debere iudicauit. Deinde bona Ecclesiastica sunt Deo consecrata, vnde in canonibus Apostolorum, can. 40. dicuntur bona Dominica: æquum est igitur, vt illa libera sint ab exactionibus Regum, ne Deus ipse soluere Regibus tributum videatur.

QVINTA propositio. *Exceptio Clericorum in rebus politicis tã quoad personas, quàm quoad bona, iure humano introducta est, non diuino.* Hæc est contra Canonistas.

30 Probatur PRIMO ex illo Rom. 13. *Omnis anima potestati bus sublimioribus subdita sit.* Et infra: *Idèò tributa prestatis.* Illud: *Omnis anima*, includit etiam Clericos, teste Chrysostomo. ergo illud: *Idèò tributa prestatis*, dicitur etiam Clericis, ergo Clerici nisi eximantur priuilegio Principum, obligantur soluere tributa; & confirmatur ex B. Thoma, qui in hunc locum idem asserit.

SECUNDO testimoniis veterum; nam Urbanus, vt habetur 23. q. 8. can. Tributum, sic ait: *Tributum*, inquit, *in ore piscis piscante Petro inuentum est, quia de exterioribus suis Ecclesia tributum reddit, &c.* AMBROSIVS in oratione de tradendis basilicis:



*eis: Si tributum, inquit, petit, non negatur, agri Ecclesie solenne tributum.* VALENTINIANVS senior in epist. ad Episcopos Asiae, teste Theodoretō lib. 4. hist. cap. 7. dicit bonos Episcopos tributa pensitare Regibus; si ergo tunc Imperator pius petebat tributum, si S. Urbanus Papa, & B. Ambrosius dicunt nō esse negandum, certē non est de iure diuino, vt nō soluat. Item B. Gregorius lib. 11. epist. 54. ad Ioannem defensorem, nō aliter probat, Presbyterum nō debere trahi ad tribunal iudicis secularis, quā quia ita ordinauit Iustinianus Imperator.

Probat TERTIO, quia nullum proferri potest Dei verbum, quō ista exceptio confirmetur, vt patebit ex argumentorum solutione.

PRIMO igitur obiciunt illud Matth. 17. *Quid tibi videtur Simon, Reges Gentium, à quibus accipiunt tributum, à suis an ab alienis? Respōdit Simon: ab alienis. At Dominus, ergo liberi sunt filij.* Et confirmatur ex Augustino lib. 1. quæst. Euang. q. 23. vbi sic loquitur: *In omni regno intelligendum est liberos esse filios, id est, non esse vectigales, multo ergo magis liberi esse debent in omni regno terreno filij regni illius, sub quo sunt omnia regna terrea.* Hæc ille. Quare ex sententia S. Augustini, ex hoc loco Evangelij Clerici, qui sunt maximè filij, & domestici summi Regis, liberi erunt. Accedat etiam Hieronymi sententia, qui in commentario huius loci indicat Clericos tanquam regni filios immunes esse à tributis.

Respondeo PRIMO, hunc locum non conuincere, nam aliqui eximeret à tributis omnes Christianos; omnes enim sunt filij Dei, qui per Baptismum renati sunt. SECUNDO dico, Dominū loqui de se ipso tantum; facit enim hoc argumentum: Filij Regum liberi sunt à tributis, quia nec soluunt parentibus suis, cū sint communia parentum & filiorum bona; nec aliis Regibus, quia eis non subsunt; At ego filius sum primi, & summi Regis, igitur nulli homini tributum debeo; Itaque Dominus cū ait: *Ergo liberi sunt filij,* id solū inde colligi voluit, se non fuisse obligatum ad soluendum tributum, de ceteris hominibus nihil dixit.

AT CONTRA; nam etiam filij adoptiui Regum non soluunt tributa; sumus autem nos filij Dei per adoptionem, ergo nō tenemur tributa soluere. RESPONDEO; Nos filij Dei sumus adoptiui secundum animam, non secundum corpus; renouati enim sumus spiritu, corporis autem redemptionem adhuc



expectamus, Roman. 8. tributa verò ratione corporis soluuntur.

At MARSILIUS de Padua obiiciet, Christus quoque ante resurrectionem secundum corpus mortalis erat, & renouationem expectabat, ergo tenebatur soluere tributum.

RESPONDEO, Christus secundum corpus mortalis erat, non tamen seruus, sed liber, nec expectabat redemptionem corporis sui, sed solum resurrectionem. Nos enim secundum corpus nōdum redempti sumus, quia adhuc concupiscentia  
 10 manet in nobis, & idēdē mente seruimus legi Dei, *carne autem legi peccati*, vt dicitur Roman. 7. Atque hinc obnoxij sumus peccatis, pœnis, periculis, propter quæ necessarium est habere magistratum, & illi tributa soluere, vt ipse vigilet, & Rempub. in pace contineat. Quocirca in statu innocentie fuisset quidem subiectio filiorum ad parentes, & fortasse ciuium ad Regem, non tamen exactio tributorum, cum nulla essent pericula, nulli terrores, nulli labores; Christus igitur, qui nullam habuit cōcupiscentiam malam, liber erat etiam corpore, etsi mortuus est, id factum est, quia ipse voluit, vt  
 20 dicitur Isaia 53. Quocirca meritō damnata est tanquam hæretica sententia Marsilij à Ioan. 22. in Extrauaganti, Licet, apud Ioan. de Turrecremata lib. 4. summæ de Ecclesia, part. 2. cap. 37.

Ad testimonium S. Hieronymi respondeo eoloco S. Hieronymum non voluisse probare ex Euangelio, Clericos esse liberos à tributo, sed solum afferre cōgruentiam quandam, cur liberati fuerint; idēdē enim dicit eos quasi filios regni tributa non soluere; & addit aliam causam, nimirum Christi honorem; ait enim, pro eius honore Clericos tributa non  
 30 soluere. Itaque non ius diuinum, sed Principum decreta, ob honorem Christi facta, Clericos liberarunt.

Ad testimonium S. Augustini respondet B. Thomas in 2. 2. q. 104. art. 6. Augustinum voluisse dicere, Christianos omnes esse filios regni, & proinde liberos à seruitute peccati. Reprehendit Cornelius Iansenius in commentario, cap. 17. Matthæi hanc responsionem, quoniam Augustinus disertē dicit, filios regni esse liberos à vectigalibus.

Responder autem Iansenius, Augustinum per filios regni intellexisse filios Dei naturales, id est, Christum, & si per impossibile, alij essent. At dura videtur hæc etiam explicatio,

quor



quorum enim Augustinus de filiis Dei naturalibus in numero multitudinis loqueretur, cum constet neque esse, neque esse posse, nisi unum Dei Filium naturalem?

Probabilior igitur videtur sententia Alphonsi Thostati q. 191. in cap. 17. Mart. & Caietani in 22. q. 104. art. 6. qui dicunt per filios regni S. Augustinum intellexisse Clericos, & Monachos, qui, ut etiam S. Hieronymus docuit in cap. 17. Marthei, immunes erant, & sunt à tributis, tanquam qui ad familiam Christi pertineant. Neque verò hinc sequitur, iure diuino Clericos esse immunes à tributis; nam in primis quod Augustinus dicit, non habetur in verbis Domini, sed colligitur solum per consequentiam probabilem. Dominus enim de filiis veris, & naturalibus Regum loquitur, ut Chrysostomus exponit, deinde ipse etiam Dominus hoc loco nihil propriè iubet, ut dici possit ius diuinum, sed solum indicat ex usu hominum, filios Regum liberos esse à tributis.

SECUNDO obijciunt caput, Quamquam, de censibus in Sexto, ubi Bonifacius Papa VIII. dicit, iure humano & diuino liberos esse Clericos ab exactionibus.

RESPONDET Dominicus à Soto, debere intellegi decretalem istam in causis Ecclesiasticis, vel certè quoad personas, non quoad bona. At Bonifacius disertè dicit, Clericos & eorum bona libera esse ab exactionibus; Dicendum igitur vel Bonifacium nomine iuris diuini intelligere exemplum, quod habetur in Scriptura diuina, nimirum Gen. 47. vel certè fuisse Bonifacium in sententia Canonistarum, & sententiam illam suam aperuisse, non autè aliquid definiuisse; nam non loquitur per modum definitiōis rem controuersam, sed simpliciter, & obiter id asserit, ait enim: *Cum iure deus non sint immunes Clerici, &c.*

TERTIO obijciunt, si solum est de iure humano, ut Clerici non soluant tributa, & non trahantur ad tribunalia secularium; ergo poterunt Reges & Principes contrarium statuere.

RESPONDEO, id non sequi, tum quia non solum ipsi, sed etiam Pontifices & Concilia hanc exemptionem Clericis tribuerunt, tum etiam quia orbis terrarum in eam consensit, qui Regibus contulit eam potestatem, quam habent.





# LIBER SECVN- DVS DE MONACHIS.

## PRÆFATIO.

**D**ISSERVIMVS LIBRO SV-  
periore de Episcopis, & Clericis, id est,  
de prima & nobilissima parte corpo-  
ris Ecclesiastici. Sequitur, vt de alie-  
ra parte Ecclesie, hoc est, de iis hominibus differa-  
mus, qui Euangelica Christi sequuti consilia, vitæ  
genus arctioris, ac sublimioris instituunt, quàm  
aut lex diuina, vel humana præscribat, aut etiam  
multorum mortalium infirmitas patiatur. De quo  
hominum genere disputationem ingrediari, si pau-  
ca prius de huius ipsius disputationis utilitate, vel  
potius necessitate, dixerò.

Quamquam enim monastica vitæ instituta, non  
ad omnes Christianos pertinent, defensio tamen  
tam magnæ, & tam excellentis partis Catholica  
nostræ Ecclesie, ad eos omnes communiter perti-  
net, qui Christianam Rempub. saluam cupiunt.  
Hæretici enim dum hanc partem petunt, ac vt  
monasticen vituperent, portentosa mendacia quo-  
tidie



tidie de Monachis fingunt, & quacunq; oblata occasione in Monachos inuehuntur, atque eos in odium vulgi rapiunt, & primarios Antichristi satellites vocant, non eò certè spectant, ut ordines solum hominum religiosorum disiciant, monasticenq; de medio tollant, sed ut Ecclesiam totam hac ratione perturbent, ac ledant, eamq; (si fieri possit) à fundamentis euertant. Intelligunt enim, si contra Monachos causam obtinuerint, id est, si populo Christiano persuasierint, non à Christo institutos, sed à malo Damone excogitados ordines, religiosorum fuisse, se continuò id effecturos, ut uniuersa Ecclesia, quæ una voce, & consensu tot iam seculis monasticen approbavit, vano errore delusa, pro Christo Antichristum coluisse, & à recta fidei, veræq; doctrinæ tramite quàm longissimè aberrasse videatur.

Neque verò nouum est hoc hæreticorum aduersus Monachos bellum, neque recens mali Demonis artificium, per monasticæ vitæ oppugnationem Ecclesiam uniuersam petere. Sicut enim quotquot fuerunt vnquam p̃i scriptores, tum sermonibus, tum scriptis libris, hoc genus vitæ laudibus in cælum tollere conati sunt, sic nulli ferè vnquam hæretici exstiterunt, qui vel nomen Monachorū patienter audire potuerint. Quando vos (inquit B. Augustinus in Psal. 132.) rectè hæreticis de Cir-



cum cellionibus insultare coeperitis, ut erubescendo sapientur: illi vobis insultant de Monachis. Primum, si comparandi sunt, vos videte: quid opus est, ut verbis nostris comparentur ebriosi cum sobriis, praecipites cum consideratis, furentes cum simplicibus, vagantes cum congregatis? sed tamen dicere consueverunt, quid sibi vult nomen Monachorum? quanto melius dicimus nos, quid sibi vult nomen Circumcellionum? *Et rursus, de Petiliano haereticorum principe, idem Augustinus libro aduersus Petilianum 3. cap. 40. Deinceps, inquit, perrexit ore maledico in vituperationem Monasteriorum & Monachorum, arguens etiam me, quod hoc genus vitae à me fuerit institutum.*

*Iam verò ARIANI tanto furore bacchantur in Monachos, ut ipsas etiam desertissimas solitudines, locaque maximè abdita & recondita penetrarent, ut Monachos quarerent, raperent, atque occiderent. Sic enim de Lucio Episcopo Ariano scribit Ruffinus lib. hist. 11. cap. 3. Inde, inquit, ad monasteria furoris sui arma conuertit, vastat eremum, & bella quiescentibus indicit. Ter mille simul, aut eo ampliùs, viros per totam solitudinè secreta, & solitaria habitatione dispersos, oppugnare pariter aggreditur. Mit-*



tit armatam equitum ac peditum manum: Tribunos, Præpositos, & bellorum Duces, tanquam aduersus Barbaros pugnaturus, elegit. Qui cum venissent, nouam belli speciem vident, hostes suos gladiis obiectare ceruices, & nihil aliud dicere, nisi; Amice, ad quid venisti? De VALENTE Imperatore pariter Ariano in Chronico B. Hieronymus annotauit, vsque adeo illam odisse Monachos, vt lege lata, Monachos omnes aut arma sumere, militesq; fieri, aut sustibus cadi, mactariq; decreuerit.

Sed nimis longum esset, si omnia veterum hæreticorum, ac præsertim Imperatoris Constantini Copronymi, & ceterorum veterum Iconomachorum in sanctos illos Monachos, aut improbe dicta, aut crudeliter facta commemorarem. Quid igitur, vt ad posteriora tempora descendamus, Ioannes WICLEE de Religiosorum ordinibus sensit? nempe omnes ad unum à Diabolo in Ecclesiam introductos, & Augustinum, Benedictum, Bernardum ad inferos esse damnatos, nisi pœnitentiam egerint, quòd Monachi, & Patres Monachorum fuerint. Sic enim habent articuli eius positi in Concilio apud Constantiam reprobati.

Quid Martinus LUTHERVS? nonne tertio quoque verbo in omnibus scriptis suis, quæ sanè quàm plurima exstant, monasticen lacerat? Ac, vt



alia pratermittam, quæ suo loco postea afferentur, certè in epithalamio illo suo, plus quàm credi possit, obscæno & sordido, quod in caput septimum epistolæ prioris ad Corinthios scripsit, qui cælibem vitam in monasteriis ducunt, eos omnes idolo Moloch corpora sua cremare confirmat. Et in eodem libro, statum religionis nihil valere, sed Ethnicum, terrenum, secularem, ac veluti lutum esse dicit, cum è contrario statum coniugij spiritualem, cælestem, diuinum, atque aureum esse prædicet. Ioannes CALVINVS libro Institut. 4. cap. 13. rem totam breuiter ita definit, vt esse velit monasteria lupanaria; vota monastica, retia Satana; Monachos omnes sophystas cucullatos, qui ab Ecclesia dissensionem fecerint, & se totos Diabolo consecrauerint. PHILIPPVS Melanchthon in Apologia pro Confessione Augustana, artic. de votis, vota atque opera Monachorum nunc obseruationes fatuas, nunc hypocriticas simulationes, nunc etiam traditiones Pharisaicas atque Mahumeticas vocat. MAGDEBURGENSES Centuriatores in 10. cap. 4. Centur. posteaquam multorum veterum Eremitarum vitas & res gestas breuiter descripserunt, in hæc verba sermonem claudunt: Sed quis, inquit, non hæc hominum monstra excretur, vt inimicos humanæ societatis, & contra totam secundam tabulam delinquentes.



*Vt illud interim omittam, quòd partem non modicam ingentium illorum voluminum in Monachorum vituperatione consumunt, quos ubiq; hypocrisis, ubique superstitionis, ubique impietatis accusant.*

*Sed quid, obsecro, Lutheranos in tam apertum, tamq; implacabile bellum contra Monachos impulit? Quid eis Monachi nocuerunt? quid rapuerunt? quid illis debent? Nonne, si scirent, ingentes gratias potius regno Monachorum, ut ipsi vocant, agere deberent? Ex quo nimirum Apostolus ille Germanicus, tertius Helias, totq; alij illustres Propheta, atq; Euangelista, tanquam ex equo Troiano prodierunt. Vnde enim habent Lutherum, Pomeranum, Bucerum, Pellicanum, Munsterum, Menium, Musculum, Miconium, Oecolampadium, Martyrem, Ochinum? Nonne ex monasteriis? Quanquam si verum fateri volumus, non monasteria tot nobis haereticos pepererunt, sed ipsa potius pestis haereseos monasteriorum desertores fecit.*

*Sed quid miramur, si filij tenebrarum lucem religionis aequis oculis intueri non queunt: si desertores militiae, castra Sanctorum oderunt: si fugitivi ac perfidi, stantes in acie commilitones suos exhorrent: si denique principis tenebrarum, primiq; caelestis militiae desertoris ac transfuga, discipuli*



eius ac filij, opera imitantur? Nam (ut apud Athanasium magnus ait Antonius) omnes quidem Christianos Diabolus odit, sed probos Monachos, Christi que virgines tolerare nullo modo potest. Hinc illa voces Abbatis Sereni apud Cassianum collat. 7. cap. 23. In ipsis, inquit, cœnobiis, in quibus commorabantur octo, vel decem, ita Dæmonum atrocitas grassabatur, & frequentes, ac sensibiles sentiebantur aggressus, ut non auderent omnes pariter noctibus obdormire, sed vicissim aliis degustantibus somnum, alij vigilias celebrantes, Psalmis & orationibus, seu lectionibus inherebant, cumque illos ad soporem naturę necessitas inuitaret, ex pergefactis ad eorum, qui dormituri erant, custodiam, similiter excubiæ tradebantur.

Habetis, quid heretici tam veteres, quam recentes, & quid ipse etiam pater eorum Diabolus de Monachis censeat. Nunc de iisdem quid censeant Patres, quid etiam Christus, & Deus, meritò à me requiri, atque expectari video. Sed quoniam plurima huius generis testimonia in ipsa Disputatione sapius nobis erunt necessario afferenda: nunc duobus tantum duorum clarissimorum utriusque Ecclesiæ luminum testimoniis contētus, rem totam, quam brevissimè fieri poterit, expediam. Prodeat igitur  
in pri-



in primis totius Graciae eximium decus S. Ioannes CHRYSOSTOMVS; is enim & pro vita monastica defensione tribus integris libris acerrimè decertauit, & ubiq; solitudines, ac monasteria ita splēdidè, magnificèq; laudat, vt illa regnis atq; imperiis, & ipso etiam paradiso, ac cælo nō dubitet anteponere. Deniq; hom. 8. in Matth. Si quis, inquit, nunc ad Ægypti veniat solitudines, paradiso prorsus omnem illum eremum videbit digniorem, & innumerabiles Angelorum cœtus in corporibus fulgere mortalibus: est enim cernere tota illa regione diffusum exercitū Christi, & admirabilem illum regium gregem, virtutumq; cœlestium conuersationem in terris micantē. Atq; hæc non in viris solū, verū etiam in foeminis splendere conspicias. Non ita variis astrorum choris cœlum refulget, vt Ægyptus innumeris Monachorum, ac virginum distinguitur, atq; illustratur habitaculis. Quanta est hæc laus? & à quanto viro, quanta verborum maiestate profecta? Sed iam B. AVGVSTINVM totius Occidentis clarissimum lumen audiamus.

Isigitur in lib. de moribus Ecclesie 1. c. 31. Monachorum vitam, tum Eremitarum, tum Cœnobarum, Manichæis perfectionem iactantibus obuiens: Nihil, inquit, de iis dicā, qui secretis  
simi



simi penitus ab omni hominum conspectu, pane solo, qui eis per certa interualla temporum offertur, & aqua contenti, desertissimas terras incolunt, perfruentes colloquio Dei, cui puris mentibus inhæserunt, & eius pulchritudinis contemplatione beatissimi, quæ nisi Sanctorum intellectu percipi non potest: Nihil (inquam) de his loquar, videntur enim nonnullis res humanas plus quam oporteret, deseruisse, non intelligentibus, quantum nobis eorum animus in orationibus profit, & vita ad exemplum, quorum corpora videre non sinimur. Sed hinc disputare longum & superuacaneum puto; nam hoc tam excellens fastigium sanctitatis, cui non sua sponte mirandum & honorandum videtur, oratione nostra videri quæ potest? Sed si hoc excedat nostram tolerantiam, quis non illos miretur, & prædicet, qui contemptis atque desertis mundi huius illecebris, in communem vitam castissimam sanctissimamque congregati, simulætatem agunt, viucentes in orationibus, in lectionibus, in disputationibus; nulla superbia tumidi, nulla peruicacia turbulenti, nulla inuidencia liuidi: sed modesti, verecundi, pacati, cōcordissimam vitam & intensissimam  
in



in Deum, gratissimum ipsi munus offerunt, à quo ista posse meruerūt. Nemo quidquam possidet proprium; nemo cuiquam onerosus est. Patres verò nō solum sanctissimi moribus, sed etiam diuina doctrina excellentissimi, nulla superbia consulunt his, quos filios vocant, magna sua in iubendo auctoritate, magna eorum in obtemperando voluntate. *Ac demum post alia multa finem faciens, ait:* Hos mores, hanc vitam, hunc ordinem, hoc institutum si laudare velim, neque dignè valco; & vereor, ne iudicare videar, per seipsum tantummodo expositum placere non posse, si super narratoris simplicitatem cothurnum etiam laudatoris addendum putauero. *Quàm dissimilia sunt hæc verba Catholicorum Patrum iis, quæ ex Luthero & Caluino paulò antè recitauimus? nimirum, hic fides, ibi perfidia; hic sapientia, ibi stultitia; hic grauitas, ibi furor; hic Deus, ibi Diabolus loquebatur.*

*Neque verò Deus per voces & scripta solum Catholicorum Patrum, sed etiam ipse per se sanctitati, atque præstantiæ ordinum Religiosorum testimonium tulit. Quid enim de hoc vitæ genere Deus censeat, testantur in primis diuina illæ, amplissimæq; promissiones, quæ partim in Prophetis,*  
*partim*



partim in Euangelis exstant, quibus (Matth. 19. Marci 10. Luca 18. Isaia 56.) centuplum in hoc seculo; sedes honoraria in iudicio; locus & nomen in regno cælorum maius, atque nobilius, quàm filiorum & filiarum sit, huius disciplina cultoribus Dominus pollicetur: testantur deinde hoc idem diuina signa, atque prodigia. Certè enim post Apostolica tempora splendore maximorum signorum, iudicio orbis terræ, semper clarissimi habiti sunt magnus Antonius, uterq; Macharius, Hilarion, Benedictus, Bernardus, Franciscus, Dominicus. At ij omnes sine controuersia professione Monachi fuerunt.

Quanta igitur, & quàm proiecta est audacia, sanctissima instituta, à Deo ipso, de cælo signis, atque prodigiis clamante, & approbante, confirmata, adhuc tamen animis obfirmatis contemnere, improbare, reiicere, cõspuere, lacerare? Vt interim omittam, quòd hac ipsa instituta longè antè Helias & Ioannes adumbrarunt, Christus consuluit, Apostoli coluerunt, Sancti ferè omnes adamarunt. Exceptis enim sacris Martyribus, rari omnino in numerum Sanctorum relati leguntur, qui ex Monasteriis non prodierint. Vt mihi iam monastica vitæ approbatio inter eas notas ac symbola, quibus Ecclesiam Catholicam ab omnium hæreticorum conueticulis inter noscimus, atq; distingui-

mus,



mus principem locum tenere, clarissimèq; eminere videatur. Quod S. ille Alexandrina Ecclesia Episcopus Petrus probe intellexit, cum, auctore Theodoro to lib. hist. 4. cap. 20. ex eo potissimum demonstravit, Lucium quendam non Episcopum, non Catholicum, sed hæreticum, hostem, lupum, & inuasorem esse, quòd eum nulli Monachi de more Ecclesie sacros Hymnos concinentes, ad solium Pontificale deduxerint. Existimabat enim magnus ille Pontifex, ita partem vera Ecclesia esse ordines Monachorum, ut Episcopus Ecclesia haberi non posset, qui secum Monachos habere nolisset.

Quæ cum ita sint, intelligi pfectò faciliè potest, ita causam Monachorum cum Ecclesia causâ esse coniunctam, ut nemo unquam Ecclesia hostis fuerit, qui non bellum eodem tempore Monachis omnibus indixerit. Quare à nobis mater nostra Ecclesia Catholica petere mihi videtur, ne nos ab hostibus diligentia, studioque vinci patiamur, sed quantum illi dies ac noctes legendo & scribendo laborant, ut aliquod Ecclesia, vel eius partibus ac membris detrimentum afferant, tantum nos operæ & laboris in omnibus Ecclesia partibus factis rectisq; conservandis collocemus: præsertim cum nos apud Deum clarissima iustitiæ, fideiq; corona, illos pœna sola perfidiæ atq; scelerum apud inferos maneat. Nunc ad rem ipsam propius accedamus.

Quin



*Omnis hac de Monachis Disputatio septem  
 precipuis capitibus, siue quaestionibus continetur.  
 Quibus quaestionibus una eademq; opera explica-  
 buntur nomina, origo, natura, partes, propieta-  
 tes, & actiones vitæ religiosæ, & simul ad ea omnia  
 respondebitur, quæ aduersarij nostri in Monachis  
 & eorum ordinibus reprehendunt.*

*PRIMA igitur quaestio erit de origine, ratione,  
 & varietate Religionum. Nec enim verentur ad-  
 uersarij, asserere ordines Religiosorum, rem esse re-  
 tens in Ecclesia inuectam; & idem esse dicere: Ego  
 sum ordinis B. Augustini, ego Benedicti, ego Domi-  
 nici, ego Francisci. ac dicere; Ego quidem sum Pau-  
 li, ego autem Apollo, ego verò Cepha. quod Aposto-  
 lus in Corinthiis grauissimè reprehendit, ut etiam  
 illos propterea seditionis, schismatis, atq; hæreseos  
 notare non vereatur.*

*SECUNDA quaestio erit de consiliis Euangelicis,  
 quæ sunt quasi bases & fundamenta totius mona-  
 stici aedificij. Horrent enim hæretici ad vocem con-  
 siliorum, & operum supererogationis, tanquam ad  
 ingētem blasphemiam. Id quod necessario faciunt;  
 cū enim arbitrentur ipsi, præcepta diuina nō pos-  
 se à quoquam, tamen si iustissimo, unquam impleri,  
 nō possunt non vehemēter mirari, cū nos dicere  
 audiunt, veros religiosos non solūm præcepta, sed  
 etiam consilia adimplere, & plus facere, quàm Deus  
 præcepit.*

*TERTIA*



TERTIA quæstio erit de votis monasticis. Cum enim aduersarij putet, nihil Deo placere, nisi quod ipse fieri iussit, omnia vota, quæ de rebus à Deo non imperatis suscipiuntur, tanquam superstitiosa, & inania reprehendunt: immò aperte votum continentia sacrificium idoli Moloch, votum paupertatis meram stultitiam, votum obedientie summam temeritatem esse volunt.

QUARTA quæstio erit de votis, quæ filij inuitis parentibus, & coniuges inuito altero coniuge, aliquando suscipiunt. Nam cum Deus mandauerit, honorari parentes, & non separari quos Deus coniunxit, grauitè nos accusant, quòd filios, inuitis parentibus, Monachos fieri patiamur; & Matrimonia, licet nondum consummata, tamen rata & firma, propter monasticam professionem dissoluamus.

QVINTA de solitudine, & summa vitæ seueritate Eremitarum. Eremitas enim aduersarij vrsos ac misanthropos vocant propter solitudinem: propter eam autem seueritatem, qua plurimorum nunquam cilicium exuebant, solis radicibus vescabantur, humi cubantes somnum breuissimum capiebant: nonnulli etiam integris hebdomadibus ieiunabant: alij ferreis cathenis se onerabant: quidam in editis columnis perpetuò consistebant; eos omnes execrantur, tanquam sui ipsorum homicidas,



das, & illius Apostolici præcepti transgressores: Habeto honorem corpori; quo præcepto nullum ipsi religiosius ac sanctius colunt.

SEXTA de habitu, & tonsura. Miram enim superstitionem in eo positam esse credunt, quod Monachi semper idem vestimenti genus, eadem forma, eodem colore, eadem magnitudine gerant, & eodem semper modo, qui sunt eiusdem ordinis, tondeantur.

SEPTIMA de opere Monachorum. Existimant enim aduersarij, de natura & ratione vera monastica professionis esse, ut Monachi omnes labore manuum victum querant, & idcirco eos omnes, qui id non faciunt, tanquam suæ ipsius professionis corruptores, falsosq; ac degeneres Monachos arguunt, & malum, & illicitum esse docent, tam sponte sua ad mendicitatem deuenire, quàm mendicatione victum colligere.

Scripserunt de hoc argumento S. Ioannes Chrysostomus in tribus libris contra vituperatores vitæ monasticæ; Ioannes Cassianus in libris de institutis Cœnobiiorum; Albertus Magnus in defensorio mendicantium; B. Thomas in opusculo 19. quod est contra impugnantes religionem; B. Bonaventura in Apologia pauperum; & libro de paupertate Christi, Thomas Waldensis lib. 3. & 4. de doctrina fidei, & de sacramentalibus, tit. 9. Albertus

Pighius



Pighius controuersia 14. Alphonsus Viruesius Philippica 20. Alphonsus à Castro in libris contra hereses, verbo Mendicitas, verbo Monachus, & verbo Votum; Ioannes Bunderius in suo compendio concertationum, tit. 34. Conradus Koellim in euerfione epithalamij Lutherani; Ioannes à Duentria in refutatione Confessionis Augustanae; Ioannes Eckius in Enchiridio, & in conclusionibus de votis; Franciscus Orantius li. 5. de locis Catholicis; Gaspar Schatzgerus lib. 1. cap. ult. & lib. 2. cap. 1. suarum Controuersiarum; Ioannes Hoffmeisterus contra art. 27. Confessionis Augustanae; Iacobus Latomus libro de Monachorum institutis & votis; Ioannes Cochleus libro de votis, & in discussione art. 27. Confessionis Augustanae; Iodocus Clichtoueus lib. 3. Antilutheri; Alanus Copus Dialogo 2. Matthæus Galenus de origine Monasticis; Richardus Cænomannus in antidoto ad censuram Erasmi in regulam S. Augustini; Franciscus Turrianus libris duobus de votis monasticis; Gulielmus Lindanus lib. 4. cap. 98. Panoplie.







# CAPVT PRIMVM.

## De nomine Monastices.

10



XPLICATVRVS IGITVR PRIMO LOCO naturam, partitionem, atque ortum religionum, & simul hæreticorum mendacia, & calumnias refutaturus, à nomine, vt par est, exordiar. Nomina apud Græcos quinque inueniuntur. vocant enim professorem huius vitæ

θεραπευτήν, ἀσκητήν, ἱερέτην, φιλόσοφον, μοναχόν: Latini retinuerunt vltimum Græcum vocabulum, & addiderunt regularem & religiosum. θεραπευτής significat cultorem. Vtitur hoc nomine Dionysius cap. 6. Ecclesiasticæ hierarchiæ, vbi dicit ab Apostolis fuisse Monachos vocatos θεραπευτάς, eo quod ipsi purè præter ceteros Deum colant. Vtitur eodem nomine Philo initio libri de vita contemplatiua supplicum, vbi dicit, eos vocari θεραπευτάς, vel quod Deum diligentissimè colant, vel quod animas suas colant, & curent à morbis vitiorum; nam θεραπευτής significat & cultorem & medicum. ἀσκητής significat pugilē suæ exercitorem, quo nomine passim vtitur Basilus, qui etiam sermones suos de rebus monasticis vocat asceticos. Dicuntur autem Monachi pugiles, vel exercitatores, quia totum eorum officium deberet esse virtutum palæstra, cùm alij homines exerceant se in bello, in mercatura, &c. ἱερέτης supplicem significat, quo nomine vtitur Philo, qui librum de vita Monachorum sui temporis, inscripsit de vita contemplatiua supplicum. dicuntur autem supplices à præcipuo munere, quod est orare, & laudare Deum.

20

Philosophi dicuntur Monachi passim à Chrysostomo in libris contra vituperatores vitæ monasticæ, & à Nilo, qui librum suū de monastice, inscripsit de Christiana Philosophia. dicun-



dicuntur autem Monachi Philosophi, ut Nilus indicat, quia eum locum tenent apud Christianos, quem Philosophi apud Ethnicos. Philosophi enim dicebantur apud Ethnicos, homines quidam seueri contemptores rerum temporalium, & toti sapientiæ studio dediti. Nomen Monachi frequentissimum est apud omnes Patres Græcos & Latinos. quid autem significet, non eodem modo explicatur ab omnibus.

B. Hieronymus in epistola ad Heliodorum, videtur velle nomen Monachi propriissimè conuenire eremitis, qui soli habitabant: *Interpretare, inquit, Vocabulum Monachi, hoc est, 10* *eremum; quid facis in turba, qui solus es?* At non ita esse, tum ex eo cognosci potest, quod eremitæ cœperunt à Paulo primo eremita, ipso Hieronymo auctore in eius vita: nomen autem Monachi inuenitur apud Dionysium Areopagitam, qui ferè CCC. annis Paulum primum eremitam antecessit: tum ex eo, quod omnes veteres, & ipse etiam Hieronymus in epistola ad Eustochium de seruanda virginitate, nomen Monachi tam eremitis, quàm cœnobitis volunt esse commune.

B. Augustinus in Psal. 132. exponens illud: *Ecce quàm bonum, & quàm iucundum habitare fratres in vnum;* dicit hoc 20 *dulcissimum canticum excitasse homines, & de secularibus Monachos fecisse, nihilque aliud significare Monachum, quàm hominem in tali vnitæte, & communitate cum aliis eiusdem instituti viuentem, ut cum illis omnibus vnum cor habeat, & vnum ac solum hominem faciat; secundum quam significationem nomen Monachi solis cœnobitis conueniret. At verissima explicatio huius nominis est apud Cassianum & Dionysium. Scribit enim Cassianus collat. 18. Abbatibus Pyamonis, cap. 5. inde Monachos dictos, quod à coniugiis abstinere, & à parentum se confortio, ac mundi huius con- 30* *uersatione fecernerent, ut nimirum soli Deo per contemplationem inhaerent. Quod idem tradit Dionysius, cap. 6. Ecclesiasticæ hierarchiæ, ubi dicit Monachos appellari, quod rebus diuisibilibus relictis, Monadi, id est, Diuinitati soli placere contenderent.*

Ex quo sequitur, propriè Monachos non esse, nisi eos religiosos, qui soli vitæ contemplatiuæ dant operam, quales sunt Cassinenses, Cistercienses, Carthusiani, Camaldulenses, atque alij id genus. Quod intelligentes S. Thomas, S. Bonauentura, & alij Doctores posteriores, non vocant Monachos,



chos, Dominicanos, & Franciscanos, & similes, qui non solum contemplationi insistant, sed in actione versantur, iuuantur Episcopos, & Clericos in concionibus, & Sacramentis, sed regulares, vel religiosos appellant. Regulares quidem, quod certæ regulæ viuendi addicti sint, quo nomine passim vtuntur Concilia. Religiosos autem, quod se totos Dei obsequio mancipauerint, vt rectè explicat B. Thomas 2.2. q. 186. art. 1. religio enim est virtus, qua Deo debitum cultum exhibemus: quare sicut omnes prohi Christiani dici possunt religiosi, si Deo seruiant, vt eorum vocatio requirit: ita illi per antonomasiam dicuntur religiosi, qui nulli rei seruiunt, nisi Deo: & licet hoc nomen videatur nouum, tamē reuera est omnium antiquissimum; respondet enim propriè illi Græco, θεοπρεπυτῆς, quo Dionysium, & Philonem vsos fuisse docuimus. Hæc de nomine.

## CAPVT SECVNDVM.

## De natura sue definitione Religionis.

**V**ANTVM ad rem attinet, religio, vt hic à nobis accipitur, sic definiri potest; Religio status est hominum ad perfectionem Christianā per paupertatis, continentie, & obedientie vota tendentium.

Sunt autem hoc loco annotanda quedam. PRIMVM illud est, veram perfectionē in caritate consistere; perfectio enim vniuscuiusq; rei in eo posita est, vt fini suo vltimo quā arctissime coniungatur. Finis autem hominis Deus est, caritas verò maximè vnit hominem cum Deo, iuxta illud 1. Ioan. 4.

*Qui manet in caritate, in Deo manet, & Deus in eo.* Et Colos. 3.

**C**aritas est vinculum perfectionis, id est, vinculum, quod ligans hominem cum Deo, hominem reddit perfectum: vel (vt Chrysostomus exponit) vinculum quod ligans, & continens in homine omnes virtutes, hominem reddit perfectum. Vt enim spiritus humanus ligat, & continet omnes humores, & partes alioqui dilapsuras, ita spiritus sanctus inhabitans corda nostra per caritatem continet omnes virtutes alioqui facile dilapsuras. Quod etiam idem Apostolus ostēdit, cum ait 1. Cor. 13. *Caritas patiens est, benigna est, & quæ sequuntur.*

Itaq; IRENAEVS lib. 5. ante medium exponens illud Apostoli 1. Thess. vlt. *Vt integer spiritus vester, & anima, & corpus conser-*



conferuetur; dicit hominem perfectum tribus constare, corpore, anima, & Spiritu sancto inhabitante per caritatem. Vt enim si desit ei corpus, vel anima, erit imperfectus in genere naturæ: ita si desit caritas, erit imperfectus in genere moris. Quo modo locum illum Pauli intelligūt etiam ferè omnes Græci, Chrysostomus, Theodoretus, Oecumenius, Theophylactus, & cum eis Hieronymus in epistola ad Hedibiam, quæst. vlt. Deniq; quodd caritas sit Christiana perfectio ex eo patet, quod ad eam omnia referuntur. Matt. 22. *In his duobus*

*mandatis Summa lex, &c. i. Tim. i. Finis præcepti caritas.* 10

Nota SECVNDO, ex B. Thoma in opusculo de perfectione, quatuor esse gradus caritatis, proinde etiam quatuor esse gradus perfectionis; dicitur enim perfectum id, cui nihil desit in ordine ad aliquem finem. Quare, non repugnat ali- quid esse perfectum, & imperfectum, si comparetur ad di- versos gradus, seu etiam fines.

PRIMVS gradus caritatis est diligere Deum, quantum est diligibilis, id est, infinito amore. Qui gradus soli Deo conuenit, & ideo solus Deus in ordine ad istum gradum perfectus est: Angeli, & Sancti omnes sunt imperfecti: quanquā hæc imperfectio non est propriè dicenda priuatio, aut vi- tium, sed pura quædam negatio.

SECVNDS gradus est, diligere Deum, non quantum est diligibilis, sed quantum potest creatura diligere, ita ut semper actu de Deo cogitet, & sine intermissione in eum per as- pectum feratur, & ne primos quidem motus cupiditatis sen- tiant contra Deum. In hoc gradu versantur beati, quorum comparatione omnes alij sunt imperfecti. Quare Philipp. 3. Apostolus, qui dixerat: *Quicumque perfecti sumus, hoc sentiamus.* Idem ait: *Non quod iam acceperim, aut iam perfectus sim.* 20

TERTIUS gradus est diligere Deum, non quantum est diligibilis, nec quantum potest creatura qualibet absolute diligere: sed quantum potest creatura mortalis, quæ à se re- mouit omnia diuini amoris impedimenta, & totam se Dei obsequio consecrauit. Qui in hoc gradu versantur, imper- fecti sunt respectu beatorum, sed perfecti respectu aliorum hominum, etiam iustorum, & piorum. Et hæc est perfectio, de qua loquuntur Theologi, cum dicunt, statum Episcopo- rum esse statum perfectionis adeptæ, & statum religiosorum esse statum perfectionis acquisitæ. Hoc enim interest inter-



Episcopos & religiosos, quod religiosi non tenentur continuo esse perfecti, sed tantum aspirare ad perfectionem. Versantur enim in exercitatione virtutis, & remotione impedimentorum: at Episcopi deberent esse perfecti, id est, ad eum gradum caritatis peruenisse, ad quem religiosi per sua vota, & exercitia tendunt. Propterea in definitione diximus, religionem esse statum hominum ad perfectionem tendentium.

10 **Q**UARTVS gradus est diligere Deum, non quantum est diligibilis, non quantum potest creatura vel absolutè, vel in hac vita diligere: sed tamè ita, vt nihil æquè, aut magis, quam Deum diligat, id est, nihil admittat contrarium diuinæ dilectioni. & hic gradus præceptus est omnibus, & quandam habet perfectionem, licet respectu superiorum sit imperfectus. Vnde 1. Ioan. 2. dicitur: *Qui seruat Verbum eius, Verè in hoc caritas Dei perfecta est.* Et tamen Matth. 19. Dominus ei, qui dicebat se omnia præcepta seruasse, ait: *Si vis perfectus esse, vende, vende omnia, &c.* Loquitur enim Ioannes de isto quarto gradu; Dominus autem de tertio, de quo nos in definitione religionis, & in tota hac disputatione agemus.

20 **N**ota TERTIO, instrumenta aptissima, atque vtilissima ad hanc perfectionem acquirendam, esse illas tres virtutes, paupertatem, continentiam, & obedientiam. Nam vt quis perfectè Deum diligat, debet & se totum Deo tradere, & omnia impedimenta remouere. vtrumque consequimur per has virtutes. Tradimus enim Deo nos totos, quando tradimus animum, corpus, & res externas; nihil enim habemus aliud. tradimus autem animum per obedientiam, corpus per continentiam, res externas per paupertatem. Item per has virtutes remouentur omnia impedimenta diuini amoris:

30 *Radix enim omnium malorum est cupiditas*, 1. Tim. 6. quemadmodum: *Radix omnium bonorum est caritas*, vt Augustinus adiungit serm. 12. de verbis Domini.

Omnis autem mala cupiditas ad tria capita reuocatur, ad luxuriam, auaritiam, superbiam: quod & auctoritate, & ratione probatur. Nam 1. Ioan. 2. dicitur: *Quidquid est in mundo, aut est concupiscentia carnis, aut concupiscentia oculorum, aut superbia vitæ.* Ratione, quia in homine duplex est appetitus, concupiscibilis, & irascibilis, ille appetit bonum absolutè, iste bonum arduum. Rursum ille prior duplex est, naturalis, & animalis.



NATURALIS appetit ea bona, quæ sunt necessaria ad naturam conseruandam tam in indiuiduo, vt cibum, & potum, quàm in specie, vt actum generationis. Qui appetitus cùm est inordinatus, dicitur incontinentia, & à Ioanne concupiscentia carnis. ANIMALIS appetitus dicitur ille, quo appetimus ea, quæ sunt bona secundum existimationem, vt pecunias, vestes, lapides preciosos, & similia, quæ non appetuntur à bestiis, quibus non inest appetitus, nisi naturalis, & hic appetitus cùm est inordinatus, dicitur auaritia, vel curiositas, & à Ioanne concupiscentia oculorum.

Denique appetitus irascibilis appetit excellentiam, quæ apprehenditur vt res maximè ardua, & cùm est inordinatus, dicitur à Ioanne superbia vitæ. Hos igitur tres fontes impedimentorum obstruunt tres illæ virtutes, concupiscentiam carnis continentia, concupiscentiam oculorum paupertas, superbiam vitæ obedientia.

Nota QVARTO, non sufficere ad religionem has tres virtutes, nisi accedat votum, id est, sacra promissio Deo facta, qua quis obstringat se perpetuè ita victurum. Religio enim est status quidam: status autem significat rem immobilem, & perpetuam. Quare fieri poterit, vt aliquis sit perfectus, & tamen non sit in statu perfectionis: quemadmodum è contrario non raro accidit, vt multi tam Episcopi, quàm Religiosi sint in statu perfectionis, & non sint perfecti. Ex his poterit tota definitio satis intelligi.

## CAPVT TERTIVM.

### De variis Ordinibus Religiosorum.

**Q**VANTVM ad TERTIVM. Veteres duo tantùm agnoscunt genera religiosorum; vnum anachoretarum, siue eremitarum; alterum cœnobitarum. Ità enim docet Hieronymus in epistola ad Eustochium de Virginitate, Augustinus lib. 1. de moribus Ecclesiæ, ca. 31. & Cassianus collat. 18. cap. 4. Itaque errat Isidorus lib. 2. de diuinis officiis, cap. 15. vbi tria facit genera Monachorum, eremitas, anachoretas, cœnobitas; nam iidem sunt anachoretæ, & eremita.

Addit quidem Hieronymus tertium genus, & Cassianus tertium & quartum, sed illa non sunt verè genera religiosorum,



rum, sed quædam relaxationes, & corruptiones religionum. Nam tertium genus vocant eorum, qui in cœnobiiis viuunt, sed adhuc aliquas proprias retinent facultates, nec in omnibus obtemperant præpositis; quæ sine dubio est corruptio vitæ cœnobiticæ. Quartum genus vocant eorum, qui ex monasteriis ad eremum transeunt, non ut sanctius, sed ut liberius viuant, nimirum excusso iugo superiorum, & legum cœnobiticarum; quæ est corruptio vitæ eremiticæ. quare ista duo à Patribus vocantur deterrima genera Monachorum.

10 Possumus nos cum B. Thoma, & Scholasticis paulò plenius, & subtilius explicare formas, & genera religionum iuxta fines, ad quos instituuntur. Omnis igitur religio ad perfectionem caritatis refertur, ut dictum est.

Possumus autem tribus modis Deum diligere, ei que seruire: Vno modo, per contemplationem ipsum Deum in se diligendo, ei que inhærendo: Alio modo, per actionem Deo in membris eius seruando, ut alendo pauperes, suscipiendo peregrinos, &c. Tercio modo, per vtrumque simul Deo obsequium præstando, id est, per contemplationem, que in actionem prodeat, siue per actionem, quæ necessario requirat contemplationem. Quod faciunt, qui concionibus, & Sacramentorum administratione populo seruiunt.

20

Iuxta hos fines tria sunt genera religionum. VNVM earum, quæ profitentur vitam contemplatiuam solum, quod genus, in multas formas diuidi potest iuxta varias constitutiones, & regulas, quas sequuntur. Alij enim sequuntur instituta S. Antonij, alij S. Pachomij, alij S. Basilij, alij S. Benedicti, alij S. Romualdi, alij S. Brunonis, &c.

ALTERVM genus est earum religionum, quæ profitentur vitam actiuam, quod in tot formas diuiditur, quod sunt opera caritatis. Quidam enim militando atque Ecclesiam armis protegendo seruiunt Deo. Quales sunt equites Hierosolymitani, S. Iacobi, S. Ioannis, & alij quidam ægrotos curando in Xenodochiis, quidam mortuos sepeliendo, & alij alij rationibus dum in proximos beneuolentiam ostendunt, Deo gratum obsequium præstant.

TERTIVM genus est eorum, qui profitentur vitam mistam, quod etiam in varias formas diuiditur iuxta varias eorū institutiones. Quidam enim sequuntur regulam S. Augustini, quidam S. Dominici, quidam S. Francisci, &c.

Quod



Quodd autem hæc ordinum varietas fuerit in vsu in veteri Ecclesia, & vtilissima sit, facile probari potest; nam, vt ex Hieronymo, Augustino, Cassiano locis notatis patet, semper fuerunt tam eremita, quam cœnobita, qui vitam contemplatiuam profiterentur; quod etiam fuerint, qui vitam actiuam exercerent, patet ex Cassiano collat. 14. quæ est prima Abbatis Nestoris, cap. 4. vbi dicit, ex religiosis sui temporis alios dedisse operam contemplationi, alios curando Xenodochio, alios alendis pauperibus, alios miserorum suscipiendo patrocinio, &c. Quod denique fuerint, qui vitam mi-  
10

seram sequerentur, perspicuum est tum ex eodem Cassiano ibidem, vbi dicit, quosdam etiam religiosos dedisse operam instruendis, & docendis imperitis, tum ex B. Augustino, qui in duobus sermonibus de communi vita Clericorum, asserit se instituisse in suo Episcopatu religionem regularium Clericorum.

Quodd autem in his tribus generibus religionũ multa essent diuersitates iuxta varias obseruationes, & ritus viuendi, docet Epiphanius in fine librorum contra hæreses, vbi dicit, quosdam religiosos ex instituto sui ordinis abstinuissẽ à car-  
20  
 nibus, alios etiam ab ouis, alios etiam à piscibus, alios etiam à pane. Rursum, quosdam nudis pedibus ambulasse, alios sac-  
 eum interius gestasse, alios humi cubasse, &c.

Iam verò quodd hæc varietas institutorum in eadem fidei consensione nihil obsit Christianæ religioni, sed potius valde pro-  
 fit, hinc intelligi potest, quod hac ratione prouisum est omni hominum generi, vt nemo sit, qui velit ad perfe-  
 ctionem tendere, & non possit. Varia enim sunt hominum ingenia, variæ propensiones, nec pares omnibus vires. Vnus diligit solitudinem, alius gaudet frequentia; vnus libenter  
30  
 orat, alius libentius legit, vel operatur, &c. Si ergo omnis re-  
 ligio requireret solitudinem, vel omnis communionem, & frequentiam; aut si omnis religio abstinentiam à carnibus indiceret, vel nulla indiceret, &c. pauci admodum religiosi  
 esse possent. Nunc autem in tanta varietate religionum po-  
 test omnibus satisfieri.

Alter ratio esse potest, quia cum omnis ordo initio fer-  
 ueat, ac multos homines excitet ad pietatem; paulatim au-  
 tem postea feruorem illum remittat; Deus subinde novos  
 ordines excitando, quasi perpetuò feruorem in Ecclesia  
sua



sua nunc per hos, nunc per illos conseruat. Certè si quis legat vitam, & res gestas sanctorum Antonij, Benedicti, Bernardi, Brunonis, Francisci, Dominici, & aliorum, qui aut nouos ordines instituerunt, aut veteres iam penè collapsos restituerunt, is fatebitur esse verissimum, quod diximus de mirifico ardore in studium pietatis, & multorum hominū conuersione à peccatis ad Deum per nouos ordines religiosos.

## CAPVT QVARTVM.

10

*De confirmatione Religionum.*

RITVR hoc loco breuis quædam dubitatio, an religionum institutio libera sit, an verò egeat summi Pontificis confirmatione, sed facilis est solutio. Duo siquidem in omni religione inueniuntur; essentia ipsa religionis, quæ in tribus votis sita est; & determinatio illius essentiæ ad certum modum viuendi. Et quidem essentia religionum in Euangelio fundamentum habet, vt paulò post demonstraturi sumus: proinde ex hac  
 20 parte non egent religiones Pontificum approbatione. Modus autem ille varius, quo tria vota suscipi possunt, non ita perspicuè in Euangelio elucet, & non parum ex prudentia, & directione humana pendet. Quare Pontificis confirmatione indigere potest, & nunc re ipsa, propter ius positium nouas religiones prohibens, omnino indiget. Itaque Antonius, Basilius, Augustinus, Benedictus auctores religionum fuerunt, nec vllam leguntur à Pontifice approbationem quaesuisse, propterea quod nondum exstaret ius Ecclesiasticum id præcipiens. Condendi autem noui iuris hæc fuit occasio.

30 Ad annum Domini circiter M.C.LXX. pauperes de Lugduno ordinem quendam religiosum instituerunt, sed multis admistis superstitionibus, & hæresibus. Quocirca à Lucio III. Alexandri III. successore hæreseos damnati fuerunt, & secta eorum reprobata, vt scribit Abbas Urspergensis in Chronico anni M.CC.XII. Illi verò postmodum, id est, tempore Innocentij III. sedem Apostolicam adeuntes diu institerunt, vt idem auctor ait, vt reconciliarentur, & religio ipso- rum confirmaretur, nec tamen impetrarunt.

Inde igitur factum est, vt B. Franciscus, & B. Dominicus volentes similiter nouos ordines instituere, & metuentes, ne  
 sibi



sibi accideret, quod videbant accidisse VValdensibus, noluerunt confidere suo iudicio, sed à Pontifice confirmationem petierunt, & impetrauerunt. Paulò autem pòst in Concilio Lateranensi generali considerans Innocentius III. periculum, quod imminebat Ecclesiæ, si vnicuique liceret nouam religionem excogitare, prohibuit, ne deinceps vllus nouus ordo institueretur, nimirum sine approbatione Apostolicæ sedis, vt habemus cap. fin. de Relig. dom. quod decretum renouauit Gregorius X. in Concilio Lugdunensi, vt habemus cap. Vnico de Relig. dom. in Sexto. Atque hinc cœpit esse necessarium, quod ante erat liberum.

## CAPVT QVINTVM.

### De origine Religionum.

**Q**UOD ad QVARTVM attinet de origine, aduersarij tria docent. PRIMÒ, religiones incœpisse demum quarto seculo, id est, post annum Christi CCC. primosque auctores fuisse Antonium, Macharium, & similes. Ita docent Magdeburgenses Cent. 4. cap. 6. col. 464. 10 *Capit*, inquit, hoc seculo primum monastice, &c. Idem repunt sæpissimè.

SECUNDO, religiones cœpisse partim casu, partim errore, partim praua imitatione. Cent. 4. cap. 6. colum. 470. dicunt Magdeburgenses, non sponte sua ad solitudinem concessisse primos eremitas, sed casu quodam, nimirum, vt fugerent persecutionem. Id, quod scribit de Paulo primo eremita B. Hieronymus in eius vita, & Sozomen. lib. 1. cap. 13. iidem autem Magdeburgenses Centur. 5. cap. 6. col. 700. *Capit*, inquit, monachatus partim ex obscuracione doctrina de iustificacione, & Veris cultibus Dei, partim ex praua amulatione Esse-  
norum.

TERTIO, addunt Philippus in Apologia pro art. 27. Confessionis Augustanæ, & Caluinus lib. 4. Instit. cap. 13. §. 10. fuisse quidem apud veteres quarti & quinti seculi aliquos Monachos, sed eos, qui nunc sunt, nihil cum illis habere commune, & ideo verè dici posse, monachatum, qualis nunc est, rem nouam, & recentem esse.

Nos ergo primò ostendemus, religiosam vitam diu ante quartum seculum incœpisse. Secundò, originem eius non fuisse



fuisse casum, vel errorem, vel prauam imitationem, sed perfectionis desiderium. Tertio, religiones, quæ nunc sunt, eadem esse quoad essentiam cum iis, quæ erant temporibus antiquissimis. Dicimus itaque primum vitam religiosam a deo esse antiquam, ut quædam eius adumbratio fuerit in lege naturæ ante diluuium: maior quædam expressio in lege Moysis: perfectio autem Apostolorum tempore.

Habemus in primis Genes. 4. de Enos: *Iste cepit inuocare nomen Domini*. Ex quo loco colligunt auctores, hunc Enos instituisse peculiarem aliquem cultum, & sublimiorem, quam  
 20 esset religio vulgi; nam ante Enos certè etiam Adam, & Abel, & Seth Deum inuocauerunt: & tamen iste dicitur primus cœpisse inuocare nomen Domini: Vide de hac re VValdensium lib. 3. doctr. fid. art. 1. cap. 1.

Habemus deinde Num. 6. vota Nazaræorum, qui seipso Domino consecrabant; ad quorum exemplum etiam in Ecclesia quosdam seipso totos diuino cultui deuouere scribit Origenes hom. 11. in Leuiticum.

Habemus deinde in eodem Testamento vetèri; Heliam,  
 20 & Helisæum, ac filios Prophetarum sine vxoribus, & diuitiis in hoc mundo vixisse. De quibus B. Hieronymus in epistola ad Rusticum, quæ est ordine quarta: *Filij Prophetarum*, inquit, *quos Monachos in Veteri Testamento legimus, ad discabant sibi casulas, propter fluentia Iordanis; & turbis Urbium derelictis, potentia, & herbis agrestibus, victitabant*. Et epist. 13. ad Paulinum, de Monachis loquens: *Noster princeps*, inquit, *Helias, noster Helisæus, nostri duces filij Prophetarum, qui habitabant in agris, & solitudinibus, & faciebant sibi tabernacula prope fluentia Iordanis*.

30 Habemus etiam Hierem. 35. insignem commendationem nepotum Rechab, qui cum eis pater, siue auus præcepisset, ut domos non ædificarent, agros non seminarent, vineas non plantarent, vinum nunquam biberent, vitam durissimam quasi extra mundum agerent, omnia diligentissime obseruauerunt. quos etiam Monachorum nostrorum figuram gessisse scribit Hieronymus in eadem ad Paulinum epistola.

Denique Ioannem Baptistam Monachorum, & Eremitarum principem fuisse, scribunt ferè omnes Patres. Nazianzenus orat. in Basilium, S. Basilium, quia Monachus fuit,



rat, cum Ioanne Baptista comparat. Chrysostomus homil. 1. in Marcum: *Sicut, inquit, Sacerdotum principes sunt Apostoli, sic Monachorum princeps Ioannes Baptista est.* Hieronymus ad Eustochium de seruanda virginitate, de eremitis differens: *Huius Vita, inquit, auctor Paulus, illustrator Antonius, &c. Et ad superiora conscendam, princeps Ioannes Baptista.* Idem docent Cassianus collat. 18. cap. 6. Sozomenus lib. 1. hist. cap. 12. Isidorus lib. 2. de diuinis officiis, cap. 15. & B. Bernardus sermone de excellentia Ioannis Baptiste.

Veniamus ad nouum Testamentum, & ostendemus ante 10 annū CCC. fuisse Monachos in Ecclesia. PRIMVM id probatur ex Athanasio in vita B. Antonij, vbi Athanasius docet, ante Antonium non fuisse quidem eremitas, sed tamen Monachos fuisse, qui in agris, ciuitatibus vicinis, monasteria sua constituiebant: & Antonium, cum is Monachus fieri veller, ad senem quendam accessisse, qui ab ineunte etate monasticen exercuerat. Ex quo sequitur & B. Antonium non fuisse primum Monachum, & ante annum Domini CCC. fuisse Monachos; nam Antonius floruit initio IV. seculi; anno enim CCC. erat annorum XL. vt colligitur ex Chronico Hieronymi, & tamen ipso adolescente inueniebantur multi Monachi senes.

Quoniam autem Magdeburgenses Centur. 4. capite 10. colum. 1306. subdubitant, an hæc vita sit ab Athanasio scripta, facile id probari potest; nam scripsisse Athanasium vitam Antonij testantur Nazianzenus in Athanasio, Hieronymus de viris illustribus in Antonio, in Euagrio, & in Athanasio, Rufinus lib. 1. histor. cap. 8. Augustinus libro 8. Confess. cap. 6. Paulinus in vita Ambrosij, Palladius in historia Lausiaca, cap. 8. & Socrates lib. 4. capite 18. Quodd autem 30 hæc ipsa, quam habemus, sic illa ipsa Athanasij, patet ex eo, quod est reuera insigne volumen, vt Hieronymus dicit fuisse librum illum Athanasij: item continet plurima illa miracula, quorum meminit Augustinus. Præterea recenset historiam illam de anima Ammonis, quam Palladius, & Socrates ex libro Athanasij de vita Antonij referunt. Denique nihil in contrarium asserunt Centuriatores, nisi iudicium suum; stultum autem est sine vlla ratione, vel coniectura, vel auctoritate id in controuersiam vocare, de quo nemo dubitat.

Proba-



Probatur SECUNDO ex Damaso, qui in vita Dionysij Papæ scribit, hunc ipsum Dionysium ex Monacho ad Pontificatum assumptum fuisse. Cõstat autem ex Chronico Eusebij, Dionysium Romæ sedisse anno Domini CC. LXVI. nõ ergo Monachi cœperunt post annum Domini CCC.

TERTIO probatur ex Cypriano, & Tertulliano, qui etiam antiquiores Dionysio Papa fuerunt, scribit enim Tertullianus librum de velandis virginibus, & CYPRIANVS Tertullianum sequutus scribit librum eiusdem argumenti, quem de  
 10 habitu virginum inscripsit. Vterque autem loquitur de virginibus religiosis, & per solennem professionem Deo consecratis. Nam TERTVLLIANVS distinguit in eo libro inter virgines mundi, id est, seculares, & virgines Dei, id est, sanctimoniales, de quibus ait: *O sacrilega manus, quæ dicatum Deo habitum detrudere potuerunt. quid perus aliquis persequutor fecisset, si hoc à Virgine electum cognouisset?* Et infra, eas alloquens: *Nupsisti, inquit, Christo, illi tradidisti carnem tuam, &c.* Similia habet Cyprianus.

QUARTO probatur ex Dionysio Areopagita, Tertulliano  
 20 antiquiore; is enim epistolam scribit ad Demophilum Monachum, & lib. de Ecclesiastica hierarchia, cap. 6. prolixè explicat monasticæ professionis formam.

Fatentur Magdeburgenses verè de Monachis scribere auctorem eius libri, sed eum negant esse Dionysium Pauli Apostoli discipulum, Cent. 1. lib. 2. cap. 10. colum. 624. quod idem negant Laurentius Valla, & Erasmus in annot. ad cap. 17. Actorum; item Lutherus, Caluinus, & omnes hæretici. At opera ista nomine Dionysij citant tres veteres Pontifices, Gregorius I. hom. 34. in Euangelia, Martinus I. in Concilio Romano, & Agatho in epistola ad Imperatorem Constantinum IV. Item Nicolaus Papa I. in epist. ad Michaëlem Imperatorem citat epistolam S. Dionysij Areopagite ad Demophilum Monachum. Item duo generalia Concilia VI. act. 4. & VII. can. 2. Præterea Doctores plurimi, vt S. Maximus, qui annotationes scripsit in Dionysium, Sophronius Patriarcha Hierosolymæ in oratione pulcherrima, quæ habetur actione 11. sextæ Synodi, Damascenus lib. 1. cap. 12. de fide, Eutymius panopliæ part. 1. tit. 2. Anastasius Bibliothecarius in epistola ad Carolum Caluum, Hilduinus in epistola ad Ludouicum Pium, & alij posteriores omnes. Non est  
 30 autem



autem illo modo verisimile tot Patres nō potuisse videre id quod nunc Valla, & Erasmus vidisse se dicunt.

DEINDE sic possumus ratiocinari: Auctor horum librorum non potest esse recentior, quā sit B. Gregorius, ut notum est, cum à Gregorio ipso citeretur. Rursum non potest esse recentior, quā sit Hieronymus; nam Gregorius eum citans vocat antiquum, & venerabilem patrem, non autem vocaret antiquum hominem, suo seculo proximum. Non potest etiam floruisse paulō ante Hieronymum, id est, IV. seculo; nam sine dubio tunc Hieronymus posuisset eum inter scriptores Ecclesiasticos; non enim potuisset ignorare scriptorem, qui sua memoria exstiteret. Et præterea notus fuisset eadem ratione Ambrosio, Augustino, Chrysostomo, aliisque Patribus, quibus tamen incognitus fuit, quantum eorum operibus colligi potest: Quare necesse est, ut Anastasius dicit, auctorem esse antiquissimum, & suppressum fuisse ab hæreticis, ac tandem Romæ repertum fuisse tempore B. Gregorij, vel paulō antè.

Ex quo soluitur argumentum Vallæ, Erasmi, & Centuriatorum, qui hoc utuntur tanquam præcipuo argumento, quod Ambrosius, Chrysostomus, Augustinus, & maxime Hieronymus nunquam citent hos libros. Hoc enim argumentum eorum nobis maxime fauet; nam cum isti Patres non citent hæc opera, signum est auctorem hunc non existisse ipsorum tempore, & cum constet ex Gregorio eum non esse illis posteriorem, sequitur necessariō esse longè antiquiorem. Vnde etiam Valla testatur, plurimos viros doctissimos sensisse hæc opera non esse quidem Dionysij Areopagitæ, sed tamen auctoris ferè æquæ antiqui, nimirum Apollinaris Hierapolitæ, vel, ut alij volunt, Dionysij Corinthij, quorum uterque floruit anno Domini C. LXXIV. ut Eusebius testatur in Chronico. Hoc autem etsi non est verum, tamen nobis sufficit ad asserendam antiquitatem monasticæ.

QUINTO probatur ex Philone Iudæo, qui etiam Dionysio Areopagita fuit antiquior. Philo igitur in libro de vita contemplatiua supplicum, prolixè admodum describit vitam, & mores Monachorum, & sacrarum virginum, quos instituit in Egypto S. Marcus Euangelista, ubi apertè ponit professionem continentia, & paupertatis, ieiuniorum, psalmodia, &c.



Magdeburgenses Centuria 1. lib. 2. cap. 3. pag. 18. fatentur Philonem hæc scripſiſſe, ſed eum non eſſe loquutū de Chriſtianis, ſed de Eſſenis, quæ erat ſecta Iudæorum omnino ſimilis noſtris religionibus. Hoc autem non probant alia ratione, niſi quia nondū Chriſtiani talia exercitia habuerunt. Quid ſi eis obiciamus, hoc eſſe petere principium, reſpondebunt, vt ſolent, nos agere ſophiſtas.

Probemus igitur breuiter non dialectica ratiocinatione, ſed testimoniis Patrum, Philonem de Chriſtianiſ eſſe loquutum. In primis EUSEBIUS lib. 2. hiſt. cap. 16. dicit Philonem Romanæ S. Petrum viſiſſe, atq; eius adhæſiſſe colloquiis, verbum Dei prædicantis, & eorum vitam, qui in monaſteriis degunt, luculenter ſcripſiſſe. Item EPIPHANIUS hæreſi 29. quæ eſt Nazæorum, de hoc libro Philonis loquens: *Monasteria ipſorum*, inquit, *in ſicinia circa Mariam paludem recensens, non de aliis narravit, quàm de Chriſtianiſ.*

Præterea HIERONYMUS de viris illuſtribus in Philone, poſteaquam docuit Philonem de Chriſtianiſ eſſe loquutum, ſubiungit: *Ex quo apparet, inquit, talem primam Chriſto creditum fuiſſe Eccleſiam, quales nunc Monachi eſſe nituntur, erupunt.* Præterea CASSIANUS lib. 2. cap. 5. de inſtitutis cenobiorū aſſerit, à S. Marco Egyptios Monachos accepiſſe primam viuendi normam. Id quod non poteſt Caſſianus didiciſſe, niſi ex hoc libro Philonis. Idem aſſerunt diſertis verbis BEDA prologo in Marcum, Sozomenus lib. 1. cap. 12. & Nicephorus lib. 2. cap. 15.

DICET fortassis aliquis, ſimilia narrat de Eſſenis Iosephus lib. 2. de bello Iudaico, cap. 7. & lib. 18. antiquit. cap. 2. iis, quæ narrat Philo. Conſtat autem Iosephum de Iudeis loqui, cum aſſermet tres eſſe Iudæorum ſectas, Pharifæorum, Sadducæorum, Eſſenorum.

RESPONDEO, duas eſſe de loco iſto Iosephi opiniones. Quidam enim aſſerunt non loqui de eiſdem Iosephum, & Philonem. Nam Iosephus lib. 18. antiquit. cap. 2. aſſerit, Eſſenorum ſectam antiquam apud Iudæos fuiſſe: Philo autem indicat ſe loqui de diſciplina ſuo tempore exorta: Præterea multa tribuuntur Eſſenis à Iosepho, quæ ſunt manifeſtè erronea, & ſuperſtitioſa, quorum nihil tribuit Philo ſuis theſeupit. Vnde S. NILVS initio Aſceticorum ſuorum aſſerit, Eſſenos (de quibus videlicet Iosephus loquitur) habuiſſe qui-



quidem mores similes moribus Monachorum, sed quia fide in Christum caruerunt, nihil eis profuisse sanctos mores.

Alij docent tam Philonem, quàm Iosephum de Christianis loqui, quibus fauere videtur B. HIERONYMVS in epist. ad Eustochium de seruanda virginitate, vbi de Monachis loquens: *Tales, inquit, Philo, Platonici sermonis imitator, tales Iosephus, Græcus Linius, in secunda Iudaica captiuitatis historia, Essenos refert.* Quam sententiam tuetur Matthæus Galenus libro de origine Monastices, cap. 5. & ad ea, quæ obijciuntur ab alijs, de erroribus, quos tribuit Iosephus Essenis, & de eorum antiquitate, respondet, Iosephum non fuisse consequutum exactè mysteria nostrorum Monachorum, & ideo frequenter lapsum esse, & eos confudisse cum antiquis Iudæis. Fuerunt enim tria genera eiusdem ferè nominis, nimirum Esseni Samaritani, de quibus Epiphanius hæresi 10. Item Esseni Iudæi, de quibus Epiphanius hæresi 19. quos tamen ipse Ossenos vocat. Denique Esseni Christiani, ex Iudæis conuersi, quos Epiphanius Esseos, vel Iesseos vocat hæresi 29. Credibile igitur est, Iosephum cōfudisse nostros Iesseos cum suis Essenis, præsertim cum eo tempore Christiani pro Iudæis haberentur. Vtraque solutio probabilis est.

Sexto probatur ex Apostolorum exemplo, qui verè primi fuerunt Monachi Christiani; nam quòd vitam cœnobiticam instituerint, vbi essent omnia communia, patet ex actis Apostolorum, cap. 4. Quod ea ratio viuendi non fuerit omnium Christianorum, sed eorum tantùm, qui volebant perfectius viuere, patet ex cap. 5. Act. vbi cum Ananias fraudasset de precio agri, & decipere voluisset Apostolos, audiuit à S. Petro: *Nōne manens tibi manebat, & vendidit in tua erat potestate?* Quòd etiam voto ad eam perfectionem se obligant Apostoli, docet Augustinus lib. 17. de ciuit. Dei, cap. 4. *Hoc eorum, inquit, potētissimi conuerant, &c.* Quòd denique ab Apostolorum exemplo cœperint religiones, testatur plurimi Patres; vt Eusebius lib. 2. hist. cap. 16. Hieronymus de viris illustribus in Philone, Augustinus serm. 2. de vita communi Clericorum, Possidius in vita Augustini, Isidorus lib. 2. de offic. cap. 15. Denique Cassianus collat. 18. cap. 5. *Itaq, inquit, cœnobitarum disciplina à tempore prædicationis Apostolica sumpsit exordium.*



At Magdeburgenſes Centuria I. lib. 2. ca. 6. col. 506. obſciunt Chryſoſtomum, qui homil. 25. in epiſtolam ad Hebræos: *Neg. Veſtigium, inquit, Monachi tunc erat, ſed omnia ad ſeculares loquebatur B. Paulus.*

RESPONDEO, Chryſoſtomum loqui ſolùm de Eccleſia Corinthiorum. Exponit enim illa verba Pauli, I. Corinth. 5. *Si quis frater nominatur in vobis, &c.* ac dicit, Paulum nomine fratris non intelligere ſolos Monachos, ſed quolibet fideles, quia tunc ne veſtigium quidem erat Monachi apud  
 10 Corinthios. At non propterea ſequitur, non fuiſſe tunc Monachos in Palæſtina, & in Ægypto. Quòd autem CHRYSTOMYS non neget Apoſtolorum tempore fuiſſe Monachos, patet ex plurimis eius teſtimoniis. Nam homil. 17. ad pop. de monaſtice loquens: *Tanti eſt,* inquit, *Philophia à Chryſto introducta.* Certè ſi Chriſtus introduxit monaſticen, iam erat tempore Pauli Apoſtoli. hom. 11. in Acta dicit Monachos ſic vivere, vt olim initio Eccleſiæ vivebant fideles omnes in Hieruſalem. item homil. 69. in Matth. dicit Monachos etiam habitu imitari Apoſtolos. denique lib. 3. contra vituperat. vi-  
 20 tæ monaſticæ, non procul à fine, aſſerit ea ab Apoſtolis impleta, quæ nunc à Monachis implentur.

Nunc quod attinet ad SECVNDVM, non occaſione perſe-  
 quutionum, & caſu exortam eſſe vitam monaſticam, facile demonſtrabitur. nam de cœnobitis non eſt dubium, cum exſtiterint ante omnes perſequutiones. de eremitis idem probatur; nam etſi Paulus primus eremita occaſione perſe-  
 quutionis ſolitudinem colere cœperit, tamen Antonius non tali occaſione cœpit, ſed ſolo ſtudio vitæ purioris, vt ex Athanaſio in eius vita perſpicuum eſt: vita autem eremitica non à  
 30 Paulo, ſed ab Antonio introducta eſt; etſi enim Paulus primus omnium in eremo vixerit, tamen non habuit ipſe diſcipulos, nec fuit notus, niſi paulò ante mortem. Antonius autem verè princeps eremitarum dici debet, quippe qui nec ab alio didicit, & ipſe docuit omnes. Quare rectè Hieronymus in vita Pauli dicit, Antonium meritò vocari auctorem vitæ eremiticæ, nō tam quòd ipſe omnes præceſſerit, quàm quòd ab ipſo omnium incirata ſint ſtudia. Quocirca vterque dici poteſt primus eremita, Paulus quidem tempore, Antonius autem magiſterio.

Quòd etiam cauſæ inſtituendæ vitæ religioſæ non fuerit obſcu-



obscuratio doctrinæ de iustificatione, vel praua Essenorum imitatio, ex iis, quæ diximus, manifestum est; nam auctores religionum fuerunt primùm Apostoli, ac deinde Antonius, Basilus, Augustinus doctissimi, & sanctissimi homines, quos non possumus ignorantix, & prauæ æmulationis accusare. Nam BASILIUM fuisse auctorem cuiusdam ordinis monastici, testatur Nazianzenus in eius vita: A V G V S T I N V S. verò à se institutum monasticum ordinem fatetur libro 3, contra literas Petilianii, cap. 40. Certè autem inter Græcos vix inueniuntur aliquis Basilio doctior, vt nec Augustino inter Latinos. 10

Quantum ad TERTIUM, quodd essentia monastices eadem sit nostrorum, & antiquorum Monachorum, plurimis testimoniis probari posset, quæ postea afferentur in disputatione de votis. Nunc, quia Calvinus, & Melancthon per antiquos Monachos intelligunt eos, qui erant tempore sanctorum Augustini, & Basilij; ex his duobus probemus sententiam nostram.

Essentia vitæ religiosæ in tribus illis virtutibus, obedientia, paupertate, castitate, ab omnibus huius temporis religionis constituitur. Idem fiebat ab antiquis; nam Augustinus 20 lib. 1. de moribus Ecclesiæ, cap. 31. vitam cœnobarum explicans. Primùm ait, eos spretis mundi huius illecebris in vitam castissimam, & sanctissimam congregari. Secundò addit, à nullo quidquam possideri proprium. Tertio adiungit, Patres nulla superbia consulere iis, quos filios vocant, magna sua in iubendo auctoritate, magna illorum in obtemperando voluntate.

BASILIVS autem in præfatione constitutionum monasticarum, de Monacho futuro sic loquitur: *Nuptias, inquit, veluti compedes fugit, his autem relictis, vitam suam Deo consecrat, 30 & castitatem proficitur, ut neque facultas ipsi sit conuersionis ad nuptias.* Item cap. 22. constitutionum, de obedientia fusillime disputat, ac tandem concludit, ita oportere Monachos obedire præposito, vt oues pastori, atque vt instrumentum fabri: *Non curiosè, inquit, inuestigando præcepta, ubi à peccato fuerint pura, sed cum omni alacritate ac studio explendo ea, quæ sunt demandata.* Denique cap. ultimo disserit de paupertate, ac docet, Monachum ab omni prorsus priuata rerum materialium possessione liberum esse debere.

Porro fuisse olim etiam cucullas, & reliquum habitum



monasticum, nec non psalmodiam, ieiunia, ciborum delictum, aliaque id genus instituta, cognosci potest, tum ex Epi-  
 phanio in compendiarie doctrina, tum ex Ioanne Cassia-  
 no in libris de institutis cœnobiorum.

## CAPVT SEXTVM.

*Mendacia deteguntur, & calumnia refu-  
 tantur.*

10



VANTVM ad quintam partem quæstionis, refere-  
 mus breuiter mendacia quædam manifesta, vel  
 absurdissimas sententias trium præcipuorum hu-  
 ius temporis Heresiarcharum, Lutheri, Melanch-  
 thonis, Caluini, quas in disputationibus suis contra mo-  
 nasticen protulerunt; horum enim mendaciorum refutatio  
 plus valet ad eos confundendos, quàm multa subtilissima ar-  
 gumenta.

20

LVTHERVUS igitur in epithalamio. PRIMO aasserit, mulieres  
 non nisi ad Matrimonium creatas fuisse. At si ita est, non igitur  
 in cœlo vllæ erunt mulieres, vbi non nubent neque nu-  
 bentur, & incidemus in hæresim Origenistarum, qui in futuro  
 seculo negant futuram sexuum distinctionem, quam Hiero-  
 nymus refellit in epistola contra errores Ioannis Hiero-  
 solymitani. frustra etiam fuerunt in hoc mundo tot millia  
 sanctissimarum virginum, si mulier non est ad aliud creata,  
 quàm ad nuptias.

30

SECUNDO dicit, idem esse consultare, sit ne ducenda vxor,  
 & sit ne comedendum, & bibendum. At de priore omnes sa-  
 pientes consultant, etiam Ethnici, vt patet ex Gellio lib. i.  
 cap. 5. de posteriore, soli stulti, vel ne stulti quidem.

TERTIO dicit, Mosem præcepisse omnibus Iudæis Ma-  
 trimonium, ita vt nullo modo licuerit in veteri Testamen-  
 to carere vxore. Quomodo igitur Helias, Helisæus, Hiere-  
 mias, Ioannes Baptista vxoribus caruerunt? caruisse enim  
 probat Hieronymus lib. i. contra Iouinianum; sed Lutherus  
 hoc præceptum non in diuinis literis reperit, sed ex Rabino-  
 rum deliriis sumpsit. Nam R. Salomon in cap. 9. Genes. vult  
 esse reum homicidij, qui liberis non dat operam, & R. David  
 Kimhi in cap. 56. Isaïæ ait, sententiam esse antiquorum Iu-  
 daeo-



dxorum, eum qui non relinquit filium, esse tanquam excommunicatum à Deo.

QUARTO dicit, & sapissimè repetit, & inculcat, Paulum, cum ait, se potuisse circumducere sororem mulierem, 1. Corinth. 9. voluisse dicere se potuisse ducere vxorem, quasi *περιόχην*, & *γαμῆν* idem significant, quæ est imperitia, vel malitia intolerabilis.

QUINTO dicit, virginitatem quidem præstare coniugio, tamen mulierem coniugatam meliorem esse coram Deo, 10  
quàm sit virgo; quæ quàm bene cohæreant, ipse viderit. Certe aliter loquitur B. AUGUSTINVS libro de sancta virginitate, cap. 31. Cum ergo, inquit, perpetua continentia professores se coniugatis comparantes, secundum Scripturas compererint eos infra esse, & opere, & mercede, & soro, & premio, statim veniat in mentem quod scriptum est: *Quanto magnus es, tanto humilior in omnibus.*

Idem LUTHERVS libro de votis monasticis. PRIMO dicit, Ecclesiam primitiuam, & nouum Testamentum in totum ignorasse vouendæ cuiusque rei usum. At beatam MARIAM vouisse continentiam, docet Augustinus de sancta virginitate, cap. 4. *Quomodo, inquit, ait MARIA, fieri istud, quoniam virum non cognosco? quod profecto non diceret, nisi Deo virginem se ante vouisset.* Vouisse etiam Apostolos, aliosq; multos in primitiua Ecclesia, paupertatem, & continentiam, infra ostendemus in quæstione de votis. Immo Lutherus ipse in hoc ipso libro paulò inferius dicit, in Baptismo omnes Christianos verè vouere omnia præcepta. At hoc votum primitiua Ecclesia non ignorauit, nisi etiam Baptismum ignorauerit.

SECVNDO dicit, formam vouendi hanc esse debere, si piè vouendum sit; Voueo castitatem, paupertatem, & obedientiam usque ad mortem liberè, id est, vt mutare possim quando volo. At si usque ad mortem continentiam polliceris, quomodo liberè? si liberè, quomodo usque ad mortem?

TERTIO dicit, Christum nunquam consuluisse virginitatem, sed ab ea potius deterruisse, & Apostolum, cum ait: *De virginibus præceptum Domini non habeo, consilium autem do.* voluisse dicere, non consulo, sed absterreo. Quid ista glossa



præclarius? Adde quòd idem Lutherus in assertionem articuli XXX. ait nullum esse consilium Euangelicum, nisi vnum virginitatis.

10 QVARTO dicit, vnam vitam non esse meliorem alia coram Deo, sed omnia paria, cum Iouiniano; & quia nouerat à diuo Hieronymo Iouinianum confutatum, dicit Hieronymum ut placeret amicis ea dixisse, & Scripturæ loca inconsideratè vndiq; corrasisse, & ea ad suum propositum detorxisse: *Ne dicam*, inquit, *deprauasse*. Et Iouinianum ab eo non solida eruditione, sed sola auctoritate sua superatum. & tandem concludit: *Quis scit si Hieronymus hac parte fuerit vnus illorum de quibus in Ezechiele dicit Dominus; Propheta cum errauerit, & mendacium loquutus fuerit, ego Dominus decepi* Prophetam illum? At Augustinus epist. 29. ad Hieronymum, libros Hieronymi contra Iouinianum vocat suauissimam præclarissimamque disputationem, & epist. 28. Iouiniani librum vaniloquia nominat.

20 QVINTO dicit, optimam formam religionum futuram, si ad professionem nemo admittatur ante annum LXX. vel LXXX. At hoc absurdissimum est, & indignum quod refellatur. Certè HIERONYMVS in epistola ad Eustochium de custodia virginitatis, de cœnobitis loquens: *Senibus*, inquit, *& paruulis sape sit prandium, & aliorum fessa sustentetur etas, aliorum non frangatur incipiens*. Ex quibus verbis duo colligimus; ynum, fuisse tempore sancti Hieronymi in monasteriis homines omnium ætatum, senes, pueros, & mediæ ætatis viros; alterum, minus aptos esse ad labores monasteriorum homines nimium senes, aut nimium iuuenes, quandoquidem oporteat his prandia præbere, ieiunantibus ce-

30 teris. PHILIPPVS MELANCHTHON in Confessione Augustana articulo. 27. & in Apologia eiusdem articuli; PRIMO dicit, tempore sancti Augustini monasteria fuisse libera collegia, non astricta vllis votis. At AVGVSTINVS in Psal. 75. ait: *Nemo posuit in monasterio frater dicat, recedo de monasterio, neq; enim soli, qui sunt in monasterio, peruenturi sunt ad regnum cælorum, & illi, qui ibi non sunt, ad Deum non pertinent*. Respondetur ei, sed illi nō Souerunt, tu Souisti. Et in Psal. 99. de Apostatis ait: *Dum non perseuerauerit implere quod Souit, fit desertor tam sancti propositi, & reus voti non redditi*.



SECUNDO dicit, monasteria olim fuisse scholas sacrarum literarum, & aliarum disciplinarum. At BASILIUS in constitutionibus monasticis, Cassianus de institutis cœnobiorum, Hieronymus in epistola ad Rusticum, & in alia ad Paulinum de institutione Monachi, Augustinus lib. I. de moribus Ecclesiæ, cap. 31. alijq; veteres dum describunt instituta monasteriorum, meminerunt orationis, ieiuniorum, psalmodiæ, continentiæ, obedientiæ, paupertatis: de scholis literarum, & Dialecticæ aliarumq; disciplinarum ne verbum quidem.

TERTIO dicit, S. Bernardum & Franciscum ob solam corporis vtilitatem religionem suscepisse; corporis verò vtilitatem vocat carere impedimentis coniugij, curis liberorum educandorum, & similibus, quæ quidem non immerito ad corporis quandam vtilitatem pertinere dicuntur. Sed quod S. Franciscus nudis pedibus ambularet, vna sola tunica, eaq; cilicina, & asperima vteretur, humi cubaret, totas noctes vigilet, ferè semper ieiunaret, pane solo, & aqua, vt plurimum sustentaretur, quis nisi insanus ad corporis vtilitatem referet? Porro S. Bernardus non solum durissimè vixit, sed etiam serm. 30. in Cantica, & alibi passim apertè docet, non esse Monachi, sed Medici, corporis vtilitatem & bonam habitudinem curare; Monachi verò esse spiritus vtilitatem querere, & carnem crucifigere, & corpus castigare, vt spiritus viuatur, & valeat.

QUARTO dicit, monachatum esse nuper inuentum; quod quantum sit mendacium, iam à nobis demonstratum est, cum ab Apostolorum tempore eum deduximus. Præterea libenter discerem, quid vocet Philippus, NUPER; nam etiam si negat Apostolorum tempore fuisse Monachos, & rursus asserit Monachos nostros non esse similes iis, qui fuerunt Augustini tempore, tamen non negat, nec potest negare, quin saltem monachatus, qui nunc est, cœperit à tempore S. Benedicti; id enim Lutherani omnes admittunt, cum videant adhuc exstare, & seruari regulas ab ipso conditas, & habitari monasteria, quæ ipse fundauit: at S. Benedictus ante annos mille floruit. nisi ergo apud Philippum mille anni sint, vt dies vnus, iuxta Scripturas, viderit ipse quàm sit verum, nuper cœpisse monachatum.

QUINTO dicit, nos asserere vitam monasticam mereri iusti-



iustificationem, & remissionem peccatorum, & applicatam aliis eos saluare, & longè meliorem esse ipso Baptismo. At hæc mera calumnia est; nulli enim Catholici ita docuerunt vnquam. Dicimus quidem opera religionis, id est, castè viuere, nihil proprij retinere, obedire maioribus, bona esse opera, & meritoria vitæ æternæ, si iustis fiant, & conducere ad satisfactionem pro peccatis, sicut cetera omnia bona opera; at mereri iustificationem nullus dicit.

Dicimus etiam, posse religiosos facere alios homines  
 10 participes suorum bonorum operum, vt possunt omnes alij fideles; est enim communicatio inter membra eiusdem corporis; at posse Monachum saluare alios suis operibus, id est, mereri illis gratiam, vel gloriam, nemo Catholicus dixit vnquam.

Denique dicimus, inter Baptismum, & professionem religionis esse quandam similitudinem; quòd sicut in Baptismo renunciamus Diabolo, & incipimus nouam vitam; ita per professionem religionis renunciamus seculo, & multis licitis voluptatibus, & incipimus nouam vitam; & sicut in  
 20 Baptismo remittuntur perfectè omnia peccata quoad culpam & pœnam; ita in professione religiosa, quando debita intentione suscipitur, piè creditur remitti omnis pœna temporalis, pro qua alioqui satisfaciendum esset, etiam culpa remissa; non tamen propterea anteponimus, vel æquamus Baptismo professionem monasticam; Baptismus enim non solum pœnam, sed etiam culpam tollit, idque certò scimus; professio autem monastica non tollit culpam, sed solam pœnam, & hoc ipsum non certò asserimus, sed piè credimus, neque est hoc nostrum inuentum. Nam in primis testatur Athanasius in vita Antonij, B. Antonium in visione audiuisse  
 30 sanctos Angelos dicentes, omnia peccata sibi remissa fuisse, quando monasticam vitam suscepit.

B. HIERONYMVS in epist. 25. de obitu Blefillæ: Cum, inquit, propositio Christo antequatuor ferme menses secundo quodam modo se propositi Baptismo laueris, & ita deinceps vixeris, Et calcato mundo semper monasterium cogita ueris.

B. BERNARDVS libro de præcepto, & dispensatione non procul à fine: Audire, inquit, & hoc vultis à me, vnde inter cetera pœnitentiæ instituta monasterialis disciplina merneris hanc prærogatiuam, Et secundum Baptisma nuncupetur: arbitror ob  
 perfe-



perfectam mundi abrenunciationem, ac singularem excellentiam Vita spiritualis, qua praeeminens uniuersis Vita humana generibus, huiusmodi conuersatio professores, & amatores suos Angelis similes, dissimiles hominibus facit, immò diuinam in hominereformat imaginem, configurans nos Christo instar Baptismi, & quasi deniq; secundo baptizamur, dum per id, quod mortificamus membra nostra, qua sunt super terram, Christum induimus, complantati denuò similitudini mortis eius, &c. Et sermone 30. in Cantica, laborem monasticum martyrij genus esse dicit; nemo autem ignorat martyrium genus esse Baptismi. Denique etiam B. Thomas 2. 2. quæst. ult. art. 30. docet rectè credi per monasticam professionem satisfieri pro omnibus peccatis, & esse hanc professionem alterum Baptisma.

Idem MELANCHTHON in locis communibus capite de discrimine consiliorum & praeceptorum dicit; PRIMO, deplorandam esse nostram cæcitatem, quod mendicitatem, aut simile opus non mandatum ornemus maioribus titulis, quàm legem diuinam, cum nullum opus possit cogitari maius, quàm quod in primo praecepto flagitatur: *Diligas Dominum Deum tuum, &c.*

Ad hanc calumniam breuiter respondemus, neminem esse Catholicorum, qui simpliciter praeponat consilia praeceptis, immò B. Thomas in 2. 2. q. 184. art. 3. contrarium docet; vult enim perfectionem Christianam essentialiter consistere in obseruatione praeceptorum, instrumentaliter in obseruatione consiliorum.

Possumus tamen anteponeere consilia praeceptis tribus modis. PRIMO, comparando singula consilia non cuiuscunq; praecepto, sed praeceptis illis, quæ versantur circa eandem materiam, verbi gratia, circa materiã externorum operum versatur praeceptum: *Non furaberis*; circa eandem versatur consilium: *Vende omnia, & da pauperibus*; certum est consilium hoc esse perfectius praecepto, non furaberis. Similiter consilium virginitatis perfectius est praecepto: *Non mœchaberis*, & sic de aliis.

SECUNDO, comparando non consilia cum praeceptis, sed statum hominum seruantium praecepta & consilia, cum statutorum, qui sola obseruant praecepta. Neq; enim dubitari potest, quin sit res longè melior, & perfectior status prior post-



posteriore, quandoquidem ille istum includit, non contrā; unde Dominus ei, qui dicebat seruasse se omnia præcepta, dixit: *Si sis perfectus esse, vende omnia quæ habes, &c.*

TER TIO, comparando consilia cum quolibet præcepto, etiam cum illo: *Diliges Dominum Deum tuum*, sed considerando in consiliis non opera externa consiliorum, sed caritatem, quam præsupponunt, & ad quam ducunt; illo enim præcepto: *Diliges Dominum Deum tuum*, non præcipitur caritas infinita, sed certus quidam gradus, nimirum tanta caritas, vt per eam nihil Deo æques vel anteponas. At maior  
 10 gradus caritatis requiritur, vt propter Deum renuncies omnibus opibus, & voluptatibus alioqui licitis; dicit enim Augustinus sermon. 18. de verbis Apostoli de virginibus loquens: *Maior amor maior imposuit onus.*

SECUNDO dicit Melanchthon, falsò nos putare legem Dei tantum de externa disciplina concionari, vt illa lege: *Non occides*, prohiberi iniustam cædem, non autem priuatam cupiditatem vindictæ, malevolentiam, iniusta odia, &c. & hoc deducit ex eo, quòd non putamus esse peccata primos  
 20 motus concupiscentiæ, quibus non consentimus. In qua re ter ipse peccat. PRIMO, quod mentitur nos non agnoscere pro peccatis nisi externa opera, quod est tam ingens mendacium, vt ferè sit incredibile. SECUNDO, quod hoc deducit ex eo, quod docemus inuoluntarios motus animi non esse peccata, quasi nulli sint actus interni nisi inuoluntarij. TER TIO, quod hoc ipse asserit, nimirum inuoluntarios motus esse peccata: immò etiam naturalem propensionem, & naturales potentias, quibus caro concupiscit contra spiritum, vult esse peccata; quod est contra omnem rationem; nomine  
 30 enim peccati omnes intelligunt actum malum, & voluntarium; unde B. Augustinus in extremo libro de perfectione iustitiæ dicit, eum, qui nullo modo consentit illicitis motibus concupiscentiæ, etiam si eos sentiat, non debere dicere Deo: *Dimitte nobis debita nostra*, sed solum quod sequitur: *Nemo nos inducas in tentationem.*

IAM CALVINVS lib. 4. Institut. cap. 13. §. 3. dicit nos pollutionem vocare coniugium, quod Deus instituit. Mendacium est. Nos enim quod Deus instituit vocamus Sacramentum, & magnum Sacramentum cum Paulo, non pollutionem: At concupiscentiam, & membrorum inobedientiam, quam



quam Deus non instituit, & sine qua tamen non consummatur coniugium, vocamus pollutionem, & morbum, qui non peccatum sit, sed ex peccato natus sit: Vide Augustinum de nuptiis, & concupiscentia.

SECUNDO, dicit ibidem §. 8. olim pios homines, qui Monachi fiebant, nihil aliud intendisse, quàm ut se monastica disciplina ad Ecclesiæ gubernationem præpararent: quod est mendacium contumeliosum in omnes sanctos, qui ex monasteriis ad Episcopatum vocati sunt, qui, si Caluino credimus, ambitiosissimi fuerunt, cum è contrario constet eos omnes inuitos ex Monachis Episcopos factos. Certè B. AUGUSTINVS serm. i. de communi vita Clericorum affirmat se Monachum non Episcopum esse voluisse, & ideo nunquam iuisse ad loca, quæ Episcopo carebant, ne fortè ibi Episcopus esse cogeretur. CHRYSOSTOMVS & Basilus quàm vehementer fugerint Episcopatum, ut perpetuò in monasterio viuerent, ex libro Chrysostomi de sacerdotio facile potest intelligi. HIERONYMVS in epistola ad Pammachium contra Ioannem Hierosolymæ Episcopum, asserit se inuitum à Paulino Episcopo Presbyterum esse creatum, cum non Presbyter, sed Monachus tantum esse decreuisset. GREGORIUS in epistola ad Leandrum, quæ habetur initio moralium, miserabiliter deplorat casum suum, quodd cum elegisset perpetuò viuere in monasterio, tamen compulsus fuisset Pontificatum suscipere.

Et quoniam Caluinus pro se adducit epistolam 81. Augustini ad Monachos infulæ Caprarie, cum tamen locus, quem adducit, magis nobis, quàm illi faueat, ipsum locum proferamus: *Vos autem fratres, inquit, exhortamur in Domino, & propositum vestrum custodiatis, & usque in finem perseueratis, ac si quam operam vestram mater Ecclesia desiderauerit, nec elatione auda suscipiatis, nec blandiente desidia respuatis, sed misericordie obtemperetis Deo, nec vestrum otium necessitatibus Ecclesiæ præponatis, cui parturienti, si nulli boni ministrare vellent, quomodo nasceremini non inueniretis.* Ex hoc loco probat Caluinus, cōsueuisse olim, ex monasteriis Episcopos & Clericos aliquando peti. ex quo vult esse consequens eos, qui Monachi fiebant, ideo fieri solitos, ut se ad Episcopatum, & similia Ecclesiastica munera præpararent: sed hoc non esse consequens, nemo non videt, & verba illa Augustini contrarium indi-



indicant; nam inprimis si Monachi illi insulæ Caprariæ se præparabant ad Ecclesiastica munera, quid opus fuit eos hortari, ne recusarent ea munera, si quando ad ea vocarentur? Deinde, cur Augustinus eos hortatur, ut propositū suum custodiant, & vsq; in finem perseuerent, si non erant ibi perpetuū manfuri, sed solum ad tempus, donec videlicet se præparassent Ecclesiastico ministerio?

TERTIO, dicit ibidem §. 10. Augustinum cum legitimum monachatum nobis deformat, omnē rigidam exactionem voluisse abesse earum rerum, quæ nobis verbo Domini liberæ relinquuntur. Hoc mendacium esse, patet ex locis supra allegatis ex Augustino in Psal. 75. & 99. & aliis infra citandis.

QUARTO, dicit ibidem, Augustinum requirere in Monachis, ut omnia sua instituta referant ad eam pietatem, quam Deus omnibus commendauit, id est, ad caritatem Dei & proximi; nostros autem Monachos nescio quam nouam pietatem sibi finxisse, cuius meditatione sint omnibus perfectiores. Hoc quoq; mendacium est, & solum verè dicit Caluinus, nescio quam nouam pietatem, &c. Verè enim nescit, quam nouam pietatem Monachi finxerint; nihil enim finxerunt noui, cum omnibus suis votis nihil aliud cupiant, quam perfici in caritate; quod verò monastica vita sit perfectior vita secularium, quod tantopere exhorret Caluinus, Augustinus apertissimè docet in epist. 89. q. 4. ad Hilarium, ubi sic ait: *Magister bonus mandata legis ab ista excellentiore perfectione distinxit: ibi enim dixit; Si vis ad vitam ingredi, serua mandata: hic autem; Si vis perfectus esse, vende omnia quæ habes, &c.*

QUINTO, dicit item §. 11. vitam monasticam nusquam esse vel vna syllaba à Domino approbatam. Hoc mendacium refellit Augustinus loco iam citato, & Chrysostomus hom. 17. ad populum: *Tanti est, inquit, Philosophia à Christo introducta.*

SEXTO, dicit §. 12. nulli vnquam veterum venisse in mentem, dicere Christum aliquid consuluisse, sed omnes vna voce clamare, nullam penitus voculam à Christo emissam, cui non sit necessariò obtemperandum. Hoc impudentissimum est mendacium; ipse enim nullum adduxit testem ad suam sententiam confirmandam. Nos autem in sequenti quæstione adducemus omnes veteres, qui reuera vna voce clamant,



clamant, multa esse consilia Euangelica. Nunc sufficiat locus Augustini citatus.

SEPTIMO, dicit ibidem, Monachos, ut videantur aliis perfectiores, promittere se consilia Euangelica seruatu-  
ros, de non iurando, de inimicis diligendis, de non appetenda vindicta. At neque isti vlli Monachi videntur, & nos ea non consilia, sed præcepta esse dicimus.

OCTAVO, dicit §. 14. Patres toto pectore abhorruisse ab illa blasphemia & sacrilego dogmate, quo professio monastica secundum Baptisma nominatur. At nos ostendimus, 10.  
Athanasium, Hieronymum, Bernardum, Thomam, non abhorruisse ab illa sententia. Ipse verò pro se nullum adduxit.

NONO, dicit ibidem, tempore Augustini veros Monachos toros se ad caritatem proximi accommodauisse, nostros autem à tota Ecclesia discessionem fecisse; id verò probat dupliciter. PRIMO, quia veteres Monachi ad eandem Ecclesiam cum ceteris Christianis conueniebant, & cum iisdem Sacramenta participabant, nostri autem proprias habent Ecclesias, propria altaria, &c. SECUNDO, quia I. Corinth. I. Apostolus vocat schismaticos eos, qui dicebant: *Ego sum* 20  
*Pauli, ego Apollo, ego Cepha*; at Monachi dicunt; *Ego sum Augustini, ego Benedicti, ego Francisci*.

Hic est mendacium duplex; nam in primis falsum est, veteres Monachos non habuisse proprias Ecclesias, Altaria, Sacramenta; nam olim tam Eremitæ, quàm Cœnobitæ ferè omnes extra vrbes procul à reliquis hominibus habitabant, & quia non poterant ad Ecclesias Episcoporum, vel Parochorum conuenire, habebant singula monasteria suum Abbatem Presbyterum, à quo Sacramenta percipiebant. Id manifestè indicat Augustinus tum lib. I. de moribus Ecclesiæ, 30  
cap. 31. & 33. tum in epistol. 81. ad Eudoxium Presbyterum & Abbatem in insula Capraria; item Epiphanius in epistola ad Ioannem Hierosolymitanum, ubi dicit, se ordinasse Paulinianum Presbyterum monasterij Bethleemitici, quia S. Hieronymus eius monasterij Præpositus, præ nimia humilitate non audebat Sacramenta fratribus ministrare. Idem apparet ex collationibus Cassiani ferè omnibus, ac præcipue 18. cap. 15.

Deinde, falsum est, Monachos nostros discessionem fecisse ab Ecclesia, cum videamus, eos eundem Pontificem agnoscere,



scere, quem reliqua Ecclesia: ab iisdem Episcopis ordinari, à quibus ceteri Clerici; deniq; eidem populo communicare, cui ceteri Christiani. Si autem, quia habent Ecclesias, & altaria, schismatici essent; essent etiam schismatici omnes Parochi; nulla enim est paràcia, quæ non habeat Ecclesiam, & altaria distincta ab Ecclesia, & altaribus aliarum paràciarum.

Ultimò, falsum est, eodem sensu, Monachos dicere; Ego sum Augustini, ego sum Benedicti, quo Corinthij dicebant; 10 Ego sum Pauli, ego Apollo; isti enim in duobus errabant, dicendo; Ego sum Pauli, ego Apollo. PRIMò, quia putabant, vim Sacramenti Baptismi pendere à probitate baptizantis, & ideo gloriabantur, se filios esse spirituales excellentium virorum, vt exponit Augustinus tract. 5. in Ioannem, & alibi. Et patet primò ex verbis sequentibus: *Nam Paulus crucifixus est pro vobis? aut in nomine Pauli baptizati estis?* Secundò ex eo, quòd toto illo capite, & tribus sequentibus, ad hunc errorem tollendum, Paulus docet, Apostolos solùm esse ministros Christi, Christum autem esse, qui verè, & ex potestate omnia facit, & ideo Deum elegisse indoctos & viles, per quos mundum conuerteret, ne salus ab hominibus pendere videretur. Tertiò ex eo, quòd hinc intelligimus, quomodo verè schismata facerent, qui dicebant; Ego sum Pauli, ego Apollo; nam tot Baptismata faciebant, quot erant baptizatores, & proinde tot fides & Ecclesias.

SECUNDO errabant, quòd temerè iudicabant de prædicatoribus suis, & alios aliis præferebant, vt patet ex illis verbis capitis quarti: *Nolite ante tempus iudicare, &c. Mihi autem pro minimo est, & à vobis iudicari, &c.* At Monachi cùm 30 dicunt; Ego sum Augustini, ego Benedicti, solùm hoc dicunt ad distinctionem ordinum indicandam; quòd si aliqui ex simplicioribus religiosis interdum contèdunt pro gloria suorum Ducum, & B. Franciscum propter stigmata B. Dominico anteponunt, vel è contrario, malè faciunt, & incidunt in posteriorem reprehensionem Apostoli, sed nec isti propterea schismatici sunt, nec oportet propter paucos idiotas, vniuersos ordines religiosorum infamare.

DECIMO dicit, §. 19. olim nefas fuisse, mulierem admittere ad votum continentiae ante annum LX. Sed aliud indicat summa illa sollicitudo veterum, Cypriani, Chrysostomi, Ambro-



Ambrosij, Hieronymi, in sacris virginibus custodiendis; si enim Sanctimonialia omnes excederent annum LX. non magna custodia indigeret earum pudicitia.

# CAPVT SEPTIMVM.

## Quid sit consilium perfectionis?

**E**QVITVR nunc quaestio de consiliis perfectionis, quam secundo loco tractandam proposuimus. Ac primum explicandum erit, quid sit consilium perfectionis, & in quo differat a praecepto. 10  
Secundo, quid sentiant haeretici, & quid Catholici. Tertiò, probanda veritas. Quarto, soluenda argumenta.

Quantum ad PRIMVM, consilium perfectionis vocamus opus bonum, à Christo nobis non imperatum, sed demonstratum; non mandatum, sed commedatum. Differt autem à praecepto ex parte materiae, ex parte subiecti, ex parte formae, & ex parte finis. Ex parte materiae dupliciter. PRIMO, quia materia praecepti est facilior, consilij difficilior; illa enim sumpta est ex principiis naturae, haec superat quodammodo naturam; nam ad seruandam coniugi fidem natura inclinat, at non ita ad abstinendum à coniugio. AMBROSIVS lib. 1. de virginibus: *Quis, inquit, humano eam possit ingenio comprehendere, quam nec natura suis inclusit legibus? aut quis naturali voce complecti, quod supra sum natura sit? è caelo accersuit, quod imitaretur in terris.* Et HIERONYMVS, siue quicumque fuit auctor, sermone de assumptione: *Profectò, inquit, in carne prater carnem vivere, non terrena vita est, sed caelestis.*

SECUNDO, quia materia praecepti bona est, consilij melior & perfectior, loquendo de praeceptis, quae circa eandem materiam versantur, circa quam versantur consilia; consilium enim includit praeceptum, & aliquid supra praeceptum addit. AVGVSTINVS serm. 18. de verbis Apostoli: *illa autem, inquit, amantes, quibus terrena nuptia vixerunt, quae terrenos amplexus non desiderauerunt, & quae adeo acceptauerunt praeceptum, et non recusarent consilium; et plus placerent, plus se ornaverunt.* 10

Ex parte subiecti differunt consilia & praecepta, quod praeceptum commune sit omnium, consilium non item. Augustinus serm. 16. de tempore: *De virginitate dicitur: Qui potest capere,*



sapere, capiat, de iustitia non dicitur: Qui potest facere, faciat, sed: Omnis arbor, quæ non facit fructum bonum, excindetur, & in ignem mittetur.

Ex parte formæ, quod præceptum vi sua obliget, consilium in arbitrio hominis positum sit. Hieronymus in epistola ad Eustochium de seruanda virginitate: *Vbi consilium, ibi offerentis arbitrium; Vbi præceptum datur, ibi necessitas est seruientis.* Et Augustinus de sancta virginitate, cap. 30. *Neque enim, inquit, sicut non mæchaberis, non occides, ita dici potest, non nubes; illa exiguntur, ista offeruntur: si fiunt ista, laudantur; nisi fiant illa, damnantur.*

Ex parte finis, siue effectus, quod præceptum obseruatum habet præmium, non obseruatum habet pœnam: Consilium autem si non seruetur, nullam habet pœnam, & si seruetur, maius habet præmium. Augustinus de sancta virginitate, cap. 14. *Præcepto quisquis non obtemperat, reus est & debitor pœna.* Et infra: *Sed quoniam deuitatis remissio peccati, adeunda est Vita æterna, in qua est quædam egregia gloria, non omnibus in æternum vitæ, sed quibusdam ibi tribuenda; cui consequenda, parum est, liberatum esse a peccatis, nisi aliquid ipsi liberatori contineatur, quod non sit criminis non commissi, sed commissi se ac reddidisse sit laudis: Consilium, inquit Apostolus, do, &c.*

## CAPVT OCTAVVM.

## Ponuntur variae sententiæ de Consiliis.

**C**ONSILIUM ad SECUNDVM, quatuor sunt de hac sententiæ; tres falsæ, vna vera. Quidam enim volunt ea, quæ nos vocamus consilia, vt voluntariam paupertatem, & continentiam, non esse consilia, sed præcepta. Alij, non esse consilia, nec præcepta, sed res indifferentes. Alij, non esse consilia, nec præcepta, sed mala & prohibita. Alij denique, esse consilia.

PRIMA opinio est vetustissima eorum, qui se Apostolicos dicebant, qui, teste Epiphanio, heresi 61. & Augustino heresi 40. affirmabant, non posse saluari eos, qui non viuerent in cœlibatu, & paupertate, more Apostolorum. Idem, ex parte, docuerunt Encratitæ, auctore Tatiano, S. Iustini discipulo, qui docebant, omnes Christianos debere à nuptiis abstinere, & cœlibes viuere, vt Irenæus testatur lib. 1. cap. 30. Item Pela-



Pelagiani, qui, teste Augustino, epistola 89. & 106. negabant spem salutis iis, qui non renuntiarent actu omnibus, quæ possidebant. Quod idem aut sensit, aut sentire se simulauit Iulianus Apostata; nam, teste Nazianzeno, orat. i. in Iulianum, lege lata decreuit, ne Christiani vlla se ratione defenderent, etiam si spoliarentur, vel occiderentur iniuste. & rationem legis reddens, dicebat, velle se Christianos cogere, vt Evangelium obseruarent, quo præceptum esset, vt Christiani nihil possiderent, & percutienti vnam maxillam, alteram præberent.

SECUNDA opinio fuit Iouiniani, Vigilantij, Lampetianorum; Iouinianus enim docuit, nullum esse consilium, neque præceptum continentia, cum eiusdem meriti sint virgines & coniugatae; vt Hieronymus lib. i. in Iouinianum, & Augustinus hæresi 82. testes sunt. Vigilantius idem asseruit de paupertate; nam, vt Hieronymus refert in libro contra Vigilantium, assererat ille, melius esse opes suas possidere, & ex iis Eleemosynas facere, quam omnia simul dimittere. Lampetiani idem senserunt de obedientia; nam, vt scribit Damascenus hæresi 98. volebant Lampetiani, Monachos in cœnobis liberos esse debere, nec pendere ex Præpositi aliacuius arbitrio.

TERTIA opinio est Ioannis VViclef, & Lutheranorum, qui primi cœperunt religiones, vt malas, vituperare. Ioannes VViclef artic. 21. in Concilio Constantiensi, sess. 8. dicit, eos qui ingrediuntur religiones eo ipso reddi ineptos ad seruanda mandata Dei. ex quo sequitur, continentiam, obedientiam, & paupertatem religiosam non consuli à Deo, sed prohiberi. Lutherus in epithalamio, & libro de votis monasticis. Philippus in locis communibus, capite de discrimine præcepti & consilij, & in Apologia Confessionis Augustanæ, art. 27. Petrus Martyr in libro de cœlibatu, & votis monasticis. Caluinus lib. 4. Institut. cap. 13. Brentius in Confessione VVirtembergica, capite de votis monasticis, & alij hæretici in genere docent, nullum esse consilium Evangelicum. Quamuis enim Lutherus in assertionem artic. 30. admiserit vnum consilium, id est, virginitatem, tamen reuocauit postea sententiam in epithalamio.

In particulari tria dicunt. PRIMO, vitam pauperem & cœlibem ducere sub obedientia Prælati, esse meram impietatem.



ratem & superstitionem, si id fiat ad colendum Deum, id est, si quis putet hæc placere Deo, & esse per se meritoria. SE-  
CUNDO dicunt, voluntariam paupertatem, & obedientiam  
exhibitam ei, cui alioqui non debetur, si non assumatur ad  
colendum Deum, non esse quidem impiam, tamen esse stul-  
tam, & inanem, & proinde malam. Satis enim esse, ferre pau-  
periem, quam necessitas adfert, & obedire parentibus & ma-  
gistratibus. TERTIO dicunt, continentiam, si non assuma-  
tur cum opinione cultus, sed ut instrumentum ad expeditius  
10 obeunda munera Euangelij, esse bonam & laudabilem, &  
sic laudari ab Apostolo 1. Cor. 7. tamen non esse possibilem,  
nisi illis, qui sciunt, se habere peculiare Dei donum, quod  
tam rarum esse volunt, ut Lutherus in epithalamio dicat, ne-  
minem posse continere, nisi diuino miraculo; & ubi est vnus  
continens, ibi esse plus quam centum millia, quibus Matrimo-  
nium necessarium sit.

QUARTA sententia est Catholicorum omnium, multa  
esse verè & propriè consilia Euangelica, sed præcipuè tria;  
Continentiam, Obedientiam, & Paupertatem, quæ nec sunt  
20 præcepta, nec indifferentia, sed Deo grata, & ab illo com-  
mendata.

## CAPVT NONVM.

*Asseruntur consilia Euangelica testimoniis  
Scriptura.*

**Q**UAE sententia, ut ad TERTIVM veniamus, proba-  
tur primò, Scripturis: Secundò, exemplis primiti-  
uæ Ecclesiæ: Tertiò, testimoniis veterum: Quarto,  
rationibus.

30 PRIMVM testimonium est Isai. 56. *Non dicat Eunuchus;  
Ego lignum aridum, quia hæc dicit Dominus Eunuchis: qui cu-  
stodierint sabbatha mea, & elegerint quæ ego volui, & seruaue-  
rint fœdus meum, dabo eis in domo mea, & in muris meis locum,  
& nomen melius à filiis & filiabus; nomē æternum dabo eis, quod  
non peribit.*

Quòd hic agatur de continentibus voluntariis, non de  
abscissis, vel sic natis, qui necessariò continent, docent Hie-  
ronymus & Cyrillus in hunc locum, Augustinus libro de  
sancta virginitate, cap. 24. & Basilius in libro de vera virgini-  
tate,



tate, Ambrosius in exhortatione ad virgines, & Gregorius 3. parte pastoralis, cap. 29. & patet ex præmio, quod Eunuchis promittitur; nec enim vlla ratio est, cur abscissis vel natis Eunuchis promittatur maior gloria, quàm sit filiorum & filiarum Dei. Addit autem subtiliter Augustinus; Si quis contendat, Isaiam loqui de veris Eunuchis, adhuc iuvari causam nostram; nam si Eunuchis, qui continent se, quia non possunt aliud facere, promittitur maior gloria, quàm iustis coniugatis: certè maiore ratione promittitur iis, qui se continent, etiam si possent non continere.

Est autem hoc loco obseruandum illud nomen: *Melius a filiis & filiabus*; posse habere alium etiam sensum, videlicet, ut intelligamus promitti aliquid melius, quàm fuissent filij & filiae; nam verba Hebræa *שם טוב מקבצים רבבות* id est, nomen bonum præ filiis & filiabus; optimè recipiunt hunc sensum, dabo illis qui carent liberis aliquid melius, quàm sit habere liberos; & sic etiam vertunt LXX. interpretæ: *τό τε ονομαστόν χρεῖσθαι υἱῶν, καὶ θυγατέρων.* Et recidit in idem cum superiore sententia; nam semper anteponuntur continētes coniugatis, cū isti liberos, illi melius aliquid habituri sint.

Quòd autem continentia Eunuchorum hoc loco non imperetur, sed consularur, docent iidem auctores, & probat Hieronymus ex illis verbis: *Qui elegerint quæ ego volui.* Illi enim dicuntur eligere, qui non coguntur præcepto; itaque sensus est; *Qui elegerint quæ ego volui*, id est, qui transcendentes ea, quæ præcepi accommodans me humanæ imbecillitati, sponte sua elegerint perfectiora, quæ ego cupio & vellem. Præterea idem patet ex eo, quòd qui Eunuchi non sunt, etsi postponuntur Eunuchis, tamen non excluduntur à regno cælorum, immò filij & filiae vocantur; ergo non tenentur omnes esse Eunuchi, ergo non est præceptum.

Quòd autem continentia non solum sit utilis in hac vita, ut aduersarij dicunt, sed sit verè meritoria gloriæ singularis, quod tanquam blasphemiam horrent, patet ex illis verbis: *Nomen æternum dabo eis, quod non peribit.* Quod sic exponit AUGUSTINUS de sancta virginitate, cap. 25. *Quid*, inquit, *tergueris impiæ cecitas? quid temporalem tantummodo utilitatem promissis continentibus Sanctis? Nomen æternum dabo eis.*



*eis. Et si forte hic ipsum aeternum pro diuturno conaris accipere, addo, accumulo, inculco, nec unquam deerit. quid quæris amplius? quid dicis amplius? aeternum hoc nomen, quidquid illud est, Spadonibus Dei, quod utique gloriam quandam propriam excellentemq; significat, non erit commune cum multis, quamvis in eodem regno & in eadem domo constitutis: Nam ideo fortasse & nomen dictum est, quod eos, quibus datur, distinguat à ceteris.*

Sed occurrit Petrus MARTYR in libro de coelibatu & votis monasticis, ac probat, Isaiam loqui de veris Eunuchis, 10 qui erant apud Iudæos; nam quia eo tempore magna felicitas erat, habere multam prolem: dicit, Deum voluisse consolari Eunuchos, atq; illis idcirco pollicitum se habiturum eos meliore in loco, quam filios & filias, id est, quam Israëlitas reliquos, qui non custodiunt legem diuinam, si tamen ipsi eandem legem diligenter seruauerint.

At hæc expositio facile refelli potest. PRIMO, quia contraria est antiquis, sanctissimis, ac doctissimis Patribus, Basilio, Cyrillo, Ambrosio, Hieronymo, Augustino, Gregorio, quibus in re dubia multò tutius credi potest, quam vni Apostata, qui mauult Rabinos Iudæorum, quam sanctos Patres Ecclesiæ sequi. 20

SECUNDO, quia absurdè Petrus Martyr per filios Dei, quibus anteponuntur Eunuchi, intelligit Israëlitas malos: nam vel dicuntur filij Dei Israëlita mali, quatenus Israëlita, vel quatenus mali, non quatenus Israëlita, quia etiā Eunuchi erant Israëlita, & proinde filij, quocirca inepta esset collatio: non etiam dicuntur filij, quatenus mali, quia homo, qua malus est, non ex Deo, sed ex Diabolo est; quare per filios coniugati fideles & boni intelliguntur, qui etiam locum 30 bonum habent in domo Dei, sed eis anteponuntur virgines, & continentes, qui locum meliorem habent, id est, locum sponsæ.

TERTIO, quia hoc loco Deus pollicetur Eunuchis nomen aeternum, id est, celebrem famam, eamque nunquam interituram, neq; in hoc seculo, neq; in futuro. OSTENDAT igitur Petrus Martyr, qui sint illi Eunuchi, in quibus impletum sit hoc vaticinium; certè non inueniet carne abscissos valde celebratos. At nos proferre possumus exercitum innumerabilem sanctorum & sanctarum Virginum, quorum laudibus pleni sunt libri sanctorum Patrum. Itaq; ipsa vaticini



cinij huius tam manifesta impletio in sanctis Virginibus satis esse deberet ad excludendam carnalem & Iudaicam illam sententiam de carnalibus Eunuchis.

SECUNDUM testimonium Sapient. 3. *Felix sterilis, & incoquinata, quæ nesciuit torum in delicto, habebit fructum in respectione animarum sanctarum, & Spado, qui non operatus est per manus suas iniquitatem, nec cogitauit contra Deum nequis sima; dabitur enim ei fidei donum electum* (id est, donum quoddam singulare, respondens fidelitati ipsius) *& fors in templo Dei. Bonorum enim laborum gloriosus est fructus, & quæ non concidit radix sapientie.* Quem locum similem esse superiori, docet Hieronymus, ubi supra.

TERTIUM testimonium Matth. 13. ubi Dominus comparat regnum cælorum, id est, Ecclesiam, terræ bonæ, cuius una pars reddebat fructum centesimum, alia sexagesimum, alia tricesimum. Quem locum exponentes Cyprianus de habitu virginum, Hieronymus lib. 1. in Iovinianum, & Augustinus de sancta virginitate, cap. 44. & 45. docent, ea parabola distingui meritum casti coniugij, viduitatis & virginitatis. Ex quo apparet, continentiam virginalem esse maius bonum, & magis meritorium apud Deum, quàm sit castitas coniugalis, ac proinde esse consilium diuinum; quod enim Deus non præcipit, & tamen commendat, & anteponit aliis rebus, sine dubio consultit.

QUARTUM est Matth. 19. cùm Apostoli dixissent: *Non expedit nubere*; Dominus ait: *Non omnes capiunt Verbum hoc, sed quibus datum est; sunt enim Eunuchi, qui de matris utero sic nati sunt; & sunt Eunuchi, qui facti sunt ab hominibus; & sunt Eunuchi, qui seipsos castrauerunt propter regnum cælorum. Qui potest capere, capiat.* Hic non dari præceptum de continentia, patet ex superioribus; nam initio huius capituli Dominus approbavit nuptias, dicens: *Quod Deus coniunxit, homo non separet*; ergo non prohibet hoc loco nuptias, ergo non præcipit continentiam. Idem patet ex sequentibus: *Qui potest capere, capiat*; nam, ut eleganter ait Augustinus serm. 61. de tempore, de præceptis iustitiæ non potest dici; *Qui potest facere, faciat*; sed omnis arbor, quæ non fecerit fructum bonum, excidetur. quod autem consilium detur, patet ex eo, quod cùm Apostoli dixissent; *Non expedit nubere*, Dominus non ait: *Immo verò expedit*, sed ait: *Non omnes capiunt Verbum*



*Verbum hoc, qui potest capere, capiat*; id est, verum dixistis, nuptias non expedire; nam impediunt potius. Tamen non omnes hoc intelligunt, sed qui potest assequi, non omittat. Quod deniq; continentia non solum conferat corporalem utilitatem, sed præmium habeat in cælo, patet ex illo: *Sunt Eunuchi, qui castrauerunt se propter regnum cælorum.*

At aduersarij, ac imprimis Petrus Martyr in libro de cælibatu & votis, illud: *Propter regnum cælorum*; exponunt, propter Euangelium expeditius prædicandum. Contra autem  
 10 *est omnium Patrum expositio. CYPRIANVS* libro de habitu virginum: *Nec ornari iam, inquit, aut placere aliq, quam Domino suo studeant, à quo & mercedem Virginitatis expectant, dicente ipso, Sunt enim Spadones, qui se castrauerunt propter regnum Dei, &c.* Vbi regnum Dei exponit Cyprianus virginitatis mercedem; non ergo significat prædicationem Euangelij, præsertim cum Cyprianus de mulieribus virginibus loquatur, quæ non possunt prædicare Euangelium. HILARIUS in hunc locum, illud: *Propter regnum cælorum*, exponit, spe regni cælestis, quod ad Euangelij prædicationem refer-  
 20 ri non potest.

CHRYSOSTOMVS in hunc locum alloquens Eunuchum spiritualem: *Gratias, inquit, age Deo, quia magna præmia, rutilantesq; coronas habebis, si ita vives, quemadmodum sine aliquo illi præmio.*

HIERONYMVS li. i. contra Iovinianum: *Proponit, inquit, Agonothetis præmium, inuitat ad cursum, tenet in manu Virginitatis brauium, ostendit purissimum fontem, & clamat; Qui sitit, Veniat, & bibat, qui potest capere, capiat. Non dicit, Velitis, nolitis, bibendum vobis est, atq; currendum, sed qui voluerit, qui*  
 30 *potuerit currere atq; potare, ille vincet, ille satiabitur.*

Denique, AVGVSTINVS de sancta virginitate, cap. 24. Christo, inquit, laudanti eos, qui se castrauerunt, non propter hoc seculum, sed propter regnum cælorum, Christianus contradicat, affirmans, hoc præsentis vite esse vile, non futura? &c. vide similia apud Bedam & Anselmum in comment. huius loci.

QVINTVM est ibidem, ubi adolescenti dicitur: *Si vis perfectus esse, Vade, vende omnia quæ habes, & da pauperibus, & habebis thesaurum in cælo.* Quod hic non detur præceptum, sed consilium, patet ex ipsa consequentia verborum; nam interroganti: *Quid faciam, & saluus fiame?* Dominus respondit: *Si*



*Via ad vitam ingredi, serua mandata.* Vbi ostendit, mandatorum obseruationem sufficere ad salutem: ac deinde subiungit: *Si sis perfectus esse*, id est, si non es contentus vita æterna, sed aspiras ad excellentem gradum in ipsa vita æterna: *Vade, vende omnia.*

Præterea, si hoc esset præceptum, certè esset præceptum caritatis, at non est; nam caritas non requirit, nisi vt diligamus proximum, sicut nos ipsos; ergo non requirit, vt demus omnia nostra proximis, & nobis nihil seruemus, sed satisfacimus ei præcepto, si partim demus, partim retineamus. 10  
Quod autem dare omnia mereatur in signe præmium, patet ex illis verbis: *Et habebis thesaurum in cælo.* Sed occurrunt quinque expositiones refellendæ.

PRIMA est S. Hieronymi & Bedæ in hunc locum, vbi doceant, iuuenem istum non voto discentis, sed animo tentantis ad Dominum accessisse. Ex quo posset aliquis colligere, Dominum quoque non seriò respondisse, sed ironicè. Refellit CHRYSOSTOMVS hanc sententiam. PRIMO, quia nullus Euangelista hunc adolescentem reprehendit, cum tres hanc historiam scribant, nimirum Matthæus, cap. 19. Marcus cap. 10. 10 Lucas cap. 18. SECUNDO, quia Dominus lenissimè cum eo locutus est, cum alioqui tentatores aliter excipere soleat. TERTIO, quia non abiisset tristis audito verbo Domini, nisi reuera seriò perfectionem desiderasset.

Adde, quod Dominus *intuitus eum, dilexit illum*, vt ait Marcus, Dominus autem nõ diligit hypocritas; ergo B. Hieronymus memoria lapsus est; existimauit enim, hunc iuuenem eundem esse cum illo Phariseo tentatore, de quo Marci 14. nam hunc locum Marci allegat, cum tamen Marcus distinguat vnum ab altero, vt patet ex cap. 10. & 14. quare Hieronymus quæst. 1. ad Hedibiam, & libro contra Vigilantium, 30 hunc locum expendens, longè aliter exponit. Similiter memoria lapsus est Erasmus, qui in annotatione ad hunc locum scribit, à Chrysostomo hunc adolescentem tanquam tentatorem accusari, cum è contrario potius Chrysostomus eum defendat, Beda quoq; in commentario ad cap. 10. Marc. aperitè mutat sententiam, ac docet falli eos, qui putant, hunc adolescentem animo tentantis accessisse.

ALTERA expositio est Ioannis CALVINI lib. 4. Institutionum, cap. 13. §. 13. qui primò demonstrat, Dominum non potuisse



tuiffe constituere perfectionem in vendendis omnibus rebus, cum Apostolus 1. ad Corinth. 13. dicat: *Si distribuero in cibos pauperum omnes facultates meas, caritatem autem non habeam, nihil mihi prodest.* Et ad Colossenses 3. dicat, caritatem esse vinculum perfectionis. Deinde explicat ipse locum hunc, ac dicit, adolescentem illum, qui dixerat: *Omnia hæc servaui à iuventute mea*, mentitum fuisse, & ideo Christum ei dixisset: *Vade, vende omnia quæ habes*; non ut eum ad hoc faciendum hortaretur, sed ut proposito illi mandato, quod implere non posset, disceret, se esse mentitum; quomodo si instanti se scire omnia diceremus; explica igitur nobis, quot sint stellæ in cælo, vel grana arenæ in littore maris; quod autem ille iuuenis non servauerit omnia mandata, probat Calvinus, quia vnum ex mandatis est, diligere Deum ex toto corde: qui autem diligit ex toto corde, paratus est, omnia dimittere propter Deum; nec efficitur tristis, si ei dicatur à Deo, ut dimittat omnia, iste autem iuuenis, audito Christi verbo, tristis effectus est.

Eadem est expositio Petri Martyris in libro de cœlibatu 20 & votis, ubi addit etiam hoc argumentum; Dominus ait: *Si vis esse perfectus, vende omnia, &c.* at perfectio oiaibus imperatur, Matth. 5. *Estote perfecti*; igitur non consilium, sed præceptum fuit huic adolescenti, vendere omnia.

At errare Petrum Martyrem & Calvinum, probatur PRIMO ex capite 10. Marci, ubi legitur: *Dominus autem intuebat eum, dilexit eum.* Dominus autem non diligit mendaces, igitur credibile est, eum vera dixisse. Neque argumentum Calvinus concludit; nam qui diligit ex toto corde, non tenetur facere omnia, quæ Deus consulit, sed solum quæ præcipit; 30 hinc autem Dominum non præcipere, sed consulere, iam probatum est: & rursus probari potest; nam Dominus non absolute dixit: *Vende omnia*, sed sub conditione: *Si vis perfectus esse.*

At, inquit, tenebatur esse perfectus, cum sit præceptum: *Perfecti estote*, Matth. 5. igitur tenebatur etiam vendere omnia; sed contra, nam in primis iam supra ostendimus, perfectionem hoc loco positam, non esse præcepti, cum distinguatur ab observatione legis, de qua dictum est: *Si quis ad eam ingredi, serva mandata.*

Neque obstat illud Matth. 5. *Estote perfecti*; nam varia sunt genera



genera perfectionis, vt diximus suprà capite secundo; quædam enim est perfectio necessaria ad salutem, quæ consistit in plena obseruatione mandatorum; quædam est perfectio maior, quæ necessaria est non ad salutem simpliciter, sed ad excellentiorem gradum gloriæ in regno cœlorum, & hæc consistit in obseruatione consiliorum, de priore igitur perfectione loquitur Dominus Matth. 5. de posteriore hoc loco; id quod rursus hoc modo probatur, nam si hæc perfectio esset præcepti, certè tenerentur omnes Christiani vendere omnia sua; nam ad præcepta omnia omnes tenentur.

RESPONDET Martyr, hoc præceptum vendendi omnia datum esse solum huic adolescenti, & proinde, illi fuisse necessarium ad perfectionem, nō autem aliis; ille enim est perfectus, qui Deo iubenti obedit.

AT CONTRA; sicut cū Dominus ait: *Si vis ad vitam ingredi, serua mandata*; indicauit, seruare mandata esse medium ad vitam æternam omnibus hominibus. Sic etiam cū ait: *Si vis esse perfectus, vende omnia*; indicauit, vendere omnia esse medium ad perfectionem omnibus hominibus, & non solum illi adolescenti. Præterea, idem probamus ex testimoniis veterum sanctorum Patrum, qui docent, Dominum hoc loco non imperasse, sed tantum hortatum esse, & consuluisse, tanquam perfectionem vendere omnia, & dare pauperibus.

AMBROSIVS lib. de viduis, ultra medium: *Vt intelligas*, inquit, *distantiā præcepti, atq; consilij, illum recorderis, cui in Evangelio antè præscribitur, ne homicidium faciat, ne adulterium admittat, ne falsum testimonium dicat; præceptum enim ibi est, Vbi est pœna peccati; at Verò cū se præcepta legis memorasset implēsse, consilium ei datur, vt vendat omnia, & sequatur Dominum; hæc enim non pro præcepto dantur, sed pro consilio deferuntur.*

HIERONYMVS lib. contra Vigilantium: *Quod autem asseris eos melius facere, qui viuunt rebus suis, & paulatim fructus possessionum suarum pauperibus diuisunt, quàm eos qui possessionibus venditis semel omnia largiuntur, non à me, sed à Domino respondebitur, si vis perfectus esse, Vade, vende omnia qua habes, & da pauperibus: ad eum loquitur qui vult esse perfectus, qui cū Apostolis patrem, & nausculam, & rete dimittit: iste quē in laudat, secundus, & tertius gradus est, quem & nos recipimus, dum modo sciamus prima secundis & tertiis præferenda.*



AVGVSTINVS epist. 89. q. 4. *Viderit, inquit, ille iuuenis quem admodum illa legis mandata seruauerit, Serunt amen magister bonus mandata legis ab ista excellentiore perfectione distinxit; ibi enim dixit, si vis venire ad vitam, serua mandata; hic autem, si vis perfectus esse, vende, vende omnia, &c.* CHRYSOSTOMVS in hunc locum: *Vt allucietur, inquit, ingentem ei mercedem futuram ostendit, & voluntati eius omnia relinquit.*

Idem probatur ex verbis sequentibus; nam cum Petrus vidisset adolescentem audito hoc consilio abiisse tristem, dixit Domino: *Eccen nos reliquimus omnia, & sequuti sumus te; quid ergo erit nobis?* quasi diceret, ecce nos fecimus quod iste iuuenis facere noluit, quid ergo nobis dabis? cui interrogati, si vera est Martyris & Caluini sententia, Dominus respondere debuit, nihil vobis dabo, nam soli illi iuueni, & illi non serio loquutus sum, sed solum ea dixi, ut iuuenis ille intelligeret se fuisse mentitum. At non ita respondit, sed ait: *Amen dico vobis, quod vos qui sequuti estis me in regeneratione, &c.* Et ne putemus solis Apostolis hæc promitti, audiamus AVGVSTINVM epist. 89. q. 4. hunc locum exponentem: *Qui, inquit, illius perfectionis de vendendis rebus suis consilium tam grande, tamq̃, praeclarum non receperunt, & tamen a damnablebus immunes criminibus esurientem Christum pauperunt, non sedebunt quidem cum Christo sublimiter iudicaturi, sed ad ipsius dexteram stabunt misericorditer iudicandi.*

Ad argumentum Caluini ex Apostolo, respondeo, desertionem omnium rerum posse dupliciter considerari; vno modo secundum se; altero modo ut est actus imperatus dilectionis. PRIMO modo, desertio omnium rerum non est perfectio, sed tamen est instrumentum ad perfectionem, & sic possumus exponere verba Domini: *Si vis perfectus esse, vende omnia*, id est, sume hoc instrumentum & acquies perfectionem; quia tamen hæc desertio rerum, si absque caritate sit, non saluat hominem, ideo dicitur non prodesse, ab Apostolo, 1. Corinth. 13. SECUNDO modo desertio ipsa potest dici perfectio siue opus perfectionis, quia includit gradum quendam eximium caritatis, & de hac etiam potest intelligi verbum Domini, ut sensus sit, si vis esse perfectus, vende omnia; nam hinc apparebit te habere perfectam caritatem.

TERTIA expositio est Pelagianorum, qui illud: *Si vis esse perfectus*, explicabant, si vis ut tibi nihil desit ad consequendam



dam salutem; ille enim est perfectus, cui nihil deest, & hoc probabant ex illis verbis Domini Marc. 10. *Vnum tibi deest.* & ex verbis adolescentis Matth. 19. *Quid adhuc mihi deest?* quasi diceret, seruauimus ista praecepta Decalogi à Mose tradita; num aliquid aliud faciendum est? cui respondit Dominus Marci 10. *Vnum tibi deest, & c.*

At falsam esse hanc expositionem, docet AUGUSTINUS ep. 89. q. 4. ex illis verbis 1. Tim. 6. *Diuitibus huius seculi praecepe, non superbe sapere, nec sperare in incerto diuitiarum, sed in Deo uiuere; benefaciant diuites, sint in operibus bonis, facile tribuant.* 10  
 & c. Puto, inquit Augustinus, quod ista praeceptum, diuites instruebat, non fallebat Apostolus, qui non ait, praecepe diuitibus huius mundi, Et vendant omnia quae habent, dent pauperibus, & sequantur Dominum, sed non superbe sapere, & c.

Cum ergo Dominus ait: *Si vis perfectus esse*, non loquitur de perfectione necessaria ad salutem, sed de alia quadam maiore, & cum ait: *Vnum tibi deest*, non vult dicere ad salutem consequendam, sed ad perfectionem istam maiorem; & similiter ille iuuenis dicens: *Quid adhuc mihi deest?* non intelligit ad salutem simpliciter assequendam; iam enim audierat responsum: *Si vis ad vitam ingredi, serua mandata.* sed intelligit ad salutem facilius, & perfectius assequendam, q. d. quid possem adhuc facere utile ad vitam æternam? quod si quis admittere velit iuuenem petiuisse, an aliquid sibi deesset simpliciter ad salutem, dicere poterit à Domino fuisse responsum, nihil ei deesse ad salutem; non enim Dominus ait: *Vnum tibi deest, & c.* sed: *Si vis perfectus esse, & c.* 30  
 deest, ut patet ex verbis Matthæi, & Marci simul iunctis, q. d. nihil tibi deest ad salutem simpliciter assequendam, sed, si vis perfectus esse, vnum tibi deest, & c.

QUARTA expositio est Gulielmi de sancto amore, contra quem scribit B. Thom. opusculum 19. qui dicebat verba ista Domini debere intelligi secundum animi præparationem, & verum præceptum continere, sicut illa Matth. 5. *Si quis te percussit in unam maxillam, praebe illi & alteram;* quod præceptum est, sed intelligitur in animi præparatione, ut Augustinus exponit in epist. 5. ad Marcellinum. Eodem modo videtur intelligere hunc locum Melanchthon in locis communibus, cap. de paupertate.

At hæc quoque falsa expositio est; nam exempla Domini, &



& Sanctorum sunt optima commentaria Scripturarum; videmus autem Dominum, cum fuit in maxilla percussus, Ioan. 18. non vertisse alteram, sed dixisse: *Cur me cadis?* Et similiter Apostolum, cum esset in maxilla percussus, Act. 23. non vertisse alteram, sed dixisse: *Percutiet te Deus paries dealbare.* Ex quibus exemplis euidenter colligit August. in epist. 5. illud esse præceptum, sed intelligi in præparatione animi; At verò consilium de relinquendis omnibus rebus, Dominus, & Apostoli, & Sancti plurimi non in præparatione animi  
 10 mireretur, sed re ipsa & factis impleuerunt. Luc. 9. de se Dominus ait: *Vulpes foveas habent, & Soluces cali nidos, filius autem hominis non habet sibi caput suum reclinat.* Et Matth. 19. Apostoli dicunt: *Ecce nos reliquimus omnia, & sequi sumus te.* Et de S. Antonio scribit Athanasius, quod cum audisset in Ecclesia legi hoc Euangelium: *Si vis perfectus esse, vende omnia,* eum mox à Deo edoctum de vero sensu eorum verborum, omnia vendidisse, & dedisse pauperibus. Ex quo apparet de reali desertione omnium facultatum hunc locum esse intelligendum.

20 Præterea illud præceptum de maxilla præbenda percussori, non potest impleri re ipsa sine damno proximi, & offensione Dei, ideo intelligimus præcipi solum patientiam, non autem ut re ipsa offeramus alteram maxillam. At vendere omnia, & dare pauperibus, sine ullius damno fieri potest; nemini enim facit iniuriam, qui res suas donat pauperibus: idcirco intelligimus hoc consilium re ipsa implendum.

30 QUINTA expositio falsa, est Osiandri, qui, ut refert Alphonsus Viruefius Philippica 20. admisit hoc esse verè consilium Evangelicum, sed non esse datum nisi iuueni illi, cum quo Christus loquebatur.

AT CONTRA; nam in primis non dixit Christus illa verba adolescenti quomodocunque, sed cum conditione, si vellet esse perfectus, ergo consilium illi datum, omnibus fidelibus, qui volunt esse perfecti, datur, iuxta illud Mar. 13. *Quod vobis dico, omnibus dico, Vigilate.* Præterea quæ Christus dixit alicui ut Principi, accipiuntur dicta omnibus Principibus, ut: *Pasce oves meas.* Ioan. 21. ergo etiam quæ dixit vni ut priuatæ personæ, intelliguntur dicta omnibus priuatis personis; præterea quod Christus hæc dixerit omnibus, patet ex intellectu.



Intelligentia Apostolorum, qui hæc sibi etiam dicta crediderunt, dicentes: *Ecce nos reliquimus omnia*. Et ex approbatione Domini dicentes: *Amen dico vobis, quod vos qui sequi estis, &c.* AD HÆC, vt supra diximus, simillimæ sententiæ sunt, & ab eodem, atque eidem dictæ: *Si vis ad vitam ingredi, serua mandata*, Et: *Si vis perfectus esse, vende omnia, &c.* At prior dicta est omnibus, cur non etiam posterior? Denique S. Antonius, teste B. Athanasio, & S. Franciscus, teste B. Bonauentura, sibi dictum putauerunt: *Si vis perfectus esse, vende omnia*, Quod idem pluribus aliis testibus probare possemus: Non igitur soli illi iuueni datum est consilium hoc. 10

SEXTVM Testimonium est ibidem de obedientia, vbi Dominus ait: *Et sequere me*; nam quod hæc sequela sit consilium, patet, quia dicitur ei soli; Qui vult esse perfectus, & cui dictum est: *Vende omnia quæ habes*; Quod autem in illo: *Sequere me*, significetur obedientia, probatur dupliciter. PRIMO, quia sequi Christum est imitari Christum; Christus autem factus est obediens usque ad mortem, Philip. 2. SECUNDO, quia Matth. 16. explicat ipse Christus quid sit sequi se dicens: *Qui vult venire post me, abneget semetipsum, tollat crucem suam, & sequatur me*. 10 Quod vltimū, est explicatio superiorum, vt sensus sit, qui vult post me venire, id est, me sequi, abneget se, & tollat crucem suam, & sic sequetur me; porro abnegare se, nihil est aliud quam valedicere suo iudicio, & suis affectibus, & accommodare se alterius iudicio, & voluntati.

DICIT aliquis; Abnegare se est quidem obedire, sed hoc loco agitur de obedientia quæ necessariò debetur Deo, non quæ spontè exhibetur homini; sequitur enim, qui amat animam suam, perdet eam.

RESPONDEO, hoc loco agi de obedientia, quæ necessariò debetur Deo; tamen hinc deduci etiam consilium religionis obedientiæ: nam hinc habemus, sequi Christum esse abnegare seipsum, id est, alterius voluntati seipsum subicere; habemus autem ex aliis locis duplicem esse Christi sequelam; vnam communem, & necessariam omnibus fidelibus, de qua hic agitur, id est, Matth. 16. & Luc. 9. & rursus aliam quæ solis iis consulitur, qui volunt esse perfecti, de qua agitur Matth. 19. & Luc. 18. ergo necesse est duplicem esse abnegationem sui, id est, obedientiam, vnam communem & necessariam omnibus, quæ consistit in obediendo in iis rebus tantum, 10



tantum, quæ sunt necessariae ad salutem; alteram maiorem & vniuersaliorem, quæ consistit in obediendo in omnibus rebus, etiam non necessariis, modò peccata non sint; qualis obedientia laudatur in Rechabitis Hierem. 35. qui obediunt patri suo in iis, in quibus non tenebantur.

SEPTIMUM Testimonium est. Corinth. 7. vbi multis modis proponitur consilium continentiae: *Bonum est*, inquit Paulus, *mulierem non tangere*. Item: *Bonum est homini sic esse*. Item: *Solutus es ab uxore, noli quarere uxorem*. Item: *Disco autem inruptis, & viduis, bonum est si sic permanserint, sicut & ego*. Item: *Volo omnes vos esse sicut me ipsum*, id est, continentes, sic enim omnes veteres exponunt. Item: *De virginibus preceptum Domini non habeo, consilium autem do, tanquam misericordiam consequutus à Domino & sim fidelis*. Vbi indicat Apostolus consilium hoc non esse humanum, sed diuinum; dicit enim se consilium dare, non vt hominem politicum, sed vt fidelem ministrum Dei. Item: *Qui Matrimonio iungit virginem suam, benè facit, & qui non iungit, melius facit*. Deniq; de vidua: *Cui vult nubat, tantum in Domino, beator autem erit si sic permanserit secundum meum consilium, puro autè, quod & ego Spiritum Dei habeam*. vbi rursus vides tribui consiliū hoc Spiritui sancto.

Ad hæc loca respondent aduersarij tripliciter. PRIMA solutio est Lutheri in Epithalamio, vbi dicit, Apostolum hoc loco non consulere, sed dissuadere continentiam; & probat ex eo quod Apostolus in hoc capite laudationi continentiae admiscet necessitatem Matrimonij; nam postquam dixit: *Bonum est homini mulierem non tangere*, statim subiungit: *Propter fornicationem autem unusquisque suam uxorem habeat*; at; quasi velit dicere, ego quidem vellem hortari ad continentiam, quæ sanè præclarum quiddam est, tamen non sine me hoc facere periculum fornicandi. IDEM ferè docet Caluinus in commentario huius loci; ait enim similem esse Pauli sententiam: *Bonum est homini mulierem non tangere*; huic sententiæ, bonum esset homini non comedere, neq; bibere, si fieri posset; sed quia non potest fieri sine miraculo, ideo vnusquisque comedat, & bibat.

AT CONTRA, nam in primis verba Pauli apertissima sunt; non enim dicit bonum esset, sed: *Bonum est*; non ait consilium dare vellem, sed: *Consilium do, &c.* Deinde Patres omnes sic



sic exponunt. Vide Chrysostomum & alios in hunc locum, Ambros. lib. de viduis prope finem. Hieronymum lib. I. in Iovinianum, & August. lib. de S. virginitate, cap. 13. & sequentibus. Ex quibus Augustinus, quasi prævuidisset, vnum ex suis Augustinianis apostatis dicturum, Apostolum hoc loco hortari ad nuptias, & detertere à continentia, disertè scripsit contrarium; sic enim ait, cap. 16. *Hoc modo, inquit, exhortatur ad virginitatem, continentiamq; perpetuam, & aliquantulum à nuptiis etiam deterret.*

PRAETEREA, si ita est difficile continere, vt isti dicunt, & 10 exemplo ostendunt, cum nulli apud eos contineant: certè Paulus ineptissimus fuit, qui rem impossibilem tantopere laudavit; & patebit absurditas huius rei, si quis applicet omnia verba Pauli ad exemplum Caluini. Nónne enim ridiculus fuisset Apostolus, si dixisset, bonum est non comedere? Item, cares cibo, noli quærere cibum? Item, de non comedendo præceptum Domini non habeo, consilium autem do, vt nemo comedat? Item, qui comedit, benè facit; qui non comedit, melius facit? Item, non peccat qui comedit, quod vult faciat, beator erit si non comederit? Non igitur de re impos- 20 sibili loquitur Paulus.

Per illud autem: *Propter fornicationem autem unusquisque suam uxorem habeat*, non mouet Apostolus, vt vnusquisq; cui inest aliquod periculum fornicandi, uxorem ducat; nam tunc omnes omnino deberent vxorè ducere, nullo excepto, cum tamen Lutherus ipse excipiat eos, qui habent donum continentiae; nam etiam illis inest periculum fornicandi, cum possint donum illud amittere, & vinci aliquando à tentatione; sed monet, vt qui uxorem duxerunt, illam retineant, & quicumque est fornicaturus, uxorem potius ducat, sicut infra dicit: *Qui non se continet, nubat.* 30

ALTERA expositio est Petri Martyris in hunc locū, vbi opponit his verbis Pauli: *Bonū est homini mulierem non tangere*, id est, sine vxore esse, illa verba Dei Gen. 2. *Non est bonū hominem esse solum*, id est, non est bonum hominem sine vxore esse, & quia non debet pugnare Paulus cum Deo, dicit Paulū loqui solū de illis, qui certi sunt se habere continentiae donū; Deū autem, de omnibus illis, qui hoc dono carent. Et quoniam rarissimi, aut nulli sunt, qui certò sciāt se habere hoc donum, inde vult inferre, bonum esse, vt omnes ducant vxores.



At utriusque errat; nam quod Deus non loquatur de iis qui hoc dono carent, patet; nam ea verba loquutus est Deus ante peccatum Adæ, quo tempore Adam sine vlllo dubio carerebatur mala concupiscentia, & habebat cum ceteris virtutibus etiam donum continentia, ita ut posset continere, si opus esset.

Quod autem Paulus non loquatur de iis solum, qui habent donum continentia, sed absolutè pronunciet, bonum esse viro mulierem non tangere, patet etiam; nam etsi non omnes habent hoc donum, tamen omnes possunt habere, si à Deo illud petant, & proinde omnibus potest conuenire Pauli consilium; nam si ita hoc donum esset à Deo, ut nullo modo esset in nostra potestate continere, & non continere, sicut nō est in nostra potestate prophetare, quod exemplum affert Calvinus in commentario huius capituli, absurdè Paulus diceret: *Consilium autem do. Et: Quod vult, faciat*; non enim vlla est cōsultatio aut electio de eo quod non est in nostra potestate. Quis enim, nisi stultus, consultaret, an vellet prophetare, vel non prophetare?

Item, idem B. Paulus ibidem dicit, etiam continentiam conjugalem esse donum Dei, & non dari omnibus: *Vnusquisque*, inquit, *donum suum habet ex Deo, & unus quidem scilicet, alius autem scilicet*. Peto igitur, qui non habet donum continentia conjugalis, quid agat? num licebit ei fornicari? Respondebunt, non licere fornicari, quia etsi non habet donum continentia, tamen habebit, si à Deo petat. Idem ego dicam de continentia virginali. Verba igitur Dei & Pauli aliter concordanda sunt. Deus loquitur de bono speciei, Paulus de bono individui. Item, Deus loquitur pro eo tempore, quo mundus erat vacuus, Paulus pro eo, quo mundus est plenus. Denique, Deus loquitur de bono, quod refertur ad vitam temporalem, Paulus autem de bono, quod refertur ad vitam æternam, ut iam probabimus.

Est ergo TERTIA solutio, quod Paulus siue suadeat continentiam, siue non, solum illam laudet tanquam utilem ad aliud, non autem ut per se Deo gratam & meritoriam; hanc autem utilitatem non eodem modo exponunt. Nam LUTHERVS in Epithalamio non agnoscit aliā utilitatem quàm temporalem, quia nimirum liberat à curis, & afflictionibus multis, quæ necessariò sunt annexæ Matrimonio: *Vult*, inquit, *S. Paulus*



Paulus hoc Verbum spiritualiter intelligi, & sic ait, bonum est homini mulierem non tangere, & hoc bonum non sit dictum de merito coram Deo, sicut hactenus textus ille etiam à S. Hieronymo est expostus, sed dictum est de temporali bono, comodo, & quiete, in hac Vita, quibus homo castus antecellit conjugatos, si quis demum, qui sine coniugio caste vivit, ab his molestiis, & tribulationibus, quæ in matrimoniali statu sunt, liber est.

At Melanchthon in locis, cap. de castitate, Martyr in hunc locum Apostoli, & alij non solum hanc utilitatem temporalem agnoscunt, sed etiam aliquam spiritualem, quod nimirum qui vxore carent, expeditiores sunt ad orandum, prædicandum, &c. Nos autem præter has duas agnoscimus tertiam, nimirum ad placendum Deo, & præmia maxima promerenda. Et quidem ad refellendum Lutherum sufficere deberet, quod idem omnino senserat Iovinianus, quem his verbis refellit AVOUSTINVS lib. de S. virginitate, cap. 13. Vnde inquit, mirabiliter desipiunt, qui putant huius continentia bonum non esse necessarium propter regnum celorum, sed propter præsens seculum, quod scilicet coniugia terrenis curis pluribus, atq; arduioribus distenduntur, quam molestia Virgines, & continentiores carent, &c.

At, inquit, Apostolus dicit, arbitror hoc bonum esse propter præsentem necessitatem, & infra: Tribulationes tamen carnis habebunt huiusmodi.

R S P O N D E O, illud: Propter præsentem, vel, ut nos legimus: Instantem necessitatem, non significare propter præsentem molestias fugiendas, sed propter temporis brevitatem, quia Dominus propè est, & dies illi propinquant, de quibus dicitur: *Va pregnantibus, & nutrentibus in illis diebus*, Matth. 24. ut exponit Hieronymus libro contra Heluidium, lib. 1. contra Iovinianum, & in epist. ad Eustochium de virginitate, & patet ex Apostolo hoc loco, qui quasi explicans quid sit præsens necessitas, ait: *Tempus breue est*, & rursum: *Præterit enim figura huius mundi*. Illud autè: *Tribulationes tamen carnis habebunt huiusmodi*, intelliguntur quidè de afflictione temporali, quam patiuntur conjugati, sed non ad eam solum fugiendam, docet D. Paulus bonam esse continentiam: Immo, ut pulchrè exponit Hieronymus lib. 1. contra Iovinianum, ne quis putaret, conjugatos esse quidem inferiores virginibus quantum ad spiritualia, sed tamen esse feliciores quantum



ad carnalia, ideo addite eos etiam miseros esse quoad carnalia, & propterea nullam esse causam ambigendi, sit ne melius continere an nubere.

Iam verò contra Philippum, & Martyrem, sunt in hoc ipso capite duo vel tria loca. Primus est: *Mulier innupta, & Virgo cogitat quæ Domini sunt, quomodo placeat Deo, & sit sancta, & corpore, & spiritu.* vbi Apostolus dicit virginitatem esse sanctitatem corporis, & spiritus, & per eam nos placere Deo; sensus enim est, sicut mulier coniugata cogitat, quomodo se pulchram cōseruet, vt sic placeat viro suo; sic virgo cogitat, quomodo seruet corporis integritatem, & sanctitatem, vt per eam placeat Deo. **HIERONYMVS** lib. I. contra Iovin. hoc exponens: *Ille, inquit, virginitas hostia Christi est, cuius nec mentem cogitatio, nec carnem libido maculauit.* vbi vides virginitatem hostiam Dei nominari; proinde rem esse, qua colitur Deus, & qua placet Deo.

**SECUNDVS** est: *Non est laqueum vobis iniciam, sed ad id quod honestum est, & quod facultatem praebeat sine impedimento Domini obsecrandi.* vbi Apostolus dicit, continentiam & per se honestam, ac decoram esse, & proinde Deo caram, & simul utilem ad aliud, id est, ad orandum sine intermissione.

**TERTIVS** est: *Beatior autem erit si sic permanserit,* id est, vt exponit Ambrosius, dignior in futuro seculo.

Accedat **VLTIMO** Augustinus lib. de sancta virginitate, cap. 14. vbi sic ait: *Quoniam ad eunda est Vita aeterna, in qua est quaedam egregia gloria, non omnibus in aeternum daturus, sed quibusdam ibi tribuenda, cui consequenda non satis est liberatum esse a peccato, nisi ipsi liberatori conueatur aliquid quod non sit criminis non conuisse, sed conuisse ac reddidisse sit laudis, ideo ait Apostolus; Consilium autem do.*

**OCTAVVM** testimonium est 1. Cor. 9. quo toto capite Paulus conatur ostendere, se plus fecisse quam sibi esset preceptum, & propterea singularem gloriam apud Deum meruisse; nam cum Dominus ordinasset iis, qui Euangelium annunciant, de Euangelio viuere, Paulus maluit gratis Euangelium prædicare, & sic facere opus supererogationis: *Melius, inquit, est mihi mori, quam ut gloriam meam quis euacuet. Nam est euangelizauero, non est mihi gloria; necessitas enim mihi incumbit: Vt enim mihi est, si non euangelizauero. Quia est ergo merces mea? Et Euangelium prædicans, sine sumptu ponā Euangelium.*

RESPON-



RESPONDET Petrus Martyr in commentario huius loci, Paulum non loqui de opere supererogationis, sed de opere debito coram Deo, licet non debito secundum iudicium hominum, & ideo etiam nomine gloriæ vult intelligi gloriationem coram hominibus, non coram Dei tribunali. Et probat tripliciter. PRIMO, quia Paulus ait: *Melius est mihi mori, quam ut gloriam meam quis euacuet.* at pro opere non necessario, quale est supererogationis, nemo debet mortem subire, sed solum pro necessario, ergo loquitur de opere necessario coram Deo; ex quo tamen sequitur gloriatio coram hominibus, qui illud opus iudicare possunt non necessarium.

SECUNDO, quia Paulus desperat de mercede nisi hoc opus faciat, ait enim: *Esse euangeliz. auero non est mihi gloria*, id est, si prædicauero accipiendo sumptus à populo, nihil lucrabor; unde sequitur: *Quæ est ergo merces mea? Ut Euangelium prædicem sine sumptu ponam Euangelium;* ergo loquitur de opere debito, quod nisi fiat, perditur tota merces.

TERTIO, quia dicit, ut non abutar potestate mea, & ne quod offendiculum ponam Euangelio Christi; At abuti potestatem, & offendiculum ponere Euangelio, peccatum est. Itaque concludit Martyr, Apostolum Paulum grauiter peccaturum fuisse si accepisset sumptus à populo, quia hoc modo impediuiſſet cursum Euangelij.

In hac explicatione duo sunt errores Martyris. PRIMVS, quod pro gloria, quam sibi tribuit Paulus, intelligit gloriationem coram hominibus, non coram Deo; nam in primis B. Aug. lib. de opere Monachorum, cap. 10. contrarium scribit his verbis: *Bonum est magis mihi mori, quam ut gloriam meam quis euacuet. Quam gloriam? nisi quam habere voluit apud Deum in Christo;* hæc Aug. ubi vide quam aperte Martyri contradicat. DEINDE verba Pauli aperte ostendunt, eum loqui de gloria apud Deum, id est, de merito cuiusdam excellentis gloriæ, quam exspectabat ex opere isto supererogationis; nam infra, id quod vocauit gloriam, vocat mercedem: *Quæ est ergo merces mea?* &c. At certè non exspectabat Paulus mercedem ab hominibus, sed à Deo. Denique si Paulus gloriaretur coram hominibus quasi de opere indebito, quod tamen re vera coram Deo debitum esset, falsò gloriaretur. quod quis dicat, nisi fortè aliquis Petrus Pseudomartyr?



SECUNDVS error est, quòd dicat Paulum peccatum fuisse, si accepisset sumptus à populo, & proinde opus eius fuisse debitum, non supererogationis; nam in primis Paulus in toto isto capite nihil aliud agit, quàm vt probet sibi licuisse viuere ex populi sumptibus; id enim probat. Primò exemplo aliorum Apostolorum. Secundò exemplis militum, Pastorum, Agricolarum. Tertiò ex lege Moïsi. Quartò ex Christi ordinatione. Quintò ex ipsa natura.

Præterea ita exposuerunt omnes Patres. CHRYSOSTOMVS in hunc locum: *Qua, inquit, supra præceptum fiunt, multa, secundum hoc dictum, mercedem consequuntur, quæ autem sub præcepto continentur, non itidem.* Ambrosius bis repetit Paulū sibi licita illicita fecisse. AVGVSTINVS lib. de opere Monachorum, cap. 5. *Audiuerat, inquit, stabularius, ad quem Vulneratus ille perductus est, si quid amplius erogaueris, in reddendo reddam tibi: amplius ergo erogabat Paulus, qui suis, ut ipse testatur, sumptibus militabat.* Deniq; Apostoli ceteri sumptus à populis accipiebant, vt hic Paulus dicit, nec est verisimile eos peccasse, ergo nec Paulus peccasset accipiendo.

RESPONDET Martyr, non esse eandem rationem Pauli, & aliorum; nam alij non habuerunt Pseudoapostolos æmulos, vt habuit Paulus. At hoc nihil valet; nam alioqui non rectè probaret exemplo aliorum Apostolorum B. Paulus, se potuisse alià populo. Responderi enim potuisset, nō esse eandem rationem aliorum Apostolorum, & suam. deinde Paulus non abstinuit ab accipiendis sumptibus propter Pseudoapostolos, sed ne grauaret populos, vt ipse dicit. 1. Thess. 2. & 2. Thess. 3. Immo propter Pseudoapostolos debuisset potius accipere sumptus. Illi enim de hoc Paulum accusabant, vt Caiet. bene animaduertit, quod Paulus non videretur verus Apostolus, cum non viueret more aliorum Apostolorum; quocirca ille in toto isto capite probat se esse verum Apostolum, & se posse accipere sumptus si velit.

Ad PRIMVM argumentum dico, falsum esse, nō licere mori pro opere supererogationis; quot enim sacræ virgines occisæ sunt, quia nuptias recusauerunt?

Ad SECUNDVM respondet Anselmus in hunc locum, Paulum desperare de gloria, si solum euangelizet propter alimenta temporalia. possumus secundò & melius dicere, Paulum, cum ait: *Si euangelizauero non est mihi gloria, &c.*

non



non desperare de gloria simpliciter, sed de gloria quadam singulari, quæ debetur operi supererogationis, ut exponit Chrysostomus.

Ad TERTIVM dico cum Chrysostomo hom. 8. de pœnitentia, & cum Oecumenio & Theophylacto in hunc locum, Paulum accepisse nomen abusus pro vehementi usu; voluit enim dicere, ne quantum possum utar potestate mea. Neque est hoc nouum; nam alij etiam auctores tum sacri, tum prophani videntur hac voce in bonam partem. Tria enim significat vox *ἡ ταχέως*, & Latine, abutor. Primò, uti re aliqua contra eius institutionem, & hoc malum est. Secundò, uti præter institutionem, & hoc non est malum; unde est figura *ἡ ταχέως*. S. Paulinus epist. 11. ad Severum: *Itaque*, inquit, *propterea filij imperatoris assensu mater Augusta patefactis ad opera sanctæ thesauri toto abusa sum*. Tertiò, uti simpliciter, ut apud Platonem epist. 8. & alios auctores.

Quod autem ait: *Ne quod offendiculum ponam*, dico ibi offendiculum non significare scandalum, sed interruptionem, est enim Græcè *ἐμπόδιον*. metuebat enim Paulus, ut aliqui auariores, ne deberent alere concionatores, ab Evangelio retardarentur; hic autem metus poterat communis esse Paulo cum ceteris Apostolis, qui tamen hoc non obstante, sumptus à populo capiebant. Ex quo intelligimus non fuisse peccatum accipere sumptus à populo, etiam si inde sequeretur aliqua retardatio cursus Evangelij; nam illa retardatio non oriebatur culpa Apostolorum, qui utebantur iure suo, sed culpa auditorum: tamen B. Paulus maluit pati famem & laborem, quam ut vlllo modo Evangelij cursus retardaretur.

Adde postremò, quod si illa verba: *Ut non abutar potestate mea*; & illa: *Ne offendiculum ponam*, significarent Paulum peccatum fuisse, si à populo sumptus accepisset, sequeretur eum non potuisse apud homines gloriari tanquam de opere indebito; nam si ipse dicit se debuisse illud facere, idque hominibus dicit, quomodo gloriatur se fecisse opus indebitum? ergo Petrus Martyr secum ipse pugnat, dum docet, Paulum gloriari apud homines de opere indebito; & tamen inducit eundem Paulum dicentem, se debuisse illud opus facere, & peccatum nisi fecisset.

NONVM testimonium est Apocal. 14. ubi legimus: *Nemo poterat*



poterat dicere canticum, nisi illa centum quadraginta quatuor millia; hi sunt qui cum mulieribus non sunt coinquinati, Virgines enim sunt, & sequuntur Agnum, quocunque ierit. Ex quo testimonio apparet, singulare præmiū habere virgines, quando quidem canunt canticum, quod nulli alij Beatorum canere possunt.

RESPONDENT Magdeburg. Cent. i. lib. 2. cap. 4. col. 454. hunc locum debere intelligi mysticè de iis, qui non sunt maculati idololatria, quæ vocatur fornicatio Babylonis, meretricis magnæ.

AT CONTRA; nam in primis Ioannes indicat paucos quosdam fuisse istos virgines, qui soli canticum illud dicere poterunt; pauci enim sunt centum quadraginta quatuor millia, si cum illa turba magna Sanctorum comparentur, quæ præ multitudine numerari non poterat, quam idem Ioannes vidit Apoc. cap. 7. At maior pars Sanctorum immunis fuit ab idololatria, ut notum est. Præterea Ioannes non diceret, cum mulieribus non sunt coinquinati, sed cum muliere, si inteligeret de fornicatione Babylonis.

Denique Patres de veris virginibus exponunt, Primasius, Beda, Oecumenius, & Anselmus in hunc locum; Hier. lib. contra Heluidium in fine; Greg. 3. parte pastoralis, cap. 29. & AUGUSTINVS de S. virginitate, cap. 27. & sequentibus, qui inter cetera sic ait, cap. 29. Videbit vos cetera multitudo fidelium, quia Agnum ad hoc sequi non valet. Videbit nec inui debet, & colatando vobis, quod in se non habet, habebit in vobis; nam & illud canticum nouum, proprium Vestrum, dicere non poterit, audire autem poterit, & delectari Vestro tam excellenti bono, sed vos qui & dicetis, & audietis, quia & hoc quod dicetis, à vobis audietis, felicius exultabitis, iucundiusque regnabitis. Hæc de Scripturis.

## CAPVT DECIMVM.

*Idem asseritur exemplis.*

**S**ECUNDO probatur exemplis primitiue Ecclesiæ. Nam constat mox initio nascentis Ecclesiæ plurimos cœpisse colere cōtinentiam, & vitam communem, rebus omnibus diuidentis, quod in Testamento veteri rarissimum fuerat. Nec potuit eius nouitas



tis alia esse causa, nisi prædicatio Christi, & Apostolorum. Actor. 4. legimus, quotquot erant possessores agrorum & domorum, iis venditis, pretia attulisse ad pedes Apostolorum. unde hoc nisi quia audierant Dominum id consuluisset.

Porro continentiam tam multi certatim arripiebant, ut Actor. 21. legamus, vnum Philippum quatuor filias habuisse, & omnes virgines, quas certè non ad tempus aliquod virgines fuisse credere debemus, sed perpetuò, & ex electione; refert enim id Lucas tanquam aliquid magnum, quod videlicet vni homini essent quatuor filiarum virgines. At quid magnum est habere quatuor filias virgines, quæ ubi maturæ fuerint, nupturæ sint? Adde, quod Eusebius lib. 3. hist. cap. 30. ex Policrate docet, filias Philippi in virginitate consensuisse.

Præterea PHILLO Iudæus in libro de vita contemplatiua testatur, plurimos suo tempore, id est, initio Ecclesiæ, vitam communem & cœlibem duxisse; ait enim, talia hominum collegia fuisse in multis orbis terræ partibus, tam apud Græcos, quam apud barbaros, sed præcipuè in Ægypto. IUSTINVS ex Græcis ferme antiquissimus in Apologia 2. ante medium ait, apud nullam Gentem ita coli cœlibatum, ut apud Christianos, ubi sunt plurimi vtriusq; sexus vsq; ad senectutem in virginitate permanentes; quod idem scribit Tertullianus antiquissimus Latinorum in Apologetico, cap. 9.

## CAPVT XI.

*Idem asseritur testimoniis Patrum.*

**T**ERTIO probatur ex clarissimis Patrum testimoniis, tum Græcorum, tum Latinorum; & quia testibus abundamus, omittam eos, quorum testimonia hæretici non recipiunt, ut Dionysium, Ignatium, & similes.

ORIGENES in cap. 15. ad Rom. Ea, inquit, quæ supra debitum facimus, non facimus ex præceptis. Verbi causa; Virginitas non ex debito soluitur, neq; enim per præceptum expetitur, sed supra debitum offertur.

EUSEBIUS lib. 1. demon. Euang. cap. 8. Quocirca, inquit, in Ecclesia Dei duo modi viuendi instituti sunt. Alter quidem naturam nostram, & communem hominum vita rationem excedens, non nuptias, non sobolem, non substantiam, non opum fascula.



cultatem requirens, & soli diuino cultui, ex immenso rerum celestium amore addictus, & talis quidem existit in Christianismo perfecta Vita modus. Alter vero remissior atq; humanior, hic & modesto coniugio, & sobolis procreatione implicatur, & rei familiaris curam assumit, & iuste militantibus, quae sint agenda describit, agros quoque & mercaturam adiuncta religione non negligit, & his quidem secundum pietatis attributus est gradus. Et quod vterq; vitae modus à Christo sit institutus, initio capituli apertè docuit.

10 ATHANASIVS in libro de humanitate Verbi, vltra medium: Quis, inquit, hominum, vel post mortem, vel in Vita auctor seruanda Virginitas fuit? at non contrà arbitratu est, eam Virginitatem praestari non posse? attamen Saluator noster, & omnium Rex Christus tantum saluit in huiusmodi praeceptis, & pueri nondum maturi legum disciplina, Virginitatem, quae supra leges est, profiteantur. Nota vocari hic praecepta, non leges obligantes, sed institutiones, & doctrinam, alioqui pugnaret ipse secum, cum & praeceptum vocat, & supra legem esse dicit.

20 BASILIUS in libro de virginitate, vltra medium: Voluit enim Dominus, inquit, non praeceptum esse ipsum Virginitatis rectè factum, sed insigne anima, virtutis studiosa ex propria at libera potestate, id quod supra mandatum, & supra naturam est, à se ipsa perpetrantis.

EPIPHANIVS haeref. 48. Gaudet quidem, nimirum Ecclesia, his, qui approbatum Dei cultum praestare possunt, & Virginitatem exercere diligunt, Verum & nuptias honorat, &c.

Ioannes CHRYSOSTOMVS hom. 8. de poenitentia: Nequaquam, inquit, Dominum incuses, haud mandat impossibilia, 30 multis & ipsa superant mandata. Et infra, posteaquam exempla posuit de continentia & paupertate, ait in persona Dei: Non cogo, non grauo, sed proficientem quidem coronabo, non proficientem non punio.

Gregorius NAZIANZENSIS orat. I. in Iulianum, vltra medium: Quomodo, inquit, illud non animaduertiis omnium sapientissime & ingeniosissime, atq; ad virtutum arcem & verticem Christianos coarctans, quod in legibus nostris aliam parendi necessitatem imponit, nec sine periculo praetermitti possunt, alia non necessitate constringunt, sed in electione, & voluntate posita unt, ac proinde hanc rationem habent, & qui ea custodierint, honore



honore & premiis exornentur, qui autem minus ea expleuerint, nihil periculi pertimescant.

Iam ex Latinis. CYPRIANVS libro de habitu virginum, prooefinem: *Neg, hoc iubet Dominus, inquit, sed hortatur, nec iugi necessitatis imponit, quando manet voluntatis arbitrium liberum: sed cum habitationes multas apud Patrem suum esse dicat, melioris habitaculi hospitium demonstrat. Habitacula ista meliora vos petitis; carnis desideria castrantes, maioris gratia primum in cælestibus obtinetis.*

AMBROSIVS libro de viduis, vltra medium: *Qui praeceptum, inquit, impleuerint, dicere possunt, serui inutilis sumus, quod debemus facere, fecimus: Hoc Virgo non dicit, non dicit ille, qui bona sua vendidit. Et infra: Ideo ergo praeceptum non datur, consilium datur, praeceptum enim castitatis est, consilium integritatis.*

HIERONYMVS lib. i. contra Iovinianum: Proponit Agnotheses primum, inuitat ad cursum, tenet in manu virginis, atq; brauium, ostendit purissimum fontem, & clamat: *Si quis sitis, Veniat, & bibat: non dicit, Velitis, nolitis, bibendum vobis est, atq; currendum, sed qui voluerit, qui potuerit currere atq; potare, ille vincet, ille satiabitur, & ideo plus amat Virgines Christus, quia sponte tribuunt, quod sibi non fuerat imperatum, maiorisq; gratia est offerre quod non debeas, quàm reddere quod exigaris.*

GREGORIUS lib. 15. moralium, cap. 9. Electi, inquit, nonnunquam plus student agere, quàm eis dignatus est Dominus iubere; carnis enim Virginitas nequaquam iussa est, sed tantum laudata; nam si illa iuberetur, nimirum coniugium iam culpa crederetur, & tamen multi Virginitate pollent, & videri licet plus impendant obsequio, quàm acceperunt praecepto. Hæc ille. Vide etiam 3. parte pastoralis, cap. 28. & 29.

AVGVSTINVS lib. de sancta virginitate, cap. 30. loquens de praeceptis & consiliis: *In illis, inquit, Dominus debitum imperat vobis, in his autem si quid amplius supererogaueritis, in re deinde reddet vobis. Et serm. 18. de verbis Apostoli: Ambierunt, inquit, Virgines illam maiorem pulchritudinem cordis sui, tanquam dicerent: quid iubet? ne adultera simus? hoc praecepit? amando te plus facimus, quàm praecepit. Et in Enchiridio, capite 111. Quacunque, inquit, mandat Deus, ex quibus vnum est; Non mœchaberis; & quacunque non iubentur, sed specia- li consilio monentur, ex quibus vnum est; Bonum est hominibus mulie-*



*mulierem non tangere, tunc recte fiunt, cum referuntur ad diligendum Deum, & proximum, & in hoc seculo, & in futuro. Ex his apparet, quanto mendacio Calvinus dicat lib. 4. Instit. cap. 13. §. 12. nulli veterum venisse in mentem, quod Christus aliquid consuluerit.*

## CAPVT XII.

*Idem confirmatur naturali ratione.*

- 10 **V**LTI MO probatur ratione desumpta, tum ex corporibus naturalibus, tum ex politicis Rebus publicis; Videmus enim in qualibet re naturali, duplicem esse perfectionem: vnā necessariam ad esse, alteram ad bene esse: vnā, sine qua rei natura non est perfecta, alteram, sine qua non est ornata; homo si habeat animam & corpus, perfectus est, quoad naturam attiner, etiam si alioqui deformis, & imperitus, atq; improbus sit. At cum est elegans, politus, formosus, doctus, probus, aliam quandam habet perfectionem; ergo eodem modo homo
- 20 Christianus duplicem habere debet perfectionem: vnā necessariam ad esse, id est, per quam sit verè Filius Dei, & heres regni, quæ consistit in præceptorum obseruatione; alioqui enim non esset Christus bonus legislator, si legem tulisset, quæ non perficeret hominem Christianum: alteram necessariam ad bene esse, quæ consistit in consiliis.

Videmus item in omnibus bene institutis Rebus publicis præter præmia, & pœnas constitutas seruantibus, aut transgredientibus leges, esse etiam præmia quædam decreta heroicis operibus; hinc apud Romanos præter stipendia debita militibus, non violentibus militiæ disciplinam, fuisse etiam coronas ciuicas, ouationes, supplicationes, ac triumphos decretos factis heroicis, vt omnes nouerunt; ita ergo nō abhorret à ratione, immò potius cōforme est rationi, vt præter vitam æternam promissam obseruatoribus legis diuinæ, sint etiam certa præmia, & singulares honores pro iis, qui non solum Dei legem seruant, sed etiam virtutes heroicæ ostendunt.





CAPVT XIII.

Soluuntur obiectiones.

**N** contrarium sunt argumenta tria Pelagianorum, & XIV. Caluinistarum, quę diligenter collegit ex Caluino & aliis Petrus Martyr in comment. 1. Cor. 9.

PRIMUM est, Matt. 19. Dominus ait: *Facilius est camelum per foramen acus transire, quàm diuitem intrare in regnum cęlorum, illud est impossibile, igitur & hoc.* RESPONDEO cum Augustino epist. 89. quęst. 4. in eodem loco esse solutionem; nam Dominus ait: *Quod impossibile est apud homines, possibile est apud Deum.*

SED instant, idē possibile apud Deum dici, quia Deus per Euangelium suum docuit vendere omnia, & dare pauperibus, quod qui fecerit, poterit intrare in regnum cęlorum. RESPONDEO, si ita esset, tunc esset etiā possibile apud homines; nam etiam Ethnici Philosophi potuerunt abiicere omnes facultates, vt de Crate Thebano, & de Antisthene refert B. Hieronymus in epist. 26. ad Pammachium de obitu Paulinę vxoris; sicut etiam apud homines possibile est camelum intrare per foramen acus, si desinat esse camelus, & redigatur ad subtilitatem setę; Christus autem dicit: Id quod impossibile est hominibus, possibile esse Deo, id est, introducere camelum, existentem camelum, per foramen acus, & diuitem, existentem diuitem, in regnum cęlorum; potest ergo diues saluari, si gratia Dei adiutus bene utatur diuitiis.

SECUNDVM argumentum Luc. 14. *Nisi quis renunciauerit omnibus, quę possidet, non potest meus esse discipulus.* RESPONDEO cum Augustino epist. 5. & epist. 89. quęst. 4. loqui Dominum de præparatione animi; nam paulò antè inter ea, quibus renunciare oportet, numerauit Dominus vxorem, & propriam animam.

TERTIO, Matth. 5. *Estote perfecti*, dicitur omnibus Christianis; at qui vult perfectus esse, debet omnia vendere, & dare pauperibus, Matth. 19. ergo, &c. RESPONDEO, in primo loco agi de perfectione necessaria, in secūdo de perfectione utili; sunt enim varij gradus caritatis, vt aliàs expositum est. Argu.



Argumentum PRIMVM Petri Martyris tale est. Deus iubet se diligere ex toto corde, ex tota anima, & ex omnibus viribus, unde nihil superest non debitum quod erogemus; quid enim agimus, corde, anima, mente, ac viribus agimus; quare omnia nostra Deo sunt obstricta. Augustinus libro doctrin. Christ. cap. 22. *Cum autem, inquit, ait toto corde, tota mente, tota anima, nullam vitam nostram partem reliquit, quam non curare debeat.*

Ad hæc, præceptum dilectionis, ut etiam præceptum non concupiscendi, in hac vita impleri non posse; Augustinus affirmat libro de spiritu & littera, cap. vlt. *Ad illam, inquit, vitam iam immortalem pertinet; Diliges Dominum Deum tuum ex toto corde tuo: ad hanc autem, non regnet peccatum in vestro mortali corpore: ad illam, non concupisces, ad istam, post concupiscentias tuas non eas.* Et in libro de perfectione iustitiæ ante medium: *In qua plenitudine caritatis, nimirum in patria, præceptum illud implebitur; Diliges Dominum Deum tuum ex toto corde tuo; nam cum est adhuc aliquid carnalis concupiscentiæ, quod vel continendo fenetur, non omni modo ex tota anima diligitur Deus.*

Adde etiam S. Bernardum, & B. Thomam; nam Bernardus serm. 50. in Cant. *Si placeat, inquit, tibi magis de affectu mali datum fuisse mandatum, non inde contendo, dum modo acquiescas et tu mihi, quod minime in vita ista ab aliquo hominum posset vel potuerit adimpleri.* Thomas in 2. 2. q. 44. art. 6. dicit, in hac vita præceptum dilectionis imperfectè impleri: & quæst. 184. art. 3. dicit, hoc præcepto ita imperari dilectionem sine mensura, ut nullus gradus caritatis remaneat, qui sit in consilio. Quare si in hac vita præceptum primum nunquam perfectè implere possumus, certè multò minus possumus amplius facere, quàm sit nobis præceptum.

RESPONDEO; Vis argumenti principalis potissimum in duobus posita est. Primo, in illa enumeratione potentiarum cordis, animæ, mentis, virium omnium. Secundo, in illa particula: *Ex toto.* Hinc enim videtur colligi debere, nihil omnino posse hominem propter Deum facere, siue corde, siue corpore, quod non teneatur facere. Ostendamus igitur neutra ex parte argumentum concludere.

Quod attinet ad illam enumerationem, quidam ex Patribus existimant, illa omnia esse diuersa; & ideo conati sunt



Sunt distinctionem eorum ostendere, vt videlicet anima significet partem animæ vegetatiuæ, cor sentientem, mens intelligentem, vel aliquid eiusmodi. Vide Gregorium Nissenum in libro de creatione hominis, cap. 8. Theophylactum & Anselmum in commentariis capitis 22. Matth. Augustinum libro 1. doctrinæ Christianæ, cap. 22. Bernardum sermone 20. in Cantica, & Thomam in 2.2. quæstione 44. articulo 5.

Sed simplicior & Scripturæ conformior est eorum sententia, qui docent ista omnia idem significare, & more Scripturæ multa, & varia nomina poni ad rem eandem explicandam, maioris expressionis gratia; itaque idem esse, diligere corde, & diligere anima, & diligere mente, nimirum diligere verè, sincere, non fictè, non simulatè; nam in primis Hilarius, Hieronymus, & Chrysostomus, in commentario ad caput 22. Matth. & Ambrosius ad caput 10. Lucæ, vbi hoc præceptum explicant, nihil omnino de distinctione harum vocum tradunt.

Deinde Matthæus cap. 22. Marcus cap. 12. & Lucas cap. 10. referunt præceptum dilectionis ex libro Deuter. cap. 6. & tamen nullus horum auctorum conuenit in numero, & ordine harum vocum cum altero, quod est euidentis argumentum, nihil esse mysterij in illa enumeratione. Moses dixerat: *Diliges ex toto corde, ex tota anima, & ex tota fortitudine tua.* Matthæus posuit: *Ex toto corde, ex tota anima, ex tota mente.* Marcus: *Ex toto corde, ex tota anima, ex tota mente, ex tota virtute.* Lucas: *Ex toto corde, ex tota anima, ex omnibus viribus, & ex tota mente.*

Præterea 3. Regum 14. de Dauide dicitur, quodd sequutus sit Dominum in toto corde suo; de Iosia autem 4. Regum 23. dicitur, quodd sequutus sit Dominum in toto corde, tota anima, & tota virtute, nec tamen vllus auderet Iosiam Dauide anteponere; Item Moses requirit Deuteronomo 4. vt homo quærat Deum in toto corde, & in tota anima, si eum inuenire desiderat: At Samuel 1. Regum 7. solum requirit, vt Deus quærat in toto corde: Apparet igitur illis omnibus verbis id vnum imperari, vt Deum sincere diligamus.

Porrò illa verba: *Ex omnibus viribus*, non significant ex omnibus potentiis animæ, sed omni virtute, & quod vulgò dicimus,



dicimus, pro viribus; nam in Græcis codicibus nihil est aliud nisi  $\epsilon\epsilon\ \delta\lambda\eta\varsigma\ \iota\ \chi\acute{\upsilon}\sigma$ , quod tamen interpres nunc vertit ex omni virtute, nunc ex omni fortitudine, nunc ex omnibus viribus. Quare ineptè Lutherus in assertione articuli 31. contendit, hoc præceptum impleri non posse, quia vna quædam ex viribus animæ, nimirum appetitus sensitivus, non diligit Deum, cum tamen diligere iubeamur Deum ex omnibus viribus. Sed etiam si iuxta priorem expositionem enumerarentur variae potentiae animæ, ac iuberemur illas omnes exercere ad gloriam Dei, adhuc nihil aduersarij obtinerent. quoniam enim præceptum hoc affirmatiuum est, idèò dicendum esset solum præcipi, vt exerceremus eas potentias propter Deum, quando id necessitas gloriæ eius procurandæ requireret, alio autem tempore si id fieret, opus esset consilij, & supererogationis.

Iam verò quantum ad illā particulam: *Ex toto*, sunt etiam duæ Patrum expositiones; Vna est sanctorum Augustini, Bernardi, & Thomæ, locis notatis, qui docent illud: *Ex toto*, significare, imperari nobis hoc mandato omnes gradus caritatis, quos vel in hoc mundo, vel in alio habere possumus, ita vt semper Deum amemus, & non sit in nobis vllus motus cupiditatis, neq; voluntarius, neq; inuoluntarius, cum Dei amore pugnans; ex quo rectè deducunt, hoc mandatum in hac vita perfectè impleri non posse. Quæ sententia non pugnat cum sententia nostra, de consilijs Euangelicis, tamen si non videretur admodum conformis sacris literis. quod autem non pugnet cum sententia nostra, ex eo patet, quod iidem Patres affirmant, hoc præceptum, licet non possit perfectè impleri in hac vita, non tamen facere præuariantes, si non impleatur.

Vt autem id intelligatur, obseruandum est duobus modis posse aliquid præcipi; Vno modo, vt solum indicetur id quod faciendum est; Alio modo, vt indicetur præcepto id quod faciendum est, & finis, cuius gratia id faciendum est. Si dicat Imperator militibus, pugnate aduersus illam urbem, solum indicat id quod faciendum est; si verò dicat, capite illam urbem, indicat quid faciendum est, & finem etiam illius operis; id enim est, ac si diceret, pugnate ad hunc finem, vt urbem capiatis; interest autem multum inter hos duos modos præcipiendi; nam cum præcipitur priore modo, præuicator



cator est, qui non facit id totum quod præcipitur: cùm verò præcipitur posteriore modo, non est præuicator, qui non facit id totum, quod præcipitur, sed is tantum præuicator est, qui non facit id, quod indicatur per modum medij ad finem. Præceptum enim propriè non obligat, quatenus indicat finem, sed solum quatenus præcipit medium. Itaq; si dicat Imperator, pugnate, peccant milites, si non pugnent; si verò dixerit, capite urbem, non peccant si urbem non capiunt, modò pugnent, ac pugnando dent operam ut illam capi-  
pant.

10

Patres igitur suprà citati, Augustinus, Bernardus, Thomas, existimant hoc præcepto: *Diliges Dominum Deum tuum ex toto corde tuo*, simul imperari medium, & indicati finem; & ideo docent, non posse impleri perfectè hoc præceptum in hac vita, & tamen non esse præuicatore, qui non perfectè illud implet. AUGUSTINVS de spiritu & litera, cap. vlt. posteaquam dixerat, non posse impleri hoc mandatum in hac vita, addidit: *Sed ideo nobis hoc etiam nunc præceptum est, si admoneremur, quid fide exposcere, quò spem præmittere debeamus.* Et infra: *Neq; enim si esse nondum potest tanta dilectio Dei, quanta illi cognitioni plena perfecta que debetur, iam culpa deputandum est, &c.* Et libro de perfectione iustitiæ: *Cur, inquit, non præciperetur homini ista perfectio, quamuis eam in hac vita nemo habeat? non enim rectè curritur, si quò currendum est nesciatur, quomodo autem sciretur, si nullus præceptis ostenderetur?* Et ad finem eiusdem libri docet idem Augustinus, motus inuoluntarios concupiscentiæ, licet hoc præcepto prohibiti sint, tamen aded non esse peccata, ut non sit opus dicere pro cis: *Dimitte nobis debita nostra.*

20

S. BERNARDVS serm. 50. in Cantica: *Nec latuit, inquit, præceptorem, præcepti pondus hominum excedere vires, sed iudicauit facile ex hoc ipso sua illos insufficientia admoneri, & si scirent sanè, ad quem iustitiæ finem nisi pro viribus oporteret, ergo mandando impossibilia non præuicatores homines fecit, sed humiles.* Sic etiam B. THOMAS solum docet hoc præceptum imperfectè seruari, quatenus indicat finem, & in eodem sensu dicit, nullum gradum dilectionis esse in consilio, sed omnes in præcepto, quatenus videlicet hoc præceptum continet, & medium, & finem; nihil enim addi potest ad eam dilectionem, quæ ut finis proponitur, finis enim sine mensura appeti-

QQ



appetitur; quare in eodem loco S. THOMAS affirmat, nullum esse peccatum, non implere hoc præceptum in tota sua latitudine, sed satis esse si aliquo modo obseruetur.

Quocirca remanet iam suus locus consiliis etiam circa hoc præceptum; nam etiam si nihil possim addere huic præcepto, quatenus indicat finem, tamen possum addere quatenus indicat medium: & si non pecco, ex sententia S. THOMÆ, si non amem Deum, nisi vno gradu amoris, certè non teneor in rigore amplius amare; implicat enim contradictionem, quod non peccem, non faciendo quod facere teneor; ergo si addam alterum gradum amoris, amo plus quam teneor, atque eo modo facio actum supererogationis, & consilij.

Demonstrauimus igitur, sententiam istam Patrum, non esse contrariam sententiæ nostræ de consiliis Euangelicis: quod autem hæc sententia non sit conformis diuinis literis, mox ostendemus. EST igitur alia sententia illud: *Ex toto corde*, non significare omnes actus cordis, vel omnem intentionem possibilem, ita ut imperetur, ut nihil corde agamus, nisi Deum diligere, idq; summa vehementia amoris, sed solum ut amemus Deum præcipuo amore, nihilq; illi in amore anteponamus, vel equeamus, ac proinde solum in hoc præcepto contineatur id, quod faciendum est, non etiam finis ob quem faciendum est; Ex quo sequuntur sex quasi corollaria.

PRIMUM est, huic præcepto aduersari omnia peccata mortalia, quia in omni peccato mortali anteponitur creatura creatori. SECUNDUM, huic præcepto non aduersari amorem honestum affinium, & amicorum, licet non referatur actu in Deum, quia non tenemur Deum solum amare, sed eum præcipue. TERTIUM, non aduersari peccata venialia eidem præcepto, quia peccata venialia non mutant vltimum finem. QUARTUM, non aduersari eidem præcepto motus inuoluntarios concupiscentiæ, etiam si rerum aliquo grauissimarum, ut infidelitatis, blasphemiarum, adulterij, &c. nam cum caritas Dei sit inuoluntate, non aduersantur ei, nisi motus voluntarij. QUINTUM, hoc præceptum perfectè in hac vita seruari posse, quia non exigit, nisi ut amemus Deum plus quam creaturas. SEXTUM, posse Deum ex toto corde magis & minus diligi; qui enim propter Deum abstinet



met se à licitis, magis diligit, quàm qui solum se abstinere ab illicitis, & tamen uterq; diligit toto corde.

Quodd autem hæc explicatio sit verior, & Scripturis conformior, quàm superior, multis modis probari potest. PRIMo, quia in Scripturis passim ita accipitur illa vox: *Totum*, vel, *omnis*, ut Matt. 2. *Turbatus est Herodes, & omnis Hierosolyma cum illo*. Et Actor. 21. *Tota confunditur Hierusalem*. In his enim locis significatur, magnam partem eorum, qui erant in Hierusalem turbatos fuisse, non autem omnes omnino, & tamen simpliciter Scriptura dicit: *Omnis Hierosolyma turbata est*. Et: *Tota confunditur Hierusalem*. Sic etiam Genes. 31. dicit Iacob: *Scitis quod totis viribus seruii patri vestro*; & tamen multa alia eodem tempore Iacob fecerat. 2. Reg. 15. *Toto corde uniuersus Israël sequitur Absalon*, aliaque id genus frequentissimè inueniuntur; Scriptura enim videtur sæpe communibus phrasibus: vulgo autem absolute dicimus; Totus sum in hac re, vel totis viribus hoc agam, cum tamen nihil aliud significare velimus, nisi præcipua cura, ac studio nos incumbere.

SECUNDO, Scriptura docet hoc præceptum esse facile, ac 20 præsupponit seruari posse, quod tamen non esset verum, si in hac vita impleri non posset. Deuteron. 10. *Et nunc Israël quid Dominus Deus tuus petit à te, nisi ut timeas Dominum Deum tuum, & diligas eum, ac seruias ei in toto corde tuo, & in tota anima tua*. Et cap. 13. *Tentat vos Dominus Deus vestester, ut palam fiat, utrum diligatis eum in toto corde vestro, & in tota anima vestra, an non*. Lucæ 10. querenti iurisperito: *Quid faciendum sit, ut eternam possidebo*, Dominus respondit: *In lege quid scriptum est? quomodo legi? ait ille: Diliges Dominum Deum tuum ex toto corde tuo, &c. Et Dominus: Hoc fac & viues*. Certè hæc 30 omnia præsupponunt mandatum hoc in hac vita impleri posse, alioqui in promptu fuisset reprehensio.

TERTIO, promissit Deus se facturum, ut tempore noui Testamenti diligatur in toto corde, tota anima, &c. Igitur aut Deus, quod esse non potest, mentitus est, aut hoc mandatum in hac vita simpliciter adimpletur. Deuteron. 30. *Circumcider Dominus cor tuum, & cor seminis tui, ut diligas eum in toto corde, & in tota anima, ut possis viuere*. Hierem. 24. *Dabo eis cor, & faciant me, & erunt mihi in populum, & ego ero illis in Deus, quia reuerterentur ad me in toto corde suo*.



QVARTO, multi hoc mandatum impleuerunt, igitur in hac vita impleri potest. Deuter. 30. *Gaudebit Dominus in te, sicut gausus est in Patribus tuis, si tamen reueraris ad eum in toto corde tuo, & in tota anima tua.* 3. Regum 14. *Non fuisti sicut seruus meus Dauid, qui custodiuit mandata mea, & sequutus est me in toto corde suo.* Eccles. 47. *De omni corde suo laudauit Dominum, & dilexit eum qui fecit illum.* 4. Regum 23. *Similis illi non fuit ante eum Rex, qui reuerteretur ad Dominum in omni corde suo, & in tota anima sua, & in vniuersa virtute sua, iuxta omnem legem Moysi.* Psalmo 118. *In toto corde meo exquisiui te.*

ACCEDAT postremò consensus Patrum, qui nihil impossibile nobis à Deo mandatum esse docent; Vide Origenem homil. 9. in Iosue; Basilium in illud: *Attende tibi, Hilarium in illud Psal. 118. Latum mandatum tuum nimis;* Hieronymum lib. 3. contra Pelagianos, & Augustinum libro de natura & gratia, cap. 69. qui auctor non solum in genere dicit, Deum nihil impossibile præcepisse, sed etiam in specie de mandato dilectionis: *Quomodo, inquit, est graue, cum sit dilectionis mandatum?* Et in Psalm. 56. de hoc ipso mandato: *Neque enim, inquit, imperaret hoc Deus, si faceremus, si impossibile iudicaret, si ab homine ferer.* Vbi videtur Augustinus aut mutasse, aut certè explicauisse priorem sententiam. Bernardus etiam serm. 50. in Cantica, et si exposuit hoc mandatum vno modo de dilectione, quæ hic perfectè haberi non potest, tamen magis propender in sententiam hanc posteriorem, quam etiam sequitur Bonauentura, in 3. distinct. 27. artic. 2. quæst. vlt. & plerique Doctores in eadem distinctione.

Argumentum SECVNDVM. Dominus ait Matth. 7. de lege sua: *Quàm angusta porta est, & arcta Via, quæ ducit ad vitam, & pauci sunt qui inueniunt eam.* Quomodo ergo non errant, qui eam tam latam & facilem prædicant, vt etiam dicant, posse hominem plus facere, quam lex exigit?

RESPONDEO, idem Dominus ait de lege sua Matth. 23. *Iugum meum suauis est, & onus meum leue.* Et Dauid de lege Domini sub eadem metaphora Psal. 118. *Latum mandatum tuum nimis.* Et Apostolus 1. Ioan. 5. *Et mandata eius graui non sunt.* Quare lex Domini difficilis est, & facilis: difficilis ex natura sua, quia difficile est attingere medium, in quo virtus



virtus consistit, facile verò est aberrare à scopo; difficiliore-  
tiam redditur ex naturæ corruptione; difficile enim est aua-  
ro facere eleemosynam, luxurioso continere, &c. At facilis  
est habenti gratiam & caritatem; gratia enim & naturam sa-  
nat, & dirigit, atque inclinatur ad medium attingendum; vt  
etiam difficile est homini pingui & onusto ingredi portam  
etiam vtcunq; latam, at homini tenui, & nudo non est diffi-  
cile ingredi portam, etiam vtcunque angustam. Vnde S. Leo  
serm. 5. de Epiphania: *Nihil, inquit, arduum est humilibus, ni-  
hil asperum mitibus.* Et B. AVGVSTINVS libro de natura & to  
gratia, cap. 69. *Omnia, inquit, sunt facilia caritati.* Et Dauid  
Psalm. 118. *Viam mandatorum tuorum cucurri, cum dilatasti cor-  
meum;* certè autem qui currit, cum solum ambulare teneat-  
tur, plus facit quàm ei imperatum sit.

Argumentum TERTIVM. In opere nostro semper ali-  
quid deest, ergo nunquam implemus legem, ergo multò mi-  
nus possumus facere opera supererogationis. Probat ur an-  
tecedens, quia Paulus ad Rom. 7. dicit, *se mente seruire legi*  
*Dei, carne autem legi peccati;* & Iob Verebatur omnia opera  
sua, Iob. 9. & Isaias cap. 64. vocat pannum menstruatæ omnes  
injustitias nostras, & Dauid clamat Psalm. 142. *ne intres in indi-  
cium cum seruo tuo, quia non iustificabitur in conspectu tuo o-  
mnis viuens.*

RESPONDEO, negandum esse antecedens; nam si nullo  
modo legem seruare possemus, mentiretur Ioannes, cum  
ait: *Et mandata eius graua non sunt,* 1. Ioan. 5. & Dominus,  
cum ait Matth. 19. *Si vis ad Vitam ingredi, serua mandata,* iu-  
uenem illum non docuisset, sed delusisset, ac si dixisset, si vis  
in cælum ascendere, fac tibi remigium alarum, & vola per  
aërem; immò sequeretur hominem nunquam peccare; non  
enim peccat qui non facit quod non potest, & Deus esset om-  
ni Tyranno iniquior, & crudelior, quippè qui tributum  
perereret quod nemo posset soluere, & hoc ab amicis suis pe-  
tereret. Adde quod Basilius oratione in illud: *Attende tibi,* di-  
cit impium esse asserere, aliquid impossibile Deum præce-  
pisse, quod idem docent omnes Patres.

Ad PRIMVM ergo locum dico, Paulum loqui de moti-  
bus concupiscentiæ inuoluntariis, qui non peccata, sed pœ-  
næ sunt.

Ad SECVNDVM dico, contrarium inde elici, ideo enim



Iob verebatur omnia sua opera, quia metuebat ne aliquid in eis imperfectionis misceret; illi autem propriè metuunt, qui vident posse vitari malum quod metuunt; semper enim coniuncta sunt spes, & metus; qui enim certò sciunt nò posse vitari, desperant, & dolent potius quàm metuunt. Vnde B. GREGORIUS in hunc locum scribens, ait: *Ipsa bona nostra, quia insidiantis culpa euadere gladium nequeunt, nisi sollicito quotidie timore muniantur, per sanctum virum nunc rectè dicitur, Verebar omnia opera mea.*

10 Ad TERTIUM dico cum Hieronymo ibidem, Prophetam loqui in persona grauissimorum peccatorum, qui si qua opera bona faciebant, saltem moraliter, ea inquinabant admixtione multorum criminum; nos autem nò de peccatoribus, sed de iustis loquimur, cum dicimus homines posse legem seruare, & etiam amplius facere; nec tamen admittimus omnia opera peccatoris necessariò esse peccata; nam Isaias non comparat opera peccatorum sordibus, sed panno sordidato, in quo sunt partes nitidæ, & partes maculatæ.

Ad VLTIMUM dico, cum Augustino libro de perfectione iustitie, Hieronymo in epist. ad Ctesiphontem, & Gregorio in hunc Psalmum, non posse hominem iustificari coram Deo, quia nemo est qui non habeat peccata venialia, quæ tamen non impediunt quin homo sit iustus, & multa opera bona faciat, etiam supererogationis; non enim dicit David, non iustificabitur omne opus, sed omnis viuens; vel dicendū cum Arnobio, Hilario, Hieronymo, & Eutymio in hunc locum, non posse ullū iustificari si comparatur cum Deo; tam sublimis enim est Dei iustitia, vt eius comparatione omnis hominum & Angelorum iustitia, iniustitia videatur, sicut candela

30 accensa coram sole, non lucere, sed vmbra facere videtur.  
Argumentum QUARTVM. Verba Christi Luc. 17. inquit Martyr: *Cum feceritis hæc omnia, dicite, serui inutiles sumus, quæ debemus facere, fecimus.* istud commentum proflus excludunt. & confirmatur; nam seruus quidquid est, Domini est, & quidquid facit, Domino facere tenetur.

RESPONDEO, Petrum non egisse hoc loco fidelem Martyrem; nam omisit ea verba in quibus latebat solutio; non enim Dominus ait, cum feceritis omnia, dicite, serui inutiles sumus, &c. Sed cum feceritis hæc omnia, quæ præcepta sunt vobis, dicite, serui inutiles sumus, quæ debemus facere, fecimus. Vnde



Vnde AMBROSIVS libro de viduis: Hoc, inquit, Virgo non dicit, hoc non dicit ille, qui bona sua vendidit, sed quasi reposita expectat pramiam sicut S. Apostolus ait; Ecce nos reliquimus omnia, & sequuti sumus te; quid ergo erit nobis nō enim quasi inutilis seruus, quod debuit facere, fecisse se dicit, sed quasi Scitis Domino, qui commissi sibi alia quasitis multiplicauit & seris, mercedem fides, atq; virtutis, bene sibi conscius meritorumq; securus expectat. Adde quod Dominus non ait, serui inutilis estis, sed dicit, *serui inutilis sumus*; vult enim nos humiles esse & non ia stare nostra merita, sed ipse tamen postea dicit: *Euge serue bone & fidelis*; inutilem autem seruum vocabit eum duntaxat, qui praeceptis non obedierit, vt patet Matth. 25. in parabola de talentis: *Inutilem*, inquit, *seruum proicete in tenebras exteriores*.

Ad confirmationem, fateor, seruum, quidquid est, Domini esse, & quidquid agit, in lucrum Domini cedere: at non inde sequitur ex debito eū facere quidquid facit; quid enim si velit sibi de somno concessio aliquid subtrahere, vt pro Domino suo aliquid agat, nōne plus faciet quā tenetur?

Argumentum QVINTVM. Iubemur quotidie dicere Deo: *Dimitte nobis debita nostra*, ergo nunquam facimus quātum debemus, ergo multo minus facimus plus quā debemus.

RESPONDEO, quotidie nos Deo dicere: *Dimitte nobis debita nostra*, propter peccata venialia, quibus in hac vita, aut nunquam, aut raro caremus, quibus tamen non obstantibus, & iussi esse, & supererogationis opera facere possumus.

Argumentum SEXTVM. Apostoli Matt. 19. non solum non cogitauerūt de operibus supererogationis, sed etiam de ipsa salute dubitarunt, dicentes: *Quis poterit saluus esse?* Quibus Dominus non ait, non solum salui esse, sed etiam supererogare potestis; sed ait: *Quod impossibile est hominibus, possibile est apud Deum*. RESPONDEO, apud homines impossibile esse, & saluari, & opera supererogationis facere; apud Deum vtrumq; esse possibile.

Argumentum SEPTIMVM. Hieremias dicit: *Maledictus qui facit opus Dei negligenter*, c. 48. Nemo autē est, cui non subrepat aliqua negligentia; ergo nemo satis facit debito suo erga Deum. RESPONDEO, loquitur de negligentia graui, quē amicitiam Dei tollat, vnde in Hebræo *חַמְדָּה* fraudem potius, quā negligentiam significat, sicut Hieronymus etiā vertit.



Argumentum OCTAVVM. Christus ait: *Hoc est praeceptum meum, & diligatis inuicem, sicut ego dilexi Vos*, Ioan. 13. At Christus sic nos dilexit, vt pro nobis sit mortuus; ergo & nos debemus pro fratribus animas ponere, vt concludit Ioannes, 1. Ioan. 3. at hæc est summa caritas, cui nihil addi potest: *Maiorem enim caritatem nemo habet, quam & animam quis ponat pro amicis suis*, Ioannis 13. Ergo nullus remanet locus consiliis, & operibus supererogationis. RESPONDEO, non tenemur animas ponere pro fratribus, nisi quando id necessarium est ad eorum salutem æternam; si ergo id faciamus, cum non est necessarium, sed vtile tantum, opus consilij & supererogationis faciemus. & similiter si proximo beneficiam, quando non est in extrema necessitate, opus facio supererogationis.

Argumentum NONVM. Iubet Deus Deut. 4. nihil addi præceptis suis, malè ergo adduntur consilia. RESPONDEO, iubet Deus nihil addi præcepto, quod ipsum corrumpat, non autem aliquid, quod ipsum perficiat; consilia autem perficiunt, non corrumpunt præcepta, vt patet. Vide plura, si libet, de hoc argumento in lib. 4. de Pontifice, cap. 17.

Argumentum DECIMVM. Ita sumus Deo obligati, vt non possimus vnquam facere, quàm debemus, ergo nunquam supererogamus. Antecedens patet; nam quidquid habemus boni, ab illo habemus; ergo omnia nostra sunt ei debita, & si millies pro Deo vitam poneremus, nunquam tamen redderemus ei aliquid æquale.

RESPONDEO, argumentum probat, potuisse Deum à nobis exigere quidquid possumus, non tamè voluisse. Constat enim ex diuinis literis, Deum pro sua benignitate imposituisse nobis iugum suaue, & onus leue. Præterea probat hoc argumentum, nunquam hominem posse facere plus quàm debet, immò etiam nec quantum debet, si consideremus beneficia Dei nobis collata; nunquam enim ei reddemus æquale; & tamen possumus facere plus quàm debemus, si consideremus, legem nobis à Deo impositam, & proinde possumus facere plus quàm reuera facere teneamur; nam etsi non possumus superare, aut æquare Dei beneficia nostris operibus, tamen non propterea rei efficiamur, quia non tenemur id præstare, sed id solum, quod Deus imperauit.



Argumentum VñDECIMVM. Ad Philip. 4. dicitur: Quod re-  
liquum est, fratres, quaecunq; sunt vera, quaecunque honesta, qua-  
ecunq; iusta, quaecunq; pura, quaecunq; accommodata, quaecunq; boni  
nomini: si qua virtus, & si qua laus, hac cogitate, quæ & didici-  
stis, & accepistis, & audistis, & vidistis in me, hac facite, & Deus  
pacis erit vobiscum: Inueniant, inquit Petrus Martyr, isti acuri  
homines, quod huic præcepto Pauli superaddi possit. RESPON-  
DEO, hæc omnia debere accipere negatiue, vt sensus sit; Nihil  
cogiretis, neque agatis, nisi quod iustum est, quod verum,  
quod pudicum, &c. & hoc modo multa possunt superaddi  
affirmatiua; alioqui si iuberet Paulus, vt omnia, quæ sunt  
vera cogitarem, deberemus cogitare, non solum om-  
nem Scripturam sanctam, sed etiam totam Philosophiam,  
ac præsertim Mathematicas demonstrationes, quæ verissi-  
mæ sunt.

Argumentum DVODECIMVM. Te, inquit, interrogo, an pos-  
sis aliquid facere vltra legem, vel non? si non potes, conueni-  
mus; si potes, ergo teneris id facere; nam lex requirit omnes  
tuas vires, & quidquid potes; ergo implicat contradictio-  
nem, quod possis vltra legem aliquid facere. RESPONDEO, 20  
nego, legem requirere omnes vires, & quidquid possumus;  
solum enim requirit, vt impleamus, quod præcipitur, si-  
ue nobis superent vires, siue non; alioqui 1. ad Corinth. 7.  
Paulus non potuisset dicere de homine soluto: Quod vult,  
faciat, non peccat, si nubat. Sic enim argumentabor: Aut ille  
potest continere, aut non; si non, ergo tenetur nubere, vt Cal-  
uinus & Martyr docent; si potest, ergo tenetur continere; lex  
enim requirit quidquid possumus; ergo nunquam datur  
tempus, quo liceat dicere: Quod vult, faciat, non peccat si  
nubat.

Argumentum DECIMVM TERTIVM. Non caret superbia  
& arrogantia infinita, vt dicas, te plus facere quam tenearis,  
& Christo fit iniuria non vulgaris, qui frustra dicitur mor-  
tuus, si valuisses legem præstare, aut plus efficere, quam in il-  
la præceptum fuerit.

RESPONDEO, non timuisse istam superbiam infinitam il-  
las virgines, quæ, teste Augustino, serm. 18. de verbis Aposto-  
li, dixerunt, Amando te plus facimus, quam præcipis: neque  
illos omnes Patres, quos supra citauimus: sed hoc reuera  
non caret superbia infinita, propter tam debiles ratiunculas



opponere se omnibus sacris Doctotibus, immò & ipsi Scripturæ, quod Petrus Martyr facit. Illud autem de Christo est manifesta calumnia; non enim dicimus, posse hominem suis viribus, aut sine Christi gratia legem seruare, vel aliquid superaddere.

„ Argumentum DECIMUM QVARTVM. Nolle Deum plus  
 „ amare, si plus possis, grauissimum peccatum est, ergo nihil  
 „ potes superaddere, quod non debeas, probatur antecedens  
 „ primò, quia negat Deum esse summum bonum, qui non vult  
 10 eum amare quantum potest: secundò, quia abutitur Dei do-  
 „ no, qui potest plus diligere, & non vult; nam posse plus dili-  
 „ gere, sine dubio Dei donum est. Adde, quod qui talentum  
 „ abscondit, à Deo punitus est, Matth. 25. & peccatum est in-  
 „ gratitudinis, nolle facere quod potes pro eo, cui non potes  
 „ referre paria.

RESPONDEO, nolle plus amare si plus possis, esse peccatum, si ex contemptu id fiat, vel si necessitas exigit maiorem illum amorem; vel si id fiat ex superbia, quasi putes te satis esse perfectum; vel denique si ex accidia & pigritia nolis vllò  
 20 modo amplius proficere; id enim repugnat statui viatoris; at si velis quidem plus diligere, & proficere, sed iuxta conditionem, & gradum tuum, etiam si nolis ad altiore statum ascendere, quamuis possis, nō peccas. Verbi gratia, cui est imperatum, vt proficiscatur Venetias, si in media via consistat, & nolit progredi, peccat: at si velit progredi, sed per viam communem, non per compendia, & si velit in ipsa via ambulare, non currere, non peccat.

Igitur ad PRIMVM dico, illum negare Deum esse summum bonum, saltem factis, qui non vult eum summo amore diligere, id est, super omnia alia: qui autem diligit Deum super  
 30 omnia, ille Deum habet pro summo bono, etiam si eum non tam ardentem amet, quàm fortè posset, vel non faciat pro eo omnia, quæ posset; alioqui semper essemus perplexi, immò etiam semper peccaremus. quantumuis enim ardentem Deum diligamus, semper tamen videmur paulò ardentius posse diligere, si paulò amplius conemur.

Ad SECUNDVM dico, illum abuti Dei dono, quieo non utitur quando est necessarium; qui autem paratus est eo uti, si necessarium sit, etiam si nunquam fortasse utatur, non dicitur eo abuti; nam ille cui Paulus dicit I. Corinth. 7. *Quod*  
*scitis.*



*Cult. faciat*, sine dubio potuit continere, & tamen ei dicitur: *Non peccat si nubat*; & B. AVGVSTINVS de bono coniugali, cap. 21. dicit, Abraamum habuisse donum continentiae, non minus, quàm Ioannes habuerit, ita vt potuerit semper continere, & tamen nunquam continuisse, ne in extrema quidem senectute: & Ioannem Euangelistam habuisse donum patiendi martyrium, non minus quàm Petrum, & tamen non exercuisse illud donum, vt fecit Petrus: Accusare autem Abraamum, vel Ioannem, quasi donis Dei abusi sint, extremae dementiae est.

Ad illud de ingratitudine dico, non esse ingratum benefactorium, qui benefactori adest, cum necessitas eius id postulat, aut cum ipse operam nostram requirit, & qui voluntati eius satisfacit: porro Deus contentus est vt legem eius seruemus, neque aliud à nobis requirit, etiam si possimus plura praestare.

Ad illud de talentis dico, seruum illum fuisse damnatum, quia habuerat praecipuum negociandi: quomodo nunc qui habet talentum concionandi, & simul habet praecipuum, quia est Episcopus, punietur, si non concionetur; at qui habet idem talentum, sed non habet praecipuum, non punietur, vt patet de S. Antonio, &c.

### CAPVT XIII.

*Explicatur nomen, & definitio voti.*

**S**EQVITVR Disputatio tertia, quae est de votis monasticis, cuius disputationis sex erunt partes. Primum enim, exponemus breuiter nomen & definitionem voti. Deinde, explicabimus sententiam aduersariorum. Tertio, probabimus omne quod sit ex voto, esse cultum Dei. Quarto, vota non esse propria Iudaeorum, sed etiam à Christianis rectè fieri ostendemus. Quinto, de rebus praecipis, qualis est promissio facta in Baptismo, non solere propriè fieri vota. Sexto, de rebus non praecipis, ac nominatim de continentia, paupertate, & obedientia, vota rectè fieri demonstrabimus.

Quod ad PRIMUM, nomen voti apud Latinos ambiguum est; significat enim promissionem, & orationem, ac desiderium; dicimus enim, suscepi votum continentiae, id est, promissum



promissi Deo continentiam; item, pro voto mihi continentia succedit, id est, ut desiderabam; & vota pro continentia Deo fudi, id est, precatus sum à Deo continentiam. Apud Græcos non est idem nomen pro voto, & oratione, tamen sunt duo affinia nomina; nam  $\epsilon\upsilon\chi\eta$  significat votum,  $\pi\rho\omicron\sigma\epsilon\upsilon\chi\eta$  orationem: apud Hebræos voti & orationis nomina nullam habent affinitatem; votum enim dicitur  $\וְרָרָה$ , oratio  $\וְרָרָה$ , cuius reica est ratio, quod apud Græcos & Latinos, cum hæc nomina inuenta sunt, non erat vlla vera pietas, & ideo nihil  
 10 homines Deo, vel Diis vouebant, nisi ad id, quod desiderabant impetrandum, & propterea semper votis annectebant preces, iuxta illud Virgilij Æneidos 6. *Cessas in vota precesque.*

Hinc igitur Græci, ut observauit Gregorius Nissenus orat. 2. in orationem Dominicam, vocauerunt orationem  $\pi\rho\omicron\sigma\epsilon\upsilon\chi\eta$ , quia post votum fiebat, quod vocabat  $\epsilon\upsilon\chi\eta$ . Latini autem (ut diximus) eodem nomine promissionem Deo factam; & preces ad Deum appellabant. At Hebræi,  
 20 quia Deum piè colebant, & absoluta etiam vota facere consueuerant sine vlla relatione ad preces, ut nos quoque Christiani facimus, propterea propriis & diuersis nominibus hæc duo nominabant.

Potest autem definiri votum: *Religiosa promissio alicuius excellentioris boni, Deo facta, libera voluntate.* PROMISSIO dicitur, quasi contractus quidam inter Deum & hominem. Nec enim sufficit ad votum, proposuisse ac statuisse aliquid facere, nisi etiam promittatur; votum enim includit obligationem vnius ad alterum; non enim obligat votum solum ratione veritatis, id est, quia tenetur, qui vouit, verum facere,  
 30 quod dixit; sed etiam ratione fidelitatis, quia tenetur, alteri fidem datam seruare; hæc autem obligatio non potest nasci ex proposito solo, quod quis apud se concipit, sed necessario promissionem requirit. RELIGIOSA dicitur, ut significetur, cuius virtutis actus sit votum, nimirum religionis.

Est autem obseruandum, in voto semper esse duas actiones; alteram materialem, alteram formalem. Materialis est, de qua fit votum, ut ieiunare, sacrificare, &c. Formalis est ipsa promissio ieiunandi, vel sacrificandi, & promissionis adimpletio; quare formalis actio semper est actus religionis mater



materialis autem interdum est religionis, vt si quis voueat quoridie sacra facere; interdum alterius virtutis, vt si quis voueat sexta feria semper ieiunare. EXCELLENTIORIS boni dicitur, vt determinetur materia voti; nec enim voueri potest, nisi id, quod melius sit facere, quàm omittere.

Ex quo perspicuum est, quinque rerum genera excludi a materia voti. PRIMO, peccata, vt cùm Iudæi voverunt se occisurum Paulum, Act. 23. nam vouere peccata, non est Deo munus promittere, sed minari. SECUNDO, opera indifferentia, vt non ire ad forum; non enim potest Deo placere, quod est vanum & inutile: *Displicet enim ei stulta promissio*, Eccles. 5. TERTIO, opera impossibilia, vt si quis voueat se profecturum in Hierusalem sine naui. QUARTO, opera necessaria, vt si quis voueat se moriturum quando placuerit Deo. QUINTO, opera bona, quæ tamen maiora bona impediunt, vt si quis voueat se ducturum vxorem. Quanquam hoc ipsum certo tempore, ac certæ personæ potest esse melius facere, quàm omittere; proinde tum erit legitima voti materia, etsi absolute contra iudicandum sit.

DEO FACTA dicitur, vt intelligamus, vota differre à iuramentis, licet vtraque sint actus religionis, & in materia ferè copueniant; vota enim fiunt Deo, iuramenta hominibus per Deum; non autem hinc excluduntur vota, quæ fiunt Sanctis; nam vel ea sunt vota materialiter, non formaliter, vt quidam docent, qui existimant, in votis Sanctorum duas esse promissiones; vnā Sanctis, quibus aliquid promittitur; alteram Deo, cui promittitur adimpletio promissionis factæ Sanctis, & hanc solam propriè votum esse dicunt; vel (quod verius puto) vota fiunt verè Sanctis, sed vt sancti sunt, id est, vt excellentissimo modo participant Dei naturam & gloriam, de qua re disputauimus in lib. 3. de Ecclesia triumphante, cap. 10.

Addimus vltimò, LIBERA VOLUNTATE, vt distinguatur votum à lege communi; votum enim est lex quædam priuata, & obligat more legis; sed lex communis obligat etiam nolentem, & inuitum; votum autem est lex, quam nos ipsi nobis ferimus, & proinde non obligat, nisi eum, qui sponte votum fecerit; & hinc non habentur rata vota facta ante vsum rationis, ne ea, quæ propter ignorantiam, aut metum censentur inuoluntaria.



## CAPVT XV.

*Explicatur status questionis.*

**I**AM VERO, vt breuiter explicemus, quibus in rebus ab aduersariis dissentiamus; Lutheri & Caluini sententia eadem esse videtur; vterque enim tria quædam de votis docet. PRIMVM, vota ad colendum Deum non posse fieri, nisi de rebus præceptis, proinde  
 10 vnum esse commune votum fidelium, promissionem illam, quam facimus in Baptismo.

SECVDVM, vota de rebus à Deo non præceptis posse fieri, si non ad colendum Deum, aut satisfaciendum pro peccatis, sed ad negotia huius vitæ expeditius peragenda, aut ad vitanda peccata, aut ad alios bonos fines fiant; exempli causa, docet Caluinus, eum, qui sæpe in vitium ebrietatis labitur, rectè facturum si voueat, se triduo aquam bibiturum, si iterum inciderit in ebrietatem; quomodo etiam existimat, Apostolorum tempore viduas quasdam vo-  
 15 uisse continentiam, vt expeditius fungerentur munere Diaconissarum.

TERTIVM, vota Monachorum impia, irrita, & omnino soluenda esse, quòd fiant cum opinione cultus, & tamen de iis rebus sint, quas Deus nusquam præcepit. Hæc omnia Lutherus docet in libro de votis monasticis, & Caluinus lib. 4. Institutionum, cap. 13. Nec dissimilia docent Confessio Augustana art. 27. & Confessio VVirtembergensis, cap. de votis monasticis.

Petrus Martyr in libro de cœlibatu & votis monasticis, 20 duo dicit pugnancia cum doctrina Lutheri & Caluini. PRIMVM est, vota in Testamento veteri fieri potuisse, vt etiam sacrificia & carimonias ceteras, in nouo Testamento fieri non posse, cum sint abrogata cum reliquis Iudaicis carimoniis, SECVDVM est, promissionem, quæ fit in Baptismo, non esse votum, in tertio dicto cum

Luthero & Caluino concordat.

CAPVT



CAPVT XVI.

*Omne quod fit ex voto, esse cultum Dei.*

**V** Tigitur ad disputationes veniamus, statuo hanc propositionem: *Omne quod fit ex voto, etiam si aliqui non sit à Deo praeceptum, verè & proprie est cultus Dei.* Hæc propositio est contra Lutherum & Calvinum, qui vota de rebus non præceptis, docent non posse fieri ad colendum Deum; quasi aliqua esse possint vera vota, quæ non sint cultus Dei. Probo igitur positam assertionem.

PRIMO, vouere est actus religionis, ergo & reddere siue implere votum est actus religionis, siue fiat de re præcepta, siue non præcepta. Probatur antecedens ex illo Isaia 15. *In illo die cognoscent Aegyptij Dominum, & colent eum in hostiis & muneribus, & vota conebunt, & soluent.* Vbi posteriora sunt explicationes priorum; vota enim munera sunt. Præterea hæc est natura voti, vt rem aliqui non ordinatam ad Dei cultum, ordinet ad cultum Dei, iuxta illud Deuter. 12. *Quidquid sacrificaueris & conueris, &c.* Deniq; faretur Calvinus lib. 4. ca. 13. §. 2. vouere esse officium religionis. Probatur iam consequentia; nam promittere & soluere, ad eandem virtutem pertinent; sed per id quod fit ex voto, etiam si non præceptum, impletur votum, ergo per id colitur Deus.

SECUNDO, omne votum est promissio Deo facta, vt etiam Calvinus docet initio, cap. 13. lib. 4. Instit. ergo votum quodcumq; implere, est fidem Deo seruare; at seruare Deo fidem, est Deum immediatè colere, & honorare: sicut è cōtrario si dem ei nō seruare, est iniuriam illi facere; ergo cuiuslibet voti impletio cultus Dei est.

TERTIO, omne iuramentum est cultus Dei, etiam si fiat de re non præcepta; vt, si quis iuret, se non bibiturū vinum, vt Calvinus ipse affirmat libro 2. cap. 8. §. 23. Institutionum, ergo & votum de re eadem erit cultus Dei. Probatur consequentia, nam adeò similia sunt iuramenta & vota, vt in Scripturis saepe iuramentum pro voto accipiat, vt patet Num. 30. *Si mulier, inquit Scriptura, habens virum conuerit aliquid, & Verbum de ore egrediens, animam eius obligauerit iuramento,*



ramento, *Soti* rea erit, reddet quod promissit, &c. Præterea sicut per iuramentum de re non præcepta facienda, honoramus Deum, quia protestamur, eum esse immutabilem veritatem, & veritatis assertorem; ita per votum de re non præcepta, sed tamē bona, Deum honoramus, quia protestamur ei, ut summo bono, placere actus virtutum.

QUARTO, soluere ex voto aliquid non præceptum, sed tamen bonum, falsis Diis, est peccatum, & nō aliud, quā idololatriæ, ergo soluere Deo vero ex voto rem eandem, erit actus latræ.

QUINTO, si quis voueat abstinere per triduum à vino, & non faciat, sine dubio peccat: at non peccat peccato intemperantiæ; non enim est actus necessarius temperantiæ abstinere à vino, ergo peccat, quia Deum afficit iniuriæ, non seruando illi fidem, ergo si abstineat, Deum honorat.

SIXTO, omni actu virtutis etiam non præcepto, nec ex voto facto, sed facto tamen propter Deum, colitur Deus; ergo multo magis, si is actus fiat ex voto, eo Deus coletur. Probatur antecedens. PRIMO, Scripturæ testimonio; nam Luca 2. dicitur Anna seruasse Deo ieiuniis & orationibus, & est verbum λατρεῖν, quod propriè cultum significat, Philip. pens. 4. *Repletus sum acceptis ab Epaphroditō, quæ misistis in odorem suauitatis, hostiam placentem & acceptabilem Deo.* Hebr. ultimo: *Beneficentiæ & communicationis nolite obliuisci; talibus enim hostiis promeretur Deus.* Iacobus. *Religio munda apud Deum est Visitare pupillos & Viduas, &c.* Quæ omnia intelliguntur etiam de eleemosyna non præcepta.

SECUNDO, ex Patribus. Nam TERTULLIANVS libro de resurrectione carnis ait: *Nam sacrificia Deo grata, conflictationes dico animæ, ieiunia, & seras, & aridas escas, & appendices huius officij sordes, caro de proprio suo incommodo instauratur, Virginitas quoque, & Viduitas, & modesta in occulto Matrimonij dissimulatio, & Sna notitia eius, de bonis carnis Deo adolentur.* EPIPHANVS hæres. 48. *virginitatem & abdicationem rerum vocat approbatum Dei cultum.* HIERONYMVS lib. 1. in Iouinianum: *illa, inquit, Virginitas hostia est Christo, cuius nec animalium cogitatio, nec carnem libido maculauit.* AVGVSTINVS libro de bono viduitatis, cap. 9. de continentia loquens: *Nulla, inquit, Christo subtrahatur oblatio, &c.* Et lib. 10. de ciuit. Dei, cap. 6. sacrificium vocat omne opus bonum propter Deum factum;



factum; certum autem est, sacrificium propriè cultum esse Dei.

SEPTIMO, votum de re præcepta non est verum & proprium votum, nisi quatenus res illa concipitur, ut non præcepta, ut paulò pòst ostendemus; igitur vel votum de re non præcepta cultus Dei est, vel nullum votum est cultus Dei, sed hoc est falsum, ergo illud verum.

OCTAVO, si votum de re non præcepta, non est cultus Dei, ergo nec ipsum vouere absolute est cultus Dei; nam ipsum vouere nusquam est præceptum. at hoc est contra ipsum Caluinum, qui docet, vouere esse actum religionis.

NONO, probatur exemplis Scripturarum. Nam primum votum legitur Genes. 28. *Votum vouit Iacob, si fuerit Dominus mecum, &c. erit mihi Dominus in Deum, & lapis iste, quem erexit, vocabitur domus Dei, cunctorumq; quæ dederit mihi, decimas offeram tibi.* Quod hoc sit votum de re non præcepta, patet, quia a loqui peccasset Iacob faciendo votum cōditionatum de re præcepta. Quòd autem hoc votum fuerit factum ad colendum Deum, patet, nam habere lapidem pro domo Dei, id est, pro ara, & offerre decimas, sunt actus religionis. Aliud votum fuit Davidis de extruendo templo, de quo Psal. 131. *Vouit Deo Iacob, &c.* quòd hoc votum fuerit de re nō præcepta, patet ex lib. 2. Reg. ca. 7. ubi Deus audito hoc voto Davidis, & laudata eius voluntate, dicit, se non præcepisse, ut sibi fieret templum, nec velle fieri à Davide. Quòd autem David hoc loco voluerit colere Deum, patet, quia extruere templum est actus religionis.

Deniq; omnia vota, quæ leguntur in Scripturis, Leuit. 27. Num. 6. & 30. Deuter. 12. & 23. vota erant de rebus non præceptis, ut ex ipsis locis patet, & ramen quod placerent Deo, patet, quia seuerissime illorum solutionem exigebat: *Si uoueris, inquit Deut. 23. non tardabis reddere, quia requirit illud Dominus; & si moratus fueris, reputabitur tibi in peccatum; si nolueris polliceri, absq; peccato eris.* Vbi clarè vides, votum liberè factum, a Deo seuerè exigi.

Sed soluamus argumentum illorum. Sic igitur argumentantur: Omnis cultus voluntarius, id est, quem Deus non præcepit, Deo placere non potest; ergo non debet fieri votum de re non præcepta ad colendum Deum. Probatur ant-



recedens; nam Coloss. 2. Apostolus reprehendit omnem  
 εθελοθρησκείαν, sic enim est in Græco, quod noster inter-  
 pres vertit, superstitionem, & Rom. 14. ait: *Quod non est ex fi-  
 de, peccatum est.* Quibus verbis indicat, peccatum esse id ag-  
 gredi, quod fides ex verbo Dei concepta non ostendit, qua-  
 liter à Deo testimetur, tales autem sunt omnes cultus volun-  
 tarij.

Ad illud, ad Coloss. 2. de εθελοθρησκεία, quidam respon-  
 dent, Paulum eo loco nō accipere in malam partem cultum  
 10 voluntarium, sed in bonam, tamen quia vulgata editio ver-  
 tit, superstitionem, & Hieronymus in epistola ad Algasiam,  
 quæst. 10. Augustinus in epist. 59. ad Paulinum, quæst. 7. Am-  
 brosius, Theodoretus, Oecumenius, & alij omnes in hunc  
 locum, accipiunt eam vocem pro simulata religione: dicen-  
 dum est, Apostolū hoc loco voluntarium cultum appellare  
 non eas actiones, quæ non sunt à Deo præceptæ, id enim re-  
 pugnet plurimis Scripturarum testimoniis, ut iam proba-  
 uimus, sed eas, quæ nec à Deo probatæ, vel commendatæ  
 sunt, nec reuera ex natura sua sunt materia cultus, sed sunt  
 20 res inanes, & tamen ab aliquibus vsurpantur quasi essent  
 cultus; quales sunt qui dicuntur supersticiosi cultus, ut cum  
 aliqui ponunt religionem in numero lotionum, ut Iudæi om-  
 lim faciebant, & Turcæ hoc tempore faciunt, qui putant val-  
 de se colere, Deum, si toto corpore sæpius loto ad orandum  
 accedant; loquitur enim Apostolus de iis, qui se abstinabant  
 à cibis quibusdam, tanquam natura sua immundis, & in co-  
 ponebant religionem, si tales cibos nunquam attingerent.

Ad illud ex Rom. 14. dico, cum communi expositione vec-  
 30 terum, fidem accipi pro conscientia, ut sensus sit, peccatum  
 esse id omne, quod fit contra conscientiam. Sed admissa eti-  
 am Caluini expositione, non video, qua ratione inde colli-  
 gatur, non placere Deo cultus, quos ipse non præcepit; nam  
 fides ex verbo Dei concepta, non ostendit solum placere  
 Deo quæ ipse præcepit, sed etiam quæ ipse consuluit; & quæ  
 neque præcepit, neque consuluit, sed tamen ex se bona sunt  
 quales sunt actus omnium virtutum, ut patet ex in-

finitis locis, ubi iubet sibi reddi vo-  
 ta sponte facta.



CAPVT XVII.

*Non fuisse Iudæorum proprium vota facere, sed cum Christianis etiam id esse commune.*

**R**EELLENDANUNC EST Petri Martyris sententia, qui in libro de votis & cœlibatu contra Smithæum, aduersus omnes, cū Catholicos, tum hæreticos, omnia omnino vota Christianis interdicat: *Quare, inquit, Et alia carimonia per Christum sublata sunt, ita & votendi ratio debet facessere.* Et infra: *Quare votum, licet antiquitus potuerit & sit esse, cum ad legis carimonias pertineret, modo explosum est.*

Hæc sententia PRIMO refellitur ex illa prædictione Isaia 19. *Colent eum in hostiis & muneribus, & vota vouebunt Domino, & soluent.* Hæc enim de Christianis prædicta esse, S. Hieronymus, S. Cyrillus, & ceteri omnes in commentario huius loci apertissime docent.

RESPONDET Martyr, hæc quidem de Christianis dici, sed per vota & hostias non intelligi vera vota, verasq; hostias, sed cultum spiritalem & Christianum. Dicit enim, Isaia cum Iudæis loqueretur, per ea, quibus tunc Deus colebatur, explicare voluisse cultum postea futurum, non enim aliter Iudæos intellecturos fuisse, quæ dicebantur.

Sed refellitur hæc solutio; nam in primis etiam si non habeamus easdem hostias, neque eadem vota, quæ Iudæi habuerunt, tamen si nulla haberemus, malè explicuisset Isaia cultum Christianum per hostias & vota; non enim explicatur aliquid per id, quod nullo modo ei simile est. Longè melius explicuisset per contradictorium, si dixisset; Non colent hostiis, nec vota vouebunt; tunc epim omnes intellexissent cultum quidem futurum, sed non qualis tunc erat. PRÆTEREA expositio ista Petri Martyris non potest probari, nisi assumatur vt certum id, quod est in questione. Nam si petas ab eo, cur illa verba: *Vota vouebunt, & soluent,* exponere velit metaphoricè potius, quàm p̄prie, nihil aliud respondebit, nisi quia p̄prie exponi non possunt, cū apud Christianos nulla essent futura vota. At hoc est, de quo contendit.



tendimus; An Christiani sint vota facturi, & cum ille neget, nos asseramus, quis non videt verbum Dei à nobis facere, cum de Christianis dicat: *Vota conuebunt, & soluentur*

SECUNDO, idem probatur ex illa exhortatione Psalmi 75. *Vouete, & reddite Domino Deo Vestro, &c.* tamen enim Petrus Martyr contendat, hæc Iudæis tantum dici, tamen longè aliud docent S. Patres, ex quibus B. Augustinus hunc locum ita enarrat, non Iudæis, sed Christianis loquens: *Quis, quod potest conueat, & reddat, non sitis pigri ad conuendum, non enim*  
 10 *Viribus Vestris implebitis.*

TERTIO, idem probatur ex illis verbis B. Pauli prioris epistolæ ad Timotheum, cap. 5. ubi de viduis quibusdam dicit: *Cum luxuriata fuerint in Christo, nubere volunt, habentes damnationem, quia primam fidem irritam fecerunt.* Quo loco per primam fidem omnes omnino interpretes, tum Græci, tum Latini, intelligunt votum continentie. S. Augustinus in Psalm. 75. *Quid est, inquit, primam fidem irritam fecerunt? conue-*  
 runt, & non reddiderunt. Sed de hoc loco infra fusè disseremus, nunc solum innuisse sufficiat. Omnia quoque testimo-  
 20 nia & argumenta, quæ proferemus, ad probandum vota monastica esse licita, huc etiam referri possent.

ULTIMO, votum non est cærimonia Iudaica, nulla igitur caussa est, cur solis Iudæis, & non etiam Christianis liceat vouere; nam in primis vouendi actus sola mente perfici potest. Tamen enim ore quoque vouere solemus, tamen etiam sine vlla voce solo cordis motu votum emitti potest: cærimoniæ autem omnes res sunt exteriores & sensibiles, vt notum est; non igitur vota ad cærimonias, sed ad internum cultum pertinent. DEINDE, licet vota cærimoniæ essent, non  
 30 continuò Iudaicæ essent; multæ enim sunt cærimoniæ omni hominum generi, & omni religioni communes, vt genua flectere ad orandum, manus attollere, cælum aspicere, tundere pectus. Et denique, illæ solæ dicuntur propriè Iudaicæ cærimoniæ, quæ vel à Mose sunt institutæ, vel Christum venturum significabant, quamuis ante Mosem cœperint, & proinde Christo adueniente cessauerunt.

Porro vota non cœperunt à Mose; nam Iacob Patriarcha *Votum conuit*, Genesis 28. longè antequam Moses nasceretur, neque vota ad Christum venturum significandum instituta sunt. Quid enim habent cum CHRISTO venturo vota ieiunio



niorum, continentiae, eleemosynarum, & similia? Nec de-  
 mum cum Mose cessarunt. Nam licet in Ecclesia Christi post  
 Euangelij plenam promulgationem cessauerit circumcisio,  
 sacrificia ouium ac bouum, & alia id genus, tamen vota nun-  
 quam cessarunt, vt patet vel ex vno loco S. AVGVSTINI: siqui-  
 dem in illud Psalmi 75. *Vouete, & reddite*, sic ait de Christianis  
 sui temporis. *Alius Vouet Deo castitatem coniugalem, &*  
*prater uxorem non nouerit aliam. Alij etiam Vouent, et si experti*  
*tales coniugium, & ita nihil tale pati, nihil tale concipiscere, aut*  
*sustinere, & ipsi Vouerunt aliquid maius, quam illi. Alij Virginitatem*  
*ipsam ab ineunte aetate Vouent, & nihil tale vel experian-*  
*tur, quale illi experti sunt, & reliquerunt; & isti Vouerunt pluri-*  
*imum. Alij Vouent, domum suam esse hospitalem omnibus sanctis*  
*aduenientibus, magnum votum Vouent. Alius Vouet, relinquere*  
*omnia sua, distribuendo pauperibus, & ire in communem vi-*  
*ram, in societatem Sanctorum, magnum votum Vouit. Hæc*  
*ille.*

At ne fortè respondeatur, vouendi carimoniam esse iure  
 abrogatam, sed non factò, ac non defuisse qui vouerint, sed  
 eos fecisse, quod non licebat: considerandum est, non qua-  
 leseunq; homines, sed doctissimos & sanctissimos, vt Augu-  
 stinum, Basilium, Hieronymum, Bernardum, aliosq; per mul-  
 tos vota vouisse, & laudasse, quorum testimonia postea affe-  
 rentur: nunc Augustinum sufficere posse putauì, præsertim  
 cum id aduersarius noster non neget.

Respondet enim Martyr, non esse curandum, quid homi-  
 nes, etiam si inculpati, & sine controuersia Deo grati, fece-  
 rint, quia non illorum vita, sed verbum Dei est regula nostræ  
 fidei. quod quidem accepit Martyr à Luthero, qui in libro de  
 abroganda Missa fusissimè docet, non esse cogitandum, quid  
 Sancti fecerint, sed quid facere debuerint secundum regu-  
 lam verbi Dei.

At quomodo, quæso, potest fieri, vt inculpati & Deo  
 grati fuerint, qui vota frequentarunt in Christi Ecclesia, si  
 vota ad carimonias Iudaicas pertinent? Certè, si qui hoc  
 tempore, vel circumcisionem, vel Sabbathum, vel sacrificia  
 cruenta publicè celebrarent, nullo modo inculpati & grati  
 Deo esse possent, præsertim si nulla ignorantia laborarent.  
 Si ergo vota similia sunt circumcisioni, & sacrificiis cruentis,  
 vt Martyr affirmat, quomodo inculpati, & grati Deo fue-



runt Basilius, Augustinus, Bernardus, & alij doctissimi viri, qui vota fecerunt, & aliis facienda suaferunt?

DEINDE non est nostra quaestio, verbum Deine, an exempla Sanctorum pro regula fidei & morum habere debeamus, sed vtri verbum Dei melius intellexerint, Petrus Martyr, Calvinus, Lutherus, & similes homines, an vtri illi, quos sanctissimos & doctissimos fuisse vtrique confitemur: exempla enim Sanctorum non repugnant verbo Dei, sed explicant, ac declarant, ideo & Apostolus dicebat: *Imitatores mei esto* 10 *te*. Et Christus Matth. 5. viros sanctos comparat lucernæ posite super candelabrum, quæ lucet omnibus, qui in domo sunt. neque huic veritati repugnat, quod etiam sancti interdum labuntur, ut patet de ebrietate Noë, de adulterio Dauidis, de simulatione B. Petri, quam Paulus reprehendit; non enim omnia facta Sanctorum imitanda esse dicimus, sed ea solum, quæ neque pugnant aperte cum regula fidei, neque inveniuntur vel à Scriptura, vel ab aliis sanctis viris reprehensa, sed contra potius à piis, & doctis passim laudata. Eiusmodi autem esse vota, nemo negare potest, nisi qui vel nihil legerit, vel nihil credat. 20

## CAPVT XVIII.

*Soluntur obiectiones.*

ED audiamus nunc obiectiones Petri Martyris, ut videamus, an habuerit aliquam, si non iustam, saltem probabilem causam recedendi à communi sententia omnium penè tum Catholicorum, tum hereticorum.

30 Obiectio PRIMA. In Testamento veteri frequens est mentio votorum, in nouo ne nominatur quidem votum, nisi cum sermo est de votis Iudaicis, ut Act. 21. igitur vota ad carmonias Iudaicas pertinent.

RESPONDEO, nomen voti in Testamento nouo non habetur, res tamen habetur, ut ostendimus ex Apostolo, & infra clarius ostendemus; sed etiam si non haberetur, sufficerent testimonia veteris Testamenti cum usu & explicatione Ecclesiæ. Moralia enim præcepta, vel documenta Scripturæ veteris, non minus ad Christianos, quam ad Iudæos pertinent; idcirco enim assidue in Ecclesia leguntur Psalmi, quod pleni sint moralibus documentis. Et



Et sanè, si Martyris argumentum valeret aliquid, con-  
cluderet etiam, usuram Christianis non esse prohibitam;  
nam usura in Psalmis, & Prophetis passim prohibetur, in Te-  
stamento nouo non legitur prohibita sub nomine usuræ.  
colligitur quidem usuræ prohibitio ex illo loco: *Mutuum da-  
te, nihil inde sperantes*, Lucæ 6. sed multò obscurius quàm vo-  
tum colligatur ex illis verbis Pauli, quia primam fidem irri-  
tam fecerunt; nam ista verba omnes Patres de voto intelli-  
gunt, illa non omnes intelligunt de usura; nam S. Basilius in  
commentario Psal. 14. S. Ambrosius in libro de Tobia, ca. 16. 10  
S. Hieronymus in commentario Ezechiel. cap. 18. & aliqui  
recentiores contendunt in illis verbis nō prohiberi usuram,  
sed consilium dari diuitibus, vt dent mutuo sine vlla spe for-  
tem ipsam recuperandi.

Si igitur usura iure diuino prohibita est Christianis, licet  
expressè eiusmodi prohibitio nō habeatur nisi in veteri Te-  
stamento, quantò magis religio vouendi licita erit Christia-  
nis, cum & res, & nomen voti in Testamento veteri, res au-  
tem in nouo expressè contineatur?

SECUNDA obiectio. Quotquot fidem Christi profitemur 20  
eo ipso toti sumus illi obstricti; quid igitur voto nos rursus ei  
tradimus? ridiculus porro haberetur filius, qui tabulis obli-  
gnatis, atq; testibus veller sese patriæ potestati subdere. Id-  
circo qui vota nuncupant, aut se fateantur non esse Dei, aut  
intelligent quàm vouendo stultè agant, dum, quemadmo-  
dum dicitur, actum agunt. Lege cauit Deus, ne Israëlita pri-  
mogenita ex pecoribus sibi vouerent, non alia sanè ratione,  
nisi quod iure sibi debebatur; propterea cum nos iam Chri-  
sti membra simus, & Deo omnibus modis obstricti, non mi-  
nus quam primogenita antiquitus erant, non est permitten- 30  
dum vt voueamus. Hæc ille.

RESPONDEO dupliciter. PRIMO, retorquendo argu-  
mentum; nam quemadmodum Christiani Deo sunt obstri-  
cti ratione creationis, & redemptionis, sic etiam Iudæi ob-  
stricti erant Deo ratione creationis, & liberationis de Æ-  
gypto, igitur etiam illi vouere non poterant, ne actum age-  
rent.

Respondet Petrus Martyr, nos quidem vouere non pos-  
se, quia non solum Deo obstricti sumus, sed etiam scimus  
obstrictos nos esse luce iam Euangelij coruscante; illi autem



vouere poterant, & debebant, vt admonerentur hac veluti pædagogia perpetuo debito se ac sua omnia Deo obstricta esse.

At nullo negotio hæc solutio refelli potest; nam qui apud Iudæos vouebant, nō erant solū imperiti aliqui homines, sed etiam Prophetæ sapientissimi, qui melius nouerant debitum nostrum cum Deo, quā vlli nostrū sciant. Dauid Prophetæ sapientissimus: *Votum Sinit Deo Iacob*, Psal. 131. & Principes ad vouendum hortatus est lib. 1. Paral. cap. 29. <sup>10</sup> vbi hæc addidit, vt os obstrueret Petro Martyri, indicans se & suos non ignorare omnia esse Dei: *Quis*, inquit, *ego, & qui populus tuus, vt possimus tibi hæc vniuersa promittere tua sunt omnia, & quæ de manu tua accepimus, dedimus tibi.* PRÆTEREA si Iudæi hoc ignorassent, non potuissent per vota huius debiti admoneri, sed potius contrarium ex sua vouendi consuetudine colligere potuissent; nam si nō possumus vouere Deo quæ ipsius sunt, qui vouet, admonetur se aliquid habere quod non sit Dei. Itaque pædagogiam valde malam Deus Iudæis tribuisset, si esset vera Martyris sententia. Voluisset <sup>20</sup> enim eos assuescere faciendis votis, vt admonerentur omnia esse Deo obstricta, & interim contrarium eueniret.

Respondeo SECUNDO ad argumentum directè, nos & omnia nostra Deo esse debita & obstricta in hoc sensu, quod omnia ab illo accepimus, & eius beneficio retinemus, & proinde potest ille, si velit, omnia repetere, & nos tenemur quidquid ille iusserit facere: tamen quia ille multa nobis libera relinquit, in quibus possumus pro arbitrio, hoc aut illud facere, idcirco multa sunt Dei & nostra simul; Dei, quia eius beneficio illa habemus; nostra, quia possumus pro arbitrio <sup>30</sup> de illis disponere, dummodo non contra Deum. Quocirca quando vouemus, & offerimus aliquid Deo, de rebus eius damus, & tamen verè damus, quia res illæ etiam nostræ erant, & potuissimus non dare. Vnde Concilium ARAUSICANVM can. 11. *Nemo*, inquit, *quidquam Domino rectè Souerit, nisi ab ipso acceperit, sicut legitur, quæ de manu tua accepimus, damus tibi.*

At illud exemplum filii familias, qui ridiculus esset si tabulis obsignatis se subdere vellet patri, respondeo; filium familias ridiculū fore si tabulis obsignatis se patri subdere vellet in iis rebus, in quibus necessario parere tenetur, & de qui-



quibus imperium patris iam habet, at non fore ridiculum si in iis rebus se subdat, in quibus alioqui sui iuris erat. Nec enim parentes possunt omnia quæ volunt filiis imperare, & in iis etiam quæ possunt, sæpe non imperant, sed dant filiis optionem; exempli causa, liberum est filiis uxorem ducere, vel non ducere, nec possunt in ea re à parentibus cogi, si tamen quis patri polliceatur se facturum in eo negotio, quod is imperauerit, tenebitur stare promissis.

Ad illud autem de primogenitis pecorum, quæ Deo voueri non poterant, quia Deierant, respondeo, hoc ipsum sententiam nostræ fauere; nam ideo primogenita pecorum voueri non poterant, reliqua autem voueri poterant, tamen si omnia Dei sint: (*Domini enim est terra, & plenitudo eius.* Psal. 24.) quia Deus Leuit. 27. non reliquerat Iudæis liberam dispositionem primogenitorum, ut reliquerat rerum ceterarum. Sic igitur & nos non vouemus ea, quæ non sunt in nostra potestate, sed ea solum, quæ Deus libera nobis reliquit.

Sed instat Petrus Martyr. Nihil est liberum, nihil indifferens in particulari, licet in genere dicantur quædam *ἀδιαφορά*, quia nec omnibus, nec omni tempore conueniunt; nam cum aliquid occurrit expetendum, vel reiciendum, aut illud repugnat salutis propriæ vel aliorum, & necessarium reiciendum est; aut conducit salutis propriæ vel aliorum, & necessarium expetendum est, si verè Deum & proximum diligimus.

RESPONDEO, falsum esse membrum hoc postremum; non enim necessarium expetendum est quod conducit salutis propriæ vel aliorum, alioquin non diceret Dominus Deuter. 23. *Si nolueris polliceri, absque peccato eris.* Neque Apostolus diceret 1. Corint. 7. *Quod suli faciat, non peccat si nubat.* Qui enim potest sine peccato facere quod voluerit, id est, nubere, aut non nubere, vouere, aut non vouere, certè nec necessarium cogitur expetere nuptias, aut votum, nec necessarium illa reicere. Illud ergo solum necessarium est expetendum, quod necessarium est ad salutem; quod verò vtile est, non necessarium, vtiliter quoque, non necessarium expetitur.

Obiectio TERTIA. Libertas Evangelica, in qua nos Dominus constituit, minuitur per vota, non igitur Christianis licet vouere. Antecedens probatur; nam Christus libera esse voluit generatam, quod nec omnibus, nec omni tempore



,, conueniant. Qui autem vouent vnum genus vitæ, necessarium sibi illud faciunt, vt iam non possint ad aliud transire.  
 ,, Item, Christus nos à lege exonerare constituit, qui autem  
 ,, vouent, se magis ac magis impediunt legibus. Cur, inquit  
 ,, Martyr, non se liberos seruant? si nolunt rectè agere, nisi lege  
 ,, adigantur, se magis ad seruitutem legis, quàm ad regnum  
 ,, gratiæ & fidei pertinere declarant.

Respondeo PRIMO, retorquendo argumentum; nam si  
 Christus libera esse voluit generam vitæ, cur ipsi se legibus Ma-  
 trimonijs astringunt? nec minus enim impedit coniugium à  
 cœlibatu, quàm votum cœlibatus à coniugio. Deinde, si Deus  
 liberos nos à legibus esse voluit, & generam vitæ libera nobis  
 reliquit, quid est quod paulò antè Martyr dicebat, nihil esse  
 liberum, nihil indifferens, sed omnia omnino aut præcepta  
 aut prohibita? Itaq; prædicant verbo libertatem Euangelicam,  
 & interim imponunt legem importabilem, & qualem  
 nullus vnquam tyrannus imposuit.

SECUNDO respondeo, libertatem Euangelicam non esse  
 libertatem (vt illi somniant) à lege, sed à peccato Rom. 6. *Li-*  
*berati à peccato serui facti estis iustitiæ.* itè à cærimonijs Iudaicis,  
 quæ erant vmbre futurorum, ac demum à timore, & seruitute,  
 non autè ab obligatione legis, qui enim caritate, quæ  
 est propriè gratia Testamenti noui, & libertas Euangelica,  
 præditus est, lege quidem tenetur, sed non est sub lege, quia  
 libenter implet legem. Sed de hac re alibi sæpè tractauimus.

Obiectio QUARTA. Qui vouet, iniuriam Deo facit; nam  
 ,, in primis repugnat illi, faciens necessaria quæ ille voluit esse  
 ,, libera. Deinde arguit Deum vel insipientiæ, vel inuidiæ; nam  
 ,, voto se obligat ad vnum genus vitæ, vt eo modo perfectior  
 ,, euadat; quasi Deus, qui eum ad illud vitæ genus non obligauit,  
 ,, aut non sciuerit ei tam bene prospicere, vt ipse sibi prospexit,  
 ,, aut certè inuiderit illi istam maiorem perfectionem.

RESPONDEO, nullam fieri Deo iniuriam per vota, quia  
 ipse voluit esse libera generam vitæ negatiuè (vt sic loquar) non  
 affirmatiuè, id est, noluit obligare, sed reliquit in arbitrio  
 nostro, vt quisque ad quod veller se obligaret. Quod itaque  
 non obligauerit nos, benignitas eius fuit; quod verò per  
 vota ipsi nos obligemus ad id, quod illi gratus esse scimus,  
 gratitudo, & pietas est: & sicut non pugnant benignitas Domini,  
 & gratitudo serui, sic etiam non pugnat quod nobis  
 necesse



necessaria faciamus, quæ libera Deus nobis reliquit: neque insipientiæ aut inuidiæ illum arguimus; nam quod facimus, eius consilio, & admonitione facimus; etsi enim non imperauit nobis maiorem illam perfectionem, ad quam per vota tendimus, consuluit tamen, & admonuit ut ad eam aspiraremus; de qua re paulò post agemus.

CAPVT XIX.

*Non esse propriè votum promissionem, quæ fit in Baptismo.*

10

**S**EQVITVR ordine quinta pars disputationis, in qua refellenda est sententia Lutheri & Caluini, quod promissio, quæ fit in Baptismo, votum propriè dici debeat. Sunt autem quedam antea prænotanda. PRIMVM est, quæstionem esse inter Theologos, num res à Deo imperata sub votum propriè cadere possint. Quidam enim id negant, ut S. Thomas, & S. Bonauentura in 4. dist. 38. Alij verò affirmant, ut recentiores quidam, Dominicus à Soto lib. 7. de iustitia, & iure q. 1. art. 3. & Alphonsus à Castro lib. 1. de lege poenali, cap. 10.

Sed conciliari possunt hæ sententiæ; nam duobus modis fieri potest votum de re præcepta: vno modo cum intentione se obligandi, etiam si res illa præcepta non esset; alio modo cum intentione solùm acceptandi, & testificandi obligationem, quæ antea erat. PRIORE modo loquuntur auctores posteriores, & rectè docent res etiam à Deo imperatas, propriè posse voueri si concipiantur ut liberæ, & qui vouet intendat ad eas se obligare noua obligatione; nam qui cœlibatū Deo vouit, non minus propriè censetur sacrilegus si fornicetur, quàm si nubat; ex quo sequitur, non fornicari esse etiam materiam voti propriè dicti, licet alioqui præceptum sit; pari ratione qui post votum paupertatis furatur, non minus sacrilegus est, quàm si res suas, quas iam dimiserat, repetat: ex quo intelligimus non furari, quod præceptum est, posse sub votū cadere, ut res suas dimittere, quod non est præceptū, sed consilium. Vide S. Thomam in 2. 2. q. 186. art. 10. vbi admittit religiosos bis peccare si furentur, aut fornicentur, quod & contra legem communem, & contra votum proprium delinquant.

POST



POSTERIORE modo loquuntur auctores priores, qui rectè docent, res præceptas non cadere propriè sub votum, si accipiantur vt præcepta, id est, si quis dum eas recipit se facturum, nihil noui promittit, sed solum agnoscit & recipit obligationem, quam lex ipsa secum affert; qualis fuit illa promissio Hebræorum Exod. 19. *Cuncta quæ loquutus est Dominus, faciemus.* Vbi enim non est intentio nouæ obligationis, nullum esse votum propriè dictum, constat.

SECUNDO loco prænotandum est, in Baptismo omnes  
 10 Christianos promittere se legem Dei seruaturus, atq; ex eo tempore abrenunciare Diabolo, & pompis eius; id enim & ritus Baptismi testatur, & Patres apertissimè docent, vt Tertullianus libro de corona militis. S. Cyprianus lib. 1. epist. 5. S. Basilius libro de Spiritu sancto, cap. 27. S. Hieronymus in Apologia 1. contra Rufinum prope finem. S. Augustinus lib. 1. de peccatorum meritis, & remission. cap. 33. S. Gregorius hom. 29. in Euangelia, & Beda lib. 3. hist. Anglorum, cap. 19.

Quæstio igitur est, An ea promissio sit solum quædam re-  
 20 stitucio, & acceptatio obligationis, quam lex Dei secum affert, proinde non appellanda votum, nisi fortè impropriè, & largo modo. An verò sit noua promissio nouam obligationem includens, atq; adeo votum propriè dictum. Martinus enim Lutherus in libro de votis monasticis, & Ioannes Caluinus lib. 4. Instit. cap. 13. §. 6. votum primarium esse docent promissionem illam, quam facimus in Baptismo, cuius contrarium affirmat communis sententia Theologorum, in 4. sententiarum dist. 38. Quæ sententia quoniam verissima est, his argumentis confirmari potest.

PRIMUM, vota, vt in Scripturis accipiuntur, spontanea  
 30 ac voluntaria, non necessaria esse debent. Sic enim legimus Deut. 23. *Si votumoueris, non tardabis reddere, quia requirit illud Dominus; & si moratus fueris, reputabitur tibi in peccatum; si nolueris polliceri, absque peccato eris.* At promissio, quæ fit in Baptismo, necessaria est, neq; de illa potest dici, si nolueris polliceri absq; peccato eris. Omnes enim ad Baptismum suscipiendum diuina lege obligantur, neq; Baptismus sine illa promissione ab Ecclesia datur.

SECUNDO, vota paruulorum à parentibus edita, rata non sunt, nisi ab ipsis, quorum nomine facta sunt, postmodum in ætate adulta confirmentur; id enim docet S. Bernardus in epist.



epist. v. ad Robertum, & apertissima ratio id ipsum confirmat, quia votum est lex particularis, quam sibi quisque imponit, si vult, ac proinde voluntatem propriam necessario exigit. At promissio quæ sit in Baptismo, paruulos obligat, ita vt postea, velint nolint, cogantur eam habere ratam, etiam si non perse, sed per alios eam ediderint; igitur non ex voto, sed aliunde vim habet obligatio quæ suscipitur in Baptismo.

TERTIO, si ea promissio votum esset propriè dictum, omnia Christianorum peccata essent duplicia, quia contra legem, & contra votum; omnia essent sacrilegia, quia contra voti religionem; nec minus peccaret secularis fornicando, aut furando, quam religiosus, vt patet. At hæc omnia communi fidelium sententiæ ac iudicio repugnant, non igitur illa promissio votum est propriè dictum.

QUARTO, illa promissio quæ sit in Baptismo, si votum esset, certè aut explicitè, aut implicitè voti obligationem contineret. At non explicitè continet, nec enim fideles dum baptizantur explicitam intentionem habent, aut habere debent se obligandi, nisi quantum ex ipsis Dei legibus obligantur: quod autem nec implicitam obligationem contineat, ita probatur; si esset implicitum votum in Baptismo, aut esset ex lege Ecclesiæ annectente hoc votum Baptismo, quomodo adiunctum est votum continentia Sacramento ordinis; talis autem Ecclesiæ lex nusquam exstat: aut esset ex natura ipsa religionis Christianæ, vt quemadmodum connexa sunt vota monastica ordinibus religiosis, ita etiam annexum esset Christianæ religioni votum renunciandi Diabolo, & pompis, atq; operibus eius. Sed neq; hoc dici potest; nam religio Christiana cum sit omnibus necessaria, vincula habere debuit, diuinas leges, quæ necessariò ab omnibus seruandæ sunt: ordines verò religiosis, quia non necessitatis, sed voluntatis sunt, vincula quoque non necessaria, sed voluntaria habent, qualia sunt omnia vota propriè dicta.

Accedat POSTREMO, quod cum non sit villo modo necessarium, neq; etiam admodum vtile de iis rebus, quæ sunt in præcepto vota facere, non est credibile Deum, aut Ecclesiam voluisse, vt omnes fideles ad eiusmodi vota faciendâ obligarentur. Non esse autem admodum vtile de rebus iis, ad quas ex lege obligati sumus, vota facere, nisi fortè ea vota coinci



coincidant cum votis de rebus non præceptis, ex eo perspicuum est, quodd vota de rebus non præceptis ideo laudabiliter sunt, præter alias causas, ut homo eo modo firmitus, & stabilius perseveret in bono opere iam conceptus; qui enim se liberos cernunt, facile mutant propositum bonum. Cum igitur ad opera legis facienda satis ligati simus ex ipsa lege, non opus est nova vincula querere, ne occasionem grauius peccandi nobis ipsi sine magna utilitate procuremus.

Obiectiones, quæ contra fieri solent, facile solui possunt.  
 10 PRIMA obiectio. Christiani grauius peccant, & puniuntur  
 „ cum non seruant legem Dei, quam Ethnicivcl Iudæi. Igitur  
 „ aliquam habent obligationem, quam illi non habent. R-  
 spondeo, grauius peccant, & puniuntur Christiani, quia  
 magis ingrati sunt, & melius nouerunt Domini voluntatem,  
 non autem quia habeant aliam obligationem, quia tunc  
 non solum grauius peccarent, sed etiam bis peccarent.

„ SECUNDA obiectio. S. AUGUSTINVS in Psal. 75. *Vouete,*  
 „ inquit, *& reddite Domino Deo vestro omnes communiter. Quid*  
 „ *debemus vouere? credere in illum, sperare ab illo Vitam æternam.*  
 20 *benè viuere secundum communem modum; est enim quidam*  
 „ *modus communis omnibus, furtum non facere, adulterium non*  
 „ *facere, non amare Vinolentiam, non superbire, non hominem occi-*  
 „ *dere, non odisse fratrem, non aduersus aliquem texere perniciem,*  
 „ *hoc totum omnes vouere debemus.* Hæc ille. R- spondeo, ac-  
 cipit S. Augustinus, eo loco nomen voti largo, & communi  
 modo, ut non solum comprehendat vota propriè dicta, sed  
 etiam quamlibet aliam promissionem, quamuis talis acco-  
 ptio voti non facillè in Scripturis inueniatur.

„ TERTIA obiectio. Ecclesia eos, qui promiserunt in Ba-  
 30 ptismo Christi legem se seruatu-ros, cogit ut eam seruent  
 „ non autem cogit Ethnicos, & Iudæos, qui id non promiserunt;  
 „ igitur obligatio quædam nascitur ex promissione, quam  
 „ non adfert secum ipsa lex, proinde illa promissio verum vo-  
 „ tum esse videtur. R- spondeo, cogit Ecclesia Christianos  
 „ baptizatos, ut seruent legem Christi, non tam ex eorum pro-  
 missione, quam ex eo, quod per Baptismum facti sunt mem-  
 bra, & filij Ecclesiæ; omne enim membrum subiectum  
 esse debet capiti, & omnis filius parenti iu-  
 renaturæ subiicitur.



## CAPVT XX.

*Paupertatem voluntariam rectè Deo voueri.*

**R**ESTAT pars quæstionis postrema, in qua, vt promissimus, tria vota monastica defendenda sunt. Incipiemus à voto paupertatis, inde ad votum obedientiæ, postremò ad votum continentia, de quo potissima quæstio est, veniemus.

Igitur PAUPERE TATEM voluntariam rectè suscipi ac Deo voueri, PRIMò probatur ex illis verbis Matth. 5. *Beati pauperes spiritu, quoniam ipsorum est regnum cælorum.* Vbi notandum est, pauperes in Scriptura tribus modis accipi solere. Primò dicuntur pauperes, qui sunt afflicti, vt Psal. 24. *Vnicuique pauper sum ego, tribulationes cordis mei multiplicatae sunt.* Secundò dicuntur pauperes, qui sunt humiles, vt Isaia ult. *Ad quem respiciam nisi ad pauperculum, & contritum, & tremementem sermones meos?* Terriò dicuntur pauperes propriè, qui non sunt diuites, idque tribus modis, aut actu, sed non affectu, aut affectu, sed non actu, aut actu simul & affectu.

Quinq; igitur existunt huius loci expositiones. PRIMA est Caluini in hunc locum, qui per pauperes intelligit afflictos. Sed hæc expositio non est germana; nam coincideret tunc hæc prima beatitudo cum tertia: *Beati qui lugent*, aut cum vltima: *Beati qui persecutionem patiuntur*. Et præterea non est expositio Patrum, ac demum Lucæ 6. Dominus pauperibus diuites opponit.

SECUNDA expositio est Chrysostomi in commentario huius loci. & Augustini lib. 1. de sermone Domini in monte, qui per pauperes intelligit humiles; quæ expositio vera quidem est, sed non primario intenta, vt paulò post ostendemus.

TERTIA esse posset, vt beati dicantur illi, qui sunt pauperes actu, non affectu; sed hæc fallæ expositio est, & à Patribus reprehenditur; non enim beati, sed miseri sunt isti pauperes; quocirca Dominus addidit, *spiritu*, id est, voluntate, & electione, nec qualicunque voluntate, sed spiritali, vt notat S. Bernardus serm. 1. de festo omnium Sanctorum. Fuerunt enim etiam Philosophi quidam voluntate pauperes, sed non spiritu pauperes, quia non propter Deum, sed propter curiositatem amarunt paupertatem.



QUARTA expositio esse posset, quòd beati dicantur pauperes affectu, licet non actu. Hæc vera est, sed non præcipue intenta, ut mox ostendam.

Est igitur QUINTA, ut beati dicantur, qui propter Deum sponte eligunt paupertatem, & proinde etiam humilitatem; & pauperes spiritu hoc loco nominari eos, qui sunt voluntariè pauperes, & proinde etiam humiles; nam ut plurimum diuitiæ elationem, paupertas humilitatem gignit. Ita exponunt B. Ambrosius in caput 6. Lucæ, B. Gregorius Nyssenus, 10 B. Hieronymus, & venerabilis Beda in caput 5. Matth. nec non S. Leo I. in sermone de illis verbis Domini Matth. 5. qui paupertatis voluntariæ, & humilitatis simul meminerunt. Item Chromatij, & Anselmi in hunc locum, Basilij quæst. 205. Bernardi serm. 1. de festo omnium Sanctorum, & recentiorum, ut Abulensis, Lirani, Caietani, Iansenij, & aliorum, qui de paupertate voluntaria, & actuali exponunt, & rectè; nam in primis verbum Græcum *πτωχος*, mendicum propriè significat; ut etiam Latina vox pauper, non humilem propriè, sed egenum significare solet.

20 Deinde præmium illud (*Quoniam ipsorum est regnum cælorum*) propriissimè respondet veræ paupertati. Præterea Lucæ 6. Pauperes, qui beati esse dicuntur, non superbis, sed diuitibus opponuntur; sic enim paulò post subiungit Dominus: *Va vobis diuitibus*. Deniq; Christus actu & affectu pauper fuit, & docuit sine dubio id quod ipse fecit. Præterea sæpius diuitias periculosas esse dixit; nam Matth. 13. comparauit spinis, quæ suffocant sementem; & Marci 10. *Quàm difficile*, inquit, *qui pecunias habent, intrabunt in regnum cælorum*. Et: *Facilius est camelum intrare per foramen acus, quàm diuitem* 30 *in regnum cælorum*.

Hinc ergo sic argumentari possumus pro voto paupertatis. Id omne Deo rectè vouetur, quod ex eius testimonio scimus esse bonum, & illi gratum; sed paupertas voluntaria testimonio Christi bona est & Deo grata, cum beati dicantur eiusmodi pauperes, & illis promittatur regnum cælorum in præmium; igitur eiusmodi paupertas Deo rectissimè vouetur.

SECUNDUM testimonium est Matth. 19. vbi Dominus ait: *Si vis perfectus esse, Vade, vende omnia quæ habes, & da pauperibus, & habebis thesaurum in cælo*. Et ibidem: *Ecce nos reliquimus*



*mus omnia, & sequuti sumus te, quid ergo eris nobis? &c.* Quod enim hic detur consilium veræ abdicationis facultatum, supra demonstrauimus in disputatione de consiliis Euangelicis; quod autem hinc sequatur, posse voueri paupertatem, patet ex argumento paulò antè facto; & præterea ex utroque testimonio non solum colligitur paupertatem rectè voueri posse, quod tamen ad rem nostram sufficit, sed etiam colligitur hortatum esse Dominum ad vouendam hanc paupertatem; parum enim prodesset dare omnia pauperibus, & fieri pauperem spiritu, si quis paulò post iterum rediret ad lucra, & opes comparandas; quocirca S. Patres intellexerunt his testimoniis commendari paupertatem perfectam, quæ suscipitur cum proposito, & voto semper ita permanendi.

Itaq; S. A VG V S T I N V S in epist. 89. q. 4. & in Psal. 103. con-  
 cione 3. totum hunc locum refert ad professionem monasti-  
 cam; & S. B E R N A R D V S in declamatione super hunc locum  
 Euangelij: *Hec, inquit, sunt Verba, quæ contemptum mundi in  
 vniuerso mundo, & voluntariam persuasere paupertatem, hæc  
 sunt quæ Monachis claustra replent, deserta Anachoretis.*

T E R T I V M testimonium est A c t o r. 4. vbi sic legimus: Mul-  
 titudinis autem credentium erat cor vnum, & anima vna, nec  
 quisquam eorum quæ possidebat aliquid suum esse dicebat, sed  
 erant illis omnia communia. Quod autem ex voto ita viuerent  
 primi illi Christiani in Hierusalem, docet S. A VG V S T I N V S  
 sermon. 1. de communi vita Clericorum, vbi dicit, id ipsum se  
 cum suis facere voluisse, quod primos Christianos fecisse te-  
 stantur Acta Apostolorum iam citata, & tamen ibidem sa-  
 pius repetit, nemini licere in tali vita habere proprium, idq;  
 ex professione facta Deo; sic enim loquitur de quodam Pres-  
 bytero suo, qui contra professionem aliquid retinuerat, &  
 inde Testamentum cum moreretur fecerat: O dolor, inquit,  
 illius societatis, o fructus natus non de arbore, quam plantauit  
 Dominus, sed Ecclesiam scripsit hæredem: nolo numerare ista, non  
 amo amaritudinis fructum, ego illum Deo quarebam, Deo socie-  
 tatem professus erat, hanc teneret, hanc exhiberet, nihil haberet,  
 testamentum non faceret.

Q V A R T V M testimonium est A c t o r. 5. vbi Ananias & Sapphira vxor eius, cum vitam communem profiteri velle vide-  
 rentur, & tamen aliquid proprii sibi clam retinuisent, con-  
 tinuò ab Apostolo Petro detecti & increpati, atq; à Deo in-  
 uisibi-



nissibiliter percussi interierunt. Hic Petrus Martyr in libro de votis dicit, se nullum votum videre; peccatum enim Anania & Sapphires fuisse mendacium, ambitionem, avaritiam, & hypocrisim, non autem voti violationem, seu sacrilegium. Sed facile possumus ostendere, primò ex circumstantiis loci huius, deinde ex testimoniis Patrum, Ananiam & Sapphiram vouisse, & tanquam sacrilegij reos esse punitos.

Quod igitur Ananias & Sapphira vouerint vitam illam communem, colligitur ex illis verbis: *Fraudauit de precepto agri, conscia uxore sua.* Non enim fraudasse diceretur, nisi rem iam obligatam promissione, subripuisset; quod autem rem non præceptam vouerint, patet ex illis verbis: *Nonne manens tibi manebat, & vendidatum in tua erat potestate?* Quod denique votum illud Deo factum esset, & proinde eius violatio sacrilegium fuerit, testantur verba illa: *Anania, cur tentauit Satanas cor tuum mentiri te Spiritui sancto, & fraudare de precepto agri?* Quid enim est mentiri Spiritui sancto, nisi fallere fidem datam Spiritui sancto?

Possent quidem utcumque dici mentitus Spiritui sancto, si mendacium tantum S. Petro dixisset, in quo sine dubio erat Spiritus sanctus: tamē nemo negare potest, quin magis propriè dicatur mentiri Spiritui sancto, qui promittit aliquid Deo, & non seruat, quam qui mentitur homini alicui sancto. Præterea seuerissima illa pœna, quam Deus ipse continuo sumpsit de Anania & Sapphira, omnino clamat maius illud peccatum fuisse, quàm simplicis mendacij, & avaritiæ, & ambitionis, atq; hypocrisis; quomodo enim potuit puniri culpa vlla atrocius? Itaq; sine dubio sacrilegium fuit, quod eo modo puniri meruit.

Accedat iam communis expositio Patrum. S. Ioannes CHRYSOSTOMVS hom. 12. in Acta Apostolorum: *Quare, inquit, hoc fecisti? Soluisti habere? oportebat initio habere, & non promittere, nunc autem postquam consecrasti, manus sacrilegium commisisti; qui enim aliena rapit, forsan alienarum rerum desiderio rapit: tibi autem licebat tuam retinere, cur igitur sacrastisti ea, & postea accepisti?*

S. HIERONYMVS in epist. ad Demetriadem, quæ est octaua I. Tomi: *Ananias, inquit, & Sapphira dissipatores timidi, immò corde duplici & ideo condēnati, quia post voti obtulerunt quasi sua, & non eius, cui semel ea vouerant, pariemq; sibi iam aliena substantiæ reseruauerunt.*



S. AUGUSTINVS serm. 27. de verbis Apostoli: *Dum, inquit, ex eo quod promiserat, partem subtraxit, sacrilegiū simul condemnatur, & fraudis.* Et serm. 10. aliās 12. de diuersis, in editione Louanienſi: *Si Deo, inquit, displicuit detrahere de pecunia quā vouerant Deo, quomodo irascitur quando vouetur castitas, & non exhibetur?* Et infra: *Potest igitur Virgini sanctimoniali nubenti dici quod ait Petrus de pecunia; Virginitas tua nunquid non manens tibi manebat, & antequam eam voueres, in tua fuerat potestate?*

S. EVLGENTIUS in epistola de debito coniugali, cap. 8. 10 *Quam, inquit, seruum, quamq; sollicitē fugiendum, si quis de hoc, quod Deo vouerit, aut retinere, aut rapere aliquid mortifera prauaricatione pertinet; exemplo sunt Ananias & Sapphira.*

S. GREGORIUS li. I. epist. 33. ad Venantium: *Ananias, inquit, Deo pecunias vouerat, quas postea uictus perſuasiōe Diaboli subtraxit, sed quā morte multatus est scis.*

ARATOR lib. I. in Acta Apostolorum hunc locum enarrans, sic ait:

--- Sed quod mutata voluntas

Falsi crimen habet: cumq; est iam cautio voti

Stare decet, nec Velle prius Violare sequenti, &c.

10

OEUVMENTIVS in commentario huius loci aliquoties sacrilegium vocat Ananias peccatum. BEDA in eundem locum dicit, ab Ananias exemplo natum esse deterrimum illud Monachorum genus, quod Sarabaitarum dicitur, qui sub vita, & professione monastica aliquid proprii retinere volūt. Atque hæc de Scripturis pro voto paupertatis.

Confirmari potest hoc idem ex traditione Patrum. S. VRBANVS Papa I. in epistola seu decretali: *Quicumque Vestrum, inquit, vitam communem suscepit, & vouit se nihil proprium habere, Videat ne pollicitationem suam irritam faciat.* S. BASILIUS in constitutionibus monasticis, cap. VI. dicit, Monachum salutem animæ perdere, & furem esse, atque alterum Iudam, si quid priuati possideat. At cur ita, quæso, si nulla est promissio, nullum votum?

S. HIERONYMVS in epist. 22. ad Eustochium de virginitate, scribit adeo arctam fuisse in Monachis sui temporis professionem paupertatis, vt nemini liceret vel necessaria petere; tametsi vigilabat præpositorum diligentia, ne cui aliquid necessarium deesset: *Quia, inquit, non licet dicere cuiquam,*



*tunicam, & sagum, textaq; iuncis strata non habeo: ille ita Eni-  
 nerfa moderatur, Et nemo quid postulet, nemo non habeat. Ibi-  
 dem scribit, aliquando in monasterio quodam Nitrie reper-  
 tum fuisse Monachum iam moriturum, qui nescio quot so-  
 lidos sibi retinuerat: quocirca placuisse Machario, Isidoro,  
 aliisq; sanctis congregatis in vnum, vt cum mortuo pecunia  
 infoderentur, clamantibus omnibus, pecunia tua tecum sit  
 in perditionem. Quod idem postea in simili casu fecisse S.  
 Gregorium, scribit Ioannes Diaconus lib. i. cap. 15. vitæ B.  
 10 Gregorij, & ipse etiam Gregorius lib. 4. Dialogorum, cap. 55.*

S. AVGVSTINVS in Psal. 25. Alius, inquit, *vouet relinque-  
 re omnia, & ire in communem vitam, in societatem sanctorum;  
 magnum votum vult. Et lib. 17. de ciuitate Dei, cap. 4. Dixe-  
 runt, inquit, potentes illi, ecce nos reliquimus omnia, & sequimur  
 sumus te. Hoc votum potentissimi vouerant, sed vnde hoc eis, nisi  
 ab illo, de quo hic continuo dictum est, dans votum venient?*

Ioannes CASSIANVS li. 4. de institutis renunciantium, c. 13.  
*Illam, inquit, virtutē inter ceteras eorum institutiones vel com-  
 memorare superfluum puto, quod scilicet nulli cistellam, nulli pec-  
 20 culariarem sportellam liceat possidere, nec tale aliquid, quod velut  
 proprium retinens suo debeat communire signaculo. Et cap. 33. de  
 hac ipsa renunciatione perfecta loquens: Sicut, inquit, im-  
 mensa gloria fideliter seruientibus Deo, ac secundum regula in-  
 stitutionem eius adhaerentibus repromittitur in futurum, si a pœni-  
 grauißima preparatur his, qui tepide eam, negligeretq; fuerint  
 exequuti, & secundum hoc quod professi sunt, vel quod ab homi-  
 nibus esse creduntur, fructus etiā congruos sanctitatis eidem ex-  
 hibere neglexerint; melius est enim secundum Scripturam senten-  
 tiam, non vouere quemquam, quā vouere, & non reddere.*

30 Adde etiam Concilium AVRELIANENSE l. cau. 21. vbi  
 grauiter Monachi puniri iubentur, qui contra professionem  
 suam aliquid proprii possidere voluerint.

Contra paupertatis votum autem vna est obiectio Ioan-  
 nis Brentij in Confessione VVirtembergica, capite de votis  
 „ monasticis. Aut is, qui vouet, est pauper conditione, aut di-  
 „ ues: si pauper est, nihil habet quod possit vouere se relicturū  
 „ aut daturū, sed debet ferre patienter crucem sibi à Domino  
 „ impositam; quam si præterea vouet, idem facit, ac si in mor-  
 „ bo voueret se ægrotaturum; qui est furor, non pietas: si au-  
 „ tem diues est, aut vouet ponere omnia in cōmune, aut dare  
 „ omnia



omnia pauperibus propter maius meritum, & viuere deinceps ex eleemosynis: si primū, nihil aliud agit, quam prouidere sibi de certiore, & copiosiore victu, quod est fugere, non amare paupertatem: si secundum, peccat contra fidem, & caritatem; contra fidem, quia vnus est mediator Dei & hominum, qui nobis omnia meruit; cui facit iniuriam, qui suis propriis operibus mereri se arbitratur, contra caritatem autem, quia caritas præcipit ne sine necessitate molesti simus proximo nostra mendicatione.

Respondeo ad PRIMVM membrum, etiam pauperes rectè 10  
vouere, & multum dare; dant enim id omne quod acquirere possent. AVGVSTINVS epist. 89. q. 4. *Neq., inquit, mibi minus imputabitur, quia diues non fui; nam nec Apostoli, qui primi hoc fecerunt, diuites fuerunt: sed totum mundum dimisit, qui, & quod habet, & quod optat habere dimittit.* Neque est simile votum ægritudinis voto paupertatis; nam Christus dixit: *Beati pauperes*, non beati egroti, Matt. 5. Et: *Si quis perfectus esse, vende omnia quæ possides, & da pauperibus*, Matt. 19. non autem si vis perfectus esse, proiice sanitatem, cura vt ægrotes. denique tenemur, si possumus, sanare ægritudinem, ne nostræ mortis 20  
causæ fuisse videamur: at discere nemo tenetur.

Ad SECVDVM membrum dico, ponere omnia in commune, esse verè amare paupertatem; nam ille verè est pauper, qui nullius rei est Dominus, qui nihil habet quod vendere, donare, permutare, destruere possit. & quam aliam paupertatem elegerunt primi Christiani, nisi istam, quam nemo aliquid diceret suum, sed essent illis omnia communia? Act. 4.

Ad TERTIVM, nego esse contra fidem, dare omnia sua pauperibus propter maius meritū, alioqui Christus aliquid contra fidem consulisset, cum ait: *Vende omnia quæ possides, & da pauperibus, & habebis thesaurum in cælo*, Matth. 19. non enim pugnant merita nostra cum Christi meritis, sed ex illis potius vt effectus ex causâ promanant; nam sine Christi meritis nulla sunt nostra merita. ille enim, præter alia, etiam potentiam merendi nobis acquisiuit merito mortis sue. Nego etiam esse contra caritatem proximi mendicare, quando quidem neminem cogunt dare eleemosynam mendicantes, sed potius occasionem diuitibus præbent compa-  
randi sibi regnum cælorum. Sed de hoc  
infra latius.



## CAPVT XXI.

## De voto obedientia.

**A**M verò OBEDIENTIAM religiosam rectè voueri Deo, his rationibus probari potest. PRIMò, grata est Deo obedientia etiam in iis rebus, quas ipse non præcepit; nam Hierem. 35. laudantur, & remunerantur à Deo filij Ionadab, qui, vt obedirent patri suo, non bibebant vinū, non serebant agros, non habebant domos, sed habitabant perpetuò in tentoriis: omne autem quod Deo gratum est, voueri illi potest, igitur obedientia, etiam alioquin non debita, Deo voueri potest.

Respondet Petrus Martyr in libro de votis, nihil indebitum fecisse filios Ionadab; nam etiam si Deus non iusserat illis, vt non biberent vinum, nec sererent agros, nec domos inhabitarent, iusserat tamen vt parenti obedirent, ac proinde illi, dum patri obedierunt, id solum fecerunt, quod facere diuino præcepto tenebantur.

20 Sed refellitur hæc solutio. PRIMò, ex testimonio Rabbini, qui in commentario huius loci dicit, filios Ionadab plus fecisse, quàm lex diuina præciperet.

SECUNDO, ex ipso textu Hieremix; nam Deus eo loco exemplo filiorum Ionadab reprehendit populū suum, quod illi obedierint voci vnius hominis, ipse autem voci ipsius Dei obedire noluerit: Firmauerunt, inquit, filij Ionadab, filij Rechab præceptum patris sui, quod præceperat eis, populus autem iste non obediuit mihi. Quæ Domini ratio planè frigeret, si filij Ionadab diuino præcepto obstricti fuissent. 30 obedire patri suo in rebus illis, vt non biberent vinum, & tunc enim nulla esset antithesis inter Deum & creaturam; nam & filij Ionadab obediissent Deo, & filij Israël non obediissent Deo.

TERTIO, idem colligitur ex laude & remuneratione diuina; non enim tantopere Deus laudasset filios Ionadab, nisi aliquid singulare fecissent.

POSTREMO, id ipsum ratio manifesta suadet; nam etiam si tenentur filij obedire parentibus, non tamen tenentur obedire in omnibus rebus, postquam ad annos pubertatis peruenierint. Est enim vnusquisq; sui iuris in deligendo statu, & genere



genere vite, alioqui nihil interesset inter seruos, & liberos, si semper, & omnibus in rebus filij in patris potestate essent.

Quod verò B. Paulus ait Coloss. 3. *Filij obedite parentibus per omnia*. Vel ita intelligi debet, vt illud (*Per omnia*) significet per omnia ad quæ se extendit patria potestas, vt rectè docet S. Thomas in 2. 2. q. 104. art. 5. quemadmodum si quis diceret, oportere milites obedire Imperatori per omnia, exponendum esset per omnia, quæ ad militiam pertinent. Vel certè tenentur filij per omnia parentibus obedire, sed dum parvuli sunt; nam vt dicitur ad Galat. 4. *Quanto tempore ha-* 10  
*res paruulus est, nihil differt à seruo*. Et Dominus ipse parentibus subditus erat cum puer esset, vt legimus Luc. 2.

SECUNDA ratio ex Testamento nouo sumi potest; nam, vt suprà diximus in disputatione de consiliis, consilium perfectionis est sequi Dominum perfectè abnegando seipsum, vt colligitur ex illo Matth. 16. *Qui vult venire post me, abneget semetipsum, & tollat crucem suam, & sequatur me*; nam et si in præparatione animi abnegare seipsum præceptum sit, cum ibidem Dominus addat; qui enim voluerit animam suam saluam facere, perdet eam; tamen extra articulum necessitatis abnegare seipsum perfectè, & omnibus in rebus subiiciendo iudicium, & voluntatem suam alterius iudicio, & voluntati, non est præceptum, sed consilium. Ideo enim Matth. 19. dicitur: *Si quis perfectus esse, & vult, vende omnia, &c. & veni, sequere me.* 20

Porro, perfecta sequela Domini, quæ in abnegatione sui ipsius, id est, in perfecta obedientia consistit, necessariò includit votum, quo quis ita seipsum abneget, vt non possit retrocedere; non enim perfecta est abnegatio sui, obedire alteri ad tempus, & paulò pòst non obedire; quocirca Dominus ibidem addidit: *Et tollat crucem suam*. siquidem vt eleganter monet Ioannes Cassianus lib. 4. de institutis cœnobiorum, cap. 35. verus, ac perfectus Monachus similis crucifixus esse debet. Qui enim cruci affixus est, non solum non ambulat quò vult, nec facit quod vult, sed nec potest ambulare, aut operari, nisi ab alio moueatur. 30

TERTIA ratio; rectè faciunt homines, qui cupientes vitam communem agere, communi consensu eligunt sibi aliquem in præpositum; id enim & recta ratio suadet, & Scriptura etiam monet, Proverb. 3. cum dicit: *Ne inuitaris prudentia*.



*2ua.* Rursus, præposito constituto, bonum est & Deo gratum, ut illi obediatur, cum scriptum sit: *Qui vos audit, me audit.* Luc. 10. Et: *Obedite præpositis vestris.* Hebr. 13. At omne quod Deo placere constat, testimonio ipsius, rectè voueri potest, ut aduersarij concedunt; poterit igitur obedientia exhibenda præposito, à nobis ipsis electo, & cui alioqui obedire non teneremur, rectè voueri.

QUARTARATIO ex usu antiquæ Ecclesiæ; certum est apud veteres sanctos obedientiam monasticam in usu fuisse; nam  
 10 S. BASILIUS in constit. monasticis, c. 12. *Nunc, inquit, rursus sermonem de obedientia exerceamus, ostendentes, quantam obedientiam ab exercitationibus erga præfectum exacta doctrina ratio exigit, &c.* Et toto capite de obedientia disserit, ac docet, debere Monachum præposito parere, & non discutere quid sit quod præcipitur, modò non sit manifestè peccatum, ac breuiter talem se exhibere præposito, quales sunt oues ad pastorem, & instrumenta ad opificem comparata. nec illud omittit, necessarium esse Monachis, perfectè obedire præpositis, & alioqui à salute aterna eos excidere; idem docet  
 20 Cassianus lib. 4. de institutis cœnobiolorum, cap. 23. & seq.

S. HIERONYMUS in epistola ad Eustochium de custodia virginitatis, describens instituta Monachorum: *Prima, inquit, apud eos consideratio est, obedire maioribus.* Et in epistola ad Rusticum Monachum: *Per hæc omnia, inquit, ad illud tendit oratio, ut doceam te non tuo arbitrio dimittendum, sed viuere debere in monasterio sub vnius disciplina patris confortioq; multorum.* Et infra: *Non facias quod vis, comedas quod iuberis, vestiare quod acceperis.* Et infra: *Præpositum monasterij timeas ut Dominum, diligas ut parentem, credas tibi salutare*  
 30 *quidquid ille præceperit, nec de maiorum sententia iudices, cuius officij est obedire, & implere quæ iussa sunt.*

SULPITIUS in Dialogo primo de virtutibus S. Martini, de Monachis disserens: *Præcipua, inquit, ibi virtus, & prima, est obedientia: neque aliter adueniens ad monasterium Abbas suscipitur, quam qui tentatus prius fuerit, & probatus, nullum unquam recusaturus, quamlibet arduum ac difficile, indignumq; toleratus Abbatis imperium.*

S. AUGUSTINUS li. I. de moribus Ecclesiæ, cap. 31. *Hic vero Patres, inquit, nulla superbia consulunt iis, quos filios vocant, magna sua in iubendo auctoritate, magna illorum in obtemperando*  
 solum



*Voluntate.* Hæc ille. Eiusmodi autem testimonia plurima afferre possemus, si opus esset.

Respondebunt fortasse, obedientiam quidem in usu fuisse apud veteres Monachos, sed votum obedientiæ non item. At IOANNES CASSIANVS lib. 4. de institutis renunciantium, cap. 33. voti & professionis nominatim meminit, ubi disserit de obseruatione monasticarum institutionum, quarum primaria de obedientia erat, verba eius capite superiore citauimus.

Item S. GREGORIUS hom. 20. in Ezechielem: *Cum, inquit, quis suum aliquid Deo vouet, & aliquid non vouet, sacrificium est; cum vero omne quod habet, omne quod vixit, omne quod sapit, omnipotenti Deo vouerit, holocaustum est.* Hæc ille. Vbi de votis monasticis loquitur, quibus homo nihil sibi retinet, ac ne iudicium quidem, quod Deo non offerat.

Denique S. AVGVSTINVS in Psal. 75. *Nemo, inquit, positis in monasterio frater dicat, recedo de monasterio; neque enim soli qui sunt in monasterio perueniunt ad regnū celorum, & illi qui ibi non sunt, ad Deum non pertinent; respondetur ei, sed illi non vouerunt, tu vouisti.* Et in Psal. 99. *Dum non perseuerauerit implere quod vouit, fit desertor tam sancti propositi, & reus voti non reddit.*

ACCEDANT postremò miracula, quæ Deus ad confirmandam obedientiam monasticam non rarò ostendit. Scribit SYLVITIUS in primo Dialogo de virtutibus S. Martini duo miracula his verbis: *Duo vobis referam incredibilis obedientia admodum magna miracula, licet suppetant plura recolenti, sed ad excitandam virtutum emulationem, cui pauca non sufficiunt, multa non proderunt. ergo cum quidam seculi actibus abdicatis, monasterium magna dispositionis ingressurus, cæpisset rogare, Abbas ei cæpit multa proponere, graues esse istius disciplina labores, sua vero dura imperia, qua nullus facile valeret implere patientia, aliud potius monasterium, ubi facilioribus legibus vineretur, expeteret, non tentaret aggredi quod implere non posset. Ille vero nihil his terroribus permoueri, sed magis ita omnem obedientiam polliceri, ut si cum Abbas in ignem ire præciperet, non recusaret intrare. Quam illius professionem ubi magister accepit, non cunctatur probare profitentem. Casu clibanus propter ardebat, qui multo igne succensus coquendis panibus parabatur: exundabat abrupta flamma fornacibus, & intra camini*



illius concuatoris habenis regnabat incendium. Hoc igitur aduenam illum iubet magister intrare, nec distulit parere precepto, modicas flammās nihil cunctatus ingreditur, quæ mox tam audaci fide victa, velut illi quondam Hebræis pueris cedere venienti, superata natura est, fugit incendium, & qui putabatur arsurus, velut frigidore perfusus seipse miratus est. Sed quid mirum si tuum Christe tyronem ignis ille non attigit, ut nec Abbatem pigeret dura mandasse, nec discipulum paniteret imperio paruisse qui eo die quo aduenerat dum tentaretur infirmus, per-

10fectus inuentus est, merito felix, merito gloriosus, probatus obedientia, glorificatus est passione.

In eodem autem monasterio factum id, quod dicturus sum, recenti memoria ferebatur. Quidam itidem ad eundem Abbatem recipiendus aduenerat, cuius prima ei lex obedientia poneretur, ac perpetem polliceretur ad omnia se extrema patientiam: casta Abbas florantem Virgam iam pridem aridam manu gerebat, hanc solo fixit, atq; illi aduena id operis imponit, ut tamdiu Virgula aquam irriguam ministraret, donec, quod contra omnem naturam erat, lignum aridum in solo arente viuifceret. Subiectus

20aduena dura legis imperio aquam propriis humeris quoti die conuehebat, quæ à Nilo flumine per duo ferè milia petebatur, iamq; emenso anni spacio labor non cessabat operantis, & de fructu operis spes esse non poterat, tamen obedientia virtus in labore durabat. Sequens quoq; annus vanum laborem iam affectu fratris eludit; tertio demum succedentiū temporum labente curriculo, cum neque noctis, neq; interdum aquarius ille cessaret operator, Virga floruit. Ego ipsam ex illa Virgula arbusculam quæ hodieq; intra atrium monasterij est ramis virentibus, vidi, quæ quasi in testimonium manens, quantum obedientia meruit, & quantum fides

30posuit, ostendit. Hæc ille.

Alia non dissimilia narrat sanctus Gregorius lib. 2. Dialogorum, cap. 7. de S. Mauro, qui ad Abbatis imperium super aquas ambulauit; & Ioannes Cassianus lib. 4. de institutis renunciantium, cap. 23. de Abbate Ioanne, qui propter obedientiæ virtutem ad prophetiæ gratiam sublimatus, sic vniuerso claruit orbi, ut etiam Regibus mundi huius merito suo redderetur illustris.

Sed occurrunt soluendæ obiectiones. PRIMA Lutheri est in libro de votis monasticis, ubi hoc modo ratiocinatur, Scriptura iubet, ut omnibus hominibus obediamus, Philipp.



2. Superiores inuicem arbitantes. Et 1. Pet. 2. Subiecti estote om-  
ni humana creatura propter Deum. Igitur obligare se ad obe-  
diendum vni soli præposito, contra Scripturam est; idem e-  
nim est ac si quis ita voueret; Deus voueo tibi nolle me se-  
cundum Euangelium tuum omnibus subiici, sed tantum vni  
maiori.

RESPONDEO, Apostolum Paulum eo loco non velle ut  
omnes habeamus tanquam principes, quibus parere teneamur,  
sed ut omnes iudicemus nobis esse superiores, id est,  
meliores, & sanctiores; commendat enim humilitatem, ut i-  
psa verba eius indicant: *Per humilitatem inuicem superiores*  
*arbitantes.* Adde, quod si vellent Apostoli, ut omnibus obe-  
diremus, rem planè impossibilem vellent; si enim omnes om-  
nibus obedire debent, nulli erunt qui iubeant, & nulli qui o-  
bediant. Porro S. Petrus per omnem humanam creaturam,  
intelligit omnem hominem potestate imperandi præditum.  
Sic enim explicat ipse se: *Sine*, inquit, *regi tanquam præcellen-*  
*ti, sine ducibus tanquam ab eo missis.*

SECUNDA obiectio est eiusdem Lutheri in eodem loco.  
Præpositus monasterij liber est ab obedientia, quam voue-  
rat, sine alia dispensatione, igitur signum est, votum illud nõ  
obligare coram Deo. RESPONDEO, in eo, qui eligitur in præ-  
positum, remanere obligationem voti, licet per accidens celsi-  
set exercitium illius voti, quia deest materia: cuius signum  
est, quia si is qui nunc est præpositus priuatur officio, iterum  
tenebitur ad obedientiam, etiam si nouum aliquod votum  
non faciat. Vide S. Thomam in 2. 2. quæst. 88. art. 11. & quæst.  
186. art. 5.

TERTIA est Petri Martyris in commentario ad caput 7.  
prioris ad Cor. Vetat B. Paulus, ne Christiani seruos se faci-  
ant, cum ait: *Precio empti estis, nolite fieri serui hominum.* Non  
igitur licet votum obedientiæ facere. Quid enim hoc est ali-  
ud, quam sponte sua se in seruitutem Abbatibus tradere?

At facilis responsio est; non enim B. Paulus prohibet ser-  
uitutem, quæ hominibus exhibetur, sed id prohibet, ne ho-  
minibus propter ipsos homines potissimum, sed propter De-  
um seruiatur, id quod exposuit clariùs ad Coloss. 3. vbi sic  
ait: *Serui obedite per omnia Dominis carnalibus, non ad oculum*  
*seruientes, quasi hominibus placentes, sed in simplicitate*  
*cordis timentes Dominum, quodcumque facitis, ex animo ope-*



*ramini sicut Domino, & non hominibus, scientes quod à Domino recipietis retributionem hereditatis, Domino Christo seruite.*  
 Quocirca S. Paulinus etsi non ignorabat Apostolum dixisse: *Nolite fieri serui hominum*, tamen seipsum vendidit, ut filium viduæ redimeret, quod S. Gregorius cum laude eius refert lib. 3. Dialogorum, cap. 1.

„ Sed, inquit Petrus Martyr, S. Paulinus ex caritate erga  
 „ proximum seipsum vendidit, quod autem ex caritate sit, re-  
 „ spondet. Quasi verò perfecti Monachi ex cupiditate, & non ex  
 10 caritate erga Deum, se Abbatibus, aliisque præpositis sponte  
 subiiciant. Sed de obedientia hæc tenus.

## CAPVT XXII.

*Asferitur votum continentia ex illis verbis*

*Lucæ 1. Quomodo fiet istud? &c.*

**V**ENIO tandem ad votum CONTINENTIAE, quod  
 primum Scripturæ testimoniis; deinde Concilio-  
 rum, & Ecclesiæ totius consensu; tertio Pontificū,  
 10 & Imperatorū decretis ac legibus; quarto Patrum  
 Græcorum, & Latinorum traditione; postremo naturali eti-  
 am ratione confirmare pro viribus nitar.

PRIMUM igitur testimonium sit illud Lucæ 1. *Quomodo fiet  
 istud, quoniam Virum non cognosco?* Quibus verbis virgo san-  
 ctissima significat impedimentum se habere, quod minus fili-  
 um concipere, & parere posset: impedimentum autem illud  
 non aliud esse potuit, quam votum continentia iam emis-  
 sum. Illa enim verba: *Virum non cognosco*, non significant iam  
 actu non cognosco, sed non licet mihi cognoscere, alioqui  
 30 ineptissima interrogatio fuisset, cum posset statim respon-  
 deri, etsi nunc virum non cognoscis, tamen paulò post co-  
 gnoscēs. Itaque sicut dicimus; In Quadagesima ego non  
 vescor carnibus, id est, non licet mihi hoc tempore carnibus  
 vesci: sic B. Virgo dixit: *Virum non cognosco*, id est, prohibeor vi-  
 rum cognoscere: cur autem prohiberetur, nulla ratio potest  
 reddi, nisi votum; nam & virum habebat, & iuueniserat; nec  
 est credibile sterilem, aut impotentem fuisse, vel certè id ipsa  
 nondum scire poterat cum ad virum nondum peruenisset.  
 Nec deniq; prohibebatur virum cognoscere lege aliqua cō-  
 muni, ut notum est, igitur lege particulari, id est, voto.

Idem



Idem confirmatur ex Patribus. S. GREGORIUS NYSSENVS in oratione de natiuitate Domini: Nam, inquit, si nuptiarum causa assumpta erat à Iosepho, quomodo Angelum de partu praedicientem, quasi re noua, atq; insolita obstupefacta, aduersata effecerit? cum prorsus speraret se quoz, ipsam aliquando iuxta legem natura matrem esse futuram? sed quoniam Deo dicatam, & consecratam carnem, veluti sanctum quoddam donarium, intactam seruari oportebat; propterea etiam si Angelus sis, inquit, ac de caelo veneris, etiam si supra hominem sis id quod apparet, attamen vt virum cognoscam, fieri non potest; qui mater ero absque viro? Iosephum enim sponsum quidem noui, virum autem non cognosco.

S. AYGUSTINVS libro de sancta virginitate, cap. 4. Ipsa quoque inquit, Virginitas eius gratior, & acceptior, quia non eam concepit Christus viro violaturo, quam conseruaret, ipse praripuit, sed priusquam conciperetur, iam Deo dicatam, de qua nascetur elegit. hoc indicant verba, qua sibi factum annuncians Angelus MARIA reddidit: Quomodo, inquit, fiet istud, quoniam virum non cognosco? quod profecto non diceret, nisi Deo virginem se ante conuisset. Sed quia hoc Israëlitarum mores adhuc recusabant, desponsata est viro in isto, non violenter ablaturo, sed potius contra violentos custodituro, quod illam conuerat.

BEDA in caput I. Lucæ: Propositum, inquit, sua mentis reuerenter exposuit, vitam videlicet virginalem se ducere decreuisse. Qua, quia prima feminarum tanta se virtuti mancipare curauit, iure singulari pra ceteris feminis beatitate meruit excellere.

S. ANSELMVS libro de excellentia virginis, cap. 4. Virgo, inquit, & tenera, & delicata, regali stirpe progenita, & speciosissima, totam intentionem suam, totum amorem suum, totum studium suum ad hoc intendit, vt corpus, & animam suam Deo virginis nate perpetua consecraret.

RPERTVS lib. 3. in Cantica: Votum, inquit, egregium primo Deo conuisset, votum virginis nate.

Denique S. BERNARDVS scrip. 4. super Missus est: Non dubitat, inquit, de facto, sed modum requirit, & ordinem; nec enim querit, an fiet istud, sed quomodo, quasi dicat, cum sciat Dominus meus testis conscientia mea, votum esse ancilla sua non cognoscere virum; qua lege, quo ordine placebit ei, vt fiat istud? si oportuerit me frangere votum vt pariam filium, & gaudeo de filio, & doleo



doleo de voto. Et in serm. Signum magnum: In libertate spiritus legis Mosaiica decreta transcendens, illibatam Deo corporis simul et spiritus sancti moniam fouit. probat enim propositi inuictabile fundamentum, quod tam constanter promittenti filium Angelo respondit, quomodo fiet istud, quoniam virum non cognosco? Accedat consensus Theologorum apud Magistrum in 4. libro sententiarum dist. 30.

Sed videamus quid ad hæc aduersarij respondeant. Ioannes CALVINUS in commentario huius loci apud Marloratum, tria dicit reprehensione digna. PRIMO, accusat beatissimam Virginem, quod malignè restrinxerit Dei potentiam. Videtur, inquit, sancta Virgo non minus malignè restringere Dei potentiam, quam prius Zacharias, quod enim præter communem naturæ ordinem est, impossibile esse colligit. Sic enim ratiocinatur, virum non cognosco, qui credam igitur futurum quod nuncias? Nec verò magnopere laborandum est, ut eam purgemus ab omni vitio. Hæc ille.

Cuius sanè verba satis indicant, impietatem eius, & quàm nihil ei commune sit cum sanctis Patribus; nam S. Ambrosius, S. Bernardus, Beda venerabilis, & alij in hunc locum, disertis verbis monent, illud: *Quomodo fiet istud?* non fuisse dubitantis, sed querentis, ac discere cupientis modum quo res illa futura erat, quæ cum ipsius voto pugnare videbatur. Deinde, quomodo credibile est eam malignè restringere voluisse Dei potentiam, quæ erat gratia plena, & cum qua Dominus ipse singulari modo semper aderat, ut Angelus paulò antè dixerat. Denique si non minus malignè S. Virgo potentiam Dei restrinxit, quàm antè Zacharias, cur non æquè punita fuit? certè Zacharias ab Angelo ob incredulitatem, & verbis castigatus, & amissæ loquelæ supplicio punitus fuit. Beatissima Virgo ne minimo quidè verbulo reprehensa. at si idem vtriusque peccatum, cur non & poena eadem fuit?

SECUNDO, Calvinus accusat Patres, qui votum virginis ex his verbis colligunt: *Quod autem*, inquit, ex hoc loco occasionem quidam sumperunt, ut dicerent Virginem habuisse votum perpetuæ virginis, quod alioqui supernacanea fuisset ista responsio, nimis infirmum est, immò absurdum, ac ridiculum. Existimabimus ne Virginem passam fuisse marito se colluctari, & eum luderet? fuisse profectò perfidia, graui reprehensione digna,



*digna, si sanctum coniugij fœdus non sine Dei ludibrio spreuisset.*  
Hæc ille.

Hic etiam desideramus Caluini modestiam. quale enim est, vt absurdum & ridiculum dicat, quod asseritur à Nysseno, Augustino, Beda, Bernardo, Anselmo, Ruperto, & ab omni schola Theologorum? Porro argumentum eius duobus modis soluitur. PRIMVM negando consequentiam, quidquid sit de antecedente; nam etiamsi daremus beatam Virginem cum Iosepho coniugium contraxisse animo consummandi Matrimonium, vt Calvinus annotatione in caput 1. Lucæ, Beza ibidem, Bucerus in caput 1. Matthæi, Martyr in libro de cœlibatu & votis monasticis, & Centuriatores Centuria 1. libro 1. capite 10. falsò docent, adhuc tamen non sequeretur, eam, cum dixit: *Quomodo fiet istud, quoniam virum non cognosco?* non habuisse votum virginittatis; potuit enim hoc votum emisisse post coniugij celebrationem, & tamen ante Angelicam salutationem, vt S. Thomas docet 3. parte quæst. 28. art. 4. ita vt primùm nuptiæ celebratæ sint, deinde antequam ad Matrimonij consummationem veniretur, B. Virgo votum virginittatis emisisset, ipso S. Iosepho consentiente, & vt piè creditur, etiam simul vouente.

Addo tamen SECUNDO, B. Virginem nunquam habuisse explicitum animum consummandi Matrimonium, ac proinde falsum esse etiam antecedens argumenti aduersariorum; nam alioquin non esset Virgo animo, sed solùm carne. Nec tamen impeditum fuit verum Matrimonium ex perpetua voluntate continendi; nec luit virum suum, neque coniugium perfidè S. Virgo spreuit, vt blasphematur Calvinus, nam cum Matrimonium inuit, dedit viro absolutam potestatem in corpus suum, ita vt verè licuerit S. Iosepho, si voluisset, cum beata Virgine Matrimonium consummare, id enim requiritur, & sufficit ad essentiam veri coniugij: tamen quia sciebat ipsa, diuina reuelatione edocta, nunquam sanctum Iosephum id expetiturum, idcirco poterat habere, & habebat explicitam voluntatem semper continendi, in qua voluntate propriè virginittas consistit, & quamuis S. Thomas non admittat votum absolutum virginittatis in B. Virgine ante desponsationem. Scotus tamen admittit in 4. dist. 30. quæst. 2. & ante Scotum Albertus Magnus in



in libro de laudibus Virginis, & ante Albertum sancti Patres Gregorius Nyssenus, & Augustinus locis notatis disertis verbis docent, beatam Virginem vouisse ante desponsationem; neq; video cur id votum pugnet cum veri coniugij celebratione, posita reuelatione, quam omnes Theologi ponunt, qua beatæ Virgini reuelatum fuit, nunquam S. Iosephum debitum coniugale expetiturum.

At, inquiunt quidam, non potest qui per votum se Deo tradidit, per nuptias se alteri tradere. Vnde & Apostolus. <sup>10</sup> Timoth. s. dicit eas, quæ post votum nubere volebant, damnationem habere; *quia primam fidem irritam fecerunt.* Respondet, cum qui vouit continentiam non posse iam se alteri tradere cum periculo violandi voti; nam de huiusmodi personis Apostolus loquitur, & ratio ipsa hoc docet. At si adsit certitudo infallibilis voti nunquam violandi, non repugnat, ut qui est vnus se tradat etiam alteri in diuerso genere nuptiarum, alioqui non possent coniuges ex communi consensu vouere continentiam, quod tamen admittunt omnes Theologi; nam eiusmodi coniuges se tradunt Deo per votum, <sup>20</sup> & tamen sunt inuicem obligati per Matrimonium.

TERTIO, Caluinus respondet nostro & Patrum argumento, quo probamus, Virginem vouisse virginitatem, quia alioqui ineptè respondisset Angelo: *Quomodo fiet istud, quoniam Virum non cognosco?* Soluendum, inquit, est obiectum, quod Virgo in futurum tempus respiciat, ideoq; significet, nullam sibi fore cohabitationem cum viro. Hac verò coniectura & probabili est, & simplex, quod rei magnitudo, vel potius maiestas Virginem perculerit, & sensus omnes admiratione ligatos haberet ac restrictos; cum audiret nasciturum esse Dei filium, aliquid non solum <sup>30</sup> gare concipit; atque hæc ratio est cur coitum Virilem excludat. Hinc attonita exclamat; *Quomodo fiet istud?* Hæc ille. Ad quem modum exponit etiam Theodorus Beza.

Sed primum, si sola coniectura Caluinus nititur, cur deserit Patrum & Theologorum omnium auctoritatem? Autum sit ob coniecturam vnā repugnare omnibus Patribus, ipse viderit: deinde improbabilis & longè petita illa coniectura est. Nam primum quod occurrit ei, cui filius promittitur, est naturalis modus generandi. Proinde omnino credibile est, sanctam Virginem, cum sibi filium promitti audiret, non statim cogitasse filium illum sine opera viri nasciturum,



rum, sed more & ordine communi, & naturali. Neq; obstat quod ab Angelo promittebatur, & magnus futurus dicebatur; nam sæpe aliàs Angeli nunciauerunt filiorū magnorum generationem, vt Abraham Genes. 18. Manuæ Iud. 13. Zachariæ Luc. 1. & tamen omnes naturali generatione nascituri erant.

Deinde Virgo sanctissima humillima erat, propterea non est credibile statim eam cogitasse se fore Messiae matrem, & virginem illam, de qua scriptum erat Isaia 7. *Ecce Virgo concipiet*, immò etiam valde probabile est eam non scuisse Messiae matrem virginem futuram, non enim id notum erat vulgo apud Iudæos; nam prophetiæ obscuræ erant, & à paucis intellectæ antequam implerentur. Præterea Virgo sancta curiosa non erat, idcirco si sciuisset, vt Caluinus dicit, se virginem parituram, nunquam dixisset, quomodo fiet istud: id enim fuisset velle indagare diuina mysteria sine necessitate, quod pertinet ad curiositatem.

Ad hæc, Angeli responsio satis apertè docet, quid B. Virgo quæsierit: siquidem nihil aliud Angelus responderet, nisi illam sine viri opera, solius Spiritus sancti virtute concepturam & parituram.

Denique sancti Patres ita hunc locum intellexerunt, ac prætereos, quos supra citauimus, S. ATHANASIUS in sermone de sanctissima Deipara: *Quin*, inquit, *& hic habitat Virgo*, & ipse ad naturam respiciens, & de Iosepho cogitans, cui nuptia erat, ad Angelum tale responsum dedit; *Quomodo fiet istud, quoniam Virum non cognosco*.

Sed iam Caluino dimisso Petrum Martyrem audiamus, is in libro de cœlibatu & votis, tria quædam affert ad hunc locum Euangelij explicandum. PRIMO dicit, non cohærere Matrimonium virginis cum voto virginitatis. Sed hoc iam solutum est.

SECUNDO dicit, non posse colligi votum ex illis verbis: *Quoniam Virum non cognosco*, nisi more Anaxagoræ quodlibet faciamus ex quolibet, & probat ex aliis similibus loquutionibus; nam Exod. 6. Moses dixit: *Quomodo audiet me Pharaon, cum sim labiis incircumcissus?* Et tamen non inde rectè colligeremus Moysen vouisse labiorum incircumcisionem. Et Nicodemus dixit Ioan. 3. *Quomodo potest homo nasci cum sit senex?* Et tamen quis inde colligat Nicodemum vouisse senectutem?



Sed hæc nimis frigida sunt, nam in circumciso labiorum, & senectus, non pendent ex libero arbitrio, & ideo impedimentum afferunt, siue ad loquendum, siue ad nascendum, quod non potest tolli ab homine. Quocirca prudenter dixit Moyses: *Quomodo audiet me Pharao, cum sim labiis incircumcisus?* Et Nicodemus: *Quomodo potest homo nasci cum sit senex?* etiam si nec ille vouerit incircumcisionem labiorum, nec iste senectutem: quia sine tali voto impedimentū habebant, ille ad loquendum, & iste ad nascendum, quod per se remouere  
 10 non poterant. At virum cognoscere, mulieri coniugata in arbitrio positum est; idcirco ineptè respondit sancta MARIA: *Quomodo fiet istud, quoniam virum non cognosco?* si nulla lege prohibebatur virum cognoscere: constat autem, eam non fuisse prohibitam lege communi, sequitur igitur, vt prohibita fuerit lege priuata, id est, voto.

TERTIO, conatur soluere hoc nostrum argumentum, atque ait, beatam Virginem etiam si votum non fecerit, tamen prudenter interrogasse: *Prudens, inquit, sanè Virginis nostra interrogatio, quia si conceptus & parius, qui ei prædicebatur, ordi-*  
 20 *dinaria & sit atq; ratione futurus esset, dixit hoc obstare, quòd viro nondum admisceretur: si verò extra ordinem, ac supra naturam, de modo cupit edoceri.* Hæc ille.

Sed frustra laborat; nam si naturali & ordinaria via conceptus futurus erat, non prudenter, sed stultissimè dixisset hoc obstare, quòd nondum viro admisceretur; nam non promittebatur ei cōceptus præsens, aut præteritus, sed futurus: *Ecce, inquit, concipies, & paries;* ad futurum autem conceptum non requirebatur, vt virum cognosceret, aut cognouisset, sed vt cognoscere posset, ac vellet in futurum; quare nulla om-  
 30 nino sponsa, nisi fortè amens, à prædicente aliquo conceptū quæreretur; Quomodo fiet istud, cum virum nondum cognouerim; responderetur enim ei, si nondum cognouisti, postea cognosces. Si autem supra naturam conceptus Virginis futurus erat, adhuc imprudenter dixisset: *Quomodo fiet istud, quoniam virum nō cognosco?* idem enim est, ac si dixisset; Quomodo potest fieri, vt Virgo pariam, cum virum non cognouerim; quæ non minus stulta interrogatio est, quàm si quis diceret; Quomodo potest ignis calefacere, cum non sit frigidus: Verissimè igitur est sententia Patrum, & Theologorum, rectissimè colligi ex interrogatione beatæ Virginis votum perpetuæ continentia,



CAPVT XXIII.

*Idem asseritur ex illis verbis Matth. 19. Sunt Eunuchi, qui se castrauerunt, &c.*

**A**LTERVM testimonium pro voto continentiae est, Matth. 19. vbi Dominus quosdam esse dicit, *Eunuchos, qui se castrauerunt propter regnum caelorum.* Et addit cohortationem: *Qui potest capere, capiat.* Ipsa enim Eunuchorum appellatio perspicue indicat votum; non enim est Eunuchus, qui solum continet, sed qui non potest non continere; Eunuchi autem, de quibus hic agitur, non coguntur continere ex vitio naturae; nam ab his eos Christus ipse seiunxit, neque coguntur lege aliqua communi (nulla enim lex est prohibens nuptias absolute) igitur id solum remanet, vt non possint ex lege particulari sponte assumpta, id est, ex voto. Idem etiam colligitur ex illo verbo: *Qui se castrauerunt;* nam si Dominus loqueretur de his, qui sine vlllo voto cœlibes viuunt, diceret, *qui se castrant* quotidie, non *qui se castrauerunt;* cùm ergo dixerit, *qui se castrauerunt,* significat eos vnica actione voluntaria amputasse sibi omnem facultatem contrahendi nuptias. Et confirmatur explicatio hæc ex Patribus.

Sanctus EPIPHANIUS hæresi 58. *Valesiorum: Quinam, inquit, hi fuerint, qui se castrauerunt propter regnum caelorum, quam generosi Apostoli, ac monasticam vitam degentes, & deinceps Virgines?* Et infra: *Post ipsos Verò, Apostolos, quot millia in mundo solitariam vitam agentes, & a monasteriis, & Virgineis conuentibus huius certaminis gloriam abstulerunt.* Hæc ille. Quidum affirmat, castrare seipsum propter regnum cœlorum id esse, quod Monachi & sacrae Virgines faciunt, aperte significat, castrationem hanc non simplicem continentiam, sed continentiam Deo deuotam significare.

S. HIERONYMUS in commentario huius loci: *Vnusquisque, inquit, consideret vires suas, utrum possit virginalia implere præcepta.* Hæc ille. At quæ sunt præcepta virginalia, nisi obligatio non nubendi, quæ sine voto nulla est? Et lib. 1. in Iouinianum dicit, eos castrare seipsos qui templum se Deo purissimū, & holocaustum acceptissimum offerunt; vbi



quoque non solum cœlibatum, sed cœlibatum Deo deuotum & sacratum, castrationem vocat.

S. AUGUSTINVS libro de sancta virginitate, cap. 30. alludens ad hunc locum, vbi Dominus de castratione ista voluntaria ait: *Qui potest capere, capiat. Vos etiam, inquit, qui hoc nondum scouistis, qui potestis capere, capite.*

S. EULGENTIUS libro de fide ad Petrum, cap. 3. *Quisquis, inquit, seipsum castrauerit propter regnum cœlorum, & in corde suo continentiam Deo seruerit, &c.* vbi illud (Et) ad explicatio-  
nem pertinere, non dubium est.

SED occurrit Petrus Martyr in libro suo de cœlibatu & votis, ac docet, ex hoc loco non posse votum continentie statui; nam Apostoli, quibus Dominus respondit per illam similitudinē Eunuchorum, tantum dixerunt: *Si ita est causa cum vxore, non expedit nubere*; non autem dixerunt, expedit vouere continentiam: quare Dominus si ad propositum respondere voluit, non de voto, sed de vtilitate & incommodis coniugij differere debuit, ergo per Eunuchos, qui se castrant propter regnum cœlorum, intelligit eos, quibus ex peculiari  
20 ri Dei dono expedit non nubere, vt expeditius Euangelium prædicent. ADDET etiam Martyr, non oportere vim facere in metaphora Eunuchorum, sed in scopo præcipuo ipsius parabola; quemadmodum in parabola de villico iniquitatis, effi-  
ducatur similitudo ab eo, qui ex bonis alienis sibi fecit amicos: non tamen Christus intendit hoc docere, vt ex bonis alienis eleemosynas faciamus.

AT frustra laborat Petrus Martyr, vt verba Domini satis aperta & dilucida obscurat & peruertat; ac in multis errat. PRIMVM, quantum ad scopum horum verborum; nam etiam  
30 si Apostoli non loquerentur de voto, sed solum quærerent, an expediret nubere; Dominus tamen aliquid perfectius eis ostendit, & sic confirmauit nō expedire nubere, vt etiam adderet, expedire, voto se obligare ad non nubendum, vt patet ex metaphora Eunuchorum & castrationis.

SECUNDO errat, cum ait, non esse vim faciendam in vobis istis, quod in parabolis non omnia ponantur ad significandum. Errat, inquam, nam licet in parabolis esse possint interdum quædam partes, quæ nihil significant, sed ponantur solum ad explendam narrationem; tamen in verbis Euangelij, de quibus agimus, nulla est parabola, sed solum duo



duo verba metaphorica, nimirum nomen, Eunuchi, & nomen, castrationis; quæ verba nisi aptam similitudinem continent, tota Christi oratio inepta redditur; non continent autem illa verba aptam similitudinem, nisi illi, qui dicuntur metaphorice Eunuchi, habeant voluntariam necessitatem continendi, sicut Eunuchi proprie dicti habent naturalem continendi necessitatem.

TERTIO deinde errat Martyr, quia licet in parabolis prolixis possit aliqua pars nihil significare, tamen id, in quo parabola præcipue consistit, non potest non significare, nisi ineptissima sit parabola. Iam verò in verbis Evangelij, de quibus nunc agimus, si parabola esset, ea præcipue in vocibus (Eunuchi & Castrationis) cõsisteret, ut patet, ac proinde merito in his vocibus vis facienda esset.

Errat QUARTO, in exemplo, quod affert de villico iniquitatis; nam non existimat aliquid significare, quòd villicus ille ex alienis bonis sibi amicos fecerit, cum tamen in hoc maxime parabola consistat; vult enim nos Dominus docere, ut quemadmodum ille villicus ex bonis Domini sui multa largiendo, sibi multos amicos comparavit: ita & nos ex bonis Domini nostri, id est, Dei, cuius sunt omnia quæ habemus, elemosynas faciendo multos amicos in cælo faciamus. Hoc solum interest, quòd ille peccabat bona Domini sui largiendo, quia contrarius voluntatem largiebatur, & idcirco dicitur villicus iniquitatis; nos autem non peccamus bona Domini nostri largiendo, quia hoc ipsum ei vehementer placet, ut bona sua liberaliter erogemus, cum nullum ipse ex hac largitione dispendium patiatur: & sanè vehementer accendit ad elemosynam faciendam ista cogitatio, quòd opes nostræ res sint alienæ, id est, Dei, & tamen ex eiusmodi alienis rebus possimus nobis regnum cælorum comparare.

POSTREMO errat Petrus Martyr, quòd existimet, hinc solum continentiam laudari, ut quis liberâ cura vxoris & liberorum, facilius possit Evangelium prædicare; quem errorem supra refutauimus in disputatione de consilijs Evangelicis. Hic vnum duntaxat S. AVGVSTINI testimonium addam, libro de sancta virginitate, cap. 23. *Quid, inquit, Seracius, quid lucidius dici potuit? Christus dicit, Veritas dicit, Virtus & Sapientia Dei dicit, eos, qui pio proposito ab vxore ducenda se continuerint, castrare se propter regnum cælorum: & contrâ, humana Vanitas*



impia temeritate contendit, eos, qui hoc faciunt, praesentem tantummodo necessitatem molestiarum coniugalium deuotum: in regno caelorum amplius quidquam ceteris nihil habere. Hæc ille.

## CAPVT XXIV.

*Idem asseritur ex verbis Apostoli 1. ad Tim.*

10 *s. Damnationem habent, quia primam fidem irritam fecerunt.*



ERTIVS locus pro continentia voto habetur in epistola priore ad Timotheum, cap. 5. ubi hoc modo Apostolus loquitur: *Adolescentiores viduas deuota; cum enim luxuriatae fuerint in Christo, nubere volunt, habentes damnationem, quia primam fidem irritam fecerunt.* Quo loco per primam fidem nihil aliud intelligi potest, nisi continentia votum, ut omnes omnino veteres intellexerunt. Nam cum Apostolus dicat, eas primam fidem irritam facere, quæ nubere volunt, necessario colligimus eum loqui de fide seruandæ continentia, quæ per nuptias violatur.

20 30 Ista autem fides seruandæ continentia, aut est fides data marito carnali, aut Christo sponso spirituali; non potest esse fides data carnali marito; illa enim tamdiu durat, quamdiu maritus viuit; mortuo autem viro, soluta est mulier, & cui vult, nubere potest, ut Apostolus ait ad Rom. 7. & 1. Corinth. 7. igitur sequitur, ut hoc loco fides, quæ per nuptias irrita fieri dicitur, sit fides data spirituali sponso Christo. Non potest autem hæc fides Christo data, esse simplex propositum, seu voluntas continendi sine promissione ac voto; tum, quia simplex propositum non habet relationem ad aliud, nec fides dici potest; unde non irritatur fides, cum mutatur propositum; tum etiam, quia propositum sapelicer sine vlla culpa mutare: Apostolus autem absolute dicit, eas damnationem habere, quia fidem irritam faciunt; sequitur igitur, ut fides hoc loco votum significet. Ex quo sequitur, votum perpetuæ continentia non esse impossibile, nec illicitum, quia nullum tunc fuisset peccatum illud violare.



Ita exposuit Concilium Carthaginense IV. can. 104. Si quæ viduæ quantumlibet in minoribus annis positæ, se deuouerunt Domino, & veste laicali abiectæ, sub testimonio Episcopi & Ecclesiæ religioso habitu apparuerint, postea vero ad nuptias seculares transferint, secundum Apostolum damnationem habebunt, quoniam fidem castitatis, quam Domino vouerunt, irritam facere ausæ sunt. Hæc sententia est CC. XIV. Episcoporum, qui in hoc Cōcilio interfuerunt. Idem habetur in Concilio Toletano IV. ca. 55. vbi LXX. Episcopi fuerunt.

Ita exponunt etiam tres summi sanctiq; Pontifices; Clemens lib. 3. constit. cap. 1. & 2. Innocentius I. in epist. 2. cap. 11. & Gelasius I. in epist. 1. cap. 23. Ita etiam Tertullianus in libro de Monogamia, non procul à fine; Basilius in libro de virginitate, parum vltra medium; Hieronymus lib. 1. in Iouinianum, & in caput 44. Ezechielis; Epiphanius hæresi 48. Augustinus libro de sancta virginitate, cap. 23. & libro de bono viduitatis, cap. 8. & 9. & in Psal. 75. Fulgentius in epist. 1. Præterea omnes expositores huius loci, tum Græci, vt Chrysostomus, Theodoretus, Theophylactus & Oecumenius; tum Latini, vt Ambrosius, Primasius, Beda, Haymo, Sedulius, Anselmus, & alij.

Ad hunc locum multi respondere conati sunt, ac primum LUTHERVS in libro de votis monasticis, contendit, per primam fidem non posse intelligi votum, eò quòd nusquam alibi in Scripturis votum dicatur fides: vult autem ipse per primam fidem intelligi fidem Christianam, quam perdiderunt viduæ illæ, quæ, vt facilius nubere illis liceret, defecerunt à fide Christiana ad Iudaismum, vel Paganismum; & confirmat hanc explicationem suam duabus rationibus. PRIMO, quia de his viduis Apostolus dicit, eas abiisse retrò post Satanam. SECUNDO, quia dicit, eas luxuriatas esse aduersus Christum; nam & abire post Satanam, & luxuriari aduersus Christum, nihil videntur significare aliud, quàm Apostasiam à fide Christi.

Sed hæc noua explicatio facilè refellitur. Nam etsi fides nusquam alibi significat votum, tamen multis in locis significat promissionem, siue constantiam in promissione seruanda, quorum vtrumque ad votum pertinere certum est, cum votum promissio quædam sit. Genes. 44. Ego hunc in fidem



meam recepi. Ad Rom. 3. *Nunquid incredulitas illorum fidem Dei enervauit?* Sicigitur hoc loco fides promissionem, seu pactum significare potest; quod autem non solum possit, sed etiam debeat fides hoc loco pro pacto ac voto accipi, non pro fide Christiana, qua Deo credimus, colligitur ex illo verbo adiuncto (*Irritam fecerunt*) nam fides, qua Deo credimus, non rectè dicitur irritari, sed amitti, vel corrumpi: pacta autem & vota propriissimè irritari dicuntur. Deut. 30. *Si quis Domino votumouerit, non faciet irritum verbum suum.* Psal. 108. *Quæ procedunt de labiis meis, non faciam irrita.*

Deinde, nulla causa erat, cur viduæ illæ, si non vouerant continentiam, non possent nubere, nisi deficerent ad Iudæos, aut Paganos; quis enim illas prohibebat nubere inter Christianos? An non Apostolus 1. Corinth. 7. apertè permiserat, ut viduæ iterum nuberent, modò in Domino, id est, inter Christianos? Neque Lutheri rationes concludunt; nam abire post Satanam, non solum contingit per apostasiam, sed per omne peccatum mortale; luxuriari autem contra Christum, non potest significare defectionem à Christi fide, sed scortari in iniuriam Christi: Nam Apostolus dicit, eas vi-  
 10 duas prius luxuriari in Christum, & postea nubere velle: Lutherus autem dicit, eas nubere velle, & propterea deficere à Christo, ergo cogitur fateri, non esse idem luxuriari & deficere.

Ad eundem locum tres solutiones Calvinus affert. PRIMÒ, dicit, Apostolum nomine primæ fidei accipere fidem in Baptismo datam, quam istæ viduæ irritam fecerunt lasciuendo, & scortando.

AT SOLVTIO parum valet; nam præterquam quòd aduersatur omnibus veteribus citatis, apertè Apostolus dicit, eas habere damnationem, quia primam fidem irritam fecerunt nubere volendo; nulla autem mulier in Baptismo promittit se non esse nupturam. si ergo non vouerant continentiam, cur damnantur, si nubere velint? Quòd autem Apostolus hoc loco ait: *Cum luxuriatae fuerint in Christo*; aliqui intelligunt de spiritualibus deliciis, ut sit sensus; Posteaquam deliciis spiritualibus in domo Dei abundarunt, ingrata sponso cœlesti terrenas appetunt nuptias; ita Tertullianus de Monogamia, & Cyprianus lib. 3. ad Quirinum, cap. 74. Alij intelligunt de temporalium rerum affluentia, ut sit sensus; Posteaquam in  
 domo



dōmo Dei Ecclesiæ sumptibus ad satietatem pastæ fuerint, nubere volunt; ita Theodoretus & B. Thomas in hunc locum. Alij, vt Chrysostomus hoc loco, & Hieronymus in epistola ad Ageruchiam de monogamia, intelligunt de fornicatione, vt sit sensus; Postquam in iniuriam sponsi sui Christi fornicatæ fuerint, etiam hoc addunt, vt nubere velint.

Sed quocumq; modo accipiatur illud: *Cum luxuriata fuerint, nubere volunt*; semper argumentum nostrum suum robur habet; nam si de scortatione non accipiatur illud; *Postquam luxuriata fuerint*, constat solum reprehendi quod nubere velint contra votum: si autem accipiatur de scortatione, tunc non solum non reprehendi, sed etiam laudari deberent, si a scortatione ad honestum coniugium transire velent. Non igitur primam fidem vocat Apostolus fidem Baptismi, sed fidem voti, cui respondet tanquam secunda, fides Matrimonij ineundi; idem enim est, ac si diceret, post fidem Christo datam, volunt fidem mortali marito dare, & primam illam irritam facere. ADDE, quod etiam si de fide in Baptismo data Apostolus loqueretur, adhuc nihil pro hæreticis concluderetur; nam in Baptismo promissimus legem Dei nos seruatu- 10 ros; lex autem passim id inculcat, vota esse reddenda. Itaque etiam hoc verum est, eas viduas, quæ post votum nubere volunt, votum violando, fidem in Baptismo Deo datam irritam facere.

ALTERA solutio Caluini est, viduas illas, de quibus Apostolus loquitur, promississe continentiam, & hanc promissionem irritam fecisse, cum nubere voluerunt, sed tamen non potuisse id promittere, nisi eas, quæ excellerant annum sexagesimum, & iam non amplius aptæ erant coniugio. Dicit enim Apostolus: *Vidua eligatur non minus sexaginta annorum.* 30 Itaq; nihil ex hoc loco deduci posse pro voto Sanctimonialium, quæ etiam in flore ætatis continentiam profitentur. Hæc etiam solutio nihil solidi habet; nam etsi Apostolus iubeat, viduam eligi annorum sexaginta, tamen non verulas, sed adolescentiores accusat, quod primam fidem irritam fecerint volendo nubere.

Si igitur verum est quod Calvinus ait, non posse iuniorum continentiam vouere, cur Apostolus eas reprehendit? Præterea dico Apostolum, cum ait: *Vidua eligatur non minus annorum sexaginta.* Et: *Adolescentiores* & *viduas deuota*, id est,



non eas eligas, non loqui de admissione ad votum continentia, sed vel de electione ad quādam praefecturam & ordinem Diaconissarum, ut exponunt Tertullianus libro de velandis virginibus; & lib. 1. ad uxorem, & quidam alij; vel, quod probabilius est, de admissione ad numerum earum viduarum, quae ab Ecclesia alebatur, ut Chrysostomus & Ambrosius in hunc locum, & Hieronymus in epistola ad Saluinam, exponunt; verbum enim, *Eligatur*, Graece *καταλεγείτω*, in Catalogum adscribi & numerari significat.

- 10 Nolebat autem Apostolus, viduas minores annis sexaginta ab Ecclesia ali, ut B. Hieronymus loco notato docet, quia iuniores possunt labore suo victum sibi comparare: & praeterea, quia iuniores difficilius conseruantur in pudicitia, & turpius erat, aliquam earum viduarum, quae ab Episcopo alebantur & regebantur, labi, quam aliquam aliam, ideo eas valde probatas esse volebat, & quibus nullum periculum incontinentiae timeretur.

20 TERTIA solutio est, quod ista promissio continentiae, quam viduae faciebant, non erat propriè votum Deo factum ad eum colendum, sed erat promissio facta Ecclesiae ad expeditiis ministrandum iis, quibus ex officio Diaconissarum debebant; quomodo si aliqua cupiens recipi in ancillam, promittat se non cogitaturam de nuptiis, ut libentiùs seruire possit.

HAEC SOLUTIO minimè omnium quadrat; nam praeterquam, quod Patres citati dicunt, eas Deo verè vouisse; si votum Deo factum rescindi potest, ac debet (ut Calvinus dicit) ab eo, qui stimulis carnis agitat, continere non potest, quanto magis rescindi poterit promissio facta Ecclesiae? Cur ergo istas adolescentiores Apostolus damnat, quia nubere volunt?

30 SED, inquiunt, non damnat, quia nubere volunt, sed quia fidem Ecclesiae datam irritam fecerunt scortando. AT CONTRA; nam Apostolus in praesenti dicit: *Habentes damnationē*; ergo debet culpa praesens damnationi praesenti respondere: scortatio autem iam praeterierat, & ex sententia Caluini emendata fuerat per nouam voluntatem honesti coniugij; Sic enim loquitur Apostolus: *Cum luxuriata fuerint, nubere volunt*; non igitur damnantur, quia luxuriatae fuerint, sed quia nubere volunt, quod est praesens. Cur autem damnantur,



tur, quia nubere volunt, nisi quia continentiam voverunt, & sic nubere volendo, primam fidem irritam fecerunt.

SED instant rursus, quia ibidem Apostolus dicit: *Volo iuniores nubere*: non ergo approbat vota iuniorum. At vide huius loci explicationem infra cap. XXX.

Iam verò Petrus MARTYR in lib. de cœlibatu & votis, post repetitionem eorum, quæ ex Luthero & Caluino iam protulimus & refutauimus, duo adfert noua. PRIMVM dicit, hunc locum esse ambiguum, & posse variis modis exponi, proinde nihil solidi hinc adferri posse ad confirmanda dogmata. 10

RESPONDEO, non posse rectè ambiguum vocari eum locum, quem omnes interpretes, qui quidè ante nostras lites exortas exstiterunt, vno modo exposuerunt: alioqui nihil erit non ambiguum. Nihil enim est tam apertè dictum, quod non possit à contentiosis ambiguum fieri. ADDO præterea, ex locis ambiguis dogmata stabiliri, & confirmari posse, quando accessit explicatio Ecclesiæ per Concilia approbata, aut per communem Patrum consensum; nam alioqui nihil omnino habebimus certi, vt reuera nihil hæretici certi habent; nam, vt diximus, nihil est in Scripturis, quod non possit exponi variis modis, si velimus contentiosè agere. Quod si addas præterea, ex eiusmodi ambiguis locis dogmata fidei confirmari non posse, nullum omnino habebimus dogma. Exempli causa, Christum esse Deum, negant hodie in Transyluania permulti, & omnia loca Scripture, quibus id nos probamus, illi variis modis exponunt; ergo si Petro Martyri credimus, non erit dogma fidei, Christum esse Deum. Atque hoc idem de omnibus aliis articulis facile posset ostendi.

SECUNDO, Petrus Martyr contendit illud: *Habentes damnationem*; non significare pœnam, quæ peccato respondeat coram Deo, sed solùm quandam infamiam apud homines. Et si enim illæ, quæ promiserant Ecclesiæ castas se futuras, non peccent nubendo, immò bene faciant, cum Paulus dixerit: *Melius est nubere, quàm eri*, i. Corint. 7. tamen subeunt quandam notam leuitatis, quod non perseuerent in eo, quod cœperant.

Porro id non aliter probat, quàm auctoritate Martini Bucerii, qui vocem illam *κηρυξ*, quam noster interpretes damnationem interpretatus est, ambiguum esse docuit, & interdum accipi pro accusatione coram hominibus.



At nos Bucero opponimus in primis omnes Patres supracitados, qui damnationem æternam coram Deo habere dicunt viduas, quæ post votum nubere volunt. Opponimus deinde ipsum Apostolum Paulum, qui ubique illa voce utitur ad significandam damnationem coram Deo & hominibus, pro crimine magno & manifesto, ad Roman. 3. *Quorum damnatio, ὅτι ἡμεῖς, manifesta est*, appellat damnationem, iudicium Dei contra illos, qui blasphemabant, ac mentiebantur Apostolum dicere: *Faciamus mala, ut eveniant bona.* Et ad Roman. 13. *Qui autem resistunt Dei ordinationi, ipsi sibi damnationem, ἡμεῖς, acquirunt.* Certè autem, qui Deo resistunt, damnationem habent coram Deo, & non coram hominibus tantum.

Denique, Ioannes etiam cap. 3. non semel, sed ~~ter~~itur verbo (*ἡμεῖς*) in hac significatione: *Non venit, inquit, filius hominis, ut iudicet mundum, sed ut saluetur mundus per ipsum.* Vbi illud, *ὅτι ἡμεῖς* (ut iudicet) non significat iudicium discussionis, sed damnationis. Est enim sensus, Non venit, ut sententiam damnationis ferat aduersus mundum, sed contra potius, ut absolutionis. Sic etiam paulò post: *Qui credit, non iudicatur*, id est, non damnatur, *qui autem non credit, iam iudicatus est*, id est, manifesta est sententia damnationis, quam habebit, etiam si nondum pronuntiata sit. Viderint igitur Bucerus & Martyr, ubi legerint *ἡμεῖς*, non significare damnationem coram Deo.

Præterea, quare, quæso, viduæ illæ, si nullo voto obstrictæ erant, infames fuissent apud homines, si nubere voluissent? Sinon erat turpe (ut ipsi dicunt) Episcopo vxorē habere, & ea mortua, rursus aliam, & aliam ducere, & in ipso Episcopatu filios procreare, cur turpe fuisset viduæ, quæ continere non poterat, nubere? Et si nec infamiam, nec leuitatem, nec turpitudinem esse volunt hoc tempore Monachis & Sanctimonialibus, post solenne votum continentię ad Matrimonium transire; quomodo audent dicere, fuisse infame, ac turpe viduis illis velle nubere, cum nullam haberent non nubendi obligationem?



CAPVT XXV.

*Idem asseritur ex Conciliis.*

**N**UNC SECUNDO probanda est nostra sententia testimonio omnium Ecclesiarum, quod ex Conciliis antiquis facile haberi poterit. Iudicium Ecclesiæ Orientalis, patet ex Concilio ANCYRANO, can. 18. Quosque Virginitatem pollicitam prauaricati sunt, professione contempta, inter digamos habeantur. Item ex Concilio CHALCEDONENSI generali, can. 16. Virginem, quæ se Domino consecrauit, similiter et Monachum, non licere nuptialia iura contrahere, quod si hoc inuenti fuerint perpetrantes, excommunicentur.

Iudicium Ecclesiæ Africanæ, patet in Concilio CARTHAGINENSI III. cap. 33. ubi precipitur, ut sacre Virgines in monasteriis diligentissime custodiantur. Et in Concilio Carthaginensi IV. cap. vlt. ut supra citatum est.

Iudicium Ecclesiæ Hispanicæ, patet in Concilio TOLETANO IV. cap. 55. Duo sunt genera viduarum, seculares et sanctimoniales. Et paulò infra: Ea, si ad nuptias transferint, sicut Apostolum, non sine damnatione erunt, quia se primum Deo conuientes, postea castitatis propositum abiecerunt.

Iudicium Ecclesiæ Gallicæ, patet in Concilio TRONENSI II. cap. 16. ante annos mille celebrato: Si qui in monasterio conuersi sunt, nullatenus exinde habeant licentiam eua-  
gandi, nec, quod absit, illius eorum coniugem ducere, et si uxorem duxerit, excommunicetur, et de uxoris male sociata consortio etiam iudicis auxilio separetur; quod si index ad hoc solatium dare noluerit, excommunicetur. Qui infelix Monachus tali coniunctione factus, si per cuiuscunque patrocinium se conatus fuerit defendere, et is, qui in hac perimacitate perdurat, et illi, qui eum exceperint defensandum, ab Ecclesia segregentur, donec reuertatur ad septa monasterij, et indictam ab Abbate, quandam præceptum ei fuerit, agat pœnitentiam, et post satisfactionem reuertatur ad gratiam.

Iudicium Ecclesiæ Germanicæ, patet ex Concilio MOGUNTINENSI, tempore Arnulphi Imperatoris, cap. vlti. Quæ propositum castitatis assumpserint, aut monasterij claustris regulariter constringantur, aut dominantibus, castitatem suam profes-



professionis integerrimè custodiant. Ibidem confirmatur decretum 13. Concilij Elibertini, & sextum Colonienſis Concilij, sub Carolo Crasso, in quibus statutum fuit, vt Virgines sacræ, si semel votum violauerint, pactumq; virginitatis perdiderint, solum in fine vite communionem percipiant: si autem libidini diu seruerint, ne in fine quidem eam accipiant. Multa item de vita Monachorum & Sanctimonialium habentur in Concilio Moguntino, sub Rabano.

Iudicium Ecclesiæ Italicæ, patet ex Concilio ROMANO sub Syluestro, can. 10. vbi prohibetur Episcopus benedicere virginem, quæ nuptias aliquândo expetiit, nisi diu fuerit eius pudicitia probata. Et ex Concilio FOROVILENSI, tempore Caroli Magni: Item placuit de feminis cuiuscunq; conditionis, puellis scilicet vel viduis, quæ virginitatis, siue continentie propositum spontanea pollicentes, Deo mancipatæ fuerint, & ob continentia signum nigram Vestem, quasi religiosam, sicut antiquus mos fuit in his regionibus, induta fuerint, licet non sint à Sacerdote sacratæ, in hoc tamen proposito eas perpetuum perseuerare mandamus. Si Verò postea, siue clanculo, seu publicè nupserint, dignis quidem mundano iudicio corporalibus coercita vindictis, segregentur ab inuicem, & agant cunctis diebus vite sue penitentiam, &c.

## CAPVT XXVI.

*Idem asseritur ex responsis Pontificum & Imperatorum.*

**I**ERTIO, probanda est responsis aliquot veterum & sanctorum Pontificum. Ac PRIMVM CLEMENS lib. 3. constitut. Apostol. cap. 1. Quare, inquit, oportet non temerè facere professionem, sed cum consilio & consideratione. Præstat enim, eam non conuere, quam conuere, & non reddere. De viduis loquitur.

SIRICIUS epist. 1. cap. 6. dicit, nec publicas leges, nec iura Ecclesiastica vlllo modo permittere Monachis vel Sanctimonialibus nuptias post votum.

INNOCENTIUS I. epist. 2. cap. 12. dicit, eas, quæ post votum nupserunt, esse adulteras Christi, id est, sacrilegas.

LEO I. epistola ad Rusticum Narbonensem Episcopum, quæ est 90. cap. 13. Propositum, inquit, Monachi proprio arbitrio



Cap. XXVII. De Monachis. Lib. II. 301

eris & voluntate susceptum, deferri non potest absque peccato. Quod enim quis sinit Deo, debet & reddere. Idem dicit capite sequenti de Sanctimonialibus.

GELASIVS epist. 1. cap. 22. *Virginibus*, inquit, *sacris temere se quosdam sociare cognouimus*, & post dictum Deo propositum incesta fœdera sacrilegâq; miscere, quos protinus a quum est a sacra communione detrudi, & nisi per publicam probatamque penitentiam omnino non recipi, &c. Idem cap. 23. dicit, viduas etiam peccare, si post vorum nubant.

Denique, GREGORIUS I. lib. 1. epist. 33. ad Venantium: 10 *Considera*, inquit, *quanto periculo in diuino iudicio dignus eris*, qui temetipsum Deo omnipotenti, cui sub monachali habitu deuoueris, subtraxisti, &c. Et epistol. 40. ad Anthemium, iubet Monachos, si vxores ducunt, debere separari, & remitti ad monasteria.

His accedant responsa etiam Principum politicorum. Scribit enim Eusebius lib. 4. de vita Constantini, fuisse abrogatam à Constantino antiquam legem Romanorum, qua priuabantur successione hereditaria homines steriles, vel orbari liberis. Causam autem abrogationis scribit fuisse 20 propter eos, qui religionis & pietatis gratia ex voto cœlibatuum colebant, ne videretur lex politica pietatem velle punire. Rursus, cum tempore Iuliani Apostatæ cœpissent quidam sacras Virgines in coniugium petere, Iouinianus Imperator Christianus, qui Iuliano successit, legem tulit, vt capite plecteretur, qui sacram Virginem, vel ad coniugium petere, vel etiam impudicè aspicere deprehensus fuisset. Scribit hanc historiam Sozomenus lib. 6. histor. Ecclesiast. cap. 3. & exstat adhuc ea lex in Codice, L. Si quis, de Episcopis & Clericis. Quæ lex si hoc tempore obseruata fuisset, Marti- 30 nus Lutherus, cum non paucis ex suis, iustissimè caput amigisset.

CAPVT XXVII.

Idem asseritur testimonio Patrum.



VARO probanda est testimoniis Patrum. S. IGNATIUS epistola ad Tharsenses iubet honorari Virgines Deo sacras. Et epistola ad Antiochenenses: *Virgines*, inquit, *agnoscant cui se conse-*

crauerunt.

DIONY-



DIONYSIVS Eccles. hierarch. cap. 6. part. 2. describens ritum, quo initiabantur Monachi, dicit eos publicè in Ecclesia promittere, se renunciare vitæ diuifibili, id est, vitæ seculari; secularis enim diuifus est, vt Apostolus dicit 1. Cor. 7. cùm partim de Deo, partim de vxore cogitet.

MARTIALIS epistola ad Tholosanos, cap. 8. dicit se Valeriæ virgini persuasisse, vt virginitatem suam Deo voueret, quod etiam Iphigeniæ suasisse Matthæum scribit Abdias in eius vita, & Theclæ B. Paulum scribit S. Ambrosius lib. 2. de virginibus, & Flauia domitille S. Clementem scribit Beda in martyrologio die 7. Maij, cuius etiam meminit Eusebius in Chron.

TERTVLLIANVS libro de velandis virginibus: O sacri lege manus, inquit, quæ dicatum Deo habitum detrahere potuerunt; quid peius aliquis persequutor fecisset, si hoc à Virgine electum cognouisset? Et in fine libri: Nupisti, inquit, Christo, illi tradidisti carnem tuam, illi sponsasti maturitatem tuam. Et ibidem: Quid, inquit, faciet ipsum continentia votum? &c. Et libro de Monogamia, vltra medium: Habentes, inquit, iudicium, quod primam fidem resciderunt, illam videlicet, à qua, inviduitate inuenta, & professa eam, noluerint perseuerare.

CLEMENS Alexandrinus Strom. 3. initio: Est ergo, inquit, continentia, corporis desipientia conuenienter pactis conuentis cum Deo initis. Et in fine libri: Dominus, inquit, dixit, qui vxorem duxit, non repudiet eam; qui non duxit, non ducat; qui autem professus est se nunquam ducturum, sine vxore perseueret.

ORIGENES hom. 23. in Num. Vnde, inquit, mihi videtur illius solius esse indefinens offerre sacrificium, qui se indefinenter, & perpetua deuouerit continentia.

HILARIUS in Psal. 64. Deo ergo, inquit, seruenda sunt contemptus corporis, castitatis custodia, ieiunij tolerantia.

EUSEBIUS lib. 4. de vita Constantini: Castitatem, inquit, virginalemque modestiam amplexata quædam, corpus, & animam consecrauit Deo. Et infra de Constantino: Virgineum, inquit, eorum tantum non adorabat, istic habitare Deum, cui se puella deuouerant, arbitrabatur.

S. CYPRIANVS lib. 1. epist. II. ad Pomponium: Christus, inquit, Dominus & Iudex noster, cum virginem suam sibi dicatam, & sanctitati suæ destinatam, iacere cum altero cernat, quam indignatur & irascitur, & quas penas incestus eiusmodi consummationi-



tionibus comminatur? Et infra: Quæ, inquit, hoc crimen admisit, non mariti, sed Christi adultera est. Et libro de habitu virginum: Qui, inquit, se Christo dicauerint, & tam carnem, quam mentem Deo deuouerint, opus suum consumment magno premio destinatum.

S. ATHANASIUS in libro de humanitate verbi dicit, etiam pueros virginitatem suo tempore profiteri solitos. & in Apologia pro fuga sua meminit sacrarum virginum, quas Ariani petulacissimè vexauerunt. quod fusiùs scribit Petrus Athanasij successor, in epistola quadam, quæ exstat apud Theodoretum lib. 4. hist. Eccles. cap. 20. 21. 22. Idem Athanasius in libro de virginitate: Postquam, inquit, continentiam professæ es, corpus tuum sanctificasti.

S. BASILIUS in proœmio constitutionum monasticarum: Itaque, inquit, qui à mundi vinculis liber esse cupit, nuptias veluti pedicæ quasdam fugit, his autè relictis, viram suam Deo consecrat, & castitatem proficitur, Et neque facultas ipsi sit conuersionis ad nuptias. Et epistola vltima, quæ est ad virginem lapsam: Et quia, inquit, impius in profundum collapsus mala de cetero contemnit, etiam ipsa abnegas ad verum sponsum pacta, neque esse virgo, neque inquam promississe clamas. Renoca in memoriam honestam professionem, quam professæ es coram Deo, & Angelis, & hominibus. Renoca in memoriam Generandam congregationem, & sacrum virginum chorum, quos literas ad Sanctos saepe exarasti, per quas pro te orare petisti, non ut nuptias humanas, immò ignominiosam corruptionem assequereris, sed ut à Domino IESU non excideres? &c. Idem libro de virginitate parum à medio: Cum, inquit, virginitatem Domino professæ sint, carnali postmodum voluptate malè blanda delinita ac deusculis super scelus honesto coniugij nomine obtegere cipiunt. Et paulò antè: Horrendo, inquit, sacrilegio Christi sponsæ adulter efficiuntur. Et paulò infra: Nam quod solenne, inquit, legitimumque connubium sponus ille (Christus) occupauit, & virginitatis habitus, & fœdera, & conuenta cum illo, & præterea processus ipse testatur, huiusmodi quippe nobilitata viro processit in publicum, &c. Idem in quæstionibus fusè explicatis, quæst. 14. & 15. multa devoto solenni Monachorum disputat.

S. GREGORIUS NAZIANZENSIS oratione de obitu patris sui vltima medium: Vt enim, inquit, nos Deo vouimus, si discrimè effugeremus, et à periculo defuncti, nosmetipsos obtulimus, &c.



304 Cap. XXVII. De Monachis. Lib. II.

Gregorius enim, ut ipse in poemate de vita sua scribit, a matre Deo consecratus fuerat, antequam nasceretur, & ipse postea, cum in mari periclitaretur, iterum vorum continentiae, & religionis emisit, quod etiam seruauit.

S. OPTATVS Mileuitanus lib. 6. contra Parmenianum: spirituale, inquit, hoc genus nubendi est; in nuptiis sponsi iam Generant voluntate ex professione sua, &c.

S. EPIPHANIVS hær. 61. Apostolicorum: Tradiderunt, inquit, sancti Dei Apostoli peccatum esse, post decretam Virginitatem ad nuptias conuersi. Et infra: Si, inquit, quæ Vidua fuit, ac Deo dicata, & postea nupsit, iudicium & condemnationem habebit, quod primam fidem rescit; quanto magis quæ Deo dicata Virgo fuit, & nupsit, contra Christum lasciuuit, & maiorem fidem rescit, & iudicium habebit. Et hær. 48. Montanistarum: Gaudet, inquit, Deus Verbum his, qui approbatum Dei cultum præstare possunt, & Virginitatem, & continentiam exercere diligunt, &c. Vides cultum vocari, professionem continentiae.

S. IOANNES CHRYSOSTOMVS homil. 15. in 1. ad Timoth. Et Vidua, inquit, in Viduitatis professione Christo consentit, id est, Christo nubit. Et infra: Cum, inquit, illi se deuouerint, nubere volunt habentes damnationem, quia primam fidem irritam fecerunt, fidem pactum dicit, Et homil. 14. prolixissime describit, ac miris laudibus prædicat monasticam professionem, sed clarissime epistol. 6. ad Theodorum lapsum: Honorabiles, inquit, nuptiae, sed te iam seruare non conuenit privilegia nuptiarum, quamuis frequenter hoc ipsum nuptias vocet, ego tamen adulterio illud peius existimo, &c.

S. VLPITIVS in vita S. Martini ante medium: Arborius, inquit, vir sancti admodum, & fidelis ingenij, cum filia eius gravissimis quartana febris astibus oreretur, epistola Martini, quæ casu ad eum delata fuerat, pectori puella in ipso accessu ardoris inseruit, statimque fugata febris est; quæ res apud Arborium tantum valuit, ut statim puellam Deo voueret, & perpetua Virginitati dicaret, profectusque ad Martinum, puellam ei præsens obtulit, neque ab alio eam, quam à Martino, habitum Virginitatis impotico, passus est consecrari.

RUFFINVS lib. 10. hist. cap. 8. dicit, Hierosolymis fuisse insigne monasterium lacrarum virginum, quibus Helena mater Constantini suis manibus ministrare in mensa aliquando volebat.



S. AMBROSIVS lib. 3. de virginibus, ante medium: Initia-  
 ras, inquit, sacris mysteriis, & consecratas integritati puellas nu-  
 bere prohibes. Vtinam potuissem renocare nupturas, & tinam po-  
 tuissem flammæ nuptiale pio integritatis velamine mutare;  
 an indignum videtur, si sacrata Virgines, à sacrosanctis altari-  
 bus non abducantur ad nuptias? & quibus licet sponsum eligere,  
 non licet Deum præferre? Et infra: Discite, inquit, quantas Ale-  
 xandrina, totiusq; Orientis, & Africana Ecclesia, quot annis sa-  
 crare consueverint, pauciores hic homines produnt, quàm illic  
 Virgines consecrantur. Similia passim repetit.

B. HIERONYMVS in epistola ad Sabinianum: Moris est, 10  
 inquit, in Aegypti, & Syria monasteriis, & tam Virgo, quàm Si-  
 da, quæ se Deo vouerint, & seculo renunciantes, omnes delicias  
 seculi conculcarint, crinem monasteriorum matribus offerant  
 desecandum, non intellecto postea contra Apostoli voluntatē ince-  
 sura capite, sed legato pariter, ac velato. Plena sunt scripta san-  
 cti huius viri testimoniis, pro castitatis voto, & professione,  
 adeo ut Petrus Martyr dicat, nullum esse ex Patribus, qui ma-  
 gis dogmati ipsorum aduersetur, quàm Hieronymus.

B. AUGUSTINVS lib. 1. de adulterinis coniugiis, cap. 24. 20  
 Quod, inquit, cuiquam, antequam vouisset, licebat, cum id se-  
 nunquam facturum vouerit, non licebit: si tamē id vouerit, quod  
 vouendum fuit, sicut est perpetua Virginitas, &c. Et in Plal. 75.  
 Nescio, inquit, quæ castimonialis nubere voluit, quid voluit?  
 quod & mater ipsa, aliquid mali voluit? mali plane, quare? qui-  
 a vouerat Domino Deo suo. Idem ibidē: Quid, inquit, ait Aposto-  
 lus de quibusdam quæ vouerunt, & non reddiderunt? Habentes,  
 inquit, damnationem, quia primam fidem irritam fecerunt, qui d-  
 est primam fidem irritam fecerunt? vouerunt & non reddiderunt.

S. FULGENTIUS lib. de fide ad Petrum, cap. 42. inquit, quæ  
 sue coniugati, siue à coniugio liberi, continetiam Deo vouerunt,  
 admodum est damnabile, si illi coniugale opus voluerint ap-  
 petere, quo se non accessuros, & illi repetere, à quo recessuros illi  
 libera, illi communi professi sunt voluntate. Idem S. Fulgentius  
 in epist. 1. cap. 6. Non peccat, inquit, Virgo nubens, si Virginita-  
 tem Deo priusquam nuberet in corde non vouit. Et epist. 3. cap.  
 4. Hæc est, inquit, Unigenitus Dei Filius, Unigenitus etiam Vir-  
 ginis Filius, Unus omnium sacrarum Virginum sponsus, sancta  
 Virginitatis fructus, decus, & munus, quem corporaliter sancta  
 Virginitas peperit, cui spiritualiter sancta Virginitas nutrit, à qua  
 sancta



*sancta Virginitas facundatur, & perseveret intacta, à quo decoratur, & permaneat pulchra, à quo coronatur, & regnet perenniter gloriosa; quapropter bonum depositum custodi, & meritum tanti boni, quod & haberes, Deus dedit, & & Deo coneres, ipse fecit.*

Ad hæc omnia Conciliorum, Pontificum, & Patrum testimonia, tres adfert responsiones Petrus Martyr ad finem libri. PRIMO dicit, omnia ista humana esse testimonia, nec esse Christiani hominis officiū prouocare à testimoniis Dei ad testimonia hominum: *Quod, inquit, ad alterum attinet de iudicio Patrum, quoniam aduersarij nostri, & in hac causa, & in alijs controuersijs semper prouocare solent ad eos, pronuncio mihi non videri hominis esse Christiani ad hominum iudicia prouocare à Scripturis Dei. hoc enim est iniuriam facere Spiritui sancto; nam fides est ex auditu, auditis autem ex verbo Dei, non ex Patribus.* Hæc ille. Vbi etiam fusissimè probat, non esse prouocandum à Scriptura ad Patres.

Sed dum hæc dicit, ipse mihi prouocare videtur à cando-  
re ad impudentiam, à veritate ad mendacium; non enim Ca-  
tholici Doctores prouocarunt vnquam à Scriptura ad Pa-  
tres, sed in Scripturæ intelligentia à iudicio paucorum sedi-  
tiosorum, ad iudicium multorum sapientissimorum, & opti-  
morum virorum: vel etiam à iudicio partis ad iudicium alio-  
rum, qui partes non sint. Vt enim in humanis litibus cum  
duo contendunt, & iudicem aliquem appellant, non prouo-  
cant à lege ad iudicem, sed à parte litigante ad iudicem: & si  
rursus iudex non satisfaciat, prouocant iterum non à lege,  
sed ab vno iudice ad alium, donec veniatur ad aliquē, à quo  
prouocari non possit. Ita quoque in Ecclesia cum oriuntur li-  
tes, inspiciuntur leges diuinæ, quæ ab omnibus recipiuntur.  
Quod si his non finiatur, quæritur iudex, non quod Scriptu-  
ræ non credatur, sed quod de ipsa Scriptura quæstio sit. Itaque  
prouocamus ab explicatione aduersarij litigantis, ad arbi-  
trium sapientium, & peritorum, qui ante litem exortam flo-  
ruerunt. quod si illi inter se fortasse non conueniant, prouo-  
camus ad Ecclesiæ totius iudicium, id est, ad summi Pasto-  
ris, vel generalis Concilij definitionem.

Quod si quis adhuc velit ab isto iudice ad Scripturam  
prouocare, idem facit, ac si quis in humanis litibus à Præ-  
tore prouocaret ad legem. quod ridiculum esset, cum nihil sit ad  
aliud prouocare à Præ-  
tore ad legem, quando de sensu legis  
quæstio



quæstio est, quàm prouocare à sententia publici iudicis ad suum proprium, priuarumq; iudicium.

At, inquit Petrus, etiam Patres omnes, & Concilia, licet inter se optimè consentiant, errare possunt, nisi cum verbo Dei consentiant. **R**ESPONDEO, id quidem esse verum, sed assumptionem, quæ subtrahitur, esse falsam, nimirum posse omnes Patres, aut Concilia legitima & approbata, cū verbo Dei non consentire. Exempla autem, quæ ipse adfert, nihil aliud probant, nisi posse Patres singulos seorsim, & Concilia illegitima, & reprobata errare, Concilium enim II. Ephesi-  
num, & Constantinopolitanum sub Leone Iconomacho, quorū exempla Martyr adducit, nemo nescit qualia fuerint.

**A**LTERA eius responsio est. Patres quidem id asserere, quod nos dicimus, sed non esse audiendos, quod non habuerint iustam causam id asserendi: *Certe, inquit, & quod verum est fateamur, eos in hac causa habemus iniquiores. Statim enim ab Apostolorum temporibus nimium tribus ceptum est calibatu, quibus autem de causis id factum sit, supra multis verbis docuimus.* Hæc ille.

Docuit autem suprà, quatuor esse causas, cur initio Ec-  
clesiæ cœperit coli cœlibatus: *Cur tanto, inquit, in pretio Vir-*  
*ginitas fuerit, causa una esse potest, quod Christus dixerit, esse*  
*Eunuchos, qui se castrauerunt propter regnum cælorum, & in eam*  
*sententiam permulta Paulus habet in 7. cap. 1. ad Corin. hæc sanè*  
*Patres semper habuerunt in ore, sed eos cogitare oportuit, quem-*  
*admodum essent accipienda. Et infra: ALTERA causa est, quod*  
*illo tempore graues erant persecutiones omnibus in locis, minis*  
*autem molestum est in persecutione, si quis solus fugiat, quàm si*  
*cogatur sollicitus esse de uxore & liberis. TERTIA causa est, quia*  
*illis temporib; Christiana religio graui laborabat infamia: cum 30*  
*enim horis antelucanis, & in tenebris metu Principum ad hym-*  
*nos & Synaxes conuenirent, populus cepti suspicari illos Viri inter*  
*se promiscuo concubitu, & nefaria libidine, &c. Et infra: At-*  
*que ea gratia magnum numerum alebant virginum & calibum.*  
**Q**UARTA causa est, quia bona pars eorum, qui accesserunt ad Christum, erat Ethnicorum. At illi maxime semper suspiciebant Virginitatem & calibatum, &c.

Hic nos respondemus, PRIMAM causam esse præcipuam, & verissimam, nimirum verba Christi, & Apostoli. Quod autem addit Martyr, S. Patres debuisse cogitare, quemadmodum



dum illa essent accipienda, coincidit cum responsione superioriori. Id enim est querere, utris tandem magis credendum sit in eorum locorum explicatione, Patribus ne antiquissimis, sanctissimis, & doctissimis, an Luthero, & Caluino. Sed certe non video quomodo ambigi possit de hac re; nam si statim ab Apostolis, ut Martyr dicit, floruerunt Patres illi, profecto Apostolos ipsos audire, & consulere potuerunt: ac proinde longè melius verba illorum intelligere, quàm isti, qui mille & quingentis annis post Apostolos fuerunt.

10 SECUNDA, & TERTIA causa potuerunt quidem momentum aliquod habere ad suadendam continentiam, sed non fuisse causas precipuas huius rei, facile probamus. PRIMO, quia Patres, dum laudant, & suadent continentiam, & continentiae votum, nunquam adferunt istas causas, sed verba Christi, Apostolorum, & Prophetarum. Quocirca ipse etiam Petrus Martyr fatetur, semper Patribus fuisse in ore verba Christi, & Pauli, nec attulit vllum testimonium alicuius veteris, qui scripserit suspiciendum esse, vel suscipiendum coelibatum ob fugam in persecutione, aut ob resellendam

20 calumniam Ethnicorum. SECVNDO, si istae fuissent causae praecipuae, iam dudum cessasset admiratio coelibatus; nam causae illae brevissimo tempore durarunt: non autem ita est, sed semper magis & magis in Ecclesia floruit, & viguit honor continentiae Deo sacratae & deuotae.

QUARTA causa falsissima est, cum constet coelibatum in Ecclesia non à Gentilibus, sed à Iudaeis coepisse; siquidem Christus ipse virgo, mater eius virgo, Ioannes virgo, Apostoli omnes post vocationem suam continentes, ex Iudeis, non ex Gentibus nati fuerant. Illi etiam primi Christiani, qui in

30 Aegypto continentiam colebant, de quibus scribit Philo in libro de vita contemplatiua supplicum, ex Iudaismo, non ex Paganismo, ad Ecclesiam venerant.

Adde, quod Petrus Martyr contrarium scripsit in commentario ad caput 7. 1. Cor. ubi sic ait: *Neg, indicamus de coelibatu, quod sit in praesentia, si haecenus erat in Iudaismo, & apud Ethnicos parum honestus. Scribit enim Cicero de legibus, Celibes esse prohibent. Christus hanc ignominiam coelibatus amouit, &c.*

Porro Gentilium testimonia adferuntur quidem interdum à Patribus, sed ita adferuntur, ut Apostolus quondam citauit



Citauit Aratum Poëtam Act 17. & Menandrum t. Cor. 15. nimirum non ut in eiusmodi testimoniis ponatur firmamentum dogmarum fidei, sed ut ostendatur cœlibatus non pugnare contra naturam, & rationem, & ut Christiani erubescant, si in iis, quæ ad virtutem pertinent, inueniantur Ethnicis inferiores. Hoc modo S. Hieronymus in libris aduersus Iouinianum, postquam multis Scripturæ testimoniis cœlibatum confirmauit, producit etiam Ethnicorum testimonia & exempla.

TERTIA responsio Petri Martytis constat ex aliquot Patrum testimoniis, quæ cum voto continentiæ pugnare videntur. Sed ea paulò post adferemus, ubi ad obiectiones aduersariorum dissoluendas peruenerimus.

CAPVT XXVIII.

*Idem asseritur ratione.*

**N**UNC tandem, ut ad postremum genus argumentorum veniamus, duplici ratione, in Scripturis, & Patrum testimoniis fundata, id ipsum breuiter confirmabimus. Prima ratio ex dignitate continentis, secunda ex utilitate vouendi sumetur. PRIMVM igitur id omne Deo rectè vouetur, quod est illi gratius si fiat, quam si non fiat. Eiusmodi autem continentia est, cum longè excellat coniugio, & cum fornicatione ne comparari quidem debeat; poterit igitur rectè continentia Deo voueri. Assumptio, quæ sola negari solet, paucis confirmanda est. QVIA verò Lutherus in Epithalamio cauillatur, virginitatem quidem præstare coniugio, sed non item vitam cœlibem vitæ coniugali: Argumenta adferemus de vita ipsa, & statu cœlibum. Ac primum Scriptura diuina clamat. 1. Cor. 7. *Igitur qui* 10  
*Matrimonio iungit virginem suam, bene facit, & qui non iungit, melius facit.* Et infra: *Cui uult nubat, tantum in Domino, beator autem erit, si sic permanserit.* Huc etiam pertinent alia testimonia, quæ attulimus supra in disputatione de consiliis.

Iam verò Patres passim perfectam vitam hanc esse dicunt. CYPRIANVS libro de habitu virginum, virginum cœtum esse dicit illustriorem portionem gregis Christi. Et ibidem: *Magna, inquit, vos merces manet, primum grande virtutis, minus maximum satisfactis.* DIONYSIVS de Ecclesiastica hierarch. cap. 6. part. 2. *Sacerdos, inquit, perfectissimam et cœlestem*



exponit, ei videlicet, qui monasticam vitam proficitur. EUSEBIUS lib. i. cap. 8. demonstr. Euangel. Et talis, inquit, existit in Christianismo perfecta vita modus. BASILIUS cap. 18. monasticarum constitutionum, & Gregorius Nazianzenus in oratione de obitu S. Basilij, vitam perfectam, immo etiam perfectissimam appellant, monasticen. Ioannes CHRYSOSTOMUS lib. 3. aduersus vituperatores vitæ monasticæ, eandem vitam appellat perfectionis culmen, virtutisq; fastigium.

HIERONYMUS in epist. i. ad Heliodorum: Tu perfectum te fore pollicitus es; nam quando relictæ militiæ te castrasti propter regna cælorum, quid aliud quàm perfectam secutus es vitam? AVGVSTINUS lib. i. de moribus Ecclesiæ, cap. 31. iam, inquit, accipite perfectorum Christianorum, quibus summa castitas non laudanda solum, sed etiam capeßenda visa est, mores & continentiam singularem. Et de sancta virginitate, cap. 52. Pergite, inquit, Virgines Dei, via sublimitatis, pede humilitatis.

SVLPIIVS in 2. Dialogo: Beata species, inquit, & Deo digna, nihil enim virginitati est comparandum. Idem quoque Patres summo consensu vitam virginum, angelicam, vitam esse docent, vitam verò coniugalem, vitam hominum. AMBROSIVS lib. i. de virginibus: Nemo miretur, si Angelis comparentur, quæ Angelorum Domino copulantur. CYRILLVS catechesi 12. Non ignoremus castitatis gloriam, angelica enim est corona, & supra hominem hæc perfectio.

NAZIANZENSIS in carmine de virginitate:

Salve Virginitas diuino tradita dono,  
Mater inoffensa vite, bona maxima fundens,  
Christi pars & spiritibus sociata supernis  
Ignaris thalami.

ATHANASIVS libro de virginitate extremo, his titulis virginitatem celebrat: O Virginitas opulencia indeficiens, corona immarcescibilis, templum Dei, domicilium Spiritus sancti, margarita speciosa, vulgo inconspicua, gaudium Prophetarum, gloriatio Apostolorum, Angelorum vita, Sanctorum corona. Vide præterea, si placet, de comparatione virginum cum Angelis, Hieronymum in epistol. 8. ad Demetriadem, Augustinum de sancta virginitate, cap. 13. Chrysostomum homil. 18. in Genesim, Basilium in libro de virginitate, Fulgentium in epist. 3. ad Probam, Damascenum lib. 4. cap. 25. Iulidum lib. 2. de summo bono.



Cap. XXVIII. De Monachis. Lib. II. 311

Hic verò mirè irascitur Petrus Martyr; nam in libro de cœ-  
libatu, & votis, recitat sententiam Athanasij suprà citatam,  
& ait: *Sunt hæc hyperbolis plena, neq; ad amissum Veritatis con-*  
*sistunt. Apostoli sanè coniuges habuerunt, & Propheta, quomodo*  
*ergo Virginitas est illis gaudium, & coronat quid præterea cum*  
*Virginitate commune habent Angeli, quandoquidem corpore ca-*  
*rent? Unde non magis illi Virgines queunt dici, quàm si quis laps-*  
*dem cæcum appellet. Hæc ille. Sed quid mirum, si non placent*  
*porcis margaritæ?*

Quod autem falsi accusat Athanasium Petrus, quod di-  
xerit, continentiam gaudium esse Prophetarum, & gloriam  
Apostolorum, refellitur facillimè ex S. Hieronymo, qui in e-  
pist. 22. ad Eustochium sic ait: *Virgo Helias, Helisens Virgo, Vir-*  
*gines filij Prophetarum: Hieremia dicitur, & tunc accipias Exo-*  
*rem.* Hæc ille. Quis verò nescit Ioannem Baptistam, & Pro-  
phetam, & virginem fuisse: ex Apostolis Ioannem certò sci-  
mus virginem fuisse. Quod idem de Paulo idem HIERONY-  
MVS affirmat loco citato, & de Apostolis omnibus in Apolo-  
gia pro libris cōtra Iovinianum: *Apostoli, inquit, aut Virgines;*  
*aut post nuptias continentes.* Ad hos ergo Apostolos, & Pro-  
phetas respiciens Athanasius, verè & propriè, non falsò & hy-  
perbolice locutus est.

Quod autem reprehendit Petrus comparationem virgi-  
num cum Angelis, non solum Athanasio, sed omnibus aliis  
Patribus, & ipsi etiam Christo iniuriam facit, qui Matth. 22.  
ait: *In resurrectione, neq; nubent, neq; nubentur, sed erunt sicut*  
*Angeli Dei in cælo.* Cui credemus iam, Petro Martyri neganti  
eos, qui non nubunt similes esse Angelis, an Christo id ipsum  
asserenti?

At, inquit, Angelis non magis convenit non nubere, 30  
quàm lapidi non videre. Ita est, sed tamen sicut eum, qui  
valde cæcus, aut surdus, aut mutus est, lapidi, & trunco,  
non ineptè comparamus; sic etiam eos, qui continentia &  
puritate excellunt, rectissimè Angelis similes facimus; nam  
alii qui nec vultum habent Angeli, & tamen non timuit S.  
Lucas dicere Act. 6. *Viderunt vultum Stephani, sicut vult-*  
*um Angeli.* Atque hæc de prima ratione. Ad 2<sup>o</sup> aliam ratio-  
nem ex parte ipsius voti; Melius est & Deo gratius ex voto a-  
liquid facere, quàm sine voto, igitur non solum licet, sed etià  
expedit continentiam vouere. Antecedens his argumentis  
confirmatur.



PRIMO, Scriptura hortatur ad vouendum Psal. 75. *Vouete, & reddite.* Quo testimonio permotus S. Augustinus, multis in locis ad vouendum hortatur; vt in epist. 45. ad Armentarium, epist. 89. ad Hilarium, epist. 143. ad Iulianum, in libro de bono viduitatis, cap. 19. in libro de sancta virginitate, cap. 29. & 30. in Psalm. 75. 99. & alibi. At si melius esset absque voto operari, deciperet nos Spiritus sanctus, quod nullo modo fieri potest: igitur melius est operari ex voto.

10 SECUNDO, opus ed melius est, ac Deo gratius, quod ex pluribus, aut ex maiori virtute procedit: continere sine voto, est temperantia, continere ex voto, est actus simul temperantia, & religionis, quæ quidem religio temperantia ipsa longè est nobilior: igitur continere ex voto melius, ac Deo gratius est, quàm sine voto. Itaque sanctus Augustinus in libro de sancta virginitate, capite 8. *Nulla*, inquit, *facunditas sanctæ virginitatis etiam carnis comparari potest, neque enim ipsa, quia virginitas est, sed quia Deo dicata est, honoratur, quæ licet in carne seruetur, spiritus tamen religione ac deuotione seruetur; ac per hoc spiritualis est etiam virginitas corporis, quam vouet ac seruat continentia pietatis.*

TERTIO, quod fit ex voto, maiori caritate & liberalitate fit, quàm quod sine voto. Qui enim sine voto aliquid facit, opus duntaxat offert Deo; qui autem vouet, atque ex voto facit, & opus, & facultatem offert. Quod explicat sanctus Anselmus in libro de similitudinibus, cap. 84. his verbis: *Plus donat, qui arborem cum fructibus, quàm qui solos fructus donat.*

30 QUARTO, melius est quod fit ex voluntate confirmata in bonum, quàm quod fit sine eiusmodi firmitate: sicut peius est peccare ex voluntate obfirmata ad malum, quàm ex fragilitate. & quemadmodum qui peccat ex voluntate confirmata in malum, similes sunt damnatis: ita qui operantur ex voluntate confirmata in bono, similes sunt beatis.

QVINTO, qui vouet, non solum id lucratur, quod diximus, quod excellentius opus facit, sed etiam munit seipsum aduersus tentationes diaboli, & humanam fragilitatem, ac mutabilitatem. Homines enim in iis rebus, ad quas non sunt alligati vinculis legum, etiam si optimæ sint, & utilissimæ, facile mutant propositum, diabolo instigante, & etiam



etiam sine diaboli artibus, ex propria mutabilitate. Quocirca videmus in rebus humanis saepe requiri iuramenta, ut alligetur voluntas, ne facile mutari possit. Ita milites, magistratus, sponsi, atque alij id genus iurare coguntur, non autem solis verbis se facturos quod debent, polliceri. Hinc sanctus AUGUSTINVS in epist. 45. ad Armentarium: *Non te, inquit, solum fuisse paritatem, immo gaude iam tibi non licere, quod cum tuo detrimento licuisset. Et infra: Felix necessitas, qua ad meliora compellis.*

CAPVT XXIX.

*Soluitur obiectio prima aduersariorum.*

**R**ESTAT nunc, ut obiectioes aduersariorum soluiamus. PRIMA obiectio communis est omnibus, & sumitur ab illis Scripturis, quæ docent, opera bona non ex necessitate, quam tamen secum adferunt vota, sed voluntariè, ac liberè esse facienda: Id enim est melius, & laudabilius, & Deo etiam acceptius, quod est magis voluntarium, & liberum, ac proinde minus necessarium. Psal. 53. *Voluntariè sacrificabo tibi.* 1. Corinth. 7. *Non sit laqueum vobis iniiciam, id est, horror ad continentiam, sed non ad votum.* 2. Corinth. 9. *Vnusquisque prout destinauit in corde suo, non ex tristitia, aut ex necessitate: hilarem enim datorem diligit Deus.* Et ad Philemonem: *Ne sicut ex necessitate bonum tuum sit, sed voluntarium.* S. HIERONYMVS lib. 1. in Iovinianum, ante medium: *Et ideo plus amat Virgines Christus, quia sponte tribuunt, quod sibi non fuerat imperatum: maioris gratia est offerre quod non debeas, quam vendere quod exigaris.* Et S. PROSPER lib. 2. de vita contemplatiua, capite ultimo: *Sic abstinere, vel ieiunare debemus, ut non nos necessitati ieiunandi subdamus, ne iam non deuoti, sed inuoluntari rem voluntariam faciamus.*

RESPONDEO, triplicem esse libertatem, ac triplicem item necessitatem. VNAM ex parte debiti, siue debitum oritur ex præcepto, siue ex voto, siue aliunde. Id enim dicimur liberè facere, quod non tenemur facere; id verò necessariò, quod tenemur. ALTERAM ex parte naturalis determinationis voluntatis. Illa enim dicimur liberè facere, in quibus non habemus voluntatem determinatam ad vnum: atque

hæc



hæc libertas est, quæ propriè dicitur liberum arbitrium. **TERTIAM** ex parte coactionis, siue ea sit absoluta coactio, vt cum quis trahitur vi, quod ire non vult, siue sit moralis quædam, & quasi conditionata coactio, vt cum quis nollet aliquid facere, & non libenter facit, facit tamen coactus timore aliquo humano, aut seruili.

Ex his **PRIMA** libertas non est necessaria ad opus laudabile, aut Deo gratum faciendum: neque contraria necessitas pugnat cum laude & merito operis boni, quia potius contra, **10** vt ostendimus, ista necessitas auget laudem operis boni. Semper enim, nisi aliunde sit impedimentum, melius est opus ex præcepto, quàm non ex præcepto; ex voto, quàm non ex voto. **ALTERA** illa libertas necessaria est ad laudem boni operis, sed ea, quæ reperitur in opere, quod fit ex præcepto aut voto, & in opere omnibus modis indebito; nam etiam si quis millies vouerit aliquid, poterit tamen ex arbitrii libertate votum non reddere, & peccare. **TERTIA** libertas est item necessaria ad laudem boni operis, sed neque ipsa repugnat præcepto, & multò minus voto. Potest enim fieri, vt **20** quis tanta alacritate, & promptitudine exsequatur opera præcepta, quanta alius opera non præcepta. Vnde David dicebat, Psal. 118. *In via testimoniorum tuorum delectatus sum, sicut in omnibus diuitiis. Et: Quàm dulcia faucibus meis eloquia tua! super mel oris meo.*

Pari ratione fieri potest, immò ordinariè fit, vt quod fit ex voto, fiat libentius, & promptius, quàm quod fit sine voto. Votum enim ex se lætitiâ gignit, cum ex magna caritate procedat, iuxta illud 1. Paralipom. ultimo: *Lætatus est populus, cum vota sponte promitteret, quia corde toto offerebant* **30 ea Domino.** Quod si aliqui cum tristitia soluunt, quod vouerunt, id accidit ex vitio hominum, non ex natura voti, nec tamen etiam tunc melius est quod fit sine voto, quàm ex voto; nam, vt S. Thomas docet in opusc. 18. quod est de perfectione voti, cap. 12. potest tribus modis quis se habere in soluendo voto.

**VNO** modo, vt libenter faciat id, ad quod tenetur ex voto, & quia res ipsa placet, & quia votum placet; & tunc sine dubio magis meretur, quàm alius, qui æquè libenter illud idem operatur sine voto.

**ALTERO** modo, vt inuitus faciat rem illam, quam vouit, tamen



tamen libenter impleat votum: ut si is, qui vult ieiunium, incipiat non amare ieiunium, & proinde cum difficultate, & tristitia ieiunet, ad eum ut si esset sui iuris, non voueret ieiunium: tamen quia iam vult, & placet ei vehementer seruare Deo fidem datam, propterea prompto & alacri animo superet eam difficultatem, ut impleat votum. Atque hic etiam magis meretur quam alius, qui sine voto libenter ieiunet; ut enim excellentior est religio, quam temperantia, ita melius est implere votum libenter, quod est religionis, quam libenter ieiunare, quod est temperantiae.

TERTIO modo potest fieri, ut quis ad eum doleat se vouisse, ut non velit amplius seruare votum; sed quia hoc est simpliciter malum, non potest conferri cum bono.

Ex his ad ea testimonia, quae contra protulimus, facile est respondere. Ad illud Psal. 53. *Voluntarie sacrificabo*, respondeo, illud, *Voluntarie*, opponi tristitia, & coactioni, non autem necessitati, quae oritur ex voto, aut praecepto.

Ad illud 1. Corinth. 7. *Non sit laqueum vobis inmisciam*; quibus verbis apertissime demonstrari existimat Petrus Martyr prohibita esse vota, respondeo, *laqueum*, appellari necessitatem, quae detinet inuitum, non autem quamlibet necessitatem. Proinde vota esse laqueos illis, qui temere vouerunt, vel qui coacti sunt ab aliis vouere, cum ipsi nihil tale cuperent: quemadmodum etiam nuptiae laquei dici possunt iis, qui temere ducunt uxorem; & eo modo alligant se alicui, cum qua viuere non possunt, & inde occasionem accipiunt cum aliis fornicandi. Est igitur sensus Apostoli; Exhortor vos ad continentiam, sed ira tamen, ut non cogam inuitos, nec suadeam temere eam accipere, & vouere, quod esset laqueus animarum, sed ut ostendam id, quod est per se honestum, & utilissimum; ut quibus Dominus huius rei desiderium inspirauerit, illi accipiant, & voueant.

Quod autem laqueus hoc loco non dicatur votum, aut necessitas absoluta, sed, ut diximus, votum ab inuito, aut temere susceptum, testatur S. AUGUSTINVS lib. de bono viduitatis, cap. 5. qui sic exponit: *Non sit laqueum vobis inmisciam, id est, non sit vos cogam.* & S. HIERONYMVS, lib. 1. in Iouinianum: *Non imponit, inquit, nobis Apostolus laqueum, nec cogit esse, quod nolumus.* Similiter exponunt commentaria in hunc locum Theodoretus, Theophylactus, Anselmi, & aliorum.

Accedit



Accedit ipsa laquei metaphora, non enim laqueus dicitur funis ligans, & tenens hominem, ne fortè cadat, sed funis vi detinens, & ad capiendum, & ad perdendum expositus. Denique Sapiens prouerb. 20. id ipsum disertis verbis exposuit: *Ruina, inquit, est homini deuotare Sanctos, & postea retrahere.* Vbi pro eo, quod Hieronymus vertit, ruina in Hebræo est שֶׁרֶץ quod propriè laqueum significat, nam שֶׁרֶץ illaqueare est, שֶׁרֶץ auceps dicitur. vnde verterunt se-  
 10 ptuaginta interpretes, πᾶσις, id est, laqueus, nec malè Hieronymus vertit ruina, quia finis proprius laquei casus & ruina est. Igitur iuxta Salomonem laqueus, & ruina est, non absolutè vouere, sed vouere, & post votum retrahere, quod accidit iis, qui temerè aut inuiti vouent. Isti enim voto, ut laqueo quodā tenentur coacti, & occasionem accipiunt græuius delinquendi.

At illud I. Cor. 9. *Non ex tristitia, aut ex necessitate,* respondeo, hoc loco appellari necessitatem, non legem, aut votum, sed humanam necessitatem, quæ cogit homines facere, quod non vellent. Loquitur enim de iis, qui eleemosynas faciunt inuiti, quia videlicet erubescunt non facere, quod alij faciunt, ne iudicentur auari; aut non audent negare perenti magno alicui viro, qualis erat ipse Paulus, pro egenis. De hac necessitate loqui B. Paulum testantur verba sequentia: *Hilaritatem enim datorem diligit Deus.* necessitas enim quæ ex humano timore nascitur, hilaritati opponitur, non autem necessitas voti quæ oritur ex caritate. Idem respondendum est ad alium locum ex epist. ad Philemonem.

Ad testimonium autem S. Hieron. lib. x. in Iouinianum, ubi dicit, maioris gratiæ esse offerre quod non debeas, quàm reddere, quod exigaris, respondeo, S. Hieronymum loqui de opere illo quod exigitur ratione præcepti, non de eo quod exigitur ratione voti. Nam multum interest inter legem & votum, quod ad rem præsentem pertinet. qui enim facit opus non imperatum vlla lege, & si non faciat opus laudabilius, quatenus facit opus non imperatum, immò, ut supra diximus, ceteris paribus, melius sit opus imperatum, quàm non imperatum facere; tamen tribus de causis, ut plurimum, facit opus laudabilius.

PRIMO, quia res non imperatæ sunt plerumque nobiliores



res secundum se, quàm res imperata. Deus enim minora imperavit, maiora consuluit. at hoc non habet locum in votis; non enim minora fiunt ex voto, maiora sine voto, sed è contrario; perfectissima enim quæque opera voueri possunt, & solent.

SECUNDO, quia semper, qui facit opera non imperata ex caritate, sicut oportet, facit etiam omnia opera imperata; atque ita plus dat, quàm ille, qui facit solùm opera imperata; includuntur enim præcepta in consiliis, non contrà. sed neq; hoc in votis locum habet; non enim qui facit aliquid sine voto, continuò implet etiam omnia vota.

TERTIO, quia ut plurimum maior promptitudo requiritur ad opus non imperatum aggrediendum, quàm ad opus imperatum, ut notū est; ac propterea ratione maioris promptitudinis opus non imperatum maioris gratiæ est, ut Hieronymus dicit, quàm opus imperatum. At de voto hoc dici non potest; nam etsi maior promptitudo fortè requiratur ad aggrediendum nouum opus, ad quod non tenemur vllō modo, quàm ad opera ordinaria facienda, ad quæ tenemur ex voto: tamen maior illa promptitudo superatur ab alia quadam adhuc maiore, quæ necessaria fuit ad votum ipsum faciendum. Cùm enim votū spontè offeratur, & sit res ardua, & difficilis, multò maior promptitudo requiritur ad votum faciendum, quàm ad faciendum aliquid sine voto.

Ad testimonium S. Prosperi ex lib. 2. de vita contemplatiua. cap. vlt. vbi dicit, sic esse abstinendum, ut non nos necessitati subdamus, respondeo, necessitatem, de qua S. Prosper loquitur, non esse necessitatem legis, aut voti, sed necessitatem timoris humani, quæ tristitiam gignit; ideo enim subiungit idem auctor: *Ne non deuoti, sed inuisi rem voluntariam faciamus.*

### CAPVT XXX.

#### *Soluitur secunda obiectio.*

ALTERAM obiectiōem ducunt ex illis Scripturæ testimoniis, quæ apertè imperant Matrimonium iis, qui stimulum carnis patiuntur. Hinc enim sequitur, Votum continentiae perpetuæ temerarium esse, & proinde illicitum, cùm nemo sciat quamdiu sine



,, eiusmodi stimulis viuere queat. I. Corinth. 7. *Qui non se con-*  
 ,, *tinent, nubant; melius est enim nubere, quam Gri.* Ibid. Propter  
 ,, fornicationem *Unusquisque suam uxorem habeat.* Huc etiam  
 ,, maximè facit illud I. Tim. 5. *Volo iuniores nubere, matres fa-*  
 ,, *miliæ esse, filios procreare.* Contra quod præceptum ij peccare  
 ,, videntur, qui puellis continentiae votum suadent, aut per-  
 ,, mittunt.

Respondeo ad hoc argumentum tribus modis. PRIMVM  
 assero, in nullo horum locorum vocari ad nuptias ab Apo-  
 10 stolo eos, qui tentantur stimulis carnis, sed eos, qui inconti-  
 nenter viuunt, ita, vt flagitiis se polluant. SECUNDO assero,  
 eos, qui incontinententer viuunt, non vocari absoluto imperio  
 ad nuptias, sed solùm ostendi eis remedium quoddam facie-  
 le, & quasi portum, quo se recipiant, sic tamen vt liberum eis  
 relinquatur ad maiora aspirare. TERTIO assero, hoc ipsum  
 siue consilium, siue permissionem, siue remedium non dari  
 ab Apostolo iis, qui vouerunt continentiam, sed solùm ho-  
 minibus solutis, & liberis.

Ac vt de PRIMO prius dicamus, sciendum est, aduersarios  
 20 existimare nuptias esse necessarias iure diuino iis, qui vtun-  
 tur; per vñtionem autem intelligunt tentationes carnis  
 non breues & leues, sed graues & diuturnas, quæ conscientiam  
 turbant, licet eis non consentiatur. Ita docet Lutherus  
 in Epithalamio, vbi etiam grauitè accusat S. Hieronymum,  
 quod coniugium non inierit, cum ipsemet fateatur in epist.  
 22. ad Eustochium, se grauissimis, & diuturnis ardoribus car-  
 nis vexatum fuisse. imò etiam eò Lutherus progreditur, vt  
 S. Hieronymum propterea hæresis Pelagianæ accuset, quasi  
 videlicet senserit propriis viribus, sine dono Dei posse ali-  
 30 quem vincere tentationes. quæ tamen est manifesta calum-  
 nia, cum ibidem Hieronymus dicat se precibus ad Deum  
 assiduè instare solitum pro victoria obtinenda contra tenta-  
 tiones.

Sed de vñtione cum Luthero conueniunt Calvinus, & Pe-  
 trus Martyr in commentatio prioris ad Corinthios, cap. 7.  
 distinguit enim Calvinus tria genera tentationum carnis.  
 VNUM, quod ita tentat, vt vincat, & hoc esse dicit pessimum  
 genus vñtionis, quod verissimum est. ALTERVM, quod ita  
 tentat, vt statim acriter repellatur, ita vt intus iacula non pe-  
 netrent, nec vlla mentis perturbatio oriatur, & has tentatio-  
 nes



nes fatetur non propriè vocari vstiones, & propter has non esse nuptias necessarias. quod etiam libenter concedimus. **TERTIUM** genus esse dicit medium, cum quis videlicet tentationi non plenè consentit, tamen iacula intus penetrant, & sentitur carnis delectatio, & mentis perturbatio. & has tentationes propriè vstiones esse dicit, & qui eas habent, eos affirmat certa lege citari ab Apostolo ad Matrimonium, ita ut peccent non nubendo.

Vbi est observandum, Caluinum non sine fraude dixisse, secundum genus tentationis esse, cum quis plenè non consentit, licet iacula intus penetrent; nam ad rem obscurandam posuit, plenè; cum vellet dicere, secundum genus esse, cum quis nullo modo consentit, & tamen sentit acres stimulos carnis. qui enim consentit, siue plenè, siue non plenè, ad primum genus pertinet secundum eorum sententiam, cum non agnoscant discrimen peccati mortalis, & venialis, sed omnem motum carnis, quantumvis inuoluntarium, doceant esse mortale peccatum.

Immo hoc est fundamentum præcipuum, ex quo deducunt eos, qui grauitèr tentantur, debere necessariò uxorem ducere, quia, ut Lutherus in Epithalamio docet, non sunt certamina castitatis similia aliis certaminibus. qui enim tolerat famem, aut sitim, aut alia id genus, non peccat. at ætus libidinis sine peccato esse non potest, cum sit prohibitus omnis motus concupiscentiæ. In quo fundamento Caluinus, Petrus Martyr, & omnes alij conueniunt. sed & fundamentum ipsum est putridum, & ædificium, quod superextruunt, facile deiici potest.

Ac de fundamento quidem alibi disputandum erit, nunc S. Pauli, & Augustini testimonium sufficiat. Rom. 7. *Si quod inolo facio, iam non ego operor illud.* Quis capiat, mihi esse peccatum, quod ego non operor? August. lib. 1. ciuit. Dei, cap. 25. *Quod si illa concupiscentialis inobediencia, qua adhuc in membris moribundis habitat, præter voluntatis legem, quasi lege sua monetur, quanto magis absque culpa est in corpore non consentientis, si absque culpa est in corpore dormientis?* Sed de hoc alibi. Nunc ad rem præsentem venientes, asserimus ab Apostolo vocari homines ad Matrimonium non ob solas tentationes, siue sensum, sed ob consensum libidinis, & per vstionem, non tentationes, sed incontinentiam, & flagitia interpretamur.



ut hic sit sensus verborum Apostoli; qui omnino decreuit, aut fornicari, aut nubere; is bene facit si nubat, quia melius est nubere, quàm vri, id est, quàm fornicari.

Probamus hanc nostram expositionem. PRIMO, ex antecedentibus verbis, dicturus enim Apostolus: *Melius est nubere, quàm vri*, præmisit: *Si non se continent, nubant*. Vbi per vitionem exponit ipsemet Paulus incontinentiam; nam causam reddit cur debeant nubere qui non se continent, quod videlicet melius sit nubere, quàm vri, id est, quàm non continere, constat autem incontinentiam non tentationem, sed flagitium significare.

SECUNDO idem patet ex illis verbis eiusdem capituli: *Beatum est homini mulierem non tangere, propter fornicationem* autem unusquisque suam uxorem habeat. vbi non dicit Apostolus, propter tentationem fugiendam, sed propter fornicationem fugiendam quisque suam uxorem habeat, id est, non si tentaris, sed si fornicaturus es, uxorem potius habeas.

TERTIO idem probatur ex illis verbis: *Iterum reuertimini in idipsum, ne tentet vos Satanas propter incontinentiam* Scenam. vbi etiam non propter simplicem tentationem iubet, ut coniuges debitum inuicem reddant, sed propter incontinentiam. Idem igitur significat apud Apostolum vitiatio, quod incontinentia.

QUARTO ex illor. Tim. 5. *Volo iuniores nubere*; causam enim non reddit non tentationem, sed incontinentiam: *Nullam, inquit, dare occasionem aduersario maledicti causæ*, id est, ne demus occasionem Gentilibus maledicendi vitam, & mores Christianorum: non autem possunt maledicere aduersarii Christianis ob occultas tétationes, sed ob manifesta flagitia.

30 Vnde mox subiungit: *Iam enim quædam abierunt post Satanam*.

31 QUINTO idem probari potest exemplo ipsius Apostoli 2. Cor. 12. *Datus est mihi stimulus carnis meæ Angelus Satanas qui me colaphizat*; et propter quod ter Dominum rogavi, *ut auferretur à me*. Nec est verum, quod dicit Petrus Martyr in libro de coelibatu & vris, Apostolum impetrasse gratiam, qua neq. laberetur, nec grauitè vexaretur; ipse enim Apostolus contrarium dicit, se videlicet non impetrasse quod petebat, ut auferretur stimulus carnis. Ait enim: *Et respondit mihi Dominus, sufficit tibi grata mea, nam virtus in infirmitate perficitur*. Vnde S. AVGVSTINVS tract. 7. in Ioannem, & term. 33. de verbis



verbis, Domini, & alibi, saepe hoc Pauli exemplum adfert, cum ostendere vult, Deum saepe vtiliter non exaudire suorum orationes. Itaque Apostolus tentabatur magnis & diuturnis stimulis carnis, & tamen uxorem non ducebat: non igitur tentari est viti; alioqui Paulus suo ipsius iudicio damnatus esset.

Sed addit Petrus Martyr, hunc locum Apostoli non necessario de tentatione carnali esse intelligendum, cum Chrysostomus per stimulum carnis dolorem capitis intelligat; alij vero persecutiones, quas patiebatur.

At hec nimis magna negligentia, vel impudentia est, cum Chrysostomus, necno Theodoretus, Oecumenius, & Theophylactus disertis verbis refellant eos, qui per stimulum carnis dolorem capitis interpretantur. Illud quidem est verum, hos Patres referre hunc locum ad persecutiones; tamen S. Aug. in Psal. 38. concione 2. contendit stimulum carnis aliquid significare, quod verecundiam, & pudorem adferat, & quod nemo de tanto Apostolo dicere ausus fuisset, nisi ipse hoc de se confiteri non erubuisset. at certe nullus est pudor, dolores capitis, aut persecutiones confiteri.

Vnde etiam THEOPHYLACTUS, licet exponat de persecutionibus, tamen addit, satius esse exponere de tentatione carnis: *Vel, inquit, quod satius est, Veneris incitamenta, quibus maxime urgebatur, expressit; quomodo etiam exponi posse docent Sedulius, Anselmus, & Thomas in commentario, quod idem suadet metaphora colaphizationis; ut enim colaphus, non tam ledit carnem, quam pudorem inlicit animo; ita carnalis tentatio, cui non consentitur, ruborem potius, quam detrimentum adfert; denique adeo videtur iam recepta haec expositio, ut vulgo tentationes carnales, stimulus carnis dici soleant.*

Sed quia hic locus non omnino conuincit, cum variis modis a Patribus exponatur, sunt alia duo magis perspicua; 1. Cor. 9. *Castigo corpus meum, et in seruitutem redigo.* & Rom. 7. *Ego ipse mente seruo legi Dei, carne autem legi peccati.* Et: *Non quod volo bonum, hoc ago, sed quod nolo malum.* Et: *Sentio legem in membris meis repugnantem legi mentis meae.*

Quae loca non modo S. Augustinus multis in locis, & precipue lib. 2. retract. c. 1. & lib. 6. in Iulian. cap. 11. contendit de ipso Paulo, & aliis iustis hominibus intelligenda esse: sed etiam Lutherus in assert, 2. articuli omnino affirmat non posse aliter



aliter intelligi. & probat ex laboribus omnium Sanctorum, & nominatim S. Hieronymus in superandis grauissimis carnis tentationibus: *Quid, inquit, in vita omnium Sanctorum legimus, quam labores, vigilas, orationes, ieiunia, quibus & leuissimis spiritualibus pugnaverunt aduersus carnem, & concupiscentias corporis proprii? quis eorum non gemit? non accusatur, non laborat in carne sua, & in concupiscentiis suis? cum ergo in his omnibus videamus illas auctoritates, caro concupiscit aduersus spiritum, & condelector legi Dei secundum interiorem hominem, video autem aliam legem, & c. qua caussa est, & hac Apostolum velimus non in sua, sed in impiorum persona dicere, quod in personis piissimorum videmus vniuersissimum studium gerit? Et infra: Quoties rogo, S. Hieronymus de incendiis libidinum conqueritur, etiam tum cum multo ieiunio, & labore contra eam pugnaret, hoc est, dum esset non modo baptizatus, sed & sanctissimus. Hec ille, qui ut verissimè ista dicit, ita manifestè repugnat illis, quæ docuit de S. Hieronymo in epithalamio. hic enim cum Paulo inungit, & cum omnibus Sanctis, concupiscentiis strenuè repugnantibus, ex quo sequitur, ut vel apud Paulum *1. Cor. 7.* vrinon sit tentari, sed labi in scelera: vel Paulus, & omnes Sancti vitionem passi sint, ac proinde contra Deum peccauerint, quodd Matrimonium non inierint.*

Accedunt SEXTO testimonia Patrum. Clemens ALEXANDRINVS lib. 3. Stromatum in ipso principio, Basilidis Hæresiarachæ sectatoribus tribuit eam explicationem, quam nunc aduersarij amplectuntur: *Et illud, inquit, melius est nubere, quam Viri, aiunt dicere Apostolum, ne animam tuam in geneminiicias, noctu, & interdum resistens, & timens, ne à continentia excidas; nam cum in resistendo occupata fuerit anima, à spe est diuisa: Apprehende ergo, inquit his verbis ISIDORVS in moralibus, robustam mulierem, ne à Dei gratia auellaris, & cum igne in semine excreueris, cum bona ores conscientia. Et paulò post: Has Voces, inquit, adduxi ad Basilidianos reprehendendos, & c. Commentarius, qui Ambrosio tribuitur, in hunc locum: Cum, inquit, voluntas calori carnis consentit, Viritur; nam desideria parit, & non vincit, illustris Viri est, & perfecti.*

S. HIERONYMVS in Apologia pro libris contra Iovinianum: *Si autem, inquit, se continere non possunt, & ardorem libidinis non tam continentia volunt quam fornicatione restringere, melius est nubere, quam Viri, id est, melius est maritum ducere quam*



quàm fornicari. Hæcille. S. AUGUSTINVS lib. de S. virginitate, cap. 74. Melius, inquit, nubere, quàm crederetur, id est, quàm occulte a flamma concupiscentia in ipsa concupiscentia vastarentur, quas pœnitet professionis, & piget confessionis. Idem S. Augustinus lib. de bono coniugali, cap. 10. Msh, inquit, videtur hoc tempore solos eos, qui se non continent, coniugari oportere, secundum illam eiusdem Apostoli sententiam; Quod si se non continent, nubant; melius est enim nubere, quàm crederetur.

Porro CHRYSOSTOMVS visus est Petro Martyri de tentatione sola hunc locum intellexisse, sed non ita est; sic enim Chrysost. breuissimè exposuit: Significat Apostolus quantas sit concupiscentia tyrannis. hoc autem est quod dicit, si magnam violentiam pateris, & libidine incenderis, laboribus te & sudoribus libera, ne quando decidas. Hæcille. vbi vstionem interpretatur tentationem, quæ ad flagitium omnino perducet, nimirum accedente ad æstum concupiscentiæ animi infirmitate. id enim significant illæ voces: Tyrannis, Violentia, & ne decidas. Itaq; sensus est iuxta Chrysostomum, si animo imbecillo es, & vis tentationis ita vrget, vt omnino sis fornicaturus, præstat, vt nubas; quem sensum clariùs expressit in lib. de virginitate. Et Chrysostomum sequutus THEODORETVS ita expressit: Vstionem, inquit, nō vocat cupiditatis molestiam, sed animæ mancipationem, & ad id quod est deterius inclinationem. Quod autem dicit, est eiusmodi; melius quidem est, & vos quibus coniugalis consuetudo nondum obrigit, & vos qui coniuncti quidē fuistis, sed morte estis disiuncti, eligere continentiam. Sin autem cupiditatis impetum ferre non potestis, sed ad hoc sustinendum certamen imbecillo animo estis, quoniā ad ea, quæ pulchra, & honesta sunt, non habetis alacrem, & ardens animi propositum, nulla lex prohibet, quò minus Matrimonium contrahatis. Hæcille.

Denique, vt omittam ceteros, S. THOMAS in commentario huius loci, non solum affirmat vstionem hoc loco incontinentiam significare, sed etiam id confirmat ex ipsa vocis proprietate. Vri enim non calere significat, quod tentatis conuenit, sed calore labefactari, ac detrimentum pati, quod minimè conuenit iis, qui simpliciter tentantur, sed iis, qui tentationibus superantur. Atq; hinc Scriptura 1. Petri 1. Eccles. 2. Sap. 3. & alibi comparat iustos in tentationibus positos auro, quod per ignem probatur: aurum enim in igne probari dicitur non comburi, licet valde incalescat, quia de-



trimentum non patitur: paleam verò incallescere, & comburi, quia planè corrumpitur.

AL TERAM nunc solutionem addam. tamen enim per vstionem Apostolus tentationem significaret, adhuc tamen nihil aduersarij obtinerent; nam in nullo eorum locorum, quos ipsi citant, inuenitur verum præceptum nubendi, sed sola permissio: falsumq; est quod Calvinus lib. 4. Instit. cap. 13. §. 17. dicit, certa voce citari ad coniugium eos, qui vruntur. primum enim forma loquendi non est imperatiua; nam non ait Apostolus, qui non continetis, nubite, sed: *Qui non se continent, nubant;* nec ait, propter fornicationem ducite vxorem, sed: *Vxorem habeat, &c.*

Deinde ratio, quam Apostolus reddit, nimirum: *Melius est nubere, quam vri,* satis indicat, verba Apostoli, non præceptum, sed permissionem continere. Vt enim Chrysostomus notat, Apostolus rationes adiungit, ne videatur legislatio, id quod ipse dixit, ac præterea ratio ipsa non concludit, nec solum esse Matrimonium, sed licitum, & permissum, nam etsi melius est nubere, quam vri, tamen est quoddam tertium melius vtroque, id est, continere, & vstionem inedia & lacrymis restinguere. quomodo, si quis diceret, qui non vult pugnare, fugiat, quia melius est fugere, quam occidi, is non imperaret, sed permetteret fugam; nō enim prohiberet pugnare, & vincere, quod est melius, quam fugere, vel occidi.

TERTIO, sicut Apostolus ait: *Qui non se continent, nubant;* ita dixit: *Iterum reuertimini in ipsam.* vt enim monuit incontinentes solutos, vt nubarent ob periculum fornicationis, sic etiam monuit coniugatos incontinentes, vt post aliquam feriatiōem ab opere coniugali, iterum redeant ad opus coniugale, ob periculum adulterij. At his verbis posterioribus nihil Apostolus imperauit, sed solum permisit; sic enim subiunxit: *Hoc autem dico secundum indulgentiam, non secundum imperium;* igitur in verbis quoque prioribus, nullum imperium, sed sola indulgentia, ac permissio est.

Ex quo intelligimus, etiam in illis verbis: *Vnusquisque suam vxorem habeat,* nullum esse præceptum; nam aut loquitur de illis, qui iam vxores duxerunt, vt vult S. Hieronymus lib. 1. in Iouinianum, & rectè, quia sequitur paulò post: *Dico autem innuptis, & viduis, bonum est si sic permanserint;* aut loquitur de illis qui non duxerant, vt Petrus Martyr contendit.



Ait: si de iis qui duxerant, tunc sensus erit: *Vnusquisque suam uxorem habeat*, id est, retineat etiam quoad torum, sed iuxta indulgentiam, nō iuxta imperium, idem enim est: *iterum reuertimini in idipsum*: & *Vnusquisque suam uxorem habeat*, quoad torum: si verò de iis loquitur, qui non duxerunt, idem erit; Vnusquisque uxorem ducat ob fornicationem, &, qui non se continent, nubant. quod iam ostendimus, permissio- nem, non legem sonare, immò à maiori ducitur argumen- tum, nam, si ubi est adulterij periculum, Paulus non imperat opus cōiugale, sed permittit; multò magis nō imperabit ubi 10 est periculum solius fornicationis.

QUARTO, si vllum esset præceptum Matrimonij in ver- bis Pauli, maximè esset in illis. Tim. 5. *Volo iuniores nubere*. at nullum ibi esse præceptum facile probari potest; nam in- primis pugnaret cum illis verbis eiusdem Apostoli. I. Cor. 7. *Volo omnes esse sicut meipsum*, id est, continentes; ista enim a- pertissimè pugnant, volo omnes continere, & volo quosdam nubere. Idem enim est ac si diceret, volo omnes continere, & non volo omnes continere. neutrum igitur Apostolus iubet, sed absolute optat vnum, id est, omnes cōtinere, & tamen al- 20 terum permittit cedens infirmitati quorundam, id est, nube- re. Præterea non solum Paulus dixit: *Volo iuniores nubere*, sed addit: *Filios procreare, matres familias esse, &c.* Si ergo cum ait: *Volo iuniores nubere*, imperat nuptias, etiam cum ait, volo eas: *Filios procreare, & matres familias esse*, imperat, ut liberos ha- beant, proinde si steriles fuerint peccabunt in Apostolicam legem, quod sanè nemo nisi stultus concederet.

Adde VLTIMO testimonia Patrum. ac locum quidem illum: *Qui non se continent, nubant*, iam audiuius Theodo- retum ita exponentem, nulla lex prohibet, quò minus Ma- 30 trimonium contrahatis, quod idem & alij docent. Locum autem istum: *Volo iuniores nubere*, ita exponit CHRYSOSTO- MVS: *Volo quia ipsa volunt*. Et infra: *An verò Matrimonium præcipitur ab ipso. Sed neq; prohibet*. Et infra: *Prohibet igitur ab huius- modi viduus, atq; deterret, non quod adolescentulus esse viduus molis, sed quod adulteras fieri videret.*

S. AMBROSIVS vtrumq; locum exponit simul in libro de vi- duis: *Nō puto, inquit, quod iuniores renocandas putarit à viduis- tatis affectu, maximè cum duxerit; Melius est nubere, quàm Cris- tianam sitisse, pro remedio nuptias suasit, & peritura sanetur;*



non pro electione prescripsit, casta & continens quod sequatur. Et in fine libri: Sed nec vidua praeceptum accipit, sed consilium. S. HIERONYMVS in epist. 11. ad Ageruchiam de Monogamia: Vult, inquit, Apostolus alterum Matrimonium, cum ait: Volo iuniores nubere, praefereus digamiam fornicationi, secundum indulgentiam duntaxat, non secundum imperium. S. AVGVSTINVS lib. de bono viduitatis, cap. 8. Quid, inquit, dicit; Volo iuniores nubere, nuptiarum bonum Apostolica sobrietate, & auctoritate commendat; non procreandi officium etiam eis, quae continentia ante: Idem dixerunt de illo loco, qui non se continent, nubant, nimirum remedium ostendi, non legem figi.

Sed adferamus nunc tandem solutionem tertiam. Dico igitur, ista omnia, quae ex Apostolo aduersarij obiciunt, siue permissionem sonent, vt nos probauimus, siue praeceptum, vt ipsi volunt, pertinere solum ad homines liberos, non autem ad eos, qui votis iam obligati sunt. Nam de ea, quae habet votum continentiae, non potest rectè dici: Quae non se continet, nubat; melius est nubere, quam vri. Nam vtrumque est malum, & nubere, & vri; immò peius est nubere, quidquid reclamant aduersarij, praesertim ei, quae habet votum solenne.

Nam quae viritur, aut non peccat si vstio solum tentationem significat; aut peccat solum contra temperantiam, & contra votum, si fornicationem significat: quae verò nubit post solenne votum, peccat contra temperantiam, contra votum, & contra ipsum coniugium, cum sub nomine coniugij tegat perpetuum sacrilegium. Quae autem nubit post votum simplex, illa verum Matrimonium contrahit, tamen aliquo modo magis peccat, quam quae fornicatur, quia reddit se impotentem ad seruandum votum, quod non facit, quae fornicatur.

SECUNDO, ei, quae virum habet, & siue, quod ille perpetuò agrotet, siue quod perpetuò absit, non potest ab eo debitum coniugale petere, etiam si grauissimè vratur, non potest dici, si non se continet, nubat; melius est nubere, quam vri. Sed necessariò dicendum illi est, vt seruet fidem coniugi, & orationibus, & ieiuniis pugnet contra vstionem. id quod ne aduersarij quidem negare auderent. Non igitur Apostolus ea libera sunt: & si ligati censentur ij, qui fidem coniugi dederunt, cur non ij, qui dederunt Deo?

TERTIO,



Cap. XXXI. De Monachis. Lib. II. 327

TERTIO, ex Patribus. S. AMBROSIVS ad virginem lapsum, cap. 5. Dicit aliquis, inquit, melius est nubere, quam Viri. Hoc dictum ad non pollicitam pertinet, ad nondum velatam. Ceterum, quæ se sponndit Christo, & sanctum velamen accepit, iam nupsit, iam immortali iuncta est viro. Etiam si soluerit nubere communi lege connubij, adulterium perpetrat, ancilla mortis efficitur.

S. HIERONYMVS li. I. in Iovinianum: Si nupsit, inquit, Virgo, non peccauit, non illa Virgo quæ semet Des cultui dedicauit, harum enim si quæ nupsit, habebit damnationē, quia primam fidem irritam fecit; Virgines enim quæ post consecrationem nupsint, non tam adulteræ sunt, quam incestæ.

S. AVGVSTINVS lib. I. de adulterinis coniugiis, cap. 15. Illis, inquit, qui se non continent, Viriq; expedit nubere, & quod licet, expedit. quæ autem conuerint continentiam, nec licet, nec expedit. Et lib. de bono viduitatis, cap. 8. Proinde, inquit, quæ se non continent, nubant antequam continentiam proficiantur, antequam Deo conueant, quod nisi reddant, iure damnantur.

GREGORIUS in libro pastorali parte 3. admonitionis 28. Scriptum est, inquit, melius est nubere, quam Viri sine culpa qui pæ ad coniugium conuertunt, si tamen necdum meliora conuerunt.

S. Ioannes CHRYSOSTOMVS in libro de virginitate, c. 39. Vidua, inquit, omnino si soluerit, potestatem nubendi facit, at eam, quæ coniuge mortuosa in sequens tempus Deo consecravit, si postea nupsit, Vehementer accusat, & quæ fidem Deo datam post sefellert, non iis ergo, sed illis dixit, si se non continent, nubant; melius est enim nubere, quam Viri. Idem Chrysostomus homil. 19. in priorem ad Corinthios, exponens illud; Si nupsit virgo, non peccauit: Non de ea, inquit, quæ sibi elegerit virginitatem, loquitur, quippe quæ iam peccauit. Quod idem 30 habent Theodoretus, Theophylactus, Oecumenius in eundem locum, & Epiphanius hæresi 61.

CAPVT XXXI.

Soluitur tertia obiectio.



BIECTIO TERTIA, eaq; omnium grauissima, sumitur ab iis locis, qui docent, continentiam esse donum Dei, quod non omnibus detur. quod argumentum etiam soluimus breuiter in disputa-



tione de cœlibatu sacerdotum: hoc tamen loco accuratius  
 soluendum est. Loca præcipua sunt quatuor, Sap. 8. *Nemo po-  
 test esse continens, nisi Deus det.* Matth. 19. *Non omnes capiunt  
 Verbum hoc, sed quibus datum est.* Et infra: *Qui potest capere  
 capiat.* 1. Cor. 7. *Volo autem omnes homines esse sicut me ipsum,  
 sed unusquisque proprium donum habet ex Deo, unus sic, alius au-  
 tem sic.* Et infra: *Qui statuit in corde suo firmus non habens ne-  
 cessitatem, potestatem autem habens suæ voluntatis, hoc iudi-  
 cauit in corde suo seruare Virginem suam, benefacit.* Quem lo-  
 10 cum tractans S. Hieronymus li. i. in Iovinianum dicit, quod-  
 dam habere necessitatem nubendi, aut scortandi.

Ex his locis ita argumentantur; Nemo debet vouere, nisi  
 id, quod certò scit se posse soluere; alioqui exponit se pericu-  
 lo violandi votum, & proinde temerè vouet, & Deum offen-  
 dit: *Displicet enim illi infidelis, & stulta promissio,* Eccles. 5. At  
 nemo potest certò scire, an poterit perpetuò continere, cum  
 id non possit sine dono Dei, nec possit vlla ratione scire, an  
 habeat illud donum, & multò minus an sit perpetuò habi-  
 turus, vt Scripturæ allatæ ostendunt; nemo igitur potest, nisi  
 20 temerè, & imprudenter, perpetuam continentiam vouere.  
 Ex qua ratione illud etiam deducunt, eos, qui iam vouerunt,  
 posse, ac debere votum suum rescindere, quia ea, quæ non  
 sunt in nostra potestate, non sunt materia voti.

Addit Petrus Martyr similitudinem. Si quis enim voue-  
 rit se perpetuò ministraturum pauperibus, ac deinde paulò  
 post in morbum incidat, certè non tenebitur voto suo, quia  
 quoderat ei possibile cum vouit, iam illi impossibile factum  
 est; igitur & ille, qui continentiam vouit, si incidat in mor-  
 bum concupiscentiæ, non tenebitur amplius voto suo. Neq;  
 30 satis est dicere, posse istum orare Deum, ac petere continen-  
 tiam; nam etiam, qui ægrotat corpore, posset orare Deum, &  
 petere sanitatem, & tamen si non impetrat, vt sæpe accidit,  
 liber à voto suo est.

RESPONDEMVS, continentiam, & donum esse Dei, &  
 tamen in arbitrio, & potestate hominis positam, quorum  
 alterum aduersarij affirmant, alterum negant. Est igitur ob-  
 seruandum, multa esse genera donorum Dei. Quædam e-  
 nim dantur homini sine eius cooperatione, qualia sunt ro-  
 bur, sanitas, pulchritudo, prophetiæ, linguarum, aut mira-  
 culorum gratia, & omnes habitus, quos Deus infundit, &  
 hæc



hæc stultum esset asserere esse in nostra potestate, aut pendere ex humana electione, ita, vt possit ea habere quicumq; velit: atq; ad hoc genus donorum reuocant aduersarij continentiam; disertis enim verbis Petrus Martyr dicit, *idem esse, statueret an Celis continere, et an Celis prophetare.*

Aliud genus doni consistit in auxilio diuino, sine quo non faceremus id, quod cum eo auxilio facimus. sic enim credere, sperare, diligere, perseverare, patientem esse, vincere tentationes dicuntur, & sunt verissima Dei dona, quia nisi Deus gratia sua nos præueniret excitando, & adiuuaret dirigendo, protegendo, & cooperando, nihil boni faceremus; & tamen ista ipsa opera pendent ab electione humana, & sunt in nostra potestate, quia Deus, licet iuuat, non tamen cogit, neque necessitat; & licet homo sine Dei auxilio non possit quidquam boni facere, absolute tamen dicitur posse, quia sufficiens auxilium, vt quis operetur, aut saltem, vt possit maius auxilium petere, nunquam deest, alioquin non peccarent homines non credendo, non sperando, &c. Ad hoc genus donorum continentiam pertinere dicimus.

Vbi præterea est notandum, quod sicut circa fidem, pernitentiam, perseverantiam, aliosque actus bonos, ita etiam circa continentiam duplex gratia, siue auxilium distingui solet; Vnum sufficiens, quod omnibus datur, saltem pro loco, & tempore; quo auxilio non tam fit vt operemur, quam vt operari possimus; Aliud autem efficax, quo re ipsa operamur. Atque hoc posterius est donum singulare, quod non omnibus datur; soli enim illi donum fidei habent, qui re ipsa credunt, soli illi donum habent perseverantiæ, qui re ipsa perseverant, soli illi donum habent continentia, qui re ipsa continent, quos notum est non esse multos, nedum omnes, & de hoc dicitur: *Non omnes capiunt Verbum hoc, sed quibus datum est.* Et simile est verum, omnes, qui volunt, posse continere, quia sufficiens auxilium ad continendum, aut ad gratiam impetrandam nulli denegatur. Sicut etiam de fide scriptum est: *Non omnium est fides.* 2. Thessal. 3. & tamen omnes credere possunt si volunt, cum prædicatur Euangelium, alioquin non peccarent, qui non crederent. Quid intersit inter hæc auxilia, non est huius loci explicare, sed in disputatione de gratia, & libero arbitrio, si Deus annuerit, explicabitur.



His iam notatis, probandum est, continentiam donum Dei esse, & tamen in arbitrio nostro positam. Quod sit donum Dei Scripturæ allata, clarissimè ostendunt, nec aduersarij id negant: quod autem sit in potestate nostra, præueniente, ut diximus, & comitante gratia, his argumentis confirmamus.

PRIMO testimoniis earundem Scripturarum; nam Matth. 19. illa verba: *Sunt Eunuchi, qui se castrauerunt propter regnum celorum*, apertè indicant arbitrij libertatem. Si enim continentia ita esset donum Dei, ut ab hominis electione non penderet, dicendum fuisset, sunt Eunuchi, qui sunt facti à Deo, non autem, qui se castrauerunt; ideo enim de abscissis dicitur, sunt enim Eunuchi, qui sunt facti ab hominibus, non autem qui se castrauerunt, quia illa abscissio est opus alienum, non proprium. Præterea, si donum continentiae simile est dono prophetiæ, linguarum, sanitatis, atque aliis eiusmodi, cur non dicimus, sunt Prophetæ, qui seiplos Prophetas fecerunt, sicut dicimus, sunt Eunuchi, qui seiplos castrauerunt.

20 SECUNDO, illa verba: *Qui potest capere capiat*, cohortationem ad continentiam habent, ut, præter sanctos Patres, etiam Petrus Martyr testatur in libro de cœlibatu & votis. Sic etiam illa verba Pauli 1. epistolæ ad Corinth. 7. *De virginibus præceptum Domini non habeo, consilium autem do*, cohortatione continent, eodem interprete Petro Martyre. At quis, rogo, sapiens hortaretur vnquam ad id, quod non est in potestate? Num, quis vnquam hortatus est homines, ut Prophetæ fiant, aut robusti ex debilibus, proceri ex paruis, formosi ex deformibus?

30 Sed, inquit Martyr, *ista cohortationes dantur iis tantum, qui donum Dei habent*. CONTRA; qui donum habent, ipsorum sententia, non possunt non continere. Scribit enim Martinus Bucerus, qui Petro Martyri instar oraculi esse solet, in illud Matth. 19. *Non omnes capiunt verbum hoc, sed quibus datum est*. Sicut valde famelicus non potest non audire cibum sumere, si offeratur ei: sic non posse non continere ab vxore ducenda, qui donum id à Deo suscepit. Si igitur, qui donum non habent, non possunt continere; qui habent, non possunt non continere; qui sunt illi, quos Christus & Apostolus eius ad continentiam cohortantur?



TERTIO, illa verba I. Cor. 7. *Quod vult, faciat, non peccat, se nubat*; liberam homini optionem dant eligendi coniugium, aut celibatum: quomodo ergo non est in arbitrio hominis positum, vt contineat, si velit: non enim de rebus impossibilibus vlla deliberatio esse potest.

QUARTO, continentes ac cœlibes in Scripturis laudantur, & præmiis afficiuntur, vt satis probatum est in disputatione de consiliis Euangelicis, ex testimonio Isaie 6. de Eunuchis, quibus promittitur, *nomen melius, quàm filiis & filiabus*. Et ex Apocal. 14. *vbi Virgines cantant canticum novum, quod nemo alius cantare potest*. Et ex illo Sapient. 3. *Bonorum laborum gloriosus est fructus, &c.* At nullum præmium, nullam laudem merentur opera, quæ non sunt in nostra potestate, vt omnes consentiunt; nec enim præmio afficiuntur, qui propherant, qui linguis loquuntur, qui morbos curant, qui dæmones eiiciunt, quia hæc folius Dei dona sunt: igitur continentia non solum est donum Dei, sed etiam libera hominis actio.

QUINTO, à simili, non minus donum Dei est credere, quàm continere. Nam de fide scriptum est Ioan. 6. *Nemo potest ad me venire, nisi Pater traxerit eum*. Et in Actis Apostolorum, cap. 13. *Crediderunt quotquot erant præordinati ad vitam æternam*. Et ad Ephel. 2. *Gratia estis saluati per fidem, & hoc non ex vobis, Dei enim donum est*. Et Philipp. 1. *Vobis datum est, & in eum credatis*. Et 2. ad Thess. vlt. *Non omnium est fides*. At nihilominus credere possunt omnes, qui volunt, & rectè hortamur omnes ad fidem, & sine vlla temeritate promittunt omnes in Baptismo, se fidem Christianam conseruatos vsq; ad mortem: igitur & continere possunt omnes, qui volunt, & rectè hortamur omnes ad continentiam; & sine temeritate multi promittunt Deo, se continentiam perpetuam seruatuos.

Respondent, discrimen esse inter fidem & continentiam, quòd illa sit necessaria ad salutem, hæc non item. Vnde monere solemus, vt facit S. Hieronymus in commentario, cap. 19. Matthæi, vt quisq; exploret vires suas, antequam voueat continentiam, non autem monemus, vt quisque exploret vires suas, antequam credat.

At facilè hoc refellitur, nam potissima causa, cur votum continentia temerarium asseritur ab aduersariis, non est, quia



quia continentia non sit res necessaria, sed quia res impossibilis, sine peculiari Dei dono, quod non omnibus datur. Alioqui multa non necessaria sine ulla temeritate voueri possunt, ut notum est. Si igitur hac potissima causa æque locum habet in fide atque in continentia, ut ex Scripturis demonstrauimus, cur temerè promittitur continentia, & non temerè promittitur fides?

Adde, quod non est verum, debere eum, qui vult vouere continentiam, explorare vires suas, & non debere explorare vires suas, qui vult fidem Christianam amplecti. Nam Dominus Lucæ 14. monet eos, qui volunt ad se venire, id est, legem ac fidem suam suscipere, ut imitentur eos, qui volunt turrim edificare, qui prius computant, si habent sumptus ad perficiendum; nec non eos, qui bellum gesturi sunt, qui prius cogitant, si possint, cum decem millibus occurrere ei, qui cum viginti millibus venit. Vnde & Ecclesia explorat Catechumenos, an habeant plenum & stabile propositum perseuerandi in fide & lege Christiana, quia peius est à fide deficere, quam fidem nunquam recipere, ad quem finem ex antiquissima consuetudine in Quadragesima fiunt aliquot scrutinia Catechumenorum, qui in Paschate baptizandi sunt. De quibus vide, si placet, Alcuinum in libro de officiis diuinis, cap. de Sabbatho sancto.

Hoc solum interest inter fidem & continentiam, quod, qui explorans vires suas, non iudicat se habere sufficientes vires ad continendum, potest nubere, quia continentia non est necessaria ad salutem, quanquam etiam potest procurare vires maiores per orationem; qui autem iudicat, se non habere sufficientes vires ad perseuerandum in fide & lege Christi, is non potest propterea licitè non amplecti fidem & legem Christi, quæ necessaria est, sed debet vires maiores à Deo petere, quas sine dubio habebit, si fideliter petat.

SEXTO, probatur ex absurdo, quod ex aduersariorum sententia sequitur. Nam si continere non possint omnes, qui volunt, sequitur, multis hominibus nullum peccatum esse fornicari, aut mœchari. Nam si quis, antequam uxorem ducat, grauissimè vergeatur stimulis carnis, & donum continentia fortè non habeat, quid ager? fornicabiturne impune? *Habet*, inquit, *paratum remedium, ducat uxorem*. Sed quid, si non statim inueniat? Nec enim vno die contrahuntur



cur Matrimonia, immò multi menses plerumque intercedunt inter sponsalia, & nuptias. AD HÆC, si iam duxit, sed fortè abest procul ab ea, vt sepe contingit, aut ea morbo graui, & diuturno laborat, ita vt non liceat viro debitum petere coniugale. quid ager? mœchabiturne, si fortè vritur, & donum continentia se habere non videt? *Non licet*, inquit, *mœchari: idcirco, qui eiusmodi est, pro continentia dono Deum exoret, non enim negabit ille, quod fideliter petitur.*

SED cur, quæso, non idem facere poterit, qui continentiam vult, si fortè vritur, & donum se habere non videat? **RESPONDENT**, magnum esse discrimen inter continentiam ab adulterio, vel fornicatione, & continentiam ab vxore. Illa enim necessaria est, & à Deo imperata, idcirco nunquam Deus eam petentibus negat. At continentia ab vxore nec necessaria est, nec imperata; ideo non semper conceditur, etiam si peratur. AD DIT Petrus Martyr in libro de cœlibatu & votis, cœlibatum non esse petendum à Deo absolute, sed solum sub conditione, si expediat ad maiorem eius gloriam, sicut petimus sanitatem, opes, & similia, quæ non sunt necessaria ad salutem. Ioannes Calvinus lib. 4. Institut. cap. 13. §. 17. dicit, nostrum non esse fiduciam habere obtinendi à Deo specialis doni, quale est cœlibatus. Martinus Bucerus in cap. 19. Matthæi, clarè affirmat, non esse petendum cœlibatum à Deo ab iis, qui nesciunt, an Deus velit illum eis dare. Ratio autem eorum est, quia oratio debet nasci ex fide, fides autem niti debet promissione Dei; promissio verò nulla est, qua cœlibatum perpetuum alicui certò promiserit. Ita impij & impuri isti homines, non modò cœlibatum oppugnant, sed etiam viam sibi, & aliis ad eum præcludunt. 30

Sed facilè est ratiunculas istas refellere; nam etsi promissio particularis deest, sufficit tamen promissio generalis: *Petite, & accipietis*, Lucæ 11. Et: *Si quid petitis Patrem in nomine meo, dabit vobis*, Ioan. 14. 15. & 16. Alioqui enim, si requireretur particularis promissio, nec Fides, nec Spes, nec Dilectio, nec Continentia coniugalis, nec alia virtus peti posset; nusquam enim exstant promissiones horum donorum in particulari.

Porro generales promissiones requirunt quidem certas conditiones: non enim quod quisq; petit, semper impetrat, cum



cum sæpe contingat minus vtilia, & minus bona peti, quæ Deum nullo modo dare conueniat: sed conditio, quæ requiritur, non est, ut aduersarij fingunt, ut res, quæ petitur, sit necessaria ad salutem, vel imperata. Id enim nulla ratione, vel auctoritate confirmant, sed est, ut id, quod petimus, sit secundum eius voluntatem; sicut enim docet nos S. Ioannes in epist. I. cap. 5. Hæc est fiducia, quam habemus ad Deum, quia quodcunque petierimus secundum eius voluntatem, audit nos. Non solum autem est secundum eius voluntatem id, 10 quod est necessarium ad salutem, sed etiam id, quod est vtile, & vtilius, quam eius oppositum; neque id solum, quod ipse imperauit, sed etiam quod consuluit, & laudauit, & cui præmium maximum promisit. Talem autem esse cœlibatum, suprà multis docuimus. S. etiam AUGUSTINVS tract. 102. in Ioannem, explicans quid sit, quod Deus petentibus in nomine Christi non negat, dicit esse id, quod conducit ad æternam salutem, nec addit, oportere esse necessarium, aut imperatum.

Probatur VLTIMO, cœlibatum esse in potestate nostra, 20 Dei gratia adiuuante, ex testimoniis Patrum. TERTULLIANVS libro de Monogamia, prope finem, explicans locum illum; Non omnes capiunt verbum hoc: *Elige*, inquit, *quod bonum est*, si non potes, est quia non vis. *Posse enim si velis, ostendit, quia tuo arbitrio vtrumque reliquit.*

ORIGENES in comment. eiusdem loci: *Qui vult*, inquit, *capere verbum, quod de castitate positum est, petat, credens dicenti, & accipiet, non dubitans de illo, quod dictum est; Omnis qui petit, accipit.* Hieronymus in eundem locum: *His*, inquit, *datum est, qui petierunt, qui voluerunt, qui, ut acciperent,* 30 *laborauerunt. Omnis enim petenti dabitur, & quærens inueniet, & pulsanti aperietur.* Gregorius NAZIANZENSIS orat. 31. in hoc Euangelij capitulum de tribus Eunuchorum generibus: *Cum audis*, inquit, *quibus datum est, adde, datum esse iis, qui volunt, & assentiuntur.*

AMBROSIVS lib. 3. de virginibus: *Dominus*, inquit, *qui sciret predicandam omnibus integritatem, misit andam paucis; non omnes*, inquit, *capiunt verbum istud.* Et libro de viduis: *Sunt*, inquit, *Spadones, qui se castrauerunt propter regnum cælorum; sed hoc non omnibus imperatur, sed ab omnibus flagituratur.* Et infra: *Scit creator omnium affectus esse varios singularis, & ideo* 40 *præmit*



premiis virtutem provocauit, non infirmitatem vnicuique alligauit. Hæc ille. Vbi vides, continentiam omnibus prædicationi, ab omnibus flagitari, nimirum, si ipsi velint præmia eius consequi.

Ioannes CHRYSOSTOMVS in commentario eiusdem loci: *Hic, inquit, datum est, qui sponte id eligunt, quod ideo dicitur, ut ostenderet superiore nobis auxilio opus esse, quod quidem omnibus paratum est, si volumus in hac luctu enadere superiores.*

AUGUSTINVS in Psal. 137. in illud; Votum vouit Deo Iacob: *Ipse David, inquit, vouit, tanquam in potestate habens, et rogat Deum, ut impleat, quod vouit, est deuotio vouentis, sed est humilitas deprecantis. Nemo presumat viribus suis reddere, quod vouerit. Qui rehortatur ut conueas, ipse adiuuat, ut reddas. Et lib. 6. Confession. cap. II. Vtique dares, inquit, nimirum continentiam, si gemitu interno pulsarem aures tuas. Denique, idem Augustinus lib. 2. de adulterinis coniugiis, cap. 10. 13. & 20. ex professo docet, possibilem esse continentiam omnibus, etiam illis, qui nihil de ea cogitantes, in eius seruandâ necessitatem inciderunt. Quod idem adhuc fusiùs docet BASILIUS in libro de virginitate, ultra medium. Ex his ad loca Scripturæ, in titid posita, facile erit respondere.*

Ille igitur locus primus Sapient. 8. *Nemo potest esse continens, nisi Deus det*, de continentia in genere accipi debet, ut non solum virginalem, aut vidualem, sed etiam coniugalem comprehendit. Is enim, qui hæc verba dicit, Salomon est, qui quidem non virgo, aut viduus, sed maritus erat, ac proinde maritalem continentiam à Deo petebat. Quocirca non habemus ex hoc loco, continentiam ita esse donum Dei, ut non possit esse omnibus communis. Nam etiam ex aduersariorum sententia, continentia coniugalis ab omnibus haberi potest, modò eam à Deo petant, idcirco enim sequitur: *Adij Deum, et deprecatus sum.*

Ille alius locus Matth. 19. *Non omnes capiunt Verbum hoc, sed quibus datum est*, maiore explicatione indiget. Aduersarij contendunt illud: *Non omnes capiunt*, hunc habere sensum; Non omnes sunt capaces continentia ab vxore, sed ij soli, qui habent peculiare donum. Ex quo sequitur, ut qui non habent donum, verè non possint continere. Colligunt verò hunc sensum ex voce Græca  $\chi\omega\rho\epsilon\iota\sigma\iota$ , nam  $\chi\omega\rho\epsilon\iota\omega$  non significat capere, id est, apprehendere; quomodo dici-



mus cape librum, cape pileum, sed capere, id est, capacem esse, quomodo dicimus, hydria hæc tantum aquæ capit, ut metretam vnâ, vel alteram, ut Euangelium loquitur.

At falluntur aduersarij ambiguitate huius vocis. Nam verbum  $\chi\alpha\rho\acute{\epsilon}\omega$ , & Latinum capio, interdum significat naturalem potentiam ad capiendum, quam qui non habent, dicuntur propriè incapaces; interdum tamen significat actua-  
 10 lem, seu voluntariam capacitatem, quæ ex libero arbitrio pendet, & qui eam non habent, non dicuntur incapaces, sed dicuntur non capere. Exempli gratia, locus angustus rectè dicitur incapax multarum rerum, & similiter pueri, qui nondum apri sunt naturaliter ad fraudes neccendas, dicuntur doli incapaces. At qui aliquid non intelligit, quia non attendit, aut quia non est qui eum doceat, is non dicitur incapax, tamen si nondum capiat, quod dicitur. Et similiter qui consilium aliquod non admittit, quia ab alio iam est persuasus ad aliud, dicitur quidem nō capere illud consilium, non  
 20 tamen non esse capax, siue non posse illud admittere, si velit. Et in hac significatione accipitur hoc loco. significat enim, non omnes intelligere practicè, id est, non admittere, non persuaderi, non approbare quod dictum est, non expedire nubere.

Quod autem hoc ita sit, probatur PRIMO, quia si capere hoc loco significaret esse capacem, ineptè Dominus addidisset: *Qui potest capere, capiat.* His enim verbis adhortatur Dominus ad continentiam, ut Petrus Martyr fatetur, & omnes interpretes docent. At qualis adhortatio est, qui potest esse capax, sit capax? PRAETEREA, si de capacitate hic  
 30 ageretur, & vellet Dominus, ut aduersarij contēdunt, ostendere, non omnes esse capaces continentia, ac proinde illis necessarium esse nubere: ratio illa (sunt enim Eunuchi, qui de matris utero sic nati sunt, &c.) nihil planè ad rem faceret, immò contrarium potius probaret. Nam si dicas, quidam continent vicio naturæ, ut frigidi; quidam aliena crudelitate, ut ab hominibus castrati; quidam propria voluntate, ut qui propter Dei cultum cœlibes viuunt; non ergo omnes possunt continere: certè non rectius colliges, quàm si diceress: Quidam vi tracti currunt, alij currunt sponte, non igitur omnes possunt currere. At contra rectissimè colligeres; Multi  
 necesse



necessitate continent, multi voluntate; igitur credibile est, omnes continere posse, si velint.

Quocirca S. Ioannes CHRYSOSTOMVS in commentario huius loci rectè docet, Christum per hanc similitudinem Eunuchorum probare voluisse, facile & vtile esse abstinere à nuptiis, & proinde non rectè iudicare eos, qui non capiunt, id est, non suscipiunt & approbant verbum hoc. Nam si multi abstinent, sine vlla spe maioris boni, vt Eunuchi corporales, quantò facilius erit abstinere proposita spe excellentissimi præmij & fulgidissimæ coronæ? Adde vltimò testimonia Patrum, quæ paulò antè citata sunt.

Illud autem: *Qui potest capere, capiat*, duobus modis potest exponi. PRIMO, vt loquatur Dominus de potentia proxima, quam non habent, nisi illi, quibus iam Dominus inspirauit desiderium efficax continendi, vt sensus sit; *Qui potest capere, capiat*, id est, qui Dei dono sentiunt sibi intus persuaderi, vt contineant, approbent verbum hoc. Ita videntur hoc dictum intellexisse Hieronymus in hunc locum, & Augustinus lib. 2. de adulterinis coniugiis, cap. 19. sed non debet hinc deduci, ergo non omnes possunt continere. Nam etiam si non omnes habent potentiam proximam, tamen habent remotam, & possunt, si velint, precibus impetrare potentiam proximam, id est, vires ad continendum: sicut de fide dicitur Ioan. 6. *Nemo potest ad me venire, nisi Pater traxerit eum*. Ad di enim potest; *Qui potest venire, veniat*, id est, qui trahitur, veniat; qui autem non trahitur, oret, vt trahatur.

SECUNDO, dici potest, hunc locum habere eundem sensum cum illo Matth. 13. *Qui habet aures audiendi, audiat*, non enim vult Dominus dicere, non omnes habere aures, sed monet omnes, vt vtantur facultate, quam habent. Quomodo solemus dicere; *Qui habet oculos, videat*; *qui habet mentem, iudicet*; sic igitur & hoc loco Dominus dicit: *Qui potest capere, capiat*, id est, qui habet mentem, & iudicium sanum, intelligat, iudicet, approbet verbum hoc, quod dictum est: *Non expedit nubere*.

Iam verò TERTIVS locus: *Vnusquisque proprium donum habet ex Deo, unus sic, alius autem sic*, i. ad Corinth. 7. non habet difficultatem; nam Apostolus vocat donum Dei non solum continentiam virginalem, sed etiam coniugalem. Donum enim Dei est, quod aliqui eligant virginitatem, &



similiter, quod aliqui eligant Matrimonium, & in eo castè perseuerent. Sed quomodo cum his cohereat, quod in potestate nostra sit continere, & castè viuere, iam antea exposuimus.

POSTREMVS locus non facit ad propositum; nam cùm Paulus ait: *Qui statuit in corde suo firmus, non habens necessitatem, potestatem autem habens sua voluntatis, & hoc in dscavit in corde suo seruare virginem suam, bene facit:* dupliciter accipipotest nomen, Virginis. Vno modo, pro ipsa virginitate, vt  
 10 accepit S. Hieronymus lib. i. in Iouinianum. Alio modo, pro filia virgine, vt exponit Epiphanius hæresi 61. Item commentaria Ambrosij, Theodoreri, Theophylacti, & aliorum fere omnium.

PRIMA expositio non est probabilis; est enim inauditum, vt virgo accipiat pro virginitate. Neque in hac questione habemus cum aduersariis; nam Ioannes Calvinus, Petrus Martyr, Erasmus, & alij in hunc locum, per virginem, filiam virginem intelligunt, non virginitatem. Si tamen admitteretur prior illa expositio, per necessitatem non oportet  
 20 rei intelligere necessitatem absolutam coniugij, sed conditionatam. Nam, vt eo loco S. Hieronymus dicit, qui nolunt continere, illis necesse est, aut uxorem ducere, aut scortari, absolutè tamen neutrum est necessarium. SI VERO accipiat expositio posterior, quæ vera & germana est: per necessitatem non erit opus accipere necessitatem coniugij, ob carentiam doni continentix, de qua necessitate hic agimus; sed necessitatem extrinsecam, quæ ad rem præsentem non pertinet; dicitur enim pater habere necessitatem iungendi  
 30 filiam Matrimonio, si ipsa nolit viuere in cœlibatu, vel, si ipse seruus sit, & cogatur à Domino filiam elocare: & contrà, dicitur habere necessitatem seruadi filiam virginem, si vel ipsa nolit nubere (neq; enim ad id cogi potest) vel si non inueniatur, qui eam velit. Sed si nulla talis necessitas adsit, liberum erit patri statuere de filia, vt voluerit: sed si iungat eam Matrimonio, bene faciet; si non iungat, melius faciet, vt Apostolus ibidem scribit. Hæc de locis Scripturæ propositis.

AD EAM verò similitudinem, quam Petrus Martyr posuit de eo, qui vouit ministrare agrotis, & postea non fecit, quod in morbum ipse inciderit, respondetur, non esse simile hoc votum voto continentix. PRIMVM enim, iste non peccat  
 non



non implendo votum, quia voluntatem habet promptam & paratam ad votum implendum, non enim vult ægrotare, sed cogitur. At qui ob morbum concupiscentiæ ducit uxorem post votum, is non habet voluntatem implendi votum, sed habet contrariam, id est, non implendi; implicat enim contradictionem, quod quis velit continere, vt vouit, & velit uxorem ducere.

DEINDE, ægritudo corporalis non pendet à voluntate ægrotantis, incontinentia verò pendet. Non enim potest rectè dici; Nemo ægrotat, nisi qui vult. at rectissime dicitur; 10 Nemo fornicatur, nisi qui vult. Obediunt enim membra corporis ad nutum voluntatis.

DENIQUE, sanitas corporalis non est bonum absolute petendum, quia sæpe melior est ægritudo ad vitam æternam consequendam, quàm sanitas. Vnde nullum exstat consilium Evangelicum de tuenda sanitate, propter regnum cælorum; ac continentia absolute peti potest, & infallibiliter conceditur, si aliunde non sit defectus in oratione, quia est bonum ad vitam æternam longè vtilius, quàm Matrimonium, & propterea consulitur & commendatur passim in Scripturis. 20

## CAPVT XXXII.

### *Soluitur quarta obiectio ex ratione naturali.*

**D**ILVENDAE sunt obiectiones, quas aduersarij sumunt ex variis incommodis, quæ videntur nasci ex cœlibatu. PRIM A ratio. Cœlibatus naturæ ipsi repugnare videtur, quæ frustra sexuum diuersitatem & vim generatiuam molita erit in homine, si melius est cœlibem esse, quàm coniugatum. 30

Hæc ratio Iouiniani est, & iam olim à S. Hieronymo lib. i. in Iouinianum, refutata. Sed quia rursus à Luthero in sermone de Matrimonio, & ab Erasmo in Encomio Matrimonij reuocata in lucem est, respondemus, non esse frustra vim generatiuam, & sexuum diuersitatem, etiam si permulti ea non vtantur. ea siquidem, quæ propter bonum speciei instituta sunt, non dicuntur frustra, si à quibusdam indiuiduis exerceantur, etiam si à multis alijs nō exerceantur. alioqui enim omnes herbar, omniaq; poma cum seminibus nascuntur, & tamen paucissima ex eis seruntur.



SECUNDA ratio. Si omnes continerent, mundus periret:  
non igitur oportet omnibus continentiam prædicari.

Respondent Patres, non esse periculum, ut omnes continere velint; semper enim plures erunt imperfecti, quam perfecti, & ideo oportere omnibus prædicari, ut saltem pauci id faciant. S. HIERONYMVS libro in Iovinianum: *At dices, inquit, si omnes Virgines fuerint, quomodo subsistat genus humanum? Noli metuere, ne omnes Virgines fiant. Difficilis res est Virginitas, & ideo rara, quia difficilis.*

Aliam solutionem adfert S. AVGVSTINVS cap. 10. de bono coniugali: *Novi quosdam, qui murmurent, quid si omnes Vellent ab omni concubitu abstinere, unde subsistat genus humanum? Vtinam omnes hoc Vellent. Multo citius Dei ciuitas compleretur, & acceleraretur terminus seculi.* Hæc ille. Quod etiam clariùs docet libro de bono viduitatis, cap. 23. unde & Apostolus dixit in I. Cor. 7. *Volo omnes esse sicut me ipsum, id est, cælibes.* Quod certè non dixisset, si non liceret omnibus cælibatum eligere, etiamsi mundus finiendus esset.

Ex quo intelligimus, non esse certam opinionem eorum, qui dicunt, si soli essent in mundo Monachi & Sanctimonialia, debere eos coniungi Matrimonio ad speciem conservandam. Possent enim eiusmodi credere mundi finem adesse, ac proinde non tenerentur votum violare, ut speciem propagarent; si tamen quis defendere velit, quod nonnulli probabiliter docent, teneri ad coniugium homines in extrema illa necessitate conservandi generis humani, non esset cur votum timeret. Vota enim non possunt præscribere contra legem diuinam.

TERTIA ratio. Ex cælibatu tot Monachorum, Sacerdotum, & Sanctimonialium, læditur Christiana Respublica, siquidem minuitur numerus Christianorum, nec potest commodè resisti multitudini infidelium.

Respondet S. AMBROSIVS lib. 3. de virginibus: *Nonnullos, inquit, dixisse, audius, quod perit mundus, defecit genus humanum, coniugia labefacta sunt. Quæro, quis tandem quæsiuit exorem, qui non inuenerit? & cetera, quæ apud eum legere poteris.* Sed certè hoc tempore, si qua causa est paucitatis Christianorum, & multitudinis infidelium, ea non cælibatus, sed monogamia est. Turci siquidem habent etiam suos quosdam religiosos, qui cælibes esse coguntur; sed ideo

valde



valde multiplicantur, quod plures simul vxores habeant. Non puto autem aduersarios tam esse cæcos, vt velint etiam contra Christilegem introducere polygamiam.

Porro causa, cur Christiani plerumque viribus inferiores sint, cum est aduersus Turcas pugnandum, non est paucitas hominum, sed discordia Principum Christianorum. Alioqui enim Magnus Alexander exiguum exercitum habuit, sed obedientem & strenuum, ideo totum orbem terrarum breui subegit. Romani quoque non multitudine, sed arte & disciplina vincebant. Denique, tempore Caroli Magni res Christiana mirabiliter floruit, & tamen plurimi tunc erant Sacerdotes, Monachi, & Sanctimoniales, qui cœlibatum colebant.

QUARTA ratio. Ex cœlibatu perpetuo non raro morbi oriuntur, qui non aliter curari possunt, quam opere coniugaliungitur temerè vouetur eiusmodi cœlibatus. Potest enim ac debet in eiusmodi casibus votum frangi, vt vitæ consulatur. RESPONDEO, nullos morbos ex continentia, sed ex crapula, & incontinentia omnes, aut ferè omnes nasci.

SED quid si morbus aliunde contractus vsu coniugij curari possit, & aliter non possit? RESPONDET S. Bonaventura in 4. dist. 38. art. 2. quæst. ult. nullo modo licere ob periculum morbi, vel mortis, votum continentia violare. PRIMO, quia nullus est morbus, qui non possit alia ratione curari, vt medici periti & pij de hac re consulti respondent. SECUNDO, quia etiam si non posset aliter morbus curari, quam voti violatione, melior est virtus continentia, quam aliqua prolixitas vitæ corporalis; nam qui dant operam literis, & sacris meditationibus, præsertim si vitæ asperitatem adiungant, ferè certò sciunt se minuere sibi ipsis vitam, & tamen rectè possunt sapientia, & pietatis accessionem anteponere paucis annis vitæ corporalis.

DICES, si ieiunij lex, aut votum, corporis valetudini vehementer noceat, potest, ac debet non seruari; cur igitur nõ idem dicatur de voto continentia?

RESPONDEO, non esse eandem rationem ieiunij & continentia; nam cibus ordinatur per se ad salutem indiuidui; idcirco illo non vt cum necesse est ad salutem conferuandam, vitium est, non virtus, proinde nec voti materia.



At coniugij actus non ordinatur per se ad salutem indiui-  
 diui, immo potius nocet. Quod si quando prodesse posset, so-  
 lum esset per accidens, neque id omnino certò. non autem  
 licet propter incertum, & per accidens, omittere voti imple-  
 tionem, quæ certò & per se bona est. & simile est, si quis me  
 velit occidere, nisi furtum faciam. non enim licet furari, e-  
 tiam si alioqui teneat seruare vitam; nam furtum non est  
 medium per se institutum ad vitam seruandam, sed solum  
 per accidens prodesset, ex mala alterius voluntate. Refert  
 10 Martinus CROMERVS lib. 29. de rebus Polonicis, Casimi-  
 rum quendam regis filium miraculis post obitum claruisse,  
 qui maluerat mori, quàm sceminae admisceri, vt ei medici  
 suadebant. Vide de hoc argumento plura apud Michaëlem  
 Medinam lib. 4. de continentia, controuersia 4.

» QUINTA ratio. Propensio ad gignendam prolem natu-  
 » ralis est & bona, quippe quæ etiam in natura integra fuisset,  
 » & in omnibus animantibus est: at impedire naturalem, ac  
 » bonam propensionem, quod faciunt qui cœlibatum perpe-  
 » tuò colunt, peccatum est, cum id nihil sit aliud, quàm natu-  
 20 » ra, ac Deo ipsi, qui naturam instituit reluctari: igitur non li-  
 » cet cœlibatum perpetuò colere illis, qui propensionem ad  
 » gignendum sentiunt. Atq; hæc est ratio, ob quam Lutherus  
 » in sermone de Matrimonio dicere ausus est, non esse præce-  
 » ptum, sed plus quàm præceptum, illud: *Crescite, & multipli-*  
 » *camini*, Genes. 1.

RESPONDET Michaël Medina libro 4. de continentia,  
 cap. 11. impedire alterum ne operetur iuxta naturalem pro-  
 pensionem, vt si quis cogat aliquem perpetuò continere;  
 peccatum esse; non autem esse peccatum impedire in seipso  
 30 naturalem propensionem, vt si quis sponte sua perpetuò con-  
 tineat: quia ius, & iniuria ad alterum referuntur. nec enim  
 aliquis propriè sibi ipse iniuriam facere potest.

At si ita est, cur peccatum erit occidere seipsum? certè B.  
 THOMAS in 2. 2. quæst. 64. artic. 5. ideo affirmat peccatum  
 esse, seipsum occidere, quod sit contra naturæ propensio-  
 nem: etsi peccatum est occidere se, quia id pugnat cum na-  
 turali propensione, cur non erit peccatum nolle filios pro-  
 creare, cum id etiam pugnet cum naturali propensione?  
 Franciscus VICTORIA in relectione de homicidio, & Do-  
 minicus à Soto lib. 5. de iustitia & iure, q. 1. art. 5. respondent  
 pro



propensionem ad generandum esse quidem naturalem, tamen nō conuenire homini, vt homo est, sed vt conuenit cum bestiis: at propensionem ad viuendum, & naturalem esse, & conuenire homini vt homo est: propterea peccatum esse se ipsum occidere, quod id sit contra propensionem hominis naturalem: at non generare non esse peccatum, quod non sit contra propensionem propriè humanam.

Sed non videtur hæc responsio plenè satisfacere; nam si propensio ad generandum non est propriè humana, quia est homini communis cum bestiis, certè multò minus propensio ad viuendum erit propriè humana, cum sit homini communis cum omnibus viuentibus. dicent fortasse, generare conuenire homini ratione corporis tantum, viuere autem ratione corporis, & ratione animæ. At hoc loco non differimus nisi de vita corporali. præterea ipsum viuere, & esse, nōne commune est cum aliis rebus? deinde si occidere seipsum esset peccatum, quia est contra naturalem hominis propensionem: certè etiam velle occidi ab alio & optare mortem, esset peccatum, quia id etiam est contra hominis propensionem naturalem; nam Ioan. 21. Petro dicitur: *Cum senueris alius cinget te, & ducet quò tu non vis.* Et 2. Corinth. 5. Paulus ait: *Cupimus nō spoliari, sed superuacuari.* Et tamen quis dixerit peccasse eundem Paulum, cum ait: *Cupio dissolui, & esse cum Christo.* Philippen. 1. & S. Ignatium, cum (vt ipse scribit in epistola ad Romanos) summo ardore cuperet à bestiis deuorari.

Denique constat, consilium esse sanctissimum, cum quis inuaditur à latrone, & non potest mortem euadere, nisi latronem occidendo, vt mortem potius oppetat, quàm inferat, etiamsi id maximè videatur contra naturæ inclinationem.

RESPONDEO igitur, duplicem esse hominis inclinationem naturalem; vnā in rem absolutè, & secundum se consideratam; alteram in rem consideratam cum omnibus circumstantiis. Nam si consideres mortem secundum se, morbum, ieiunium, atque alia id genus, naturaliter abhorrebis, at si cōsideres mortem, morbum, & similia, vt materiam patientiæ, vt viam ad cælum, vt occasionem glorificandi Deum, iam incipies affici & appetere. Quia verò posterior propensio sola est verè, ac propriè humana, quia est secundum



rectum iudicium rationis, ideo contra illam facere peccatum est. Est enim id pugnare cum ratione, atque ideo cum ipso iure naturæ, & cum Deo auctore naturæ.

Porro cœlibatus etsi est contra priorem inclinationem, non tamen contra posteriorem, immò conformis est posteriori illi inclinationi, quia est medium ad purius, & feruentius amandum Deum. At occisio sui ipsius est contra utramque inclinationem, nisi fortè à Deo præcipiatur, idcirco nunquam licet semetipsum occidere, nisi Deus iubeat; nam si Deus iubeat, poterit appeti ut mediū ad maius bonum, id est, ad implendam Dei voluntatem, & gratiam eius promerendam: *Melior est enim misericordia Domini super Scitis*, Psalm. 62. At extra hunc casum, nunquam potest esse medium ad maius bonum; nam bona omnia vel corporalia, vel spiritalia sunt; corporaliū fundamentum est vita, idcirco fieri non potest, ut occisio sit medium ad maius bonum corporale. spiritalia verò sunt actus liberi arbitrij, proinde à voluntate pendent, nec est ullum eiusmodi bonum, quod non possit haberi sine sui ipsius occisione.

20 SEXTA ratio. Virginitas non est virtus, sed res omnino  
 » indifferens; nam virtutes per se expetuntur, virginitas autem  
 » non est bona, nec appetibilis, nisi relata ad aliud, id est, ad  
 » Deum purius orandum & colendum. Præterea virtutibus  
 » omnibus contraria sunt vitia, virginitati autem nullam op-  
 » ponitur vitium, non igitur virginitas materia voti esse po-  
 » test

RESPONDEO, virginitatem absolutè consideratam, ut  
 solū dicit negationem quandam coniugij, non esse virtu-  
 tem: sed eandem, ut est perfecta quædam refractio concu-  
 30 piscentiæ, & proinde medium ad melius, ac purius Deum  
 colendum, omnino esse virtutem. immò ut S. FULGENTIUS  
 notavit in epist. 3. cap. 4. adeo virtus est virginitas, ut à virtu-  
 te nomen acceperit; quomodo etiam mortem appetere ab-  
 solutè non est virtus, tamen mortem appetere ad fidem, vel  
 patriam defendendam, virtus est fortitudinis. Verum est ta-  
 men virginitatem antequam Deo per votum consecratur  
 non esse virtutem specialem, & ideo non habere contrarium  
 vitium. Est enim, si absque voto consideretur, actus quidam  
 perfectus, & heroicus temperantiæ, & idcirco non vitium il-  
 li opponitur, sed aliquid minus bonum. Vicia enim oppo-  
 nuntur



nuntur actibus necessariis virtutum, nō autem actibus perfectis, & heroicis. Vide S. Thomam in 2.2. q. 152.

SEPTIMA ratio est Erasmi in colloquio Proci & Puel-  
la, ubi petulantissimè loquitur; Pomarium melius est, quod  
post flores fructus parturit; vitis melior, quæ amplexa pa-  
lum, vel vlmum, vis grauida est, quàm quæ humi iacens cō-  
putrescit; rosa felicior, quæ manu hominis atteritur, dele-  
ctans interim oculos, & nares, quàm quæ senescit in frutice;  
vinum felicius, quod bibitur antequam ace scat, ex quibus  
illud efficere contendit, vt coniugium melius, magisquē  
expetendum videatur, quàm cœlibatus. Illud etiam addit,  
vnā virginem si nubat, posse multas virgines parere, proin-  
de si virginitas placet, non posse nuptias virginum displice-  
re, quæ hoc ipsum, quod tantopere placet, cum sœnore red-  
dunt.

Sed eiusmodi argumenta talia sunt, qualia equi & canes,  
siloqui possent, proponerent, quippe qui nihil melius noue-  
runt corporis deliciis. at Christianos qualescunque, quibus  
regnum cœlorum patria est, vita præsens exilium, auctor  
Christus virgo de virgine, & virginitatis prædicator, mirum  
est potuisse eo modo argumentari; nam virgo Christiana  
non habet flores sine fructibus, immò fructum habet cen-  
tesimum, cum coniugium non habeat nisi tricesimum, vt  
Patres colligunt ex cap. 13. Matth. vnde S. A VG VSTINVS li-  
bro de sancta virginitate, capite 8. *Nulla, inquit, carnis facun-  
ditas sanctæ Virginitati, etiam carnis, potest comparari.* Et S.  
AMBR OSI VS libro 1. de virginibus: *Conferamus, inquit, bona  
mulierum cum Virginis Virginitate, iacet licet fecundo se mulier  
nobilis partu, &c.* Et S. quoque HIERONYMVS in epist. ad  
Demetriadem, & in epist. 22. ad Eustochium, idem argumen-  
tum fusè diluit.

Sed Erasmus non habuit fortè oculos, quibus fructus vir-  
ginum conspici possunt: *Animalis enim homo non percipit ea  
quæ sunt spiritus*, 1. Corint. 2. Pariratione non est virgo Chri-  
stiana vitis humi iacens, & putrescens, sed est vlmō nobilissi-  
mæ adhærens, Christo desponsa, eiusque spiritu grauida, vt  
pulchrè docet sanctus Fulgentius in epistola 3. ad Probam,  
cap. 4.

Denique, virgo Christiana non est rosa in frutice scæ-  
scens, aut vinum ace scens, sed perpetuò florens, & vicens.  
Con-



346 Cap. XXXIII. De Monachis. Lib. II.

Coniugia enim marcescunt, & acescunt, quippe quæ finem habitura sunt: virginitatis autem flos hic incipit, & in futura vita perficitur, ubi nemo nubit, sed omnes sunt velut Angeli Dei.

Porro, quod addit Erasmus, ex nuptiis virgines nasci, eleganter refellit S. AUGUSTINVS libro de sancta virginitate, cap. 10. Nam, inquit, ne illo quidem debent continentium meritis se conferre coniugia, quod ex eis Virgines procreantur. Hoc enim non coniugij bonum est, sed natura, qua sic diuinitus instituta est, ut quolibet humano viriusque sexus concubitu sine ordinato, & honesto, siue turpi, & illicito, nulla fœmina, nisi Virgo nascatur. Ita fit ut Virgo nascatur etiam de stupro sacra autem Virgo nec de coniugio. Hæc ille.

CAPVT XXXIII.

Soluitur obiectio quinta ex Conciliis.

**Q**UIBICVNT aduersarij quoque testimonia Conciliorum & Patrum, quæ tamen nullo negotio solui poterunt. PRIMVM testimonium est Concilij Antycyrani, canone 19. Quotquot Virginitatem pollicitam prauaricati sunt, professione contempta, inter bigamos habeantur. Hoc testimonium profert Ioannes Brentius in prolegomenis contra Petrum à Soto, ut inde probet Matrimonium post votum non esse peccatum, cum constet digamiam peccatum non esse. Sed malè Ioannes Brentius ratiocinatur; nam Concilium non docet, eos, qui ducunt uxorem post votum, verè esse digamos, sed in pœnam peccati facit eos inhabiles ad sacerdotium, ac si digami essent; ex eo autem quoddam eiusmodi homines à Concilio puniuntur, non potest colligi eos non peccasse, sed contrà potius peccasse; pœna enim culpam sequitur. & cum ipsum Concilium dicat eos prauaricatos esse promissionem, & professionem contempsisse, is tantum dicere poterit eos non peccasse, qui prauaricationem & contemptum peccata esse negare audebit.

At, inquit Petrus Martyr, in libro de cœlibatu, & votis, Concilium hoc nõ diremit Matrimonium contractum post votum, nec alia pœna affecit, quàm ut digamia reputaretur.

RESPONDEO, Concilium non diremisse Matrimonium, quia



quia nullum erat quod dirimi posset. nec enim Concilium dicit eos Matrimonium contraxisse, sed solum præuarcatos promissionem suam, quod tam fornicatione quam nuptiis fieri potuit. quodd si etiam nuptiæ fuerint veræ illorum, & propterea, nec dirimendæ, quod etiam nunc seruamus in iis, qui post votum simplex vxorem ducunt, an propterea licuit ex Concilij sententia iis, qui vouerunt continentiam, nuptiis copulari? quàm multa malè sunt, quæ tamen facta tenent? certè si nullum esset peccatum ita copulari, non punirentur à Concilio, qui id fecerunt, siquidem apud aduersarios, vbi nullum est crimen votum continentia violare, non solum non arcentur à ministerio qui ex Monachis mariti facti sunt, sed ipsi propè soli vocantur ad ministerium.

SECUNDVM testimonium est Concilij Gangrensis, canone 9. & 10. vbi damnantur, qui continentiam professi nuptias execrantur, aut despiciunt coniugatos.

RESPONDEO, Ioannem Brentium in Confessione VVirembergensi capite de votis, & Petrum Martyrem in libro de coelibatu & votis, dum hos Canones proferunt impudentiam suam ostendere. Nihil enim isti Canones docent, nisi nuptias non esse malas, licet votum continentia sit melius; & continentia professores humiles esse debere, non superbos. Quod ipsum fusè docet S. Augustinus in vltimis aliquot capitibus libri de sancta virginitate, sed Canones ipsos audiamus. Canon IX. *Si quis vel Virginitatem, vel continentiam professus tanquam abominabiles nuptias indicat, & non propter hoc solum, quod continentia, & Virginitatis bonum sanctum propositum est, anathema sit.* Canon X. *Si quis propter Deum Virginitatem professus, in coniugio positos per arrogantiam & ituperauerit, anathema sit.* Quid hic legitur, quod non Catholici omnes libentissimè audiamus & amplectamur?

TERTIVM testimonium est Concilij Chalcedonenfis, can. 16. *Si qua se Virgo Deo dedicauerit, similiter & Monachus, non licere eis iungi nuptiis, si verò inuenti fuerint hoc facientes, manean excommunicati. Statuimus Verò posse in eis fieri humanitatem, si ita probauerit loci Episcopus.*

Ex hoc loco colligit Petrus Martyr potuisse permitti ab Episcopo connubia Monachorum, & Sanctimonialium. At non hoc dicit Canon, immò apertè negat posse cōiungi eiusmodi personas. Humanitas porro illa, de qua loquitur Concilium,



cilium, non est indulgentia nuptiarum, sed absolutio ab excommunicatione. Cum enim statuat Concilium perpetuum anathema in eiusmodi apostatas, permittit tamen, ut Episcopus etiam ante mortis articulum anathema tollat, si nimirum illi ad poenitentiam venerint, & à malè contracto connubio discesserint, ut exponit Concilium Triburense, can. 23. Nunc ad Patrum testimonia veniamus, quæ à Brenzio, Caluino, Illyrico, sed potissimum à Petro Martyre collecta sunt.

10

## CAPVT XXXIV.

*Soluitur obiectio sexta ex Patribus.*



RMVS ex Patribus est Petrus cum omnibus Apostolis, excepto Ioanne: Sumemus, inquit Petrus Martyr, principium ab Apostolis; nam quodammodo sunt Patres Patrum. Illi autem quamuis essent sanctissimi, tamen non aspernati sunt coniugia; immò si credimus Ambrosio, omnes habuerunt uxores præter Ioannem & Paulum.

20 Et infra: Quanquam ita Ambrosium cito hoc loco, non ut prorsus concedam in eam sententiam: Unde enim sciebat ille, Paulum non habuisse uxorem?

RESPONDEO, qui ex Apostolis uxorem habuerint, & qui non habuerint, ex Scripturis certò constare non posse, excepto solo Petro, cuius focum legimus Matth. 8. Ioannem tamen virginem fuisse nemo dubitauit vnquam. Idem de Paulo, & Apostolis ceteris probabiliter docet Hieronymus lib. 1. contra Iovinianum; sed quidquid de hoc sit, illud nobis satis est, & Petrum, & Apostolos omnes, post vocationem à Christo, continentes fuisse: Sed, inquit Petrus Martyr, solent dicere, Apostolos postquam venissent ad Christum, repudiasse quodammodo uxores, & ab illarum consortio abstinuisse. Quis ista dicunt, sua tantum dicunt, nihil probant; immò absurde, & sine ratione dicunt; nam nisi intercessisset adulterium, nullo modo licuit discedere ab uxoribus. Nec Christus venit in mundum facere diuortia, sed potius monet, ut quod Deus coniunxit, homo non separet. Hæc ille. Nos verò non dicimus ab Apostolis repudiatas uxores, quod Christus prohibet Matth. 19. sed ex consensu abstinuisse à commercio coniugali. Nec enim S. Ioseph ideo repudiasse dicendus est beatissimam coniugem suam, quòd



quòdeam nunquam cognouerit. non enim carnalis copula, sed consensio animorum coniugium facit.

PORRO Apostolos omnes post vocationem renunciaſſe officio coniugali, non tantum dicimus, sed etiam probamus; nam cum Petrus dixiſſet Matth. 19. *Eccenost reliquimus omnia*, Dominus addidit: *Omnis, qui reliquerit domum, aut parentes, aut fratres, aut uxorem, &c. centuplum accipiet, & vitam æternam possidebit.* Vbi satis apertè inter omnia illa, quæ legimus Apostolos reliquiſſe, videmus etiam coniuges numerari. quod si relinqui non potest vxor, quin repudietur, accusetur, igitur Petrus Martyr Christum, qui præmium tam grande vxores relinquentibus pollicetur. Adde, quod non nos primi docemus, Apostolos cælibes post vocationem vixiſſe. docuit id Clemens Alexandrinus lib. 3. Stromatum, docuit S. Hieronymus lib. 1. in Iovinianum. docuerunt alij ferè omnes, necyllus Catholicorum vnquam contradixit.

SECUNDO loco ponit Petrus Martyr Ignatium, qui in epistola ad Philadelphienses dicit, non eſſe detrahendum nuptiis, quod Patriarchæ, Prophetæ & Apostoli mariti fuerunt. RESPONDEO, de Apostolis iam diximus, eos habuiſſe vxores, sed post vocationem mutaſſe illas in forores, vt Clemens Alexandrinus loquitur. Patriarchæ & Prophetæ temporè, & statui legis veteris ſeruiebant. Quanquam, vt nonnulli Prophetæ, vt Iſaias & Ezechiel, ex èplo docuerunt non eſſe detrahendū nuptiis, vt rectè Ignatius monet, ſic alij itè Prophetæ, vt Helias & Hieremias exemplum continentia præbuerunt.

TERTIO ponit Iuſtinum, qui in Apologia ſecunda meminit continentia, sed non meminit voti. RESPONDEO, quid hoc ad rem? num ideo vouere non licet, quia Iuſtinus non meminit voti?

QUARTO ponit Dionyſium Corinthium, qui in epistola ad Gnoſios, teſte Eufebio lib. 4. hiſt. cap. 23, monet Pinytum Episcopum Gnoſiorum, ne compellat fratres ad ſeruandam continentiam. RESPONDEO, quis noſtrum contradicit? ſed num quia non licet cogere fratres ad continentiam, non licebit etiam ſponte illam ſuſcipere?

QUINTO proferit Irenæum, qui lib. 1. cap. 9. meminit vxoris Diaconi cuiuſdam. & capit. 31. dicit, Tatianum hæreſiaricham equaſſe Matrimonium ſcortationi. Addit Petrus Martyr: *Et quid aliud noſtri faciunt aduerſarij? immò ſi Matrimo-*



*monium ministrorum statuunt esse adulterio & fornicatione deterius. quid est consentire cum Tatiano, si hoc non est?*

RESPONDEO, quid est ineptire, vel potius impudenter mentiri, si hoc non est? num ideo votum continentiae illicitum erit, quia Diaconus quidam uxorem habuit? & unde probas Diaconum illum ab uxore non continuisse post sacrum ordinem susceptum? Porro Tatianus vera & legitima Matrimonia damnabat, & ideo hæreticus erat, nos sacram ministrorum coniugia, non coniugia legitima, sed sacrilegia coniugij nomine tecta esse ostendimus, & ideo reprehendimus. alioqui si Tatianum sectatur quicumque coniugia illegitima non commendat, Tatianum etiam sectari dicitur, qui coniugium parentis cum filia non probauerit. Itaque S. Augustinus, qui Tatiani hæresim optimè nouerat, eamque damnauerat in libro de hæresibus, cap. 25. idem tamen coniugia, quæ post votum contrahuntur, peiora adulteriis esse affirmat in libro de bono viduitatis, cap. 11.

Sexto loco profert Clementem Alexandrinum, qui in primo libro pædagogi, cap. 10. dicit, Christianos debere aut Matrimonium contrahere, aut purè viuere, si non contrahant. Hinc enim colligit Petrus Martyr eos, qui non purè viuunt ex Monachis & Sacerdotibus, debere Matrimonium contrahere. At cur non potius colligit, debere eos mutare vitam, & mores emendare, & sic purè, & castè viuere, & votum suum Domino reddere? Sed, inquit Martyr, idem Clementis in lib. 3. Stromatum dicit, Paulū habuisse uxorem, Petrum, ac Philippum liberos genuisse.

RESPONDEO, sed ibidem dicit, ante vocationem ad Apostolum ista facta esse, postea verò ab Apostolis uxores habitas loco sororum, non loco vxorum. Attegit deinde longissimam disputationem eiusdem Clementis contra eos, qui nuptias damnant. Sed omnia sunt ægyptiæ, neque aliud probant, nisi inopiam, quæ ipse premitur testimoniorum, quæ ad rem faciant.

SEPTIMO transit ad Tertullianum, ac primùm fateri multa in Tertulliano esse pro Papistis, sed non esse fidem habendam Tertulliano, quod hæreticus fuerit, & secundas nuptias prohibuerit. Sed facilè hoc refellitur; nam etiam si hæreticus fuerit, non tamen vnquam à veteribus reprehenditur, quod votum continentiae asseruerit, sed ob alios



lios errores, quos S. Augustinus notauit libro de hæresibus, cap. 86.

Deinde Petrus Martyr mentiri audet, in libro de velandis virginibus Tertullianum tractare, an solæ nuptæ debeant velato capite ingredi Ecclesiam, an etiam virginēs, non autem loqui de velo, seu habitu sacrarum virginum. Sed adeo manifestè mentitur, vt non sit opus, nisi librum ipsum legere; scribit enim aduersus virgines seculares, quæ cum nudo capite incederent, ægrè ferebant, virgines sacras rectas, & velatas procedere, & adferebant in argumentum, quod Apostolus 1. Corinth. 11. mulieres velari iusserit, de virginibus autem nihil dixerit: *Ambiunt*, inquit, *Virgines hominum aduersus Virgines Dei*. Et infra: *Scandaliz. amur*, inquit, *quia à aliter aliæ incedunt, & malunt scandalizari, quàm prouocari*. Et infra: *O sacrilega manus, quæ dicatum Deo habitum detrahere potuerunt*. Et infra: *Nupsisti Christo, illi tradidisti carnem tuam, illi sponsasti maturitatem tuam, incede secundum sponsæ voluntatem. Christus est, qui & alienas sponsas & maritas velari iubet, & tuque multò magis suas*. Denique liber sancti Cypriani de habitu virginum, ex libro Tertulliani expressus, satis apertè docet, de quibus virginibus Tertullianus loquitur.

Sed habet Petrus Martyr ex Tertulliano insigne testimonium contra nos; nam in libro de Monogamia, tractans locum illum, 1. Timoth. 5. *Volo iuniores nubere*, ita loquitur; *Ad eas dirigit, quales suprà denotat, iuenculas viduas, quæ in viduitate deprehensa, & aliquandiu affectata, postquam in delictis habuerunt Christum, nubere volunt, habentes iudicium, quod primam fidem resciderunt, illam videlicet, à qua in viduitate inueniunt, & professæ eam, non perseuerant*. Propter quod *vult eas nubere, ne primam fidem susceptæ viduitatis postea rescindant*. Ex his verbis, inquit Martyr, *alterutrum horum omnino intelligendum est, Vel Paulum velle eas nubere, quamuis Souissent, idq; magis Tertullianus videtur sentire, Vel si non de viduis, quæ professæ sint, sed de similibus agatur, tamen Paulū eas quoq; velle nubere, ne postea fidem datam rescindant*. Hæc quoq; sententia contra aduersarios nostros facit; nam illi iuenculas, & pene puellas permittunt Souere, & in periculum incurrere.

RESPONDEO, priorem sensum nullo modo admittunt verba Tertulliani. Illa enim verba: *Propter quod vult eas nubere*,



bere, ne primam fidem suscepta & iudicata postea rescindant, & peritissimè monent eum loqui de illis, quæ nondum vouerunt; nam quæ semel vouerunt, & fidem primam resciderunt, quomodo possunt nubere, ne primam fidem rescindant, cum iam eam resciderint? & cum ipsum nubere, sit primam fidem rescindere? Tertullianus enim interpretatur primam fidem rescindere, non perseuerare in professione viduitatis.

At, inquit Martyr, Paulus dicens, Solo iuniores nubere, dirigat sermonem ad eas quæ primam fidem irritam fecerunt, & Tertullianus dicit; Cuius igitur Apostolus, ex interpretatione Tertulliani, eas nubere quæ iam vouerant. RESPONDEO, dirigere sermonem ad eas quæ vouerant, nihil aliud est, quàm eas respicere, & ex earum ruina aliis prospicere de remedio, ut verba sequentia apertissimè docent. Quod verò attinet ad posteriorem sensum, fateamur velle Apostolum iuuenulas nubere, sed ut supra ex Patribus ostendimus, non omnes iuuenulas, sed eas tantum, quæ continere nolunt. Omitto hæc mendacia reliqua Petri Martyris, cum dicit, nos Matrimonium impurum, & spurcum appellare, & alia id genus, quorum Deo rationem in iudicio reddet.

OCTAVO loco ponit Origenem, in cuius libris nihil inuenit pro se, nisi quod loca quædam pro se facere interpretatur, quia non faciant contra se, nimirum ubi Origenes non vituperat nuptias, & multò magis, ubi aliquid dicit in laudem nuptiarum. Ita profert multa ex commentariis Origenis in caput 12. ad Romanos, & in cap. 19. & 23. Matthæi. Sed nihil omnino est quod ad rem faciat; nos enim nuptias longè magis honoramus, quàm aduersarij faciant, cum Sacramentum Christi esse doceamus, quod illi peritissimè negant, & ciuilem contractum solum in nuptiis agnoscant.

NONO venit ad Cyprianum, qui lib. I. epist. II. ad Pomponium ita scribit de quibusdam virginibus, quæ postea quam se Deo dicauerant, cum masculis cubare repertæ fuerant: Quod si ex fide se Christo dicauerunt, pudicæ, & castæ sine ulla fabula perseuerent, ita fortes, & stabiles præmium virginum atque expectent; si autem perseuerare nolunt, vel non possunt, melius est, ut nubant, quàm in ignem delictis suis cadant.

Hunc locum non Petrus Martyr solum, sed etiam Caluinus,



tus, Brentius, aliq; ex aduersariis obiecerunt. Refellit quod  
que Petrus Martyr aliquot solutiones parum congruas, vt  
ostenderet argumentum planè esse insolubile. Sed responsio  
plana, & facilis in promptu est. Sanctus enim Cyprianus eo  
modo loquitur, quo S. Paulus 1. Timoth. 5. nimirum occasio-  
ne quarundam virginum, quæ parum honestè se gerebant  
post votum continentia, monet alias, vt si non habent fir-  
mum propositum perseuerandi, non voucant, sed nubant.  
Hic igitur sensus est verborum Cypriani: *Quod si ex fide se*  
*Christo dicauerunt, pudicè & castè sine ulla fabula perseuerent, id*  
*si autem perseuerare nolunt, aut non possunt, id est, si dū de vo-*  
*to faciendo deliberant, cogitant se non perseueraturas, me-*  
*lius est, vt nubant, quàm in ignem delictis suis cadant,*

Esse autem hunc sensum eorum verborum probari po-  
test. PRIMO, quia S. Cyprianus virginibus illis sub disun-  
tione concedit, vt nubant, si perseuerare nolunt, aut non  
possunt. Proinde concedit, vt nubant, si tantum nolint per-  
seuerare, etiamsi alioqui possint. At post votum licitum esse  
nubere ei, qui perseuerare potest, ne Caluinus quidem, aut  
Petrus Martyr affirmaret.

SECUNDO, de sacris virginibus in eadem epistola idem  
Cyprianus dicit, eas grauissimè peccare si alicui viro misce-  
antur; & non mariti, sed Christi adulteras esse: *Si superuenies,*  
*inquit, maritus sponsam suam iacentem cum altero videat, non*  
*me indignatur, & fremit, & per zeli dolorem fortassis & gladium*  
*in manu sumit? quid Christus Dominus & iudex noster, cum vir-*  
*ginem suam sibi dscatam, & sanctitati sue destinatā iacere cum*  
*altero cernit, quàm indignatur, & irascitur? & quas pœnas ince-*  
*stis eiusmodi coniunctionibus comminatur?* Hæc ille. Non er-  
go Cyprianus potuit eiusmodi virginibus Deo dicatis no-  
ptias permittere, nisi incestam coniunctionem & manifestā  
Dei offensionem, seipso teste, permittere vellet. Quis verò  
credat tam stultum Cyprianum fuisse, vt sciens & prudens  
grauissima crimina permitteret?

TERTIO, de virginibus Deo dicatis, quæ iam lapsæ fuerant,  
in eadem epistola iubet vt separentur, idq; aliquoties repetit,  
& ne semel quidem admonet, posse eas cum stupratoribus  
suis, aut cum aliis inire Matrimonium: *Quod si, inquit, obsti-*  
*nata perseuerant, nec se ab invicem separant, seruant se eorum hæ-*  
*sua impudica obstinatione nunquam a nobis admittent. Necesse est*  
*posse, &c.*



354 Cap. XXXIV. De Monachis. Lib. II.

posse. &c. Igitur cū suprà monebat, vt nuberent, non de iis loquebatur, quæ iam vouerant, sed de iis, quæ adhuc sui iuris erant.

Virget Petrus Martyr illud verbum: *Aui non possunt*, quasi aliqua sint quæ absolutè non possint continere, etiam si velint. Sed hoc suprà explicatum est. Sic enim Cyprianus loquitur, quomodo Christus ipse, cū ait, qui potest capere capiat. Illi enim dicuntur velle, & non posse, qui desiderant continere, sed non plena, & perfecta voluntate. Proinde de 10 sunt illis vires efficaces ad continendum, quas tamen vires, si vellet in oratione laborare, non difficulter acquirerent. Alium locum ex libro de singularitate Clericorum, in disputatione de cœlibatu sacerdotum explicauimus.

DECIMO ponit Eusebium Cæsariensem, ex quo tamen nihil adfert nisi coniecturam quandam, quod consecratio virginum solennis cœperit tempore Constantini Imperatoris, antea verò non fuerit. Coniectura hæc est, quod lib. 4. de vita Constantini, posteaquam narrauerat Constantini decreto abrogatam fuisse legem veterem, quæ priuabat hæc- 20 ditare eos, qui liberos non habebant, continuò subiecerit Eusebius, mulieres ad perpetuam virginitatem se Deo consecrasse, necnon ad sacerdotium Dei. AT HÆC coniectura nititur manifesto mendacio. Non enim Eusebius subiecit de virginum cōsecratione post narrationem de abrogata lege, sed præmittit tanquam rationem legis abrogatæ. Dicit enim, Constantinum legem illam abrogasse, quia multi viri, multæque fœminæ liberis carebant, non ob impotentiam generandi, sed quia ob immensum amorem numinis, perpetuum cœlibatum profitebantur.

30 VNDECIMO loco Athanasium ponit, sed ne syllabam quidem vnā pro se inuenire potuit. Idcirco solum attulit loca quædam contra se, & respondit, non esse Athanasium audiendum, non esse tolerandum, nimis multum sibi sumpsisse hunc patrem. Centuriatores Centuria 4. cap. 4. col. 267. & cap. 6. col. 466. & ca. 7. col. 486. proferunt vnum Athanasij testimonium ex epistola ad Dracontium, vbi dicit, se nouisse Episcopos & Monachos, qui filios genuerint.

RESPONDEO, nos etiam nouisse permultos Monachos, qui simul etiam Episcopi dici volebant, & filios genuerunt, nimirum Lutherum, Bucerum, Martyrem, Ochinum, Oecolampa-



lampadium, vVigandum, & alios. Athanasius enim eo loco reprehendit Episcopos & Monachos perditè viuentes, addicit, nonnullos reperiri, qui filios genuerint; nam alioqui id illicitum fuisse ex sententia Athanasij, patet ex cohortatione ad Monachos, vbi inter alia impedimenta monasticæ vitæ, ponit, alligatum esse vxori, aut filiis impeditum.

DVODECIMO loco ponit Basilium, quem ab eruditione, & doctrina magnum appellatum fuisse dicit. Profert autem vnum testimonium ex libro de virginitate, vbi Basilus arguit sacras virgines, quæ perditè & flagitiosè viuunt, ac dicit, longè esse præstabilius si viros habeant, illisque subiectæ sint, & officium coniugale, vt decet, exerceant: *Nihil*, inquit Martyr, *pro nobis dici potuit aptius.*

RESPONDEO, non monet Basilus, vt sacræ virgines, quæ flagitiosè viuunt, relictæ professione nubant, sed dicit, melius fuisse futurum, si nupissent antequam vouerent. Melius enim est in statu humiliore saluari, quàm in sublimi damnari. Id ita esse, planum est tum ex illis verbis: *Nam si abtecto Viri ugo, & ad Vitam, ad quam conseruanda domus, & procreandum liberorum gratia, facta est inutilis, & professæ Virginitatis pudenda futura est: tota res damni plena est. Et longè præstabilius esset, ipsam viro coniunctam ad Vitam gubernare, &c.* Vbi vides nuptias suaderi, non ei, quæ vouit, sed ei, quæ professæ virginitati pudenda futura est: tum ex eodem libro, vbi Basilivs fulissimè probat, sacras virgines non posse vllò modo nubere: *Virginitatem*, inquit, *professæ, deinde à carnis solutibus incitata, scortationis peccatum nuptiarum nomine seculari solunt, non ignorantes, opinor, etiam si ignorantiam simulant, quod quæ sponsi sui dexteram præterit, neq; huius est sponsa, quem illegitimè reliquit, neq; illius, cui seipsam per affinitatem adiunxit, iuxta leges vxor reperiri potest.* Et infra: *Ne decipiat seipsam, quod peccatum ipsi pro nuptiis reputabitur.* Et infra: *Non enim locum apud ipsum habebit nuptiarum prætextus.*

At, inquit Martyr, Basilus cum hæc scripsit, oblitus erat sui. Sed quis credat virum tam admirabilem, qui ab eruditione magni nomen inuenit, in eodem libro tam aperitè secum pugnare, nec potuisse tres paginas scribere, quin obliuisceretur sui? Omitto quæ deinde attexit Martyr in reprehensionem S. Basilij. non enim hîc quærimus, an rectè dixerit, sed an dixerit id, de quo agimus. Quanquam etiam ad refutationem



nem calumniarum, & ratiuncularum Martyris, satis est scire, illum fuisse verè magnum Basilium, istum esse Petrum falso Martyrem appellatum. Adfert aliud testimonium ex q. 15. fusè explicata, sed ad rem non pertinet, & à nobis paulò infra refutabitur in disputatione de votis filiorum inuitis parentibus editis.

DECIMO TERTIO ponit Gregorium Nazianzenum, ex quo nihil adferre potuit contra nos. Tantum adfert multa, quæ dicit pro se facere, quia non faciunt contra se; nimirum  
 12 ubi Nazianzenus scribit nuptias esse bonas. Adfert etiam multa, quæ dicit se non probare, ut quod Nazianzenus dicit virginitatem homines Angelis aggregare, nuptias perturbationis, virginitatem splendoris indicium esse, continentiam in arbitrio positam, ita ut possint continere omnes, qui volunt. Hæc Martyr admittere se non posse dicit, sed non multum refert quid ipse admittat, modò Nazianzenus à Catholicis faciat.

DECIMO QUARTO ponit Hilarium, ex quo vnum duntaxat locum habere potuit, quem nobis obiiceret. In reliquis  
 10 Hilarium reiecit cum ceteris Patribus, qui Papistis nimis aperte fauent. Testimonium igitur contra nos proferit Martyr ex commentario Hilarij in ca. 19. Matth. ubi sic loquitur: *Nobis circa Eunuchos sermo sit & Voluntas; & in vno posuit naturam, in altero necessitatem, & in tercio voluntatem. Naturam in eo qui ita nascitur, necessitatem in eo, qui ita factus est, voluntatem in illo, qui spe regni cælestis talis esse decreuerit, cui nos similes, effici, si tamen possimus, admonet. Ecce, inquit Martyr, non inquit, si tamen velimus, sed si possumus: rationem habens vtrum vniuscusque nostrum.*

30 RESPONDEO, nihil Hilarius addit ad verbum Domini: *Qui potest capere, capiat.* De quo loco satis multa diximus. Neq; negamus habendam esse virium rationem, & eos non debere seipsos castrare ob regnū cælorum, qui nondum vires habere se sentiunt ad continendum, & qui proinde non possunt: tamen addimus, eos, qui vires nondum habent, & modò non possunt, posse tamen per orationem vires acquirere, quibus postmodum poterunt, si voluerint.

Alium locum ex Hilario proferunt Magdeburgenses, Cent. 4. cap. 4. col. 300. ubi postquam posuerunt encomia virginitaris ex Athanasio, ita subiungunt: *Contra hanc super-*  
*stitionem*



Ritiosam opinionem videtur Hilarius in Psalmo 64. loqui; Cernimus nudos Philosophos algere corporibus, ipso etiam coniugiorum & Magistri abstinent, haeretici sicco panis cibo viuunt. Sed quis tandem ociosi huius propositi profectus totum hoc inane, & ridiculum est, & cum ipsis superstitionis causam miserabile. Deo ergo commendata sunt contemptus corporis, castitatis custodia, ieiunij tolerantia. Vota enim tantum Ecclesiastica religionis & ista sunt, quae cum & dignis Deo cautionibus, & proposita in Ecclesia obseruantiae studio probantur.

Ex his verbis Magdeburgenses collegisse videntur, vo. 10. uendum esse corporis contemptum, sed non extremum illum vsque ad nuditatem, & algorem, uendam castitatem, sed coniugalem, non virginalem, uenda ieiunia, sed non ardua illa, quibus nonnulli solo pane viuunt. At non hoc Hilarius dicit, sed monet, continentiam, ieiunia, corporis contemptum, extra Ecclesiam nihil prodesse, multum autem prodesse si in Ecclesia propter Deum suscipiantur, ipsae Deo uoucantur. Explicat enim illa verba Psalmi: Tibi redetur votum in Hierusalem. Et vim facit in illis vocibus: Tibi, &, in Hierusalem, id est, Deo, & in Ecclesia, atque inde super- 10. stitiosa vocat continentiam, & ieiunia Gentilium, quia non Deo; & haereticorum, quia non in Ecclesia offeruntur. Quocirca Petrus Martyr ex hoc loco Hilarij colligit, Hilarium sensisse votum coelibatus debere fieri ad placendum Deo. Sed addit, sibi hanc Hilarij sententiam non probari.

DECIMO QUINTO ponit Epiphanium, ex quo duo testimonia profert, vnum ex lib. de haeresibus, haerel. 48. vbi sic legimus: Nos vero non necessitatem imponimus, verum cum bono consilio admonemus, exhortantes eum qui potest, non autem necessitatem imponimus non potenti, neque reuicimus ipsum a vita. 30.

Ex his verbis arguit Catholicos Petrus Martyr, quod imponant necessitatem coelibatus, quia non admittunt ad sacros ordines nisi coelibes: & rursus, quod dicant omnes posse continere, si velint; quorum vtrumque reprobatur Epiphanius. Sed de hoc posteriore iam saepe diximus, quomodo verum sit quosdam posse, & non posse continere. Nam non possunt, dum non habent donum, & tamen possunt absolute, quia possunt donum petere & habere. Et tamen interim non negamus, quin male faciant, qui vouent eo tempore, quo se donum non habere sentiunt, & peius etiam faciunt,



qui eiusmodi homines impellunt, aut etiam cogunt ad vouendum. De priore autem, manifesta calumnia est; nam et si non admittimus ad sacros ordines, nisi cœlibes, tamen sicut non cogimus ad ordines suspiciendos, ita nec ad cœlibatum profitendum.

Itaque idem ipse Epiphanius, qui neminem vult cogi ad cœlibatum, affirmat non debere admitti ad sacros ordines nisi cœlibes. Sic enim loquitur Epiphanius hæresi 59. *Reuera non suscipit sancta Dei prædicatio post Christi aduentum eos, qui mortua sua uxore secundis nuptiis coniuncti sunt, propter excellentem sacerdotij honorem & dignitatem, sed & adhuc liberos gignentem. Vnius uxoris virum non suscipit, sed eum, qui se ab eund continuit, aut in viduitate vixit, Diaconum, & Presbyterum, & Episcopum, & Hypodiatonum.*

Aliud testimonium proferunt, cum Petrus Martyr, tum etiam Ioannes Brentius ex eodem libro hæresi 61. ubi sic legimus: *Melius est lapsum à cursu palam sibi uxorem sumere secundum legem, & à virginitate multo tempore penitentiam agere, & non quotidie iaculis sauciari.*

10 Respondeo PRIMO, Epiphanius videtur dicere, minus malū esse nubere post votum, quàm occultè, & assidue scortari: non tamen dicit, non esse malum nubere post votum, quod aduersarij dicunt, & de quo nostra controuersia est. Nam in eodem loco paulò antè Epiphanius sic ait: *Sancti Apostoli tradiderunt, peccatum esse post decretam virginitatem conuerri ad nuptias.* Et paulò post, monet illud Pauli: *Si nups-  
rit virgo, non peccauit*, intelligi debere de ea quæ nondum est dicata Deo. Et infra, illud 1. Timoth. 5. *Damnationem habent, quia primam fidem irritam fecerunt*, dicit maximè pertinere  
30 ad virgines, quæ nubere volunt post votum.

Denique ipse etiam Petrus Martyr, fatetur Epiphanium nobiscum facere: *Nunquam, inquit, asserui, Epiphanium facere mecum, quòd dicat esse peccatū Matrimonium inire, post votum editum.* Et infra: *In eo itaq; mecum non conuenit Epiphanius, sed tantum in eo quòd illas nuptias, & veras esse dicat, & licitas.* Hæc ille. Qui manifestè secum pugnat, vel Epiphanium falsò pugnare secum ipsum asserit. Nam peccatum esse nuptias inire post votum, & nuptias esse licitas post votum, pugnantia sunt: vtrumq; tribuit Martyr Epiphanio, qui tamen constanter primum asserit semper, alterum nunquam.

SECUNDO



SECUNDO dico, probabile esse, Epiphanium non voluisse etiam dicere, minus malum esse nubere post votum, quàm scortari, sed hortatum esse ad nuptias eos, qui sine voto perseuerabant in cœlibatu, & tamen flagitiosè viuēbant; nam in eo loco distinguit duo genera virginum. Vnum eorum, qui ex electione, & professione, ac voto virgines erant, & de his sepius repetit, non licere sine grauissimo crimine post dictam Deo virginitatem conuerti ad nuptias. Alterum eorum, qui tempore adolescentiæ non inuenerant commodas nuptias, & ideo quasi necessariò permanserant toto eo tempore cœlibes, deinde cùm iam prouecti essent ætate, erubescēbant conuerti ad nuptias, atq; idcirco cœlibes permanere decreuerant: interim tamen occultè scortabantur, & coram hominibus virgines erant, coram Deo nequaquam. Hos ergo hortatur, vt agant pœnitentiam propter amissam per fornicationem virginitatem, & ad Matrimonium confugiant, magisque timeant Dei condemnationem, quàm hominum iudicia.

Itaque cùm ait Epiphanius: *Melius est vnum peccatum habere, quàm multa*, non vult dicere, melius est peccare semel nubendo post votum, quàm sæpius scortari, sed melius esse post vnā fornicationem transire ad nuptias, quàm cœlibem manendo exponere se periculo assiduè scortandi: & cùm hortatur eum, qui à cursu lapsus est, vt vxorem accipiat, non vocat cursum votum cœlibatus, sed ipsum cœlibatum, quem ille lōgo tempore liberè seruauerat, & postea per fornicationem corruerat. Hoc dico valde esse probabile, tum quia verba Epiphaniij hunc sensum patiuntur, tum etiam quia non est credibile Epiphanium hortari voluisse ad id, quod ipse fatetur esse contra Apostolicas sanctiones.

DECIMO SEXTO proponit Petrus Martyr Chrysostomum, ex quo nihil adfert, nisi laudes nuptiarum, quæ nihil causæ nostræ efficiunt. Sed Magdeburgenses Cent. 5. cap. 4. col. 444. producunt testimonium Chrysostomi ex oratione de cohabitatione regularium mulierum cum viris, vbi hortatur virgines sacras, vt potius apertè nubant, quàm cum viris ita cohabitent: *Nam illas nuptias, inquit, neque Deus condemnat, neq; homines reprehendunt. Honestæ enim res est neminem offendens, neminem laedens. Virginitas autem illa cum viris plusquam stuprum ipsum ab omnibus arguitur.*



At non satis fideliter hæc verba Magdeburgenses reculerunt. Siquidem omiserunt ea, quæ proximè præcedunt; ex quibus apertissimè colligitur, Chrysostomum loqui de nuptiis, quæ votum præcedunt, non de iis, quæ illud sequuntur. Sic ait: *Nam si habere cohabitatores concupiscis, non oportebat Virginitatem eligere, sed ad nuptias transeundum erat. Multo enim melius sic nupsisse, quàm illo modo Virginem profiteri, fuisset, nam illas nuptias neq; Deus condemnat, &c.* Et infra: *Si concupiscunt Virum, & nuptias, quis prohibebat, & libertatem*  
*adimebat, ne hoc facerent?* Hæc ille. Loquitur ergo Chrysostomus, quomodo Cyprianus, & Basilius loquebantur, de eo, quod debuisset fieri ante votum, non de eo, quod post votum fieri debuit. Idem enim Chrysostomus in epist. 6. ad Theodorum, disertè dicit, Matrimonium post vota monastica non Matrimonium, sed quid adulterio peius esse.

Exstat apud Chrysostomum alius locus, qui contra vota obijci potuisset, quamvis eum non legerim ab aliquo aduersariorum notatum fuisse. lib. 3. aduersus vituperatores vitæ monasticæ, sub finem ita loquitur Chrysostomus: *Ergo ne*  
*intempestuè liberos nostros ab deserti commoratione reuocemus.*  
*Verum studij celestis disciplinam in eis solidam permittamus,*  
*aliq; radicibus arbuta firmari, & siue decem annos, siue etiam*  
*viginti nutriendi illi sint in monasterio, non perturbemur.* Ex his verbis colligi videtur non fuisse Monachos votis adstrictos; aut certè vota ipsa libera fuisse Chrysostomi ætate, quandoquidem domum ex monasterio redire poterant.

RESPONDEO, duo erant genera hominum, qui in monasteriis eo tempore vivebant. Alij enim monasticen profitebantur, & hi votis adstricti erant, nec redire poterant ad  
*negotia secularia.* Alij solum ad tempus in monasteriis degebant, non tam vt Monachi fierent, quàm vt in pietate, & virtutibus exercebantur. Hi verò nullis votis alligati erant, & cum volebant abire ex monasterio, poterant. De his ergo posterioribus hoc loco Chrysostomus loquitur. Quod etiam ex eo cognosci potest, quod omnes ciues hortatur, vt ad monasteria filios suos mittant, necnon, vt ipsi etiam, licet coniugati, eò se conferant, ibiq; aliquandiu commorentur. De prioribus loquitur S. Basilius c. 21. constitutionum, vbi multis rationibus ostendit non licere Monacho domum redire. Ipse etiam CHRYSOSTOMVS in epistol. 6. ad Theodorum:



Equidem fleo, inquit, non quod paternarum rerum sollicitudinem geras, sed quod negligendo calcaveris quidquid ante de pretore Christo sponderas. ad hac inhorresco, his angor, & crucior, propter ista formido non immerito. Ut enim non obiscitur desertio militum non militanti; ita is, qui semel ceperit esse miles, cum deseruisse detegitur, poena & ultima dignus iudicatur. Item THEOPHYLACTVS in cap. 8. Matth. Si autem, inquit, illi neque patrem sepelire licuit, & a his, qui monasticen professi ad mundana regrediuntur negotia.

DECIMO SEPTIMO ponit Petrus Martyr Ambrosium, 10 ex quo quia nihil adferre potuit contra vota continentiae, inuicitur in eius libros de virginibus, planè aureos & dulcissimos. Dicit Ambrosium sibi ipsum non constare, quidd nunc doceat virginitatem non imperari, sed consuli; nunc verd ipse idem eam imperet, cum prohibeat virgines Deo lacratas nubere. Sed non intelligit iste falsus Martyr carnali amore cecatus, neq; quid loquatur, neq; de quibus affirmet. Aliud enim est imperare virginitatem, aliud eam exigere ab eo, qui spontè se obligauit. Deniq; libros illos de virginibus, qui tantopere displicent Petro Martyri, S. Hiero- 20 nymus mirificè laudat in epist. 22. ad Eustochium.

DECIMO OCTAVO ponit Hieronymum, ex quo vnum locum profert ex epistol. 8. ad Demetriadem. Deinde acerbè satis reprehendit libros S. Hieronymi aduersus Iouinianum. Sed posteriori obiectioni sat est opponere S. Augustinum, qui in epistol. 29. ad Hieronymum, libros illos contra Iouinianum suauissimam, & præclarissimam disputationem appellat. Necnon ipsum Hieronymum, qui in Apologia pro libris suis contra Iouinianum, eas calumnias, quas nunc Petrus Martyr profert, iam antè refutauit.

Porro testimonium ex epistola ad Demetriadem, hoc est: Sanctum Virginum propositum, & celestis, Angelorumq; familia gloriam, quarundam non bene se agentium nomen infamat, quibus aperte dicendum est, Sit aut nubant, si se non possunt continere, aut contineant si nolunt nubere. HAEC Verba, inquit Martyr, non possunt intelligi de iis qui nondum conuerint. Quia nemo de honestat aliquem ordinem nisi fuerit in illum adscriptus. Nullus turpi Vita infamasset Apostolos, nisi inter eos fuisset annumeratus.

RESPONDEO, loquitur S. Hieronymus de ancillis sacrum virginum nobilium. Erant enim quaedam virgines sacrae, 10



fœminæ nobilissimæ, quæ domi suæ viuebant, & multis ancillis comitatæ procedebant. Sæpe autem fiebat, vt aliquæ ancillarum, quæ quidem nullum habebant votum, parum pudicè viuendo dominas infamarent. Sic enim pergit ibidem Hieronymus post verba citata: *Dignares risu, immo planctu, incedentibus dominis, ancilla virgo procedit ornatioꝝ, & pro nimia consuetudine, quam incompertam videris, dominam suspiceris.* Et paulò superius: *Mores enim & studia dominarum plerumq; ex ancillarum, & comitum moribus indicantur.*

10 Porro ancillas virginum sacrarum non fuisse omnes sacras virgines, perspicuum est ex epist. 22. ad Eustochium, vbi monet virginem Eustochium, vt ex ancillis, si quas habeat eiusdem propositi, eas magis honoret, & ad mensam suam adhibeat, vt earum honor aliarum sit inuitatio. Vbi etiam addit hæc verba de ancillis, quas dixerat inuitandas ad continentiam ex aliarum honore: *Si quæ dissimulat, & seruilem refugit, illi Apostolum legito, melius est nubere, quàm viri.* Vbi docet, esse quidem prouocandas ancillas ad propositum continentia, sed non esse cogendas.

20 Aliud testimonium ex Hieronymo proferri potuisset. sic enim loquitur ad sacram virginem in epistol. 47. de vitando suspecto contubernio: *Si virgo es, quid times diligentem custodiam si corrupta, cur non palam nubis?* Esse autem virginem sacram, quam alloquitur, patet ex verbis illis eiusdem epistolæ: *Non tibi displiceat eius conuersatio, quæ responsio tuo virginem consecrant.*

RESPONDEO, loquitur Hieronymus de quadam virgine, quæ non in monasterio publicè professa fuerat (nam in eadem epistola hortatur eam, vt se conferat ad monasteriũ) 30 sed priuatim vouerat continentiam, vt eo tempore multæ facere solebant; ac deinde relicta matre vidua, iuueni cui-dam adhæserat, & cum eo viuebat non sine suspitione impudicitia. Hanc ergo Hieronymus monet, vt potius apertè nubat, quàm perpetuò cum aliorum scandalo impudicè viuat. Neque ita hoc monet, quasi peccatum non sit, quod aduersarij volunt, nubere post votum, sed quia minus peccatum sit, & prudentia ac ratio doceat, ex duobus malis minus esse eligendum. Quod autem S. Hieronymus malum esse putet, nubere post votum, non negat Petrus Martyr, cum id mil-lies repetat S. Hieronymus lib. 1. contra Iovinianum, & alii in



In locis, sed præterea id ipsum habemus hoc loco; nam postquam dixerat: *Si corrupta es, cur non palam nubis?* Ita subiungit: *Neg.* Verò hoc dico, quod post peccatum tollam penitentiam, ut quod malè cepit, malè perseueret, sed quod desperem in istiusmodi copula diuisionem. Hoc est, non horror ut nubas, quia cupiam in eo, quod malè cepisti fornicando, malè perseueres nubendo, & non potius cupiam penitentiam, & emendationem; sed quia despero te posse separari à viro, ideo malo, quod minus est malum, ut marito adhæreas, non fornicario.

Est autem hoc loco obseruandum, nuptias post votum simplex, de quo Hieronymus loquitur, licet sine peccato contrahi nequeant, tamen veras nuptias esse; & ideo aliquo modo minus malū esse, nubere post votum eiusmodi, quam assiduè fornicari, tum ob fidem coniugij, tum ob prolem legitimam, tum ob alia bona: tamen etiam aliquo modo, ut nos suprà diximus, est maius malum sic nubere, quam fornicari, quia, qui ita nubit, reddit se inhabilem ad votum seruandum, quod non facit, qui fornicatur.

DECIMO NONO ponit Augustinum, quem in primis factetur aduersari sibi, & suis Lutheranis apertissimè, sic enim ait: *Hæc omnia votorum genera, id est, virginum, & diuinarum coniugarum, vult Augustinus & firma, & valida esse, ita ut gravissimè peccent, qui post ea nuncupata, Matrimonia contraxerint.* Et post testimonia allata, subiungit: *Ista Vir Dei scribit, ut homo deceptus.*

At cur non sit verisimilius decipi Martyrem, quam illum virum Dei, qui etiam aduersariis testibus doctissimus atque sanctissimus fuit? Adfert deinde duo loca pro se. VNVM ex libro de sancta virginitate, cap. 40. & 41. vbi Augustinus dicit, impossibile esse, aut valde difficile intelligere cur Deus vni det continentie donum, alteri non det. Ex quo loco colligit Martyr, non posse omnes qui volunt, hoc donum habere. Si enim omnes, qui volunt, haberent donum, non esset difficile intelligere, cur vni daretur, alteri nō daretur. Causa enim esset, quia vnus vult, alius non vult.

ALTERVM testimonium sumit ex libro de bono viduitatis, c. 9. & 10. & ex epist. 70. ad Bonifacium, vbi S. Augustinus docet nuptias post votum ratas esse, ac veras, nec debere dissolui.



TERTIVM testimonium addit Brentius ex libro de bono coniugali, cap. 21. vbi S. Augustinus non audet antepo-  
nere virginitatem S. Ioannis, coniugio Abraham.

Addo ego QVARTVM testimonium ex libro de sancta virginitate, cap. 34. vbi sic loquitur S. Augustinus de virginibus quibusdam sacris: Hæ nubere volunt, & ideo non nubunt, quia impunè nō possunt, quæ melius nuberent, quam virentur.

RESPONDEO ad PRIMVM testimonium, & dico S. Augustinum loqui de dono continentia, non quo fit, vt aliquis continere possit, quod nemini negari dicimus, sed quo fit, vt re ipsa aliquis contineat; quod nō datur nisi iis, quibus Deus dandum esse iudicauerit: neq; est hoc proprium dono continentia, sed commune cum dono fidei, dilectionis, perseverantia, aliisq; donis eiusdem generis. Siquidem omnes iusti verè perseverare possunt, si velint, & tamen impossibile est intelligere, cur Deus vni iusto det perseverantia donum, ita vt re ipsa infallibiliter perseveret, alium cadere sinat, nec det ei eam gratiam, qua efficaciter perseveret. libro de spiritu &  
20 litera, cap. 34. *nam si ad illam profunditatem, inquit, scrutandam quisquam me coarctet, cur vni ita suadeatur, ut persuadeatur, alteri nō item; duo interim occurrunt quæ respondere libeat. O altitudo diuitiarum, & non est iniquitas apud Deum. Sed de his alibi disputandum est.*

Ad SECVNDVM dico, Augustinum voluisse quidem nuptias post votum esse veras nuptias, sed simul asseruisse (quod Petrus Martyr non negat) grauissimè peccare eas, quæ post votum nubunt. sic enim ait libro de bono viduitatis, cap. 9.  
30 *Damnantur tales vidua, non quia conjugalem fidem posterius inierunt, sed quia continentia primam fidem irritam fecerunt. Et cap. 11. Non possum dicere à proposito meliore lapsas, si nupservint, fæminas, adulteria esse, non conjugia, sed planè non dubitauerim dicere, lapsus & ruinas à castitate sanctiore, quæ Souetur Deo, adulteris esse peiores. Hæc ille. Itaque testimonium Augustini nihil efficit contra id, quod nunc defendimus, non licere nubere post votum.*

SED instat Petrus Martyr; In eo saltem contradicitis Augustino, quod Matrimonia Monachorum & Sanctimonialium irrita esse decernitis.

RESPONDEO, conuenit inter Theologos, Matrimonium



nam post votum simplex continentiae illicitum quidem esse, sed tamen ratum, nec dirimendum: post votum solenne nullum esse. sic enim Innocentius I. docet in epist. 2. & post eum Gelasius in epist. 1. ac Toletanum Concilium l. can. 16. Vtrum autem post solenne votum, nullum sit Matrimonium iure diuino, & naturali, an solum iure Ecclesiastico, quaestio est. Nam Albertus, B. Thomas, B. Bonaventura, Richardus, & Durandus in 4. d. 38. & Dominicus à Soto lib. 7. de iustitia, & iure, q. 2. artic. 5. volunt iure diuino, ac naturali Matrimonium nullum esse, si post votum solenne contrahatur. Atque hi dicerent S. Augustinum de voto simplici tantum esse loquutum, non de solenni, vt etiam S. Hieronymum in epist. 47. de vitando suspecto contubernio. Contra verò, S. Basilium in libro de virginitate, & Chrysostomum in epist. 6. ad Theodorum, de voto solenni.

At Scotus & Paludanus in 4. d. 38. & Caietanus in 22. q. 88. art. 7. & omnis schola Iureconsultorum, vt refert Panormitanus in cap. Rursus, qui Clerici vel vouentes, asserunt solo iure Ecclesiastico Matrimonium irritum esse, quod post votum solenne contrahitur. Atque hi Augustinum & Hieronymum, vel de voto simplici loquutos esse dicerent, vel de solenni, secundum regulas iuris diuini, ac naturalis. Decretum enim Ecclesiasticum, quo inhabiles fiunt ad Matrimonium, qui votum habent solenne ad eorum notitiam non peruenisse. vtraque sententia probabilis est, nec est nostra considerationis hoc loco quaestionem istam definire.

Ad TERTIUM dico, S. Augustinum eo loco non conferre virginitatem cum coniugio absolutè, sed virginitatem vnius personae cum coniugio alterius personae. Et si enim absolutè virginitas longè excellat coniugio, vt Augustinus, cum alibi saepe, tum in ipso libro de bono coniugali, cap. 23. affirmat, tamen potest fieri, vt virginitas coniuncta sit in vno homine cum minore caritate, humilitate, aliisque virtutibus, quàm coniugium in altero homine. Idcirco non possumus antepone virginem coniugato, nisi constet in ceteris virtutibus illos esse pares.

Ad QUARTUM dico, S. Augustinum eo modo esse loquutum, quo S. Hieronymus in epistol. 47. nimirum minus malum esse apertè nubere ei, qui simplex votum habet, quàm perpetuò occultè fornicari.



VICESIMO adducit Leonem, ex cuius operibus vnum testimonium profert ex epist. 87. aliâs 85. ad Episcopos Africae, vbi Leo ita loquitur: *Dicente Apostolo, Et inter alias Christianismi regulas is Episcopus ordinetur, quem vnus vxoris vnum fuisse, aut esse constaret, tam sacra semper habita est ista præceptio, Et etiam de muliere sacerdotis eligenda, eadem intelligatur seruanda conditio.* Videtur enim hic dicere S. Leo, non modò posse Episcopum ordinari, qui vxorem habuerit, sed etiam qui habeat; & præterea posse Episcopum, qui non habet vxorem, eam ducere, si voluerit.

Sed ad hoc testimonium iam respondi in disputatione de coelibatu sacerdotum. Admittimus enim Episcopum fieri posse, qui vxorem habeat, modò ab ea se continere deinceps velit. Posse autem Episcopum vxorem ducere, nunquam sensit, vel scripsit S. Leo. siquidem in codicibus emendatioribus non habetur: *De muliere sacerdotis eligenda*, sed, *de muliere sacerdotis eligendi*. Iubet enim S. Leo, vt non solum arceatur a sacerdotio, qui plures vxores habuit, sed etiam is qui vnâ habuit, quæ tamen alterius antea fuerit. Consule epist. 84. ad Anastasium, vbi disertis verbis Leo docet, non modò Episcopum, sed etiam Presbyterum, Diaconum & Subdiaconum debere innuptum esse, vel continentem.

POSTREMO loco adducit Petrus Martyr Gregorium I. qui lib. I. epist. 42. ita scribit: *Ante triennium omnium Ecclesiarum Sicilia Subdiaconi prohibiti fuerunt, Et more Romano Ecclesiæ suis vxoribus non miscerentur, quod mihi durum, atque incompetens* (impium, pro incompetens, Petrus Martyr legere maluit ad rem exaggerandam) *videtur, Et qui vsu continentia non inuenit, neq. castitatem promissit, compellatur à sua vxore separari, atque per hoc, quod absit, in deterius cadat.* Ex his multa deducit Martyr, quæ aduersus Catholicos pugnare videntur.

PRIMUM est, Romanum Pontificem, qui prohibuerat, ne Subdiaconi Siciliae suis vxoribus miscerentur, fecisse contra Nicenam Synodum, quæ Paphnutio auctore decreuit, non esse Clericis prohibendū propriæ vxoris commercium. At fabulam istam Paphnutianam in disputatione de coelibatu sacerdotum euidenter, vt arbitror, confutauimus. Præterea, si vnus Romanus Pontifex præceptum paulò durius, & incompetens, vt S. Gregorius dicit, imposuit, mox illud à successore temperatum fuit,



SECUNDUM est, non fuisse eo tempore votum annexum sacro ordini. Gregorius enim dicit, durum sibi esse visum, ut Subdiaconi castitatem tenere cogerentur, qui non promiserant. At si in Sicilia Subdiaconi non vouebant, num alibi nusquam vouebant? immo abusus erat, quod in Sicilia non vouerent. Atque idcirco ibi S. Gregorius iubet, moneri Episcopos, ut nullum ordinent Subdiaconum, qui non antea continentiam voueat.

TERTIUM est, tyrannidem hanc à Romana Ecclesia coepisse, in Orientali autem seu Græca Ecclesia eiusmodi usum non fuisse. Sed mendacium apertissimum est, non fuisse usum continentiae Subdiaconorum, atque ordinum etiam superiorum in Orientali & Græca Ecclesia ante tempora S. Gregorii. Contrarium enim disertis verbis docet Epiphanius hæresi 59. Hieronymus libro in Vigilant. Leo epist. 84. & alij quos supra citauimus in disputatione de cœlibatu sacerdotum.

QUARTUM est, Gregorium, licet admodum superstitiosum, vidisse tamen hoc esse durum, & alienum à pietate; & moderari conatum, non tamen potuisse, quantum volebat ob canones, & decreta. Sed quod sanctissimum virum admodum superstitiosum Petrus Martyr vocat, facit more suo. quod ait eum vidisse hoc esse alienum à pietate, mentitur, ut solet. Non enim impium, sed incompetens Gregorius esse dixerat prædecessoris sui decretum. quod addit S. Gregorium moderari conatum canones prædecessorum, sed non tantum fecisse quantum voluisset, planè diuinat, vel somniat potius. Gregorius enim, ut summa potestate, ita etiam summa libertate utebatur in iis, quæ ad Dei honorem, & Ecclesiæ utilitatem pertinere videbat.

Adferunt alij quidam adhuc vnum testimonium ex Gelasio Papa. Is enim epist. 1. ad Episcopos Lucaniæ, cap. 23. de viduis quæ continentiam vouerant loquens, ait: *Nos talibus nullum laqueum debemus iniicere, sed solum adhortationes præmij semper inter, pœnasq; proponere diuini iudicij, & si nostra sit absolutio a conscientia, & illarum proserationem Deo reddat intentio.* Hæc ille.

RESPONDEO, laqueus, de quo Gelasius loquitur, non est, ut aduersarij credunt, nuptiarum prohibitio iis, quæ vouerant, sed iis, quæ non vouerant; nam antè dixerat Gelasius eas, quæ vouerunt, non posse nubere sine peccato: *Sic ut, inquit,*



quit, si se continere non poterant, secundum Apostolum nullatenus nubere vetabantur: sic habita secum deliberatione promissam Deo pudicitia fidem debent custodire. Vultigitur Gelasius non debere cogi viduas ad vouendum, sed exponenda illis esse, & præmia si voueant, & reddant, & supplicia si voueant, & non reddant.

## CAPVT XXXV.

*Quòd iuniores vouere possint.*

10



SEQUITUR Disputatio QUARTA de iis, qui vota monastica suscipere, ac nuncupare possunt. Quatuor sunt genera personarum, quibus præ ceteris aduersarij negant facultatem huiusmodi vota suscipiendi. Primo, iuniores. Secundo, filii familias inuitis parètib; Tertio, coniuges ex consensu mutuo. Quarto, coniuges ante Matrimonium consummatum, inuito altero coniuge.

De PRIMO, Lutherus libro de votis monasticis ait, non oportere viros admittere ad vota monastica nisi post annum LXX. vel LXXX. Similiter Confess. Augustana, art. 27. conuenitur, quod pueri permittantur fieri religiosi. Caluinus lib. 4. Instit. c. 15. §. 19. dicit olim nefas fuisse annum LX. admittere scæminam ad votum continentia. Martyr in libro de cœlibatu, & votis eandem querimoniam renouat. Probant ex illis verbis 1. Tim. 5. *Adolescentiores viduas denita*, vel ut est in Græco *ὡραία* & reice. & *Volo iuniores nubere, matres familias esse*, &c. possumus addere duos veteres Canones; nam Concilium Romanum sub Syluestro can. 10. prohibet velari Sanctimoniales ante annum LXXII. & B. Gregorius lib. 3. epist. 11. vetat Sanctimoniale velari ante annum LX.

At his non obstantibus dicimus duo. Primo ad vota suscipienda continentie, obedientie, & paupertatis, requiri quidem eam ætatem, in qua sit vsus liberi arbitrij, sed ubi is adfuerit, in quacunque ætate licere talia vota nuncupare. Probatur PRIMO Scriptura. Thren. 3. *Bonum est viro, cum portauerit iugum ab adolescentia sua*. Matt. 19. *Sinise paruulos venire ad me*.

SECUNDO exemplis; nam Ioannes Baptista à pueritia secessit in eremum, Luc. 1. B. Maria adolescentula vouit perpetuam continentiam, ut suprà demonstrauius, B. Antonius, Paulus



Paulus I. Eremita, Hilarion, Benedictus, Bernardus, Franciscus, aliique permulti in adolescentia Monachi facti sunt, ut patet ex Athanasio, Hieronymo, Gregorio, & Bonaventura, in eorum sanctorum vitis. pari ratione omnes ferè sancte virgines, quas Ecclesia publicè colit, adolescentulæ vouerant continentiam, ut Thecla, Agnes, Cecilia, Agata, Lucia, Clara, Catharina, & aliæ propemodum infinitæ.

TERCIO probatur ex Patribus. ATHANASIUS de humanitate verbi, dicit etiam pueros virginatatem profiteri doctos esse à Christo. BASILIUS in questionibus diffusè explicatis, q. 15. disputat in qua etate recipiendi sint homines ad vota monastica. & respondet, in prima etate esse recipiendos pueros ad monasterium, sed non esse admittendos ad professionem, nisi ubi cœperint liberum habere usum rationis. AMBROSIVS li. 3. de virginibus: Non ergo, inquit, etas reiciitur florētior, sed animus examinatur. at certe Theclam non senectus, sed virtus probauit, & hinc quid plura contexat, cum omnis etas habilis Deo perfecta sit. CHRISTO nec mirere in adolescentulis professionem, cum legeris in paruulis passionem. An dubitamus si eum & ad continentiam sequatur adolescentia, quem & ad mortem confitetur infantia?

HIERONYMVS in epistola ad Eustochium de virginatate docet in cœnobiiis fuisse suo tempore homines omnis etatis, pueros, viros, senes. AVGVSTINVS de sancta virginatate, cap. 36. Sed, inquit, respice agmina virginum, puerorum, puellarumq; sanctarum, in Ecclesia tua eruditum est hoc genus, illic tibi a maternis & veribus pullulauit, nomen tuum ad loquendum linguam soluit, nomen tuum velut lac infantia sue suxit infusum, non potest quisquam ex hoc numero dicere, qui prius fui blasphemus, & persecutor. immò etiam quod non insistit, sed tantummodo volentibus arripiendum proposuisti dicens, qui potest capere capiat, arriperunt, & conuerunt, & propter regnum celorum seipsos non quia minatus es, sed quia hortatus es, castrauerunt.

SECUNDO DICIMVS ad professionem publicam expectandam etiam eam etatē, quam leges Ecclesiæ præscribunt, quæ pro temporum, & locorū diuersitate variæ existerunt; nam Concilium Casaraugustanum, cap. vlt. & Agathense can. 13. iubeant expectari annum XL. antequam mulieres publicam professionem emitterent. Concilium autem Carthaginen. 3. can. 4. iubeat expectari annum XXV. quod expositum est in Concilio Mileuit. can. 26. debere intelligi, nisi



aliqua necessitas cogat ante illud tempus virginem velari. B. GREGORIUS lib. I. epist. 48. in insulis ubi est molestior habitatio, iubet, ne recipiatur aliquis ad monasticam professionem ante annum XVIII. ex quo rectè deducunt Canonistæ, in aliis locis posse recipi in minori ætate, nimirum anno XIV. quam ætatem definiunt multi canonēs, vt cap. Ad nostram, & cap. Significatum, extra de regularibus.

Porro Concilium Trull. can. 40. & Concilium Triburi, cap. 24. permittunt professionem etiam ante annum XII. sed  
 20 nostro tempore Concilium Tridentinum sess. 25. cap. 15. statuit professionem non debere fieri ante annum XVI. quam ætatem etiam olim definierat S. Basilius, vt testatur Concilium Trullanum, cap. 40. ex quibus apparet nunquam in Ecclesia fuisse consuetudinem, aut legem, vt expectaretur annus LX. vel LXXX.

Ad ARGUMENTA. Illud Apostoli: *Adolescentiores deuota*, seu reiice, intelligitur à numero earum viduarum, quas Ecclesia alebat, non à voto continentiæ. Solum enim annus LX. annorum quæ seipsas alere non poterant, voluit Apostolus  
 20 stolis nutriri sumptibus Ecclesiæ.

At, inquit Petrus Martyr, si iuniores arcebat Paulus à conuictu earum viduarum, quas alebat Ecclesia propter periculum incontinentiæ, cur non ob eandem causam arcendæ sunt à voto? RESPONDEO, quæ alebantur ab Ecclesia, vouebant etiam continentiam, turpius autem fuisset decere à voto aliquam ex iis, quæ publicè alebatur ab Ecclesia, quàm ex aliis. idcirco nolebat Apostolus recipi iuniores ad numerum earum, quæ ab Ecclesia alebatur. Illis autem verbis: *Volo iuniores nubere*, opponimus aliud, volo, ex 1. Cor. 7.  
 30 *Volo omnes esse sicut me ipsum*, id est, continentes. Cùm enim istæ voluntates contrariæ sint, oportet dicere neutrum adferre præceptum, & absolute quidem Apostolum cupuisse, vt omnes continerent, tamen quia nonnullæ bonum propositum deseruerant, cœpisse optare, vt iuniores quæ non viderentur perseverare, potius nubere, quàm vouerent. Vide quæ de hoc loco diximus suprâ cap. XXX.

Ad illud Concilij Romani dico, PRIMO, locum esse corruptum, & intelligibilem, & fortasse multò minorem annorum numerum debere poni pro LXXII. Dico SECUNDO, loqui Concilium non de omnibus virginibus, sed de illis  
 solum



solum quæ antequam profiterentur, viros petierunt, ut ipsa verba Concilij indicant. illæ enim diutius quàm ceteræ probanda videntur.

Ad Gregorium dico, eum loqui de sola Abbatissa. Sic enim ait: *iuuenculas Abbatisas fieri vehementissimè prohibemus. nullam igitur fraternitas tua, nisi sexagenariam virginem, cuius ætas hoc, atque mores exegerint, velari permittat.*

CAPVT XXXVI.

*Licere filiis ingredi Religionem parentibus inuitis.* 10

**D**E SECUNDO, an videlicet filij inuitis parentibus fieri possint religiosi. Lutherus in libro de votis monasticis dicit, non posse filios, quamuis maxime etatis sint, ingredi religionem sine consensu parentum, si adhuc supersint. idem docent Magdeburgenses Cent. 4. cap. 10. col. 1304. & Cent. 6. cap. 6. col. 354. & Martyr in libro de cœlibatu, & votis. Ratio eorum PRIMA est, quia præceptum de obediendo parentibus, in omni ætate obligat, & sicut non licet vlli vouere, quod non obedit parentibus, ita non licet vouere aliquid eis inuitis. SECUNDO, quia vxor non potest ingredi religionem sine consensu viri, nec seruus sine consensu domini, ergo nec filij sine consensu patris. & confirmatur ex Concilio Gangrensi, cap. 16. *Quicumque filij à parentibus prætextu diuini cultus abscedunt, nec debitam reuerentiam dependunt illis, anathema sint.* Contrarium dicit B. Thomas in 2. 2. q. 88. art. 8. ad 2. & antea idem probauerat exemplo suo, quippe qui inuitis & repugnantibus matre & fratribus ordinem Prædicatorum professus est. 30

Nos breuiter respondemus, licere filiis inuitis parentibus ad religionem transire, duabus seruatis conditionibus. VNA quòd ad annos pubertatis peruenerint. Porro pubertas in viris est anno XIV. vt habemus cap. 1. de regularibus in Sexto; in fœminis anno XII. vt habemus can. puella, 20. q. 2. ALTERA conditio est, vt parentes non sint in tali necessitate, vt sine filiorum auxilio viuere non possint. Tunc enim tenentur ex præcepto Dei, parentibus adesse.

Probatur iam hæc sententia, PRIMO Scripturis, etsi enim hoc Scripturæ disertè non docent, tamen eis valde conforme est,



est, Gen. 12. *Egredere de domo tua, & de cognatione tua, & de domo patris tui.* Deut. 33. *Qui dixit patri suo, & matri suae, Nescio vos: & fratribus suis, Ignoro illos. Hic custodierunt eloquium tuum, & pactum tuum seruauerunt.* Vbi Moses in laudibus Leuitarum ponit, quod parentes, & fratres deseruerint, ut Deo liberius vacarent. Vnde glossa interlinearis exponit, qui dixerunt, nescio vos, patri & matri cursum mentis impredientibus. Item Psal. 44. *Obliuiscere populum tuum, & domum patris tui, & concupiscet rex decorem tuum.* Item Matth. 10. *Qui amat patrem, 10 vel matrem plusquam me, non est me dignus.* Et Luc. 9. non permisit Dominus eum, quem vocabat, ut iret domum ad salutandum, vel ad sepeliendum parentem.

SECUNDO sacris canonibus; nam in Concilio Toletano X, cap. ult. *Parentibus, inquit, filios religioni tradere non amplius, quam & q. ad quartum decimum eorum aetatis annum licentia poterit esse: postea vero, an cum voluntate parentum, an sua deuotionis sit solitarium eorum, erit filijs licitum religionis assumere cultum.* Item 20. q. 2. can. *Puella, qui sumptus est ex Concilio Triburiensi, can. 24. Puella, inquit, si ante duodeci-*  
 20 *mum aetatis annum sponte sua vel amicum sibi sacrum assumpserit, possunt statim parentes vel tutores id factum irritum facere si voluerint. Si vero in fortiori aetate adolescentula, vel adolescens seruire Deo elegerit, non est potestas parentibus prohibenda.* Item cap. Cum virum, de regularibus, Clemens III. loquens de puella nubili: *Tunc, inquit, quia liberum habet arbitrium in electione propositi, parentum sequi non cogitur voluntatem.*

TERTIO, testimoniis Patrum. CHRYSOSTOMVS in fine libri tertij contra vituperat. vitæ monasticæ: *Sin autem, inquit, alloquens parentes, Vos contenderitis, filij quidem si*  
 30 *fuerint egregia virtute pradi, etiam si nolueritis, ad hanc peruenient Philosophiam monasticam, sempiternisq. gaudiis fruuntur: Vos autem infinitos vobis ipsis cruciatus congeretis.* Idem hom. 84. in Ioan. Cum spiritualia, inquit, impediunt parentes, nec agnoscendi quidem sunt. Similia habet in cap. 6. epistolæ ad Ephesios in illud: *Filij obedite parentibus in Domino.* vult enim additum esse, in Domino, quia non debemus eis parere, cum pietatem impediunt.

THEOPHYLACTVS in cap. 19. Ioan. in illud; *Ecce mater tua: Oportet, inquit, quidem parentibus ad pietatem obsequenti-*  
*bus non parere: non obsequentiibus autem omni cura seruire.*



AMBROSIVS lib. 3. de virginitate loquens de illis, quæ inuitis parentibus profitebantur, non arguit ipsas, sed eorum parentes, qui vim facere conabantur; quos dicit esse peiores Gentilibus, quæ filias præmiis ad virginitatem inuitabant: illic præmiis, inquit, reuocatur à nuptiis: hic ad nuptias coartantur iniuriis: illic violentia fit, & capiantur: hic fiet violentia ne profiteantur? & potest esse patientia Sacerdotum, & non vel morte oblata, si ita necesse est, integritatis sacrificium vendicet?

HIERONYMVS in epist. de suspecto contubernio: Si quis, inquit, te corripit, quod sis Christiana, quod sis Virgo, non cures quod matrem deserueris, & in monasterio inter Virgines viueris: talis detractio laus tua est. Item crudelitas ista pietas est, illum enim præfers matri, quem præferre iuberis & anima tua. Idem ad Heliodorum, quæ prima est omnium: Licet, inquit, parulus ex collopendeat nepos, licet sparsa crimine, & scissis vestibus & bebra, quibus te nutrierat mater ostēdat, licet in limine pater iaceat, percalcatoperge patre, siccisq; oculis ad vexillum crucis euola; solum pietatis genus est: an hac re esse crudelem. Idem in vita Malchi testatur, eum, cum à parentibus ad nuptias minis & blanditiis cogeretur, eis inuitis, ad monasterium se contulisse. 20

AVGVSTINVS in epist. 38. ad Letum, qui à matre impediabatur, ne ad vitam perfectam sequeretur: Sed quid, inquit, dicit, aut quid allegari forte decem illos menses, quibus viscera eius onerasti, & dolores parturitionis, ac labores educationis? hoc, hoc interfice verbo salutari, hoc perde matris, & in vitam æternam inuenias eam. Hoc memento, & oderis in ea, si diligis eam, si tyro Christi es, si turris fundamenta posuisti.

Gregorius TYRONICVS in vita Leobardi & Pappule, laudat eos, quod tam ille, quam illa, inuitis parentibus, monasticam professionem susceperint. GREGORIUS homil. 37. in 30 Evangelia, in illud: Qui non odit patrem, &c. Quos, inquit, aduersarios in vita Dei patimur, odiendo & fugiendo nesciamus.

Denique B. BERNARDVS epist. III. quam scribit nomine Helie Monachi ad parentes eius: Sola, inquit, causa, qua non licet obedire parentibus, Deus est. Ipse enim dicit, qui amat patrem, aut matrem plusquam me, non est me dignus. Si verè me, & boni, & pii parentes diligitis, quid me Patri omnium Deo placere satagentem inquietatis, & ab eius seruitio, cui seruire regnare est, retrahere tentatis? Seruum nunc cognosco, quia inimici hominum



*domestici eius: in hoc vobis obedire non debeo, in hoc non agnosco vos parentes, sed hostes. Si diligeretis me, gauderetis utique, qui vado ad meum atque vestrum, immò vniuersorum Patrem: alioqui quid mihi & vobis? quid à vobis habeo, nisi peccatum & misericordiam, &c.*

QUARTO, probatur ratione B. Ambrosij libro de virginibus: *Cui licet, inquit, maritum eligere, cur non licet Deum præferre?* At licet filiis, parentibus inuitis, Matrimonium contrahere, cur non etiam liceat iisdem inuitis continentiam profiteri? Præterea licet viro, vxore inuita, ad religionem transire, quando Matrimonium de presenti quidem contractum erat, sed nondum consummatum, vt habemus cap. Verum, & cap. Ex publico, de conuersione coniugatorum, ergo multò magis licebit inuito patre, Præterea quilibet ingenuus post annos pubertatis est iuris sui, quantum ad ea, quæ ad personam & statum suum pertinent. In hoc enim differunt serui à liberis. Denique, magis obediendum est Deo, quàm hominibus, Actor. 5. Deus autem consulit perfectam vitam, Matth. 19. omnibus in genere, & in particulari interna inspiratione vocat quosdam; ergo si parentes resistant, audiendi non sunt.

Neq; argumenta in contrarium vim vllam habent. PRIMVM est, Deus iubet obedire parentibus, & eos honorare, Ephes. 6.

RESPONDEO, parentibus duo à filiis deberi, obedientiam, & honorẽ, id est, temporalia subsidia. Quantum ad primum, dico ex Chrysostomi, Theophylacti, Hieronymi, & aliorum expositione in eum locum, ideo Apostolum addidisse, *in Domino*, vt intelligamus, nõ esse eis obediendum, nisi in iis, quæ non impediunt pietatem. Quantum ad alterum, dico, præceptum illud, vt alia omnia affirmatiua, non obligare, nisi in casu necessitatis, cum videlicet pater sine filij opera viuere non potest. Si enim vel diues sit, vel habeat alios, à quibus alatur, filius non tenetur ei adesse, vt expressè docet Luc. 9. Dominus cum ait: *Sine mortuos sepelire mortuos suos*; Nam vt Theophylactus exponit, qui dixerat: *Sine, & vado ad meum*, non dicere voluit; Pater meus mortuus est, debeo eum sepelire; sed, sine vt maneam cum patre meo, vsque ad mortem eius: cum autem abierit, & eum sepeliero, tunc sequar te.



SECUNDVM argumentum erat: Vxor non potest ingredi religionem sine consensu viri, nec seruus sine consensu domini; igitur nec filius sine consensu patris.

RESPONDEO, vir non habet corporis sui potestatem, sed vxor, vt dicitur I. Cor. 7. & ideo non potest vir de persona sua disponere sine consensu vxoris. Filij autem, quo ad personam sui, liberi sunt post annos pubertatis. Vnde B. Augustinus, qui epist. 36. ad Letum docuit posse filios inuitis parentibus sequi perfectionem; idem in epist. 199. ad Ediciam, docet, vxorem id facere non posse sine consensu viri. Pari ratione seruus non habet personæ suæ potestatem, sed dominus eius, ideo de ea disponere non potest. Addit B. Thom. 2. 2. q. 189. art. 6. quod cum subiectio seruilis sit pœna peccati, non autem subiectio filialis, non mirum videri debet, si seruis admittatur aliquid, quod antea eis competebat, & id non admittitur filiis.

Argumentum TERTIVM ex Concilio Gangrensi, cap. 16. RESPONDEO, fuisse eo tempore quosdam, qui malè intelligentes verba Domini, Luc. 14. *Si quis venit ad me, & non odit patrem, & matrem, & vxorem, & filios, &c.* prætextu Euangelij relinquebant non solum parentes, sed etiam vxorem, & liberos, nec eorum vllam curam gerebant, etiam si maximè indigerent. hos ergo Synodus anathemati subiicit. Vnde ca. 14. anathema dicit coniugibus deferentibus coniuges. Et cap. 15. parentibus deferentibus filios. & cap. 16. filiis negligentibus parentes.

Ex quo apparet, nihil facere hoc decretum contra religiosos, qui parentibus adsunt, si eorum præsentia necessariò indigeant: si autem non indigeant necessariò, absunt quidem corpore ab eis, tamen eos iuuant quomodo religiosos; decet, nimirum precibus apud Deum. nam etiam filij seculares non eodem modo iuuant parentes, sed alij consilio, alij artificio, alij opibus, prout conuenit statui vnus cuiusque.

Addit QVARTVM argumentum Petrus Martyr ex Basilio q. 15. fusè explicata, vbi filios dicit non esse recipiendos ad monasticam disciplinam, nisi à parentibus offerantur. RESPONDEO, loquitur S. Basilius de filiis, qui ob minorem ætatem adhuc subsunt in omnibus patriæ potestati, id quod textus ipse Basilij loquitur apertissimè: *Eos, inquit, qui sub parentibus sunt dum ab illis ipsis adducuntur, coram multis reſtibus suscipiemus.*



## CAPVT XXXVII.

*Licere coniugatis ex consensu vouere continentiam.*

**D**E TERTIO, an liceat coniugatis ex consensu tuo suscipere vota perpetuæ continentia. Negat hoc disertis verbis Petrus Martyr in comment. I. Cor. 7. & probat ex verbis Pauli: *Nolite fraudare inuicem, nisi forte ex consensu ad tempus, ut vacetis orationi, & iterum reuertimini in id ipsum.* Vbi Paulus solum ad tempus concedit vacationem ab usu coniugali. Idem docent Magdeburgenses Cent. 4. cap. 10. col. 1304. vbi accusant Malchum Monachum, tanquam Matrimonij contemptorem, quia ex consensu perpetuo abstinuit ab vxore, quam duxerat in captiuitate sua. Vbi obiter notanda est imperitia, vel nequitia ipsorum; nam, vt Hieron. scribit in vita Malchi, cogebatur Malchus à Barbaris ducere in vxorem mulierem quandam, quæ virum habebat; cum igitur non posset sine peccato adulterij illam accipere, simulauit nuptias, vt mortem euaderet, & illam pro sorore habuit, & tamen Magdeburgenses illum reprehendunt, quod illi mulieri misceri noluerit.

At hic error impudentissimus est, & probo PRIMO ex ipso Pauli loco; nam Paulus postquam ait: *Iterum reuertimini in id ipsum.* subdit: *Hoc autem dico secundum indulgentiam, non secundum imperium.* Vbi illud: *Secundum indulgentiam*, non potest referri ad illud: *Nolite fraudare inuicem.* Ibi enim locum habet imperium, non indulgentia; neq; ad illud: *Nisi ex consensu ad tempus, ut vacetis orationi.* Nam abstinere ad tempus ex consensu propter orationem, non eget indulgentia. Idem enim dicimus indulgere quod non libenter concedimus, sed quasi coacti. Paulus autem maximè cupiebat, vt continerent, cum dicat: *Cupio omnes esse sicut me ipsum;* ergo illud, secundum indulgentiam, refertur ad illud: *Iterum reuertimini in id ipsum.* Idem enim Paulus non libenter concedit, sed indulget propter incontinentiam illorum; quomodo exponunt Hieron. lib. 1. contra Iovin. August. lib. 1. cont. Iulian. cap. 21. Ambr. Theod. & alij in hunc locum. ergo qui perpetuò continent ab vxore ex consensu, rem gratissimam Paulo faciunt; tantum abest, vt ipse id prohibeant.



SECUNDO, probatur ex Patribus. BASILIUS in quaestio-  
nibus diffusè explicatis, q. 12. Eos, inquit, qui in coniugio Ma-  
trimoni ad talem vitam accedunt, percurrari oportet, an ex con-  
sensu hoc faciant, &c. EPIPHANIVS hær. 59. & Hieronymus lib.  
contra Vigilant. dicunt, coniugatos non consueuisse sacris  
initiari, nisi continentiam perpetuam ab vxore promitterent.  
Quod idem statuit Conciliū Arelatenſe II. can. 2. Idem quo-  
que S. Hieronymus in epist. 14. ad Celantiam, arguit eam fœ-  
minam, quod sine consensu viri continentiam vouisset.

AUGUSTINVS in epist. ad Ediciam, quæ est 199. Quod, in-  
quit, Deo pari consensu ambo conuerſi, perseueranter & in fi-  
nem reddere ambo debuistis: à quo proposito si lapsus est ille, tu sal-  
tem constantissimè perseuera. Et epist. 45. ad Arment. & Pauli-  
nam: Ambo, inquit, Deo reddite, quod ambo conſiſtiſti. Et infra:  
Si vester consensus oblatio ad supernum altare creatoris, &c. Et  
sup. Nunc Verò quia tenetur apud Deum sponsio tua, non te ad  
magnam iustitiam inuito, sed à magna iniquitate deterreo. Idem  
Aug. in epist. 32. ad Paulinum, laudat eum, quod cum Thera-  
sia coniuge sua continentia votum suscepit: ipse etiam S.  
Paulinus epist. 3. ad Aprum, mirificè eum laudat, quod cum  
vxore perpetuam continentiam Deo vouerat.

GREGORIUS lib. 9. epist. 39. ad Theotistam patriciam: Si  
Verò, inquit, & si q. conueniat continentem vitam ducere, hoc  
quis audeat accusare, quando certum est, quod omnipotens Deus,  
qui minora concessit, maiora non prohibuit? THEODORETUS lib.  
4. hist. cap. 13. laudat Pelagium Laodicen. Episc. quod prima  
die nuptiarum, cum ipse iuuenis iuuenem sponsam accepisset,  
ei persuaſerit, vt simul continentiam vouerent, HILAR-  
IUS Arelatenſis in epist. ad Aug. quæ præponitur libris de  
prædest. Scias, inquit, Sanctitas tua fratrem meum cum matro-  
na sua ex consensu perfectam Deo continentiam deuouisse: Unde  
rogamus sanctitatem tuam, vt orare digneris, quo hoc ipsum in eis  
Dominus confirmare & custodire dignetur.

Probatur TERTIO, exemplis eorum, quos rectè fecisse,  
quod ex consensu continentiam vouerint, nullo modo ne-  
gari potest, cum sancti fuerint, & miraculis claruerint. PRI-  
MVM exemplum est Mariæ & Ioseph. Quod enim veri con-  
iuges fuerint, patet ex Euangelio Matth. 1. Ioseph filij David,  
nolit timere accipere Mariam coniugem tuam. Et: Ioseph vir  
eius, cum esset iustus, &c. quod autem ex consensu perpetua  
con-



continuerint, certum est. Fuit enim error Heluidij à tota Ecclesia damnatus, quòd B. Maria non fuerit semper virgo. Vnde B. Augustinus de consensu Euangelistarum, lib. 2. cap. 1. *Hoc exemplo, inquit, magnifice insinuaturs fidelibus coniugium, etiam seruata pari consensu continentia, posse permanere coniugium, non permixto corporis sexu, sed custodito mentis affectu.* Neque hoc exemplum aduersarij negare possunt.

Nam Centuriatores Cent. 1. lib. 1. cap. 10. col. 366. dicunt, Iosephum & Mariam ita verum coniugium contraxisse, ut  
 10 voluerint, statuto tempore, more aliorum coniugum liberos procreare. Quod etiam docet Martinus Buterus in cap. 1. Marth. Petrus Martyr in lib. contra Smithæum de cœlibatu; & Caluinus in 1. cap. Luc. Id autem etsi blasphemum est, cum B. Mariam virginitate animi, quæ sola virtus est, spoliare nitatur, tamen in eo nobis deseruit, quod hinc habemus non posse negare hæreticos, quin veri coniuges fuerint Maria & Ioseph. Porto iidem Centuriatores Cent. 4. cap. 5. col. 405. dicunt errorem Heluidij esse, dicere B. Mariam aliquando cum Iosepho viro suo rem habuisse: nec possunt dicere, B.  
 20 Mariam, inuito Iosepho continuasse, nec è contrario, cum vterque sanctissimus fuerit.

SECUNDVM exemplum est Ammonis Monachi, qui cum vxore virgine ex consensu semper virgo permansit, teste Palladio, in historia Lausiaca, cap. 8. & quod hoc Deo placuerit, ex eo manifestè colligitur, quòd eius animam S. Antonius in cœlum ab Angelis deferri cum summa gloria vidit, ut Athanasius refert in vita S. Antonij.

TERTIVM exemplum est apud Cassianum, collat. 14. cap. 7. vbi refert, Laicum quendam, quia cum vxore sua, ex consensu continentiam virginalem colebat, aded claruisse, ut  
 30 Dæmonem quendam ferocissimum, quem S. Ioannes Abbas expellere ab obsessio corpore non potuerat, ipse sola sua præsentia mox expulserit.

QUARTVM est S. Paulini & Therasiæ vxoris, qui ex consensu votum perpetuæ continentia susceperunt, de quo videtur epistolam; 2. Augustini ad Paulinum.

QVINTVM est S. Maturiani & Maximæ vxoris, de quo videtur Victorem lib. 1. de persecutione Vandalica.

SEXTVM est apud Gregorium Turonicū de gloria Confessorum, cap. 32. vbi refert, quòd cum ex duobus coniugibus,



bus, qui semper ex consensu castè vixerant, altera mortua esset, alter in hæc verba prorupit: *Gratias tibi ago, omnipotens Conditor, quòd hanc puellam, sicut eam tradidisti impollutam, & ab omni solutæ contagio puram, ita tibi restituo: illa vero etiam si mortua esset, subridens ait: Sile Vir Dei, quia non est necesse proloqui nostrum, nemine interrogante secretum.*

SEPTIMUM est S. Eduardi Angliæ Regis, de quo Surius TOMOL. ex antiquo manuscripto refert, quòd cum vnà cum vxore virgo permanisset, multis miraculis claruit, & post annos centum à morte, inuentus est omnino integer, aded, vt ne barba quidè illi, quæ proluxa & cana fuerat, decidisset.

OCTAVUM est S. Henrici I. Imperatoris, sed secundi Regis, & Kunegundis vxoris eius, qui similiter ex consensu virgines permanferunt, & miraculis claruerunt, aded vt vomerem candentem sine læsione calcauerit S. Kunegundis in testimonium virginittis. de quibus vide Krantium lib. 3. cap. 32. suæ Saxonix.

NONVM est Petri Vrfeoli Ducis Venetorum, apud Volaterranum lib. 4. qui cum vxore ex consensu castè viuens, miraculis illustris fuit.

DECIMUM est S. Catharinæ Sueciæ, quæ cum viro suo virgo permanfit, & miraculis claruit. Volaterranus lib. 22.

VNDECIMUM Boleflai pudici Polonorum Regis. de quo sic canit Clemens Ianitius Polon:

*Coniuge consenuit cum Virgine Virgo maritus,*

*Additæ studis casta Diana tuis.*

DVODECIMVM est Alphonfi II. Regis Castellæ. de quo similia refert Volaterranus lib. 2. quòd nimirum miraculis claruerit, & ab vxore perpetuò se continuerit.

Probatur VLTIMO ratione; nam tota causla, cur non liceat viro profiteri continentiam, est, quia nō habet potestatem corporis sui, & nemo potest rem alienam donare inuito Domino. At ista causla cessat, cum ex consensu sit votum.

Adde POSTREMO, quod solum contrà obiici potest illud Matt. 19. *Quod Deus coniunxit, homo non separet.* sed hoc facile soluitur; nam non soluitur coniugium per votum continentix. Vnde August. lib. 1. de serm. Domini, cap. 14. *Beatiora, inquit, sanè coniugia iudicanda sunt, quæ sine filijs procreatis, siue etiam ista terrena prole contempta, continentiam inter se paris consensu seruare potuerint; quod neque contrà illud præceptum*  
fit.



*fit, quo Dominus dimitti coniugem iubet, & illud seruatur quod ait Apostolus.*

## CAPVT XXXVIII.

*Per vota solennia solui Matrimonium ratum,  
non consummatum.*

**D**E QVARTO duo sunt errores extremi. VNVS est Martini Remnitij contra sess. 24. Conc. Trid. can. 6. & Magdeburgensium, qui docent, Matrimonium siue sit ratum & consummatum, siue sit ratum tantum, non posse solui per monasticam professionem. ita docent. Cent. 1. lib. 2. cap. 12. col. 637. idem docet Eras. in cap. 7. 1. ad Cor. & in eandem sententiam propender ex Catholicis Claud. Espenæus lib. 6. cap. 4. de contin. suntq; pro hac sententia grauissima argumenta. Nam Matt. 19. & 1. Cor. 7. Matrimonium insolubile esse pronuntiatur: quod autem hoc de rato dicatur, patet PRIMO, quia Matrimonium ratum non differt à consummato vlla essentiali differentia. copula enim carnalis actus quidam est coniugij, non essentia coniugij. SECUNDO, Matrimonium ratum est verum Sacramentum, significans Christi & Ecclesiæ vñionem inseparabilem, ergo insolubile. Præterea TERTIO, per Matrimonium ratum dat vir vxori potestatem corporis sui, ergo, &c.

ALTER error est in altero extremo, quod nimirum Matrimonium etiam consummatum dissoluatur per ingressum in religionem. Ita decreuit Iustinian. C. de Episc. & Cler. l. finali. & refert hanc legem Greg. lib. 9. epist. 39. pro qua sententia adduci solet Basil. in quæstionibus fusiùs explicatis, q. 12. vbi videtur dicere, virum, qui non potest ab vxore impetrare consensum transeundi ad religionem, posse ea inuita id facere: adducitur etiam exemplum THEONAS Abbatis, de quo Cassian. col. 21. cap. 9. scribit, quòd cùm per quinque annos cum vxore vixisset, ac deinde Monachus fieri vellet, & ab vxore licentiam non impetraret, illa inuita, Matrimonium soluit, & Monachus factus est. & cap. 10. scribit idem Cassian. non debere hoc factum reprehendi, cùm iste Theonas Apostolicis miraculis postea claruerit, & à plurimis magnis Patribus factum eius collaudatum fuerit.

At nihilominus Ecclesiæ sententia est in medio, nimirum



rum Matrimonium ratum solui per monasticam professionem, non autem Matrimonium consummatum. ita habemus. cap. ex publico, & cap. ex parte tua, & cap. verum. de conuersione coniugat. & 27. q. 2. can. desponsatam, aliisque multis canonibus ibidem. quibus accessit Trident. Concil. sess. 24. can. 6. ubi dicitur: *Si quis dixerit Matrimonium ratum, non consummatum, per solennem religionis professionem alterius coniugum non dirimi, anathema sit.*

Probat ergo secunda pars huius sententiæ contra secundum errorem. PRIMO, ex ipsa Scriptura. nam quod 10 Christus ait: *Quos Deus coniunxit, homo non separet. Et: Qui dimiserit uxorem, facit eam machari*, Matth. 19. & quod ait Apostolus 1. Corinth. 7. *lis qui Matrimonio iuncti sunt, præcipio non ego, sed Dominus, mulierem à viro non discedere, &c.* in aliquo Matrimonio locum habere debet, ergo saltem in Matrimonio consummato. si enim in hoc non habet locum, in nullo habebit. SECUNDO, ex Patribus; nam Hieronymus in epist. 14. ad Celantiam, arguit eam, quod sine licentia viri continentiam vouisset. Item August. epist. 45. ad Armentarium, & in epist. 199. ad Ediciam, disertè docet, non licere con- 20 iungi, invito coniuge, vouere continentiam; & si id faciat, debere cogi, vt, voto non obstante, viro suo debitum reddat. Idem docet Greg. lib. 9. epist. 39. ad Theodistum, ubi reprehendit legem civilem, quæ permittit contrarium. Idem prohibent VIII. Synod. & Nicol. I. in epist. ad Carl. Regem, aliæque Conc. & Pontificum decreta apud Grat. 27. q. 2. necnon in decretalibus, tit. de conuers. coniugatorum.

Ad testimonium Basilij respondeo, fortasse loqui eum de Matrimonio rato, sed nondum consummato. quod si ita est, sententia eius nobis apertissimè fauet. Sin autem de consummato fortè loquatur, dico tria habere eo loco Basilium. PRIMUM enim asserit, coniugatum venientem ad monasticum, debere interrogari, an consensum vxoris obtinuerit: *Vir enim non habet potestatem corporis sui, sed uxor*, vt Apostolus ait 1. Corinth. 7. DEINDE addit Basilius, si coniunx repugnet, ac resistat, oportere audire Domini vocem: *Qui non odit patrem, matrem, uxorem, &c. non est me dignus*. Quæ duo inter se pugnare videntur. Sed addit TERTIO, sæpe accidisse, vt orationibus à Deo impetratum sit, vt coniunx morbo correpta, consensum præbere cogeretur.

Vide.



Videtur ergo S. Basilii velle, ut coniugatus, si Monachus fieri velit, primum consensum vxoris quærat: si impetrare non potest, oret Deum, & lacrymis & ieiuniis instet, quo id etiã vxori persuadeatur, ac tum demum obtento consensu Monachus fiat. sic enim & Apostolo obediet, dum non sine consensu coniugem relinquit, & Christo etiã parebit, dum vxoris amorem Christi amori postponit. Exemplum habemus in fratre & sorore S. Bernardi. Nam & ille ab vxore, & illa à marito orationum instantia consensum obtinuit, quem antea impetrare non poterant. Vid. lib. I. cap. 4. & 6. vitæ S. Bernardi.

Ad exemplum Cassiani dico, esse illud vnum ex iis factis Sanctorum, quæ sunt admiranda, non imitanda. Credendum enim est, peculiari Spiritus sancti admonitu id factum esse, præter communem ordinem, ac legem, quandoquidem ille tot claruit postea signis & virtutibus.

Probatur altera pars contra alterum errorem. PRIMO, testimonii Ecclesiæ supra citatis. etsi enim aduersarij ea non recipiunt, tamen cum nulla ipsi in contrarium adferant, recta ratio docet, potius credendum esse tot sanctis Pontificibus, & vni generali Concilio, quam simplici inficiationi paucorum hominum.

SECUNDO probatur, exemplis Sanctorum. Ac PRIMUM quod sanctam Teclam ante Matrimonij consummationem S. Paulus à nuptiis reuocauerit. testatur Epiphanius hæres. 78. & Ambrosius lib. 2. de virginibus.

SECUNDUM exemplum est S. Alexij, qui prima nocte nuptiarum vxorem intactam relinquens, peregrè profectus est, castamque vitam perpetuò duxit. ita refert Simeon Metaphrastes in eius vita, cuius historia totius Ecclesiæ à multis seculis celebratione confirmata est.

TERTIUM exemplum est S. Euphrasie, de qua similia refert idem Simeon Metaphrastes.

QUARTUM est S. Cecilie, quæ, teste eodem Metaphraste, prima nocte nuptiarum negauit viro suo Valeriano conjugale debitum, quia nimirum continenter viuere volebat.

QUINTUM est apud Augustinum lib. 8. Confess. cap. 6. ubi scribit, duos milites, lecta Antonij vita, mox vota monastica suscepisse, relictis sponis, quas habebant: illas verò cum id cognouissent, similiter fecisse. Nec refert quod ab August.



gust. dicantur sponsæ, non vxores; nam sapissimè Veteres sponſas & sponſos vocant vsque ad consummationem Matrimonij, atque exinde maritos & vxores. Sic accipitur nomen sponsæ in cap. Ex publico, & cap. Carissimus, & cap. Ex parte tua, extra de conuersione cōiugatorum; & eodem modo Augustinus lib. 8. Confess. cap. 3. *Institutum est*, inquit, *et sponsa iam pacta, non citò iradantur, ne uilem habeat maritus datam, quam non suspirauit sponsus dilatare*. Præterea aduersarij non solum vxores, sed etiam sponſas futuras, negant posse dimitti propter uota monastica.

SEXTVM est S. Leobardi, qui, teste Gregor. Turon. rupit fœdera nuptialia cum honesta puella inita, & inuitis parentibus Monachus factus est.

SEPTIMVM est apud Greg. lib. Dialog. 3. cap. 14. ubi dicit, Gregoriam sacram virginem, nuptiis iam constitutis, ad Ecclesiam confugisse, & sanctimonialis uitæ habitum petiisse, ac impetrasse.

Probatur VLTIMO, duplici ratione. PRIMA est, quia ratio ipsa docet, semper esse licitum transire de statu minus perfecto ad perfectiorem, si id possit fieri sine ullius detrimento: at status coniugij est imperfectior statu religionis, ergo poterit ab vno ad alium fieri transitus, quando id fiat sine ullius detrimento: sit autem sine ullius detrimento, quando Matrimonium est ratum, sed non consummatum. nam cum Matrimonium est cōsummatum, duplex detrimentum oritur, si dirimatur; vnum proli iam natæ, vel conceptæ, quæ non poterit tam bene educari; alterum ipsi coniugi, quæ manet ligata, nec potest alteri nubere, & quando etiam posset, non tam commodè, cum non sit amplius virgo. At nihil horum inuenitur in Matrimonio non consummato. Ibi enim nulla est proles, & vxor potest alteri nubere, & æquè bene atque antea, cum adhuc sit virgo, & nihil infamix incurrat ex huiusmodi repudio, ut notum est.

DICES; at iniuria illi fit, cum spoliatur inuita re sua. RESPONDEO, tenetur consentire marito volenti perfectiores nuptias sine ulla comparatione inire, cum id facere possit sine suo incommodo, potest autem cogi ut faciat, quod tenetur facere.

DICES rursum; si hæc ratio valeret quidquam, probaret non solum propter monasticam professionem Matrimonium



ratum dirimi, sed etiam propter sacrorum ordinum susce-  
ptionem, ac præcipuè propter Episcopalem dignitatem, cum  
etiam sacro ordini sit annexum solenne votum continentiae,  
& status Episcoporum sit perfectior statu religiosorum. At  
non dirimitur Matrimonium ratum propter ordinis sacri  
fuspceptionem, vt Ioan. XXII. definiuit in Extrauaganti, An-  
triquæ concert. de voto, ergo, &c. **RESPONDEO**, non esse si-  
milia; nam monastica professio repugnat per se, & ex na-  
tura rei coniugium, non autem repugnat per se & ex natura  
10 rei ordini sacro, sed ex solo decreto Ecclesiæ.

**SECUNDA** ratio est; nam in Matrimonio duplex inuenitur  
vinculum; vnum spirituale, quod ex solo consensu nascitur,  
alterū carnale, quod nascitur ex copula; sed istud carnale di-  
rimitur per mortē corporalem, vt patet ex 1. Cor. 7. ergo vin-  
culum spirituale dirimi debet per mortem spiritualement & cie  
uilem: talis est monastica professio, qua homo toti mundo  
quodam modo moritur, ergo, &c. Et ex hac etiā ratione pa-  
tet, cur non dirimatur tale Matrimonium per ordinem sa-  
crum; nam sacer ordo non requirit mortē illam spiritualement  
20 seu ciuilem, qua quis opibus & propriæ voluntati renunci-  
et.

Ad argumenta duplex est solutio. **VNA** communis Theo-  
logorum, quam præcipuè Sotus explicat in. 4. d. 27. q. 1. art. 4.  
quod tam insolubile sit Matrimonium tam ratum, quam  
consummatū; & tunc ad illa omnia argumenta respondent,  
ea probare optimè Matrimonium ratum non posse dirimi  
ab homine, id est, humana vlla auctoritate, sed tamen non  
probare, quin possit dirimi à Deo, Deum autem esse qui diri-  
mit, cum sponsum vocat ad religionem.

**DICES**; vnde habemus, quod Deus dirimat Matrimonia  
30 rata, & non dirimat etiam consummata per vocationem ad  
religionem, cum certum sit, Deum omnia posse dirimeret  
**Respondeo**, scimus ex Ecclesiæ declaratione.

**ALTERA** solutio est communis Canonistarum, quam co-  
etiam sequitur Caietanus in opusculis, tom. 1. tract. 28. qui do-  
cent, Matrimonium consummatum non esse solubile, nisi à  
Deo: Matrimonium autem ratum tantum esse solubile, au-  
toritate Pontificis, & etiam sine illa auctoritate, solui per  
ingressum in religionem; & tunc ad argumentum ex verbis  
Domini Matthæi 19. *Quos Deus coniunxit, homo non separet*,  
respondent, ea verba intelligi solum de Matrimonio con-  
sum-



Matrimonio. Nam hæc verba nō sunt dicta à Domino, nisi postquam dixerat: *Erunt duo in carne vna*; quod non fit, nisi per copulam carnalem. Et sic docet exponi debere hunc textum Alexander III. cap. Ex publico, de conuersione coniugatorū.

Ad PRIMAM rationem respondent, Matrimonium ratum, & consummatum non differre solū accidentaliter, id est, vt rem operantem, & non operantem, vt vult prima opinio; nec tamen differre propriè essentialiter, quasi desit Matrimonio rato altera pars essentiæ, quomodo differunt homo & anima; sed differre, sicut perfectum & imperfectum, sicut differunt homo, cui non deest vlla pars integralis, & homo mancus, surdus vel cæcus; id, quod ipsa verba ostendunt. Cur enim dicitur Matrimonium ratum, & non consummatum, si nihili deest, nisi operatio, siue effectus? & cur non dicitur etiam sacerdotium ratum, & non consummatum, antequam Presbyter incipiat exercere sacros ordines?

Porro id, quod deest Matrimonio rato, est id, quod facit illud solubile. Nam Sacramentum Matrimonij triplicem habet significationem. PRIMO, significat gratiam inuisibilem, siue coniunctionem Christi cum anima. SECUNDO, coniunctionem Christi cum Ecclesia per caritatem. TERTIO, coniunctionem Christi cum Ecclesia per naturæ conformitatem. Ex quibus Matrimonium ratum habet solam primam, vt docet S. Thomas in 4. dist. 27. q. 1. artic. 3. quæst. 2. ad 1. & Innocentius III. cap. Debitum, de digamis. Quæ significatio sufficit ad constituendū verum Sacramentum, sed ea non facit Matrimonium insolubile, nam illa coniunctio Christi cum anima non est insolubilis, vt patet.

Matrimonium autem consummatum habet alias duas, vt patet ex Paulo, Ephes. 5. qui non dixit: *Sacramentum hoc magnum est, ego autem dico in Christo, & in Ecclesia*, nisi postquam dixerat: *Erunt duo in carne vna*. quod certè fit per copulam. & confirmatur hoc totum ex eo, quod si Matrimonium ratum, non consummatum, significaret vniōnem Christi cum Ecclesia, sequeretur esse digamum, qui duo Matrimonia rata contraxit, licet vnum tantum, aut nullum consummauerit, quod est contra cap. Debitum, de digamis. Sequela patet; nam digamia contrahitur ex defectu significationis vnius Christi cum vna Ecclesia, quam non habet, qui cum duabus contraxit.



Ad SECUNDAM rationem dico, Matrimonium ratum esse verum Sacramentum, sed non perfectum, quoad omnem significationem.

Ad TERTIAM dico. PRIMO, eos, qui dant seipsoſ vxori, semper intelligere, se dare cum ea conditione, nisi vocentur à Deo ad spirituales nuptias. SECUNDO, non teneri coniugem ad soluendum eiusmodi debitum cum detrimento boni spiritualis sui, quando id potest fieri sine vllō detrimento alterius coniugis, vt in præſenti accidit. Vtraque solutio est bona, sed hæc posterior est conformior decretis & factis Pontificum, qui de facto dispensant in Matrimonio rato, non consummato. Præterea, prima opinio nititur testimonio Nicolai, 27. quæst. 2. can. Scripsit, vbi dicit, Deum esse, qui soluit Matrimonium, cum aliquē vocat ad religionem. At hoc fundamentum non est solidum, quia Nicolaus loquitur de Matrimonio consummato, & intelligit illud solui, quoad torum, non quoad vinculum.

## CAPVT XXXIX.

20

*De Eremitis.*

EQVITVR Disputatio QVINTA de Eremitis. Eremitarum institutum præ ceteris religionibus grauissimè reprehendunt Magdeburgenses Centur. 4. & 5. cap. 6. & 10. necnon Calvinus lib. 4. Institut. cap. 13. §. 16.

Duo sunt autem, quæ reprehendunt, solitudinem, & vitæ seueritatem. Solitudine dicunt eos peccasse dupliciter contra proximum. PRIMO, quòd quasi odio humani generis solitudines recesserint, contra illud Matth. 24. *Ecce, in deserto est, nolite exire.* Et Hebr. 10. *Non deserentes collectionem nostrā.* SECUNDO, quòd illa officia caritatis deseruerint, quæ Deus mandauit, contra illud Hebr. 10. *Adiuuemus nos inuicem.*

Vitæ seueritate dicunt eos peccasse in seipsoſ. PRIMO, quòd se exposuerint multis periculis, & tentationibus, sine Dei mandato, contra illud Matth. 4. *Non tentabis Dominum Deum tuum.* Et ideo in pœnam peccati Deus permiserit eos vexari variis modis à Diabolo, vt de Antonio & Hilarione patet. SECUNDO, quòd sui ipsorum fuerint homicidæ, nimis ieiuniis, ciliciis, aliisque spontè susceptis afflictionibus, con-

tra



tra illud Exod. 20. *Non occides.* Et Coloss. 2. *Habeto honorem corpori.* TERTIO, quod stulto labore seipsos vexauerint, in rebus ridiculis & fatuis ponentes religionem, ut pater de Simone, qui in altissima columna more auis plurimos annos vixit: in quo apparuisse dicunt miram Diaboli fascinationem & illusionem.

At vitam Eremiticam, sanctam & perfectam, & Deo gratam esse probatur. PRIMO, testimonio Scripturæ, quæ vehementer laudat Heliam & Ioannem qui Eremitarum Principes fuerunt, siue solitudinem, siue asperitatem vitæ consideres; nam de Ioanne dicitur Matth. 11. *Internatos mulierum, non surrexit maior Ioanne*: Helias autem quantus fuerit, vel ex eo patet, quod in laudibus Ioannis, Angelus posuerit, futurum illum similem Helix: *ipse*, inquit, *præcedet in spiritu, & virtute Helix*, Luc. 1. Porro Helias ut plurimum versabatur in monte Carmelo, & pilis induebatur, zona pellicea præcinctus, ut dicitur 4. Reg. 1. similiter Ioannes vixit in deserto ab infantia ad finem vsque vitæ, & pilis camelorum induebatur, præcinctus zona pellicea, victusque eius erant locustæ & mel sylvestre, ut dicitur Luc. 1. & Matth. 3. Quocirca veteres Patres Heliam & Ioannem Eremitas & Principes Eremitarum faciunt, ut Basilii in epist. ad Chilonem. Nazianzenus in Apologia postquam ex fuga rediisset. Chrysostomus hom. 69. in Matth. Hieronymus partim in epist. ad Paulinum de institutione Monachi, partim in epist. ad Eustochium de virginitate. Cassianus collat. 18. cap. 6. Sozomen. lib. 1. hist. cap. 12. Theophylactus in primum cap. Lucæ. Isid. lib. 2. cap. 15. de officiis.

Ad hoc argumentum respondent, ac præcipue de Ioanne docent, eum nunquam fuisse in vera eremo, nec tam aspero victu, & vestitu usum, ut nos dicimus. Magdeburgenses Cent. 1. lib. 1. cap. 6. col. 248. dicunt, Ioannem prædicasse in deserto, esse accipiendum per Synechdochen, quia nimirum prædicabat in oppidis adiacentibus deserto. & cap. 10. col. 357. dicunt, Ioannem habitasse cum suis parentibus, sed dictum habitasse in deserto, quia domus parentum eius erat in montanis Iudææ, qui locus vulgo dicebatur desertum, ob montes, & sterilitatem, quanquam plurima ibi oppida & pagi existerent. similiter exponunt Bucerus & Zwinglius in cap. 3. Matth.



Rursus Centuriatores ibid. col. 356. dicunt, vestem Ioannis fuisse quidem ex pilis cameli, sed tamen bene contextam, & talem, qualibus ordinariè utebantur homines eius loci. quod idem ait Bucerus in cap. 3. Matthæi. addit verò in eundem locum Chytræus, fuisse vestem similem illis, quas undulatas vocamus; vel Italicè, diciambelletto, quibus certè nobiles nunc vtuntur, non rustici.

Denique Centuriatores col. 364. dicunt, locustas Ioannis fuisse genus cancrorum, id est, optimorum piscium, quos  
 10 piscatores proiciebant tanquam in lege prohibitos, sed Ioannem illos manducare solitū Evangelica libertate. Quod idem sensit Melanchthon in concione de Ioanne Baptista, & aliquot alij in cap. 3. Matthæi.

Hos errores refellit accuratè Petrus Canisius lib. 1. de corruptelis verbi Dei, cap. 2. 3. & 4. Ac primum in verissimo deserto fuisse Ioannem, probat Canisius PRIMO, quia vox desertum, quæ in Scriptura frequentissima est, semper accipitur pro vero deserto.

SECUNDO probat, nam Luc. 1. dicitur, erat in desertis vsque in diem ostensionis suæ ad Israël; ergo non viderunt illum Israëlita vsque ad annum eius 30. quo nimirum se ostendere, & prædicare cœpit, ergo toto illo tempore non habitavit in domo parentum, vel in oppidis, & pagis, sed in verissima eremo.

TERTIO ex illis verbis Luc. 3. *Factum est Verbum Domini super Ioannem Zacharia filium in deserto, & Venit in omnem regionem Iordanis, prædicans Baptismum penitentia.* vbi notandum est, eam regionem Iordanis, vbi Ioannes prædicabat, fuisse etiam desertam, sic enim ait Matth. cap. 3. de eadem  
 30 loquens: *In diebus illis Venit Ioannes Baptista, in deserto prædicans Baptismum penitentia.* ergo Ioannes venit a deserto in desertum: sed prius illud desertum, vbi mansit Ioannes, antequam prædicare inciperet, adeo erat desertum, vt eius comparatione illud alterum non videretur desertum; nam alioqui cur Lucas diceret, venit à deserto in regionem, si hæc regio erat æquè deserta. Itaq; vera est Euthimij sententia, qui in ca. 3. Matth. docet, duplex fuisse in Iudæa desertum; vnum interius, quo nimirum nemo, aut rarissimi penetrabant; alterum exterius, vbi non habitabant quidem homines, tamen per illud sæpius iter faciebant: ac Ioannem quidem vsque



que ad annū XXX. fuisse in interiori deserto, deinde postremo vitæ suæ anno in deserto exteriori.

Possumus addere *QVARTAM* rationem ex dubitatione Iudæorum, qui Ioan. i. petunt à Ioanne, quis ipse sit, num Helias, an aliquis alius. Si enim versatus fuisset semper in domo parentum, certè sciuissent illum esse Ioannem filium Zachariæ, & Elisæbeth. At quia per tot annos latuerat, vide licet ab infantia, vsq; ad annos triginta: nemo erat qui eum agnosceret, & ideo petunt: *Tu quis est* & quia videbant eum vestitum eo modo, quo Scriptura testatur indui consueuisse Heliam, & simul sciebant rediturum Heliam ante Christi aduentum, ideo quærunt: *Helias es tu?*

Accedunt *VLTIMO* testimonia Patrum. *EVSEBIUS* libro 9. demonstr. Euangel. cap. 5. *Procedebat*, inquit, *ex deserto inu- sitatum indutus habitum, omnemq; communem hominum consuetudinem declinans; nam neq; in vicum & urbem, neq; in urbem, neq; in communem aliquem virorum cætum commebat. Et in- fra: Repente*, inquit, *nescio, vnde è latebris solitudinis produn- tem, & post prædicationem rursus in solitudinem, & latebras recedentem, sine cibo, sine potu, abhorrentem à multitudine, me- rito obstupecebant, & ne hominem quidem illum esse arbitra- bantur.*

*HIERONYMUS* in epist. 4. ad Rusticum: *Ioannes*, inquit, *Baptista sanctam habuit matrem, Pontificisq; filius fuit, & ta- men nec Patris affectu, nec matris opibus vincebatur, ut in domo parentum cum periculo viveret castitatis. Vixit in eremo, & oculis desiderantibus Christum nihil aliud dignabatur aspicere. Accedant testimonia suprà citata, quæ Ioannem Eremitarū principem faciunt.*

Iam verò de Ioannis veste, quod non fuerit ex panno, nec illo modo mollis, ac delicata, patet ex illis verbis Domini Matth. II. *Quid existis in desertum videre? hominem mollibus vestitum? ecce qui mollibus vestiuntur, in domibus Regum sunt.* Vnde Chrysostomus hom. 10. in Matth. dicit Ioannis vestem compunctioni, & pœnitentiæ accommodatam fuisse. & ibi- dem ait, fuisse cilicinam ad mundi contemptum indican- dum. Sanctus quoque *BERNARDUS* in sermone de sancto Ioanne Baptista: *Venit*, inquit, *Ioannes non manducans, nec bi- bens, plane nec vestiens, sicut enim non est locustæ cibus, nisi ali- quorum fortè irrationabilium animalium, sic nec pilus camelæ*



hominum est indumentum. Hæc ille. & cur, quæso, sanctus Euangelista tam sollicitè nobis Ioannis vestem descripsit, si ea communis, & ordinaria erat? cur vestem Christi non etiam descripserunt Euangelistæ, si personæ & non ipsius vestis ratio habebatur?

Porro de victu, quod locustæ illæ non fuerint pisces delicti, sed aut veræ locustæ, quæ sunt minuta animantia, vel certè herbarum summitates, patet PRIMO, quia Græca vox *ἀγριοί* nihil aliud significare potest, vt Euthymius docet. SECUNDO, quia Christus Luc. 7. ait: *Venit Ioannes non manducans, neq; bibens*, id est, vsq; adeo tenui cibo, & potu vtens, vt nullo vi videatur. TERTIO, quia sic exponunt omnes Patres, quos vide apud Canisium.

Probatur SECUNDO vitæ Eremiticæ institutum ex testimoniis sanctorum Patrum, qui vno consensu illud approbant. BASILIUS in epist. ad Chilonem, Martyrio comparat vitam solitariam, & soluit omnes obiectiones quæ contra Eremitas fieri possunt, similiter in epist. i. ad Gregorium Theologum de vtilitate solitudinis multa disputat. NAZIANZENSIS in Apologia pro fuga sua, vocat cœlestem vitam Eremitarum, & in epist. ad Hellenium refert mira quædam de Eremitis sui temporis, vt quod aliqui nunquam homines videant, aliqui integris viginti diebus cibo abstineant. Refert etiam de quodam, quod toto anno in oratione steterit, & ne tantillum quidem obdormierit, cui reliquias exigui cibi vicinus coruus adferebat. Posteaquam autem hæc, & similia retulit, subiungit: *Talis est Christi pars, talis passionum Christi fructus, quem ipse à terra ad Patrem defert; religionis, inquam, Christianæ columen, populi decus, mundi fundamentum, cum cælestibus purissimis* christudinibus *elegantia propemodum certans.*

EPIPHANIVS in compendiaria doctrina, inter ea, quæ in Ecclesia Catholica seruantur sine præcepto, primo loco ponit virginitatem, secundo solitudinem, quibus adiungit abstinentiam à carnibus, ouis, piscibus, & ab ipso etiam pane, & vino, humi cubationem, sacci gestationem, & similia.

CHRYSOSTOMVS passim prædicat laudes Eremitæ, vt hom. 8. in Matthæum, vbi sic ait: *Si quis nunc ad Aegypti veniat solitudinem, paradiso præfusus omnem illam Eremitum videbit digniorē, & innumeros Angelorum choros in corporibus fulgere mortalibus, &c.* Similia habet hom. 69. & 70. in Matt. & hom. 14. in priorē ad Timotheum.



Cap. XXXIX. De Monachis. Lib. II. 391

HIERONYMVS in epist. I. ad Heliodorum: O desertum, inquit, Christi floribus Germanis, o solitudo, in qua illi nascuntur lapides, de quibus in Apocalypsi ciuitas magni Regis extruitur, o Eremitus familiaris Deo gaudens, &c. Idem in epistola ad Eustochium de uirginitate dicit, eos, qui ex cœnobiis ad Eremitum tanquam ad vitam perfectiorem profugiunt, nihil secum ferre ad cibum, nisi panem, & salem.

AUGUSTINVS lib. I. de moribus Ecclesiæ, cap. 31. miris laudibus effert Eremitas: Nihil, inquit, de iis dicam qui secretissimi penitus ab omni hominum conspectu, pane solo, & aqua contenti desertissimas terras incolunt, persuentes colloquio Dei, cui puris mentibus inhaerunt, & eius pulchritudinis contemplatione beatissimi, quæ nisi Sanctorum intellectu percipi non potest. Et infra: Hoc tam excellens fastigium sanctitatis, cui non sua sponte mirandum, & honorandum videtur, oratione nostra videri qui potest?

His adde IUSTINIANI nouellam constitutionem 133. ubi sic ait: Solitaria vita atq; in ea contemplatio res planè sacra est, & quæ suapte natura animas ad Deum adducat, neq; in tantum, qui eam incolunt, commodet, sed etiam omnibus aliis, &c. 20

TERTIO probatur rationibus. PRIMA ratio sumitur ab effectu; videmus enim magnam partem veterum Eremitarum euasisse viros perfectissimos & miraculis clarissimos, cuius rei testes produci possunt illi omnes qui scripserunt vitas & res gestas Eremitarum; vt Athanasius in vita Antonij, Hieronymus in vita Pauli & Hilarionis, Palladius in historia Lausiaca, Cassianus in collationibus, Theodoretus in historia religiosa, Sozomenus lib. I. hist. cap. 12. 13. & 14. lib. 3. cap. 13. & lib. 6. cap. 28. & sequentibus, Rufinus lib. 2. histor. cap. 3. & 4. Euagrius lib. I. cap. 21. & li. 4. cap. 7. ac vt de ceteris nunc taceam, certè Paulum primum Eremitam Deus non pauisset annis LX. mittens ei per coruum singulis diebus dimidium panem; neque Antonius vidisset animam eius ad choram Apostolorum in cœlum deferri; neq; Leones illi sepulchrum effodissent, nisi summa illius solitudo centum ferè annorum, & maximè vitæ austeritas Deo placuissent.

SECUNDA ratio, vita Eremitica est culmen & fastigium vitæ religiosæ; nam omnes ferè Patres docent, ad vitam Eremiticam non debere quemquam transire, nisi prius diligenter in cœnobio se exercuerit, propterea quodd Eremitus non



392 *Cap. XXXIX. De Monachis. Lib. II.*

adferat perfectionem, sed præsupponat. B. Hieronymus, in epistola ad Rusticum, 1. Cassianus collat. 10. cap. 3. Augustinus lib. 1. de moribus Ecclesiæ, cap. 3. Benedictus in Regula, cap. 1. Bernardus serm. 3. de circumcissione. & hæc fortasse est causa cur liceat omnibus ferè religiosis transire ad ordinem Carthusiensium, quia nimirum vita illorum est solitaria, & proinde perfectiorum. Cum igitur vita Eremitica perfectissima sit; non potest Deo non esse grata; supra enim ostensum est, vitam perfectam ad eò placere Deo, ut rectissime voueri possit.

10 TERTIARATIO, austeritas, & solitudo sunt optima media ad optimum finem; nam finis austere & solitarie vitæ est contemplatio Dei rerumq; cœlestium, ut patet ex Cassiano collat. 19. quæ est de fine vitæ Eremiticæ: eam autem optimam partem Dominus vocat Luc. 10. Medium autem ad contemplationem omnium optimū, est habere animum collectum, & intentum; cui rei mirum in modum deseruit solitudo, quæ omnem strepitum rerum, quæ animum distrahere possent, procul arceat. hinc Dominus quotiescunque orare volebat, 10 pergebat in montes, & loca deserta. Luc. 5. *Ipse autem sedebat in desertum, & orabat.* Moyfi quoque Exod. 24. cum Deus loqui veller, iussit ut solus ascenderet in montis verticem, & caliginem intraret, nimirum ut nihil videre posset, quod animum eius a Deo auocaret. Scribit etiam B. Hieronymus lib. 2. contra Iovinianum, ad eò hoc esse verum, ut etiam multi Philosophi ductu nature in desertis habitauerint, & quidam etiam sibi oculos eruerint, ut sine distractione contemplari possent.

Idem de ieiunio, & reliqua vitæ seueritate dici potest. Nā 30 quod ieiunium medium sit optimum ad orationem, patet ex eo, quod in Scriptura ubiq; iungitur orationi. Tob. 12. *Bona est oratio cum ieiunio.* Matth. 17. *Hoc genus non eicitur nisi in oratione, & ieiunio.* Luc. 2. & *Hæc non discedebat à templo, ieiunans, & obsecrationibus seruens nocte, & die.* 1. Cor. 7. *Vt vacetis orationi, & ieiunio.* & Chrysostomus hom. 1. in Genesim dicit ieiunium esse animæ instar alarum ut sursum ferri, & summa contemplari queat. similia habet Athanasius in lib. de virginitate, & Basilii orat. 1. de ieiunio: & quisq; experitur, cum caro viget & floret, & in deliciis agit, animum quoque fieri quodammodo carnalem & terrenum, & magis de luxuria, quam de sapientia cogitare.

Quo-



Quocirca etiam Plato locum pestilentem elegit, ubi ver-  
faretur & doceret, ut ait Hieronymus lib. 2. contra Iouinia-  
num, ut discipuli sui nihil amarent nisi sapientiam; & ibi-  
dem refert Pythagoræos vitasse non solum vrbes, sed etiam  
horros, & omnia loca, quæ voluptatem adferunt, ne animi  
mollescerent, & à studio sapientiæ retardarentur. Similia  
docet de sacerdotibus Ægyptiorum; qui ut vacarent con-  
templationi syderum, neque vxores habebant, neque vllum  
propinquorum videbant, & cibo tenuissimo utebantur. Scri-  
bit etiam GALENVS in exhortatione medicinæ, animas ho-  
minum voluptatibus deditorum in multo sanguine tan-  
quam in luto demersas nihil subtile & cæleste contemplari  
posse.

Quamquam sancti illi Eremitæ, non solum propter con-  
templationem ita seuerè viuebant, sed etiam aliis iustissimis  
de causis. PRIMO, quia loci natura id exigebat, nec enim  
poterant, etiam si voluissent, eas commoditates vitæ in de-  
serto reperire, quæ in vrbibus reperiuntur. & hæc est causa  
cur Paulus primus Eremita foliis palmarum indueretur, &  
fructibus eiusdè arboris aleretur, quia nimirum, nihil aliud  
ibi erat; & similiter cur Ioannes locustis & melle Syluestri  
viueret, quia eiusmodi rebus illa Eremus abundabat, ut Hie-  
ronymus docet lib. 2. contra Iouinianum.

SECUNDO, quia occupati deliciis animi, partim obliui-  
scebantur corporis, ut de Ioanne Abbate refert Cassianus  
collat. 19. cap. 4. qui non recordabatur, an pridie comedisset  
necne? partim etiam ægrè ferebant istam corporis seruitu-  
tem, & ided quod rarius, & breuius poterant necessitati cor-  
poris satisfacere, eò se feliciores putabant, ut Philo scri-  
bit de primis illis Monachis, in libro de vita contemplati-  
ua supplicum. multi enim propter auiditatem spiritualium  
epularum vix quinto, aut sexto quoque die corpus reficie-  
bant.

TERTIO, quia nouerant Deo gratissimam esse victo-  
riam cupiditatum, & patientiæ exercitationem. quia enim  
caro semper concupiscit contra spiritum, placet Deo, ut spi-  
ritus semper concupiscat aduersus carnem. Vnde Tertullia-  
nus, feras, & aridas escas, & reliquam corporis afflictionem  
sacrificium Deo gratissimum esse dicit, libro de resurrectione  
carnis.



QVARTO, ad fructus dignos pœnitentiæ peragendos, & pro peccatis satisfaciendum. Sancti enim qui serid iustitiam efuriunt, leues culpas grauius vindicare solent, & hæc est vna ex præcipuis causis, cur Ioannes Baptista tam seuerè vixerit; nam & si ipse nulla fortasse peccata actualia habuit, tamen quia missus à Deo fuerat, vt pœnitentiam prædicaret, voluit exemplo, & verbo eam prædicare, & idcirco, vt Chrysostomus dicit homil. 10. in Matthæum, vestem habuit compunctioni & pœnitentiæ accommodatam. Ex his facile iam  
 10 erit ad argumenta respondere.

Ad PRIMVM argumentum respondeo, Eremitas non odio humani generis, sed studio purioris vitæ concedere in solitudinem. Vnde AVGVSTINVS lib. 1. de moribus Ecclesiæ Catholicæ, cap. 31. *Quid est, inquit, quod vident qui non possunt homines non diligere, & tamen possunt homines non videre? profecto illud quidquid est, præstantius est rebus humanis, cuius contemplatione potest homo sine homine viuere.* Itaq; licet peccet contra genus humanum, qui odit societatem, non tamè peccat qui sine odio solitarius manet.

20 Locus autem Euangelij: *Nolite exire*, ad literam de aduentu Antichristi intelligitur. mysticum autem desertum, & penetralia significant Ethnicorum & Hæreticorum falsa dogmata, vt Origenes, Hieronymus & Beda scribunt in cap. 24. Matth. Hæretici enim Christum inuenire volunt in quibusdam sensibus Scripturarum planè inuiis, & desertis, quos S. Patres ne à longè quidem salutauerunt. qualis est hic ipse sensus horum verborum: *Nolite exire.* quis enim vnquam cogitasset per hæc verba prohiberi vitam Eremiticam? & tamè Magdeburgenses dicunt: *Ecce hic est Christus*, in hoc deserto,  
 30 in hoc sensu recondito, est vera verbi diuini intelligentia.

Ad illud Hebr. 10. *Non deferentes collectionem nostram*, dico Paulum accusare eos, qui ex odio, vel inuidètia non conueniebant in Ecclesiam, quia nimirum non habebant eum locum, quem cupiissent, & ideo seorsim cum paucis conuenticula faciebant. Vnde Theodoretus, & Oecumenius notant Paulum per collectionem intelligere consensionem animorum. ADDE, quod etiam Eremitæ, exceptis paucissimis, ad Ecclesiam in ipsa Eremita simul conueniebant, vt nunc etiam Carthusianos, & Camaldulenses facere videmus.



Ad SECUNDVM argumentum respondeo cum Augusti-  
no lib. 1. de moribus Ecclesiæ, cap. 31. ubi ille sic ait: *Viden-  
tur nonnullis (Anachoretæ) plusquam oporteret deseruisse res  
humanas, non considerantibus quantum nobis eorum animus in  
orationibus proficit, & ista ad exemplum, quorum corpora videre  
non sinimur.* Vnde & IUSTINIANVS loco citato dicit, im-  
perium, militiam, agros ipsos, & quidquid boni habent ho-  
mines seculares, per orationes conseruari sanctorum Ere-  
mitarum.

DICES; non sola oratio est opus caritatis à Deo præce-  
ptum, sed multa alia, vt eleemosyna, visitatio ægrotorum,  
consilium, instructio, &c. quæ Eremitæ non modo non præ-  
stant, sed etiam impotentes se reddunt ad ea præstanda. RE-  
SPONDEO, ad opera caritatis non obligantur homines pri-  
uati, nisi quando se offert occasio. hoc enim interest inter  
Prælatos, & non Prælatos, quod illi tenentur ex officio in-  
quirere, an populi sibi crediti aliqua re indigeant, at isti non  
tenentur querere, sed solum oblata occasione facere aliis,  
quod sibi fieri volunt. Et quanquam ex intentione facere se  
impotentem ad ea opera præstanda, sit peccatum, vt si quis  
ideo semper maneret domi, ne vlli pauperi occurrat: tamen  
si præter intentionem id accadat, non est peccatum.

Ad TERTIVM dico, exponere se periculo, non esse pec-  
catum; alioqui non liceret nauigare, nec præliari, &c. Sed pec-  
catum esse temerè exponere se periculo; quod faceret qui si-  
ne iusta causa, & conscius suæ debilitatis & nuditatis, cum  
viro forti, & armato congredi vellet. & similiter in rebus spi-  
ritualibus, qui solitudinem peteret sine causa, id est, sine  
proposito purioris vitæ, & non prius in cœnobio edoctus es-  
set pugnare cum Diabolo, vt Patres citati docent, nisi for-  
tasse extraordinariè Deus aliquem vocet, vt constat de Pau-  
lo primo Eremita, & aliis quibusdam.

Ad QVARTVM dico, adeo sanctos Eremitas non fuisse  
sui homicidas, vt etiam diutissimè vixerint; nam Paulus pri-  
mus Eremita vixit annos CXIII. Antonius CV. ceteri ferè  
omnes admodum senes fuerunt, vt ex collationibus Cassia-  
ni colligitur. Ostendit etiam B. Hieronymus lib. 2. contra  
Iovinianum, ex Hippocrate, & Galeno, conducere sanitati  
ieiunium. quod idem ex Antiphane medico doctissimo, de-  
monstrat Clemens Alexandrinus, lib. 2. Pædagogi, cap. 1.



Ad illud autem Col. 2. *Habeto honorem corpori*, est duplex solutio. VNA secundum Augustini explicationem in epist. 59. ad Paulinum, ubi sic explicat, quæ videntur quidem rationem habentia sapientiæ in superstitione, & humilitate, non ad parcendum corpori, non in honore aliquo ad saturitatem carnis, id est, videtur abstinentia istorum habere quædam rationes sapientiæ, licet superstitiosa sit, quia hoc facere videntur ad humiliandum cor, & castigandum corpus, non autem ad honorandum vel saturandum. hæc enim bonæ essent, si non fierent superstitiosæ; nam & Paulus ait: *Cæ-  
10* *stigo corpus meum, & in seruitutem redigo*, I. Cor. 9.

ALTERA explicatio est Hieronymi in epistola ad Algaisiam, & Chrysostomi in hunc locum, qui dicunt reprehendere eos, qui corpus non honorant. porro honor corpori debitus id requirit, ut non subtrahantur ei necessaria, neque sine utilitate vel necessitate affligatur. Eremitæ autem affligebantur quidem, sed magna cum utilitate, nec tamen necessaria sibi subtrahebant, ut patet ex longissima vita ipsorum; nam & si interdum necessaria sibi ipsi subtrahere videbantur, ut  
*20* cum ieiunabant multis diebus sine ullo cibo, tamen quia vires ad hoc faciendum ex diuino beneficio habebant, non erat illis eiusmodi cibus necessarius.

Ad QUINTVM sufficit Apologia Theodoretæ in historia religiosa, cap. 26. ubi duobus modis defendit factum Simonis, PRIMO, quia id non fecit sponte, sed quasi coactus; cum enim plurimi ad eum confluerent, eumque certatim tangerent, ut curarentur à languoribus suis, vel certè, ut sanctitatem aliquam inde perciperent; ille indignum se iudicans tanto honore, & simul ægrè ferens tantam distractionem, &  
*30* impedimentum ab oratione, excogitauit rationem illam in columna viuendi, quo nemo attingere posset.

SECUNDO dicit, id eum fecisse instinctu Spiritus sancti, qui voluit nouo illo spectaculo singularissimæ pœnitentiæ, & patientiæ excitare torporem hominum, quemadmodum quondam Prophetas suos Deus quædam facere præcepit, quæ stulta videntur; nam Isaiam iussit nudum prorsus incedere per ciuitatem, Isaiæ 20. Hieremiam cathena lignea sponte sua circumdatum, Hieremiæ 28. Ezechielem comedere panem in fimo bouino coctum, & per dies CCC. XC. dormire super latus sinistrum, & per XL. super dextrum.

*Ezechie-*



Ezech. 4. & caput, ac barbam radere, & pilos in medio foro in statera ponderare, & vnam partem cremare, alteram concidere gladio, tertiam dispergere in ventum, aliam ligare in summitate pallij, Ezech. 5. denique Ioannem Baptistam filium summi Pontificis iussit habitare cum bestiis, indui pilis camelorum, & vesci locustis.

Quod autem verè Simeon iste Dei instinctu in columna habitauerit, probat Theodoretus ex vita eius miraculis clarissima, & ex conuersione innumerabilium hominum, qui per eum Christiani facti sunt. Nam hic erat ordo vitæ eius, 10 tota nocte, & magna diei parte, id est, vsque ad horam nonam orabat, deinde verba faciebat ad eos, qui illum inuisebant; inuisebant autem tam multi, vt via quæ ad illum ducebat propter continuum euntium & redeuntium hominum concursum, perenne quoddam flumen videretur. porro his concionibus multa millia Ethnicorum ad Baptismum adduxit, sæpe etiam Iudæos & Hæreticos confutauit. Post concionem curabat agrotos, qui ordinariè adferebantur; tanta autem erat fama nominis eius propter miracula, vt ex toto orbe terrarum eò concurreretur, ex Armenia, Perside, Scythia, 20 Æthiopia, Arabia, Hispania, Gallia, Britannia.

Romæ verò in omnium officinarum vestibulis, & porticibus imagines eius visebantur, quibus Romani sibi præsidium, & opem parabant. Post curationes dirimebat lites, plurimi enim ad illam columnam, tanquam ad summum tribunal contentiones suas, & discordias diiudicandas adferebant. multa futura prædixit, quæ suo tempore impleta fuisse idem Theodoretus ibidem affirmat. Ieiunabat integram Quadragesimam sine vlllo cibo & potu; idque plusquam per annos XXVIII. continuauit. Denique, cum iam mortuus esset, adhuc stabat cadauer eius immotum, & erectum in columna, quemadmodum cum vivebat, & post sepulturam miracula creberrima, tam ad loculum reliquiarum, quam ad ipsam columnam fiebant. Porro harum rerum mirum silentium apud Magdeburgenses; nimirum hinc facile euanuiscent omnes ipsorum obiectiones.





## CAPVT XL.

## De habitu, &amp; tonsura Monachorum.



**S**EXTA Disputatio de habitu, & tonsura, de quibus duo explicanda sunt. PRIMO, antiquitas harum caerimoniarum. SECUNDO, ratio earum; nam Magdeburgenses Cent. 4. cap. 6. col. 467. loquentes de habitu, & tonsura Monachorum, dicunt esse res superstitiosas, & non conformes Scripturæ, nec vsui purioris Ecclesiæ. Caluinus quoque lib. 4. Instit. cap. 19. §. 27. videtur indicare, cœpisse vsum tonsuræ tempore Augustini, causam autem fuisse dicit, quia eo tempore soli homines effœminati, & delicati alebant comam: non autem videbatur permittendum Clericis, & Monachis, vt id facerent, quod soli faciebant lasciuiores, & molliores; postea verò corruptioribus temporibus excogitata esse mysteria, & significationes.

Quidam verò HORTENSIVS Landus librum scripsit de persecutione Barbarorum, vbi multa dicit contra tonsuram Monachorum. Et ne videatur sine Scriptura loqui, profert aliquot Scripturas Testamenti veteris. Prima est Leuit. 19. vbi Dominus ait: *Non attondebitis comam in rotundum.* Cui similis est locus Hierem. 9. vbi Dominus dicit, se dispersum omnes circumtonsos in comam. Tertia est Leuit. 21. vbi de Sacerdotibus dicitur: *Non radent caput, nec barbam.* Quarta est Ezech. 44. vbi idem habetur. Quinta in epistola Hieremix apud Baruch, cap. vlt. vbi Hieremias ridet idolorum Sacerdotes habentes caput, & barbam rasam.

Quantum igitur ad vestes, quod antiquissimum sit institutum, vt qui profitentur mundi contemptum, & pœnitentiam, singulari & notabili habitu induantur, patet primò ex DIIONYSIO, cap. 6. Ecclesiasticæ Hierarchiæ, vbi de professione Monachi loquens, ita ait: *Sacerdos, inquit, signo crucis eum consignatum tondet; omniq; veste detracta, eum alia induit, &c.* Eusebius lib. 2. hist. cap. 24. scribit ex Egesippo Iacobum Apostolum fratrem Domini nunquam induisse laneam vestem, sed sola syndone linea vsu.

ATHANASIVS in libro de virginitate ante medium, docet sanctimonialem, vt fuscam vestem & vilem gerat. BASILIVS



IVSEPIST. I. ad Gregorium multa dicit de habitu Monachi, & similiter in quæstionibus suis explicatis, q. 22. CHRYSOSTOMVS homil. 69. in Matthæum dicit, Monachos habitu imitari Heliam, & Ioannem. & libro de comparatione Regis & Monachi dicit, Monachum vno tantum amictu, instituto suo conformi, vti solere.

PALLADIUS in historia Lausiaca, cap. 41. dicit etiam virgines sanctimoniales suo tempore cucullis vti consueuisse. TERTULLIANVS libro de velandis virginibus meminit habitus Deo dicati, quo utebantur sanctimoniales.

AMBRYSIVS lib. 6. epist. 36. de Paulino loquens, qui ex magno viro in seculo, & nobili senatore Monachus factus fuerat, & eo facto multos gentilium senatorum offenderat: *Et cum ipse, inquit, capita & supercilia sua radant, si quando istis suscipiunt sacra: si forte Christianus vir attentior sacrosanctæ religioni vestem mutauerit, indignum facinus appellant.*

HIERONYMVS in epist. 4. ad Rulticum Monachum: *Vidi quosdam, inquit, qui postquam renunciauere seculo, & vestimentis duntaxat, & vocis professione, non rebus, nihil de conuersatione pristina mutauerunt.* Epistol. 13. ad Paulinum: *Tunicam,* inquit, *mutas cum animo, &c.* Et epist. 15. ad Marcellam: *Tunicam fusciolem,* inquit, *induta se repente Domino consecrauit.* Epist. 22. ad Eustochium de virginitate omnium cœnobitarum eundem fuisse habitum dicit, nimirum tunicam & sagum, quibus in vita Hilarionis addit cucullam. dicit enim vestes eius fuisse, tunicam saccam, palliolum, & cucullam. Epist. 27. ad Eustochium de obitu Paulæ loquens de sanctimonialibus: *Vnus, inquit, omnium habitus, sinteamine ad tegendas solum manus utebantur.*

AUGUSTINVS lib. 6. contra Faustum, cap. 9. dicit, peccatum esse, si vel sanctimonialis gerat ornamenta nuptiarum, vel nuptæ speciem virginum vestibus referant; & in epist. 199. ad Ediciam indicat, fuscam vestem fuisse tunc in signe continentiam profitentium.

GREGORIUS lib. 2. Dialogorum, cap. 1. meminit habitus Monachi, & lib. 3. cap. 14. meminit habitus sanctimonialis. deniq; CASSIANVS totum primum librum de institutis cœnobiorum consumit, in explicando habitu Monachorum; docens eos præscriptum habitum professioni congruentem à maioribus accepisse. ADDA duo Cœnobia; nam Gangrense



can. 11. reprehendit eos Monachos, qui ob habitum superbiebant, & contemnebant alios Christianos, qui communibus vestibus utebantur. Concilium Carthaginense IV. can. 104. distinguit habitum laicalem ab habitu religioso. De habitu Clericorum, vide Chrysostomum homil. 83. in Matth. & Hieronymum lib. 1. contra Pelagianos, ubi meminerunt candidæ vestis. Item Hieronymum in Epitaphio Nepotiani, ubi meminit sacræ tunicæ, quæ utimur in mysterio Christi.

10 IAM quod attinet ad rationem habitus monastici, ea redditur ab iisdem Patribus; nam cur vestem mutet Monachus futurus, rationem esse dicit Dionysius, cap. 6. Eccles. hierat. ut significetur vitæ mutatio. cur proprio & certo utantur religioso vestium genere, rationes duas reddit Basilus q. 22. ex diffusè explicatis. PRIMA ratio est ad designandam propriam professionem. Si enim convenit, ut aliter vestiantur senatores, aliter milites, aliter nobiles, aliter rustici, & si Paulus 1. Cor. 11. iubet virum aperto capite orare ad significandam potestatem, mulierem verò velato ad significandam subiectionem, cur non conveniet religioso certam vestem deferre ad significandum statum suum? SECUNDA ratio est, ut religiosi saltem inuiti cogantur rectè vivere. si non haberent certum habitum, non internoscerentur ab aliis. at nunc ab omnibus statim cognoscuntur & observantur, & si quid agant contra suam professionem, ab omnibus notantur, & reprehenduntur.

Cur utantur cucullis, rationem esse dicit Cassianus loco notato, ad designandam simplicitatem, innocentiamque infantilem, ad quam Monachi redire cupiunt. Infantes enim dum adhuc in fasciis, & sinu nutricis versantur, velis quibusdam quasi cucullis teguntur. Cur autem veste horrida, ut sacco, aut certè simplici, & vili utantur, causam reddunt Hieronymus & Cassianus locis notatis, tum ad agendam poenitentiam, tum ad mundi contemptum demonstrandum. Nam saccos, & asperas vestes, habitum esse poenitentium Scriptura testatur, cum inducit Achab poenitentem sacco indutum, 3. Reg. 21. & Heliam veste pilosa rectum, 4. Reg. 1. & Niniuitas sacco vestitos, Ionæ 3. & Ioannem pilis camelorum ventem, Matth. 3. & deniq; multos alios: *Circumcises in melotis, & in pellibus capris, Hebr. 11.*

Quia



Quia tamen potest quis & benè, & malè vti veste inusitata, id est, insigniter contempta, vel horrida; monet sapienter B. Augustinus lib. 2. de sermone Domini in monte, cap. 19. vt ex sola veste neminem iudicemus, sed ex aliis eius operibus discamus, vtrum id faciat contemptu superflui cultus, an ambitione aliqua, & simulatione sanctitatis. Potest enim sub ouina pelle lupus latere, nec tamen debet ouis deponere pellem suam, quia sub ea aliquando lupus delitescit.

Nunc ad tonsuræ antiquitatem ostendendam, habemus in primis Dionysium eodem cap. 6. Eccles. hierarch. vbi clarè dicit, Monachum futurum primum tonderi. Deinde, indui alia veste, priore abiecta. Habemus DEINDE Anicetum in epistola ad Gallos, vbi iubet radi caput in modum spheræ.

TERTIO, Athanasium in libro de virginitate, Palladium in historia Lausiaca, cap. 41. & Hieronymum in epistola ad Sabinianum Diaconum, qui testantur etiam sanctimoniales tonderi consueuisse.

QUARTO, Epiphanium hær. 80. & Augustinum de opere Monachorum, cap. vlt. qui acriter reprehendunt quosdam Monachos crinitos, qui tonderi more aliorum nolebant.

QUINTO, Hieronymum & Augustinum, qui coronæ sacerdotialis meminerunt. Hieronymus in epist. ad Augustinum, quæ est 26. inter epist. Augustini: *Fratres tuos Dominum meum Alipium, & Dominum meum Euodium, Si meo nomine salutes, precor coronam tuam.* Augustinus in epistola ad Proculianum Episcopum 147. *Per coronam nostram nos adiurant vestri, per coronam vestram vos adiurant nostri, &c.*

SEXTO, Isidorum lib. 2. de officiis diuinis, cap. 4. & secundam lib. 5. historie Anglorum, cap. 22. quorum prior ab Apostolis dicit institutam esse tonsuram & coronam Clericorum, & Monachorum, posterior dicit S. Petrum omnium primum gestasse coronam capillorum, toto reliquo capite detonso, & ad eius imitationem omnes Clericos & Monachos idem suscepisse.

SEPTIMO, Iustinianum, qui in authenticis collo. t. 7. tit. 5. cap. 2. & 3. distinguit tonsuram Monachorum novitiorum, quam Laicorum tonsuram vocat, à tonsura professorum.

OCTAVO, Concilia; nam Concilium Carthagen. IV. can. 44. prohibet Clericos alere comam aut barbam. Concilium Toletanum IV, can. 40. iubet, vt omnes Clerici toto



capite detonso, solum circulum capillorum supra aures relinquant. ex quo apparet, olim eandem fuisse coronam Clericorum & Monachorum: sed Monachi quidem seruauerunt antiquam consuetudinem, Clerici verò magna ex parte illam mutauerunt.

Vt autem ad rationem tonsuræ veniamus. PRIMVM falsa est Caluini ratio; nam quòd tempore Augustini non solum aliqui dissoluti comam gestarent, sed multi alij probi homines, idque sine peccato facerent; ex eo patet, quòd penitentes iubeantur tondere caput in signum doloris, & penitentię, vt patet ex Concilio Agathensi, can. 11. & Toletano III. can. 12. & præterea non solum Clerici, & Monachi tondentur, sed ita tondentur, vt corona capillorum appareret, quod certè non erat in communi vsu Laicorum.

ALIA ratio redditur ab Isidoro lib. 2. de officiis diuinis, cap. 4. quòd nimirum Monachi tondentur ad imitationem Nazaræorū, qui in die consecrationis sue tondentur, vt dicitur Num. 6. Nazaræi enim sunt Monachi Testamenti veteris. At hæc ratio non mihi probatur, siquidem Nazaræi tunc solum tondentur, cum desinebant esse Nazaræi, insignēq; illorum erat longa casaries, vt ex eodem cap. 6. Numeri patet. Immo EPIPHANIUS hæresi 80. probat Monachos nostros debere esse tonsos, quia gerere comam longam, est proprium Nazaræorum Testamenti veteris. Sicut etiam Augustinus libro de opere Monachorum, prope finem dicit, Patres Testamenti veteris meritò gestasse longos capillos, quia mysteria redemptionis nondum reuelata erant. Idem enim significabant velamen positum in facie Moysis, & coma longa Sanctorum. At nunc posteaquam Christus apparuit, conuenit, vt qui Christo sunt consecrati, contrarium significant ablatione comarum. & hæc potest esse ratio prima nostræ tonsuræ.

SECUNDAM reddit Beda lib. 5. hist. cap. 22. ad exprimendam imaginem spinę coronę Christi; vt enim omnes Christiani signo crucis ornantur, ita par erat, vt Clerici & Monachi, qui specialius Christum patientem imitari volent, speciali signo ornarentur.

TERTIAM & QUARTAM rationem reddunt Isidorus lib. 2. cap. 4. de officiis, Rabanus lib. 1. de instit. Clericorum, cap. 3. & Hugoli. 2. de Sacramentis, part. 3. cap. 1. dicunt enim tonderi



tonderi capillos, qui sunt superflua quædam corporis partes, ad significandum, debere Clericos & Monachos omnia superflua, & præcipue vitiosas cupiditates amputare, vt sic maneat vertex, id est, animus liber, & apertus diuinis contemplationibus, & illustrationibus: & rursum sic tonderi dicunt, vt relinquatur circulus capillorum, ad significandam regiam coronam, quando quidem seruire Deo regnare est.

QVINTAM reddit Dionysius, cap. 6. Eccles. hierarch. vt significetur illa nudatione capitis, vita pura & aperta, non fucata vlla specie, quam Monachus exhibere debet.

Posset addi SEXTA ratio tonsuræ Monachorum, nimirum vt signum esset pœnitentiæ, & conuersionis; nam, vt antè diximus, pœniteres olim non nisi tonsi recipiebantur. Porro tonsuræ sanctimonialium rationem moralem reddit Hieronymus in epistola ad Sabinianum, quia nimirum non lauabant vnquam, nec vngebant caput; & periculum erat, ne à paruis animalibus, quæ inter cutem & crines oriuntur, & concretis sordibus opprimerentur. Quanquam negari non potest, quia etiam id fiat ad contemptum mundi demonstrandum; solent enim sceminæ capillos plurimi facere.

Est autem hoc loco obseruandum, olim non tam rasuram, quam tonsuram fuisse in vsu. tondabantur enim demissè quidem, sed ita tamen, vt cutis recta maneret. Id apparet ex CLEMENTE Alexandrino lib. 3. pædagog. cap. 11. *Sed pilis, inquit, tondendi sunt, non nouacula, sed tonsorum forficibus.* Item ex OPTATO Mileuitano, qui lib. 2. contra Parmenianum arguit Donatistas, quod Catholicis Sacerdotibus, per vim capita raserint: *Docere, inquit, & vobis mandatum sit, raderè capita Sacerdotibus, cum è contrariis sint exempla proposita, fieri non debere.* Item ex HIERONYMO in cap. 44. Ezechielis, vbi dicit Sacerdotes non debere comam alere, nec tamen radi, sed ita tonderi, vt cutis recta maneat. Denique Dionysius, Epiphanius, Hieronymus, Athanasius, Palladius, Augustinus, Isidorus, Beda, & Concilia Carthaginense & Toletanum, nusquam nominant rasuram, sed solum tonsuram. Vnus est Anicetus Papa, qui, vt dixi, rasuræ meminit, sed non est ea epistola prorsus indubitata; fortè enim falsum titulum præ se fert. Nec tamen propterea reprehendimus vsus huius temporis, quo Monachi & Clerici raduntur; nam nec vnquam fuit prohibitum radi, & præterea eiusmodi



carimoniarum, pro temporum & locorum diuersitate, variari possunt.

Ad argumenta HORTENSII respondemus, inprimis præcepta illa esse carimonialia, & propterea non magis obligare, quam obligent circumcisio, sacrificia, &c. Dico præterea primum & secundum locum ex Leuit. 19. & Hierem. 9. nihil concludere; nam vt rectè notauit Ifichius in hunc locum, tondere comam in rotundum, non est comam scindere, sed ornare. Itaque prohibebat Deus Iudæis, ne comam rotundam  
 10 efficerent, quod certè Monachi non faciunt, qui comam radunt, vno circulo capillorum excepto. Neque hoc Deus absolute prohibebat, sed solum propter intentionem malam, nimirum ne hoc facerent in cultum demonis, vt eo tempore & in iis locis gentiles faciebant, vt notant Theodoretus q. 28. in Leuiticum, & Ifichius, ac Radulphus in hunc locum.

Ad tertium Leuit. 21. dico, ibi non præcipi Sacerdoti, ne radat caput absolute, sed ne radat in morte alicuius propinqui sui, in signum doloris, voluit enim Deus Sacerdotes esse ceteris constantiores.

20 Ad quartum Ezech. 44. dico, Sacerdotibus Iudæorum fuisse prohibitam rasuram, non quòd in se mala sit, sed ne viderentur similes Sacerdotibus gentilium, in quorum vicinia habitabant, qui toto capite raso idolis sacrificabant, vt ex epist. Hieremie apparet. Quod ex se non esset malum, patet, quia Ezechiel, qui Sacerdos erat, iubetur à Deo radi. Ezech. 5. & præterea Numer. 6. Nazareus completo tempore consecrationis suæ iubetur radi. Vnde Paulo dicit Iacobus Act. 21. *Sunt nobis viri quatuor, habentes votum super se, his ergo assumptis sanctificare cum illis, & radant capita sua.* Solum ergo propter viciniam idololatrarum prohibebantur Sacerdotes Iudæorum radi. quæ fortè causâ erat, cur Optati, Hieronymi, & Ambrosij tempore Christiani Sacerdotes non raderentur, sed ronderentur; nam adhuc ipsorum tempore erant Sacerdotes Isidis, qui caput radebant, vt Ambrosius epistola 36. & Hieronymus in caput 44. Ezech. testantur. posteaquam autem illa causâ cessauit, nihil absurdi faciunt, qui ad aliquid sacrum significandum caput radunt.

Ad vltimū dico, Hieremiam non ridere illos Sacerdotes, quia radebant caput, & barbam, sed quia id faciebant in honorem Deorum ligneorum, qui non poterant remunerare cultores suos.



CAPVT XLI.

*Licere Monachis manibus laborare.*

**R**ESTAT postremò Disputatio de ratione viuendi, siue de opere corporali Monachorum. Sunt autem quatuor modi viuendi apud homines religiosos. Vel enim viuunt ex labore proprio, vendentes aliquid, & ementes aliud: vel viuunt ex bonis suis communibus, id est, ex bonis quæ religiosi ipsi ad monasterium adferunt, & in commune constituunt: vel ex bonis relictis ac donatis à pijs viris: vel ex mendicatione.

De singulis dicendum est. AC PRIMVM, de primo duofuerunt extremi errores. VNVS eorum, qui dicebant non licere religiosis operari, & laborare pro victu, sed debere eos considerare in Dei prouidentia, & viuere ex alienis laboribus, huius erroris fuerunt Messaliani, siue Euchitæ, apud Epiphanium hæ. 80. & rursus quidam apud Carthaginem, teste Augustino lib. 2. retract. cap. 21.

ALTER error fuit Gulielmi de sancto amore, & postea 20 Ioan. VViclefi apud Thomam VValdensem lib. 4. doct. fidei antiquæ, art. 2. cap. 22. & Ioannis Caluini lib. 4. Instit. cap. 13. §. 10. qui docent teneri Monachos ex proprio labore viuere, quanquam Gulielmus non omnes religiosos obligabat ad laborandum manibus, sed eos solum, qui non habent bona stabilia in communi. PRIMVS error natus est ex duobus locis Scripturæ malè intellectis, nimirum Matth. 6. *Nolite solliciti esse anima vestra, dicentes, quid manducabimus, &c.* Et Ioan. 6. *Operamini non cibum qui perit, sed qui permanet in vitam æternam.* Refellit hunc errorem Augustinus in libro de opere Monachorum, ex verbis Apostoli 2. Thessal. 2. vbi & se laborasse, & operatum dicit, ne quenquam grauaret, & alios monet, vt operentur, & laborent.

Quia verò respondebant hæretici illi, B. Paulum loqui de opere spiritali, id est, de oratione & exhortatione; notanda sunt alia loca, vbi expressè ponitur labor manuum, Actor. 20. *Ad ea, quæ mihi opus erant, & his, qui mecum sunt, ministraverunt manus istæ.* Ad Ephes. 4. *Qui furabatur, iam nõ furetur, magis autem laboret operando manibus suis.* 1. Thes. 4. *Operamini manibus vestris.* Ad hæc, vt acutè notauit Augustinus idem



Apostolus 1. Cor. 9. dicit se operatum, cum tamen liceret sibi secundum Domini ordinationem non operari. At certè non licebat ei secundum Domini ordinationem non concionari, & non orare. Ait enim: *Si non euangeliz. auero, & mihi, &c.* Loquitur igitur de corporali labore, cum dicit se laborasse, cum tamen non teneretur.

Ad verba illa Domini contrà citata, respondeo, non prohiberi illis verbis moderatam sollicitudinem quærendi cibum proprio labore, sed immoderatam & superfluam. 10 **P**rotest autem tribus modis esse immoderata sollicitudo. **P**rimo, ratione finis, ut si quis quærat cibum præcipua intentione, quasi sit ille vltimus finis, ut faciunt qui euangelizant, ut comedant; cum deberent comedere, ut euangelizent. Atque hoc reprehendit Dominus Matth. 6. cum ait: *Primum quaerite regnum Dei, &c.* Et Ioan. 6. *Operamini non cibum, qui perit, sed qui permanet in vitam æternam*, id est, primaria intentione quaerite cibum spirituales, secundaria corporalem.

**S**ecundo, ratione diffidentia immoderata est sollicitudo, ut cum quis aded sollicitus est de rebus temporalibus, 10 ut vix possit credere sibi Deum ad futurum in illis acquirendis, etiam si adhibeat ipse quoque suum laborem. Et hoc reprehendit Dominus cum ait Matth. 16. *Nolite solliciti esse, &c.* Vult enim persuadere fidelibus confidentiam in Deum; & sanè persuadet efficacissimis argumentis; nam si Deus, inquit, pascit aues, & vestit lilia, quæ cum non norunt, immodè etiam prouidet Gentilibus, qui eum blasphemant; quomodo vobis cultoribus suis poterit deesse? & si vobis corpus & animum donauit, quæ maiora sunt; quomodo credibile est non daturum cibum & vestes quæ sunt minora?

10 **T**ertio, immoderata est sollicitudo ratione temporis, ut cum quis hodie sollicitus est pro eare, pro qua satis tempestiuè cras inciperet sollicitus esse. & hoc reprehendit Dominus cum ait ibidem: *Nolite solliciti esse de crastino. Sufficit diei malitia sua.* Vbi notandum, non reprehendi prouidentiam parandinecessaria pro tempore futuro, alioqui peccasset Ioseph. Gen. 41. qui recondidit frumenta pro futura sterilitate: etiam Dominus ipse habebat oculos, ut emeret cibos, Ioan. 13. Itaq; vocatur sollicitudo de crastino, & mala est illa, quæ non conuenit præsentì tempori secundum rectam rationem.



CAPVT XLII.

*Non teneri Monachos ad laborem manuum.*

**S**ECUNDVS error tria affert præcipua fundamenta. VNUM ex Apostolo, qui Ephes. 4. 1. Thes. 4. & 2. Thes. 3. præcipit Christianis, vt ex labore manuum victum quærant. ex quibus locis tale argumentum duci potest: vel ista verba B. Pauli continent præceptum necessitatis, vel cõsiliũ perfectionis. si primum, ergo tenentur laborare etiam religiosi; si secundum, ergo tenentur saltem religiosi, illorum enim est viam perfectionis & consiliorum tenere.

SECUNDVM fundamentum est ex AVGVSTINO, qui in lib. de opere Monachorũ dicit religiosos teneri ad hoc Apostoli præceptum implendum, nec excusari per occupationes spirituales. Sic enim ait, cap. 17. *Quid, inquit, agant, qui operari corporaliter nolunt, cui rei vacent, si re desidero. Orationibus, inquit, & psalmis, & lectio, & verbo Dei. Sancta plane vita, & in Christi suauitate laudabilis: sed si ab his auocandi non sumus, nec manducandum est, nec ipsa esca quotidie præparanda. Et possint apponi & assumi. Si autem ad istas vacare seruus Dei certis interuallis temporis ipsius infirmitatis humanae necessitas cogit, cur non & Apostolicis præceptis obseruandis aliquas partes temporum deputamus? citius enim exauditur & obediens oratio, quàm decem millia contemptoris.*

TERTIVM fundamentum est ex consuetudine omnium antiquarum religionum; nam Epiphan. hæres. 80. Hieron. epist. 4. ad Rusticum, Augustin. lib. 1. de morib. Eccl. cap. 31. Cassian. lib. 2. cap. 3. & lib. 3. cap. 2. de institutis cœnobiorum, docent omnia monasteria bene instituta, secundum Apostolum, *in legem manibus laborare.*

His non obstantibus, respondemus cum B. Thoma, in opusculo 19. & in 2.2. quæst. 187. articulo 3. & B. Bonauentura in libro de paupertate Christi, & in Apologia pauperum: Ad victum labore manuum quærendum non magis teneri Monachos, quàm seculares. & probatur PRIMO, vel laborare manibus est præceptum, vel consilium. Si primum, omnes obligat, tam seculares, quàm religiosos. Præcepta enim dantur omnibus, omnibus enim dicitur: *Si vis ad vitam ingredi, serua mandata.* Si secundum, ergo nemo tenetur laborare mani-



manibus, nisi qui spontè ad huius consilij obseruationem se obligauerit; talis enim est natura omnium consiliorum: ergo religiosi qui id consilium non receperunt, non tenentur manibus laborare. Non enim tenentur religiosi ad omnia consilia, sed solùm ad illa, quæ spontè suscipiunt.

SECUNDO, si tenerentur religiosi laborare manibus, magis quàm seculares, aut id esset ex præcepto naturali, aut expositiuo; neutrum autem dici potest: quod enim non expositiuo, patet, quia nullum tale exstat. quod enim ex naturalibus, <sup>10</sup> probatur; Nam præceptum de laborando, ut est naturale, dupliciter obligat, vno modo absolutè, alio modo in certo casu. PRIMO modo non obligat singulos, sed Rempub. ut patet; debent enim in ea alij esse opifices, alij agricolæ, alij medici, alij iudices, &c. & ex hac parte non conuenit religiosi laborare manibus, illi enim officium habent in Repub. orandi, & psallendi, & similia faciendi. SECUNDO modo tenentur quidem singuli hoc præcepto, sed non minùs seculares, quàm religiosi: nam omnes casus in quibus obligantur singuli laborare manibus, non minus accidere possunt secularibus quàm religiosis; verbi gratia, vnus, & præcipuus casus est, si quis nihil habeat vnde viuatur, nec possit licitè habere, nisi operando. Alius casus est, si quis teneatur providere alteri de cibo, & non possit licitè eum inuenire nisi operando. Tertius est, si quis non possit ocium fugere, vel tentationes carnales superare, nisi operando corporaliter. At omnes tam religiosi, quàm seculares tenentur providere, ne moriantur fame, & ocium fugere, ac superare tentationes. omnes igitur tenentur eodem modo laborare.

<sup>30</sup> TERTIO probatur ex illis ipsis argumentis, quæ contra nos proferuntur. Nam in primis Apostolus, in illis locis non scribit Monachis, sed secularibus, ut patet, & præcipuè iuxta opinionem aduersariorum, qui docent nondum illo tempore coepisse religiones. Deinde Apostolus in illis locis nunquam præcipit operari absolutè, sed solùm ad euitandum futurum, vel scandalum, vel ocium, nam Ephes. 4. ait: *Qui fuerat fur, iam non furetur, magis autem laboret operando manibus suis.* Et 1. Thessalon. 4. posteaquam dixerat, ut operarentur, subiungit rationem: *ut honestè ambuletis ad eos, qui foris sunt, & nullius aliquid desideretis.* Vbi illud, *desideretis*, non significat concupiscatis, sed careatis. Sicut enim est in Græco,



καὶ μηδεὶς χρεῖαν ἔχῃ, id est, & nullius indigentiam habeatis. Scandalizabantur enim infideles, cū videbant Christianos ex alienis bonis velle vivere. Et 2. Thess. 1. postquam dixerat: *Qui non laborat, non manducet.* Subdit: *Audimus enim quosdam inter vos inquietos esse, nihil operantes, sed curiosè agentes.* Qui ergo possunt furtum euitare, & scandalum, & ocium, alio modo quàm corporaliter operando, eos Paulus non obligat corporaliter operari.

Iam verò B. Augustinus in illo lib. de opere Monachorū, solū obligat ad operandum manibus illos, qui antequam religiosi fierent, ex labore manuum vivebant, & nunc idem facere possunt, sine impedimento maioris boni, & tamen ex ocio, & pigritia nolunt; Nam cap. 21. excipit religiosos, qui Ecclesiastica ministeria exercent, quales sunt hoc tempore omnes mendicantes. Sic enim ait: *Si Evangelistæ, inquit, sunt, si ministri altarū, si dispensatores Sacramentorū, bene sibi istam non arrogant, sed planè vendicant potestatem, nimirum sumentes facultates populi.*

DICES; potestas petendi sumptus à populo, non est data nisi ordinariis pastoribus: alioqui possent religiosi accipere decimas, quod est falsum, & contra canones multos, vt Clementinā prima de decimis.

RESPONDEO; quidquid de hoc sit, quod postea videbimus, satis nobis est, quod Aug. hoc dicat. de cuius sententia disputamus, & præterea siue religiosi prædicantes, & Sacramenta ministrantes, possint ex iustitia sumptus petere, siue non possint, satis est quod licitè possint petere saltem ex caritate, & accipere corporalia; sicut ipsi ex caritate ministrant spiritualia, & populus accipit. ADDE etiā, quod religiosi huiusmodi rectè dici possunt operari manibus suis. Operari enim manibus est operari corporaliter, siue id fiat manibus, siue pedibus, siue lingua, siue alio modo: appellatur autè opus corporale, opus manuum, quia manus est instrumentū præcipuum, quo operamur. Vnde etiā aurigæ, & nautes, & cursores, & vigiles dicuntur operari manibus, quia corporaliter exercentur, licet nō minùs pedibus quàm manibus in suo opere utantur. Qui ergo canunt in choro publicè, concionantur, docent, confessiones audiunt, planè manibus laborare dici possunt.

Itaque soli contemplatiui, qui sibi ipsis vacant, manibus non laborant. Inter illos autem excipit Augustinus ab obli.



obligatione laborandi illos omnes, qui in seculo diuites fuerunt, & bona sua pauperibus dederunt. Illis enim debet Ecclesia victum, & vestitum, quando quidem omnia sua ipsi Ecclesie in eius pauperibus dederunt. Sic enim ait de istis loquens, cap. 25. *Si & ipsi, inquit, aliquid manibus operentur, & peregrini ex sint humilioribus, & ab hac exercitatione venientibus auferant excusationem, multo misericordius agunt, quam cum omnia sua indigentibus diuiserunt. quod quidem si nolunt, quis audeat cogere?* & cap. 21. tales multos fuisse dicit in Hierusalem, qui quoniam omnia sua pauperibus dederant, quando tempore famis egebant, non sunt coacti operari manibus, sed eorum inopia eleemosynis Græcorum sustentata est, Act. 11. soli ergo remanent illi religiosi, qui in seculo vivebant ex officio, & in religione sibi solis vacant, non populo. Hos Augustinus obligat ad laborandum.

Sed nec istos obligat absolute, sed solum quando, si operentur, non impediuntur a maiori bono, & si non operentur, perniciosè ociosi erunt; nam si aliquis talis possit perpetuo orare, aut legere, & velit id facere, & inueniat qui eum in tali opere versantem gratis alat, cur non poterit id facere? nam hoc modo vixit per triennium B. Benedictus, ut Greg. testatur lib. 2. dialog. ca. 1. & tota vita sua B. Alexius, ut in eius vita scribit Simeon Metaphrastes.

Vnde Augustinus, cap. 17. eiusdem libri, ubi dicit Monachos non debere excusari ab opere manuum per orationem, psalmodiam, lectionem, & verbum Dei; clarissimè indicat se loqui non de oratione assidua, nec de continua, & publica psalmodia, lectione, vel concione, quæ totum hominem occupant, sed de oratione, psalmodia, lectione, & exhortatione priuata, & rara, quæ multum ocij relinquunt. Et cap. 21. dicit se reprehendere illos Monachos, qui ex conditione feruili ad monasterium veniunt, ut vitam inopem, & laboriosam fugiant, & vacui pascantur ac vestiantur, & insuper honorentur ab iis, à quibus contemni conteri que consueverant, de quibus etiam dicit, cap. 25. *Nullo modo decet, & in ea vita, ubi sunt senatores laboriosi, ibi stant opifices ociosi, & quod veniunt relictis deliciis suis, qui fuerant pradiorum Domini, ibi sint rustici delicati.* Et cap. 28. ait: *Ostendite, inquit, hominibus non vos in ocio facilem victum, sed per angustam & arctam portam regnum Dei querere.*



Ad argumentum TERTIVM de consuetudine antiquorum monasteriorum dico, Monachos illos fuisse obligatos operari manibus ex propriis regulis suis. Cur autem eiusmodi regulam constituerint, causa est duplex. VNA, quia non poterant aliter sustentari; nam nec habebant prædia, & possessiones sibi relictas, vt nunc habent multi Monachi; & eleemosynas à populo petere, nec audebant, cum populo non seruirent, nec vlllo modo id suffecisset; nam vno in loco, sub vno Abbate debebant terna, vt minimū hominum milia, vt Augustinus refert lib. i. de moribus Ecclesiæ, cap. 31.

ALTERA ratio est, quia illi Monachi cum non essent Clerici, sed Laici omnes, excepto Abbate, non erant satis occupati, & idè ad fugiendum ocium necessarium erat illis laborare. Hieronymus in epist. 4. ad Rusticum: *Aegyptiorum monasteria hunc morem tenent, vt nullum absq; operis labore suscipiant, non tam propter victus necessitatem, quàm propter animæ salutem, ne sagetur perniciosæ cogitationibus mens, &c.* Nec tamen absolute est verum, omnes antiquos religiosos manibus laborasse. Sic enim scribit de monasterio S. Martini Sulpitius in vita S. Martini, cap. 7. *Nemo ibi quidquam proprium habebat: omnia in medio conferebantur, non emere, aut vendere, vt plerisq; Monachis moris est, quidquam licebat. ars ibi, exceptis scriptoribus, nulla habebatur. Cui tamen operi minor ætas deputabatur: maiores orationi vacabant.* Hæc ille. Vbi vides solos iuniores laborasse manibus, eosque non ad victum quærendum (nam nihil eis vendere licebat, sed vivebant ex bonis, quæ attulerant) sed ad ocium fugiendum. Sed nec primi Monachi sub Apostolis in Hierusalem, aut in Ægypto operabantur manibus, vt patet Act. 3. & 4. & ex lib. Philonis de vita contemplatiua.

### CAPVT XLIII.

*Licetum esse Monachis viuere ex bonis patrimonialibus in communi.*

**D**E SECVNDO modo viuendi nulla potest esse dubitatio; nam in primis talis fuit vita primorum religionum sub Apostolis, cap. 4. Act. vnusquisque enim adferebat precia suarum rerum Apostolis,



stolis, & inde diuidebatur cuique, sicut cuiq; opus erat. Deinde talis etiam fuit vsus antiquorum monasteriorum, vt reciperent, si quid ij in commune dare volebant, qui Monachis fiebant, vt patet ex Augustino, in epistola 109. ad Sanctimoniales, vbisic ait: *Qua aliquid habebant in seculo, quando ingressa sunt monasterium, libenter & elint illud esse commune.* Item sermone 2. de communi vita Clericorum: *Viuunt, inquit, nobiscum in societate communi, & nemo eos distinguit ab eis, qui aliquid attulerunt.* Et libro de opere Monachorum, cap. 25, ided dicit, diuites non teneri ad opus manuum, quia monasterio sua bona contulerunt.

B. BENEDICTVS, vt in vita S. Placidi legitur: *Bona quae fuerant Monachorum suorum, non sinebat alio deriuari, quam ad sua monasteria, & inde multos Dei seruos alere posset.* B. BENARDVS epist. 1. ad Robertum: *Ostenditur, inquit, terra quae cum illo, & pro illo dicitur, data fuisse.*

Denique hinc natae sunt illae leges Iustiniani, in authenticis collat. 1. const. 5. §. illud quoque, & collat. 9. constit. 15. §. Si quamulier. In quibus statuitur, bona eorum, qui Monachi fiunt, eo ipso ad monasteria, quae illi ingrediuntur, pertinere. quanquam hoc tempore multae religiones huic privilegio renunciarunt.

## CAPVT XLIV.

*Licetum esse Monachis viuere ex rebus sponte oblatiis & donatis.*

**D**E TERTIO modo nulla quaestio esse deberet, nam B. AVGVSTINVS in Psalm. 103. conc. 3. explicans illud: *Cedri Libani, quas plantauit, illic passeret nidificabunt.* dicit cedros esse homines potentes, & diuites; passeret autem esse religiosos pauperes. nidificare vero passeret in cedris, significare, quod religiosorum monasteria a diuitibus huius seculi eriguntur, & sustentantur: *Cedri Libani,* inquit, *nobiles & diuites, excelsi huius seculi, quando cum timore audiunt; Beatus qui intelligit super egenum & pauperem, attendunt res suas, villas suas, & omnes superfluas copias, quibus videntur excelsi, & praebeant illas seruis Dei, dant hortos, aedificant Ecclesias, monasteria, colligunt passeret, & in cedris Libani*



*Pani nidscent.* HIERONYMVS in epist. 27. ad Eustochium de obitu Paulæ, laudat sanctam Paulam, quod ex rebus suis quatuor monasteria ædificasset, & sustentasset, vnum Monachorum, & tria sacrarum virginum. GREGORIUS Papa, vt lib. 1. cap. 5. & 6. vitæ eius scribit Ioannes Diaconus, ex patrimonio suo septem monasteria erexit, & singulis prædia, & possessiones attribuit, sex in Sicilia, vnum Romæ. Similia exempla Caroli Magni, Caroli I V. Henrici II. & aliorum optimorum Principum, plurima adferri possent.

CAPVT XLV.

*Licere Monachis ex mendicatione viuere.*

**I**DEO QUARTO præcipua est difficultas. Oppugnaverunt enim acerrimè ordines mendicantium. PRIMO, Gulielmus de sancto amore apud Antoninum parte 4. tit. II. cap. 7. §. 5. summæ Theologica. SECUNDO, Desiderius Longobardus apud B. Thomam in opusculo 19. TERTIO, Gyraldus de Abbatis villa apud Bonauent. initio Apologiæ pauperum. QUARTO, Ioannes VViclef apud VValdensẽ lib. 4. art. 2. doctrinalis fidei. QUINTO, Richardus Episcopus Armacanus serm. 4. VLTIMO, Lutherus articulo ultimo, & Brentius in Confessione VVirtemberg. cap. de votis monasticis, qui omnes docent, esse extra statum salutis eos, qui redigunt seipso spontè ad mendicitatem, tum quod exponunt se euidenti periculo moriendi fame, tum quod non liceat eos, nisi fortè ægrotent, elemosynas petere, quæ debentur solum iis, qui seipso iuuare nequeunt, tum denique quod lex diuina & humana reprehendat, & prohibeat voluntariam mendicantem.

At nihilominus vitam religiosorum mendicantium tanquam sanctam & perfectam approbarunt multi summi Pontifices; vt Innocentius III. teste Bonauentura, Honorius III. Gregorius IX. Innocentius IV. Alexander IV. & Nicolaus IV. vt refert Ioannes XXII. in extrauaganti, Quia quorundam, de verborum significatione, necnon Concilium Lugdunense generale, vt refert Nicolaus IV. cap. Exiit, de verborum significatione in 6. & Constantiense sess. 8.

Rectè autem fuisse hanc vitam approbatam, ostendimus sequen-



sequentibus rationibus. PRIMO, exemplo Domini; nam Dominus non habuit possessiones, neque proprias, neque communes, ut patet ex illo Lucæ 9. *Vulpes foveas habent, & Soluces cœlivos, Filius autem hominū non habet sibi caput suum reclinet.* Et quod nō operaretur manibus, sed ex elemosynis fidelium vixerit, patet ex illo Lucæ 6. *Mulieres aliquam ministrabant ei de facultatibus suis.* Item ex tota eius vita, siquidem natus est in domo aliena, vixit in domibus & ex rebus alienis; nunc enim prandebat apud Martham, nunc apud Simonem leprosum, nunc apud Zacheum, nunc in domo Petri, nunc in domo Matthæi; equitavit in iumento alieno; fecit ultimam cœnam in domo aliena; sepultus est in sepulcro alieno. Vnde Psalm. 39. dicit: *Ego autē mendicus sum & pauper.* Et Psalm. 108. *Quia persecutus est hominem in opem & mendicum.* Quibus in locis est vox מְדִינָה, quæ habetur etiam Deuter. 15. ubi dicitur: *Non erit in te mendicus.* Quem locum pro se adferunt, qui dicunt, illicitam esse mendicitatem. & certum est utrumque Psalmum de Christo intelligi; nam priorem allegat Paulus ad Hebræos 9, de Christo: *In capite libri scriptum est de me, &c.* Et posteriorem allegat Petrus Act. 1. *Scriptum est enim in libro Psalmorum, Episcopatum eius accipiat alter, &c.* Item 2. Corinth. 8. *Propter vos egenus factus est, cum esset dives.* Græcè ἐπὶ ὧχευρε, significat enim ἐπὶ ὧχεω, mendicare, vnde apud Homerum Odys. 17. δαίτω ἐπὶ ὧχευρε, prandium mendicare.

Ad hoc respondent Armacanus, Christum fuisse pauperem, sed non mendicum, & pauperem non amore paupertatis, sed quia restrictio dominij eius id exigebat. Dicit enim Christus successisse Adamo in dominio originali, cui repugnabat tam habere proprium, quàm mendicare; Adamus enim in statu innocentie fuit dominus omnium bonorum terrenorum, sed ita tamen, ut non posset accipere in usum suum, nisi necessaria, nec sibi aliquid appropriare; divisio enim nata est post peccatum. Itaque in statu innocentie non fuissent propriæ diuitiæ, nec tamen fuissent ulli egeni, vel mendici. Quoniam ergo Christus natus est cum iustitia originali, habuit etiam tale dominium, quale Adam, & ideo repugnabat illi habere proprium, & simul repugnabat mendicare, cum omnia essent sua, quantum ad vltimum, tamen fuit restrict-



restrictum dominium eius, quia debuit esse sub lege; & sic fuit pauper, quia non potuit uti suo naturali dominio, obstante lege civili.

Hæc omnia sunt contra apertas Scripturas, & primum, quod Christus verè fuerit mendicus, & caruerit non solum usu, sed etiam dominio temporali rerum terrenarum, patet, quia dominium illud originale in bona cōmunia, periit per diuisionem rerum iuste introductam. Nec Dominus accepit dominium politicum more humano, licet dominium diuinum semper habuerit. Itaque fuit verè mendicus, ut ex Psalmis, & ex Apostolo ostendimus. Fuit etiam verè Dominus, saltem in communium suis discipulis, eorū bonorum, quæ illi ut mendico donabantur. Quod enim Christus acciperet dominium civile, & proprietatem, saltem in communium Apostolis, earum pecuniarum, quæ sibi donabantur, patet ex Ioan. 12. ubi dicitur Iudas fur, quia usurpabat sibi pecunias loculorū Christi. At si Christus non habebat proprietatem, nec dominium civile, non erat furtum illud Iudæ; nam per solum dominium naturale non magis pertinebant ad Christum illæ pecuniæ, quàm aliæ res omnes.

Denique, quod Christus amore paupertatis, & non ex restrictione dominiij fuerit mendicus, planum est; nam quis illum coëgit fieri sub lege? nōne spontè id ipse elegit? quod certè poterat non eligere, si odisset paupertatem. Præterea etiam existens sub lege, nōne poterat facillè ditescere si voluisset? nōne turbæ illum Regem facere voluerunt? cur ergo non habuit, ubi caput reclinaret, & spontè non habuit, si non amabat paupertatem? denique cur Paulus 2. Cor. 8. vocat istam gratiam Domini, si non ex amore, sed ex necessitate fuit egenus.

Dicit SECUNDO Armacanus, si Christus mendicasset, non propterea licere nobis mendicare. Esset enim hoc ponendum inter opera admiranda, non imitanda, sicut quod ieiunauerit XL. diebus sine vlllo cibo. At mendicare, sine vlllo miraculo fieri potest, ut experientia docet: ieiunare autem sine omni cibo, non potest sine miraculo. Ad hæc, non consuluit Christus, ut se imitaremur ieiunando sine omni cibo, consuluit autem ut se imitaremur mendicando, cum ait Matth. 19. *Si quis perfectus esse, vende omnia quæ habes, & da pauperibus, & sequere me.*



SECUNDO probatur, exemplo Apostolorum; nam illi omnia dimiserunt, Matthæi 19. *Ecce nos reliquimus omnia.* Nec habuerunt possessiones in communi, vt patet Matthæi 10. *Nolite possidere aurum, neque argentum in zona, nec duas tunicas, &c.* Nec operabantur manibus, sed viuebant ex liberalitate eorum, quibus prædicabant, vt patet ex eodem c. 10. Matthæi, & 1. Corin. 9. Talis autem est vita mendicantium. Vnde S. Franciscus, qui cum sancto Dominico primus auctor fuit huius instituti, pro regula suscepit decimum caput 10 Matthæi.

Ad hoc respondent. PRIMO, vitam illam Apostolorum fuisse à Christo institutam ad tempus tantum, nimirum dum in Iudæa prædicabat ante suam passionem; nam Lucæ 22. Dominus reuocauit ista præcepta, dicens: *Quando misi eos sine sacculo, & pera, & calciamentis, nunquid aliquid defuit vobis? sed nunc qui habet sacculum, tollat, similiter & peram.* Vnde, & loculos cum pecuniis habuit extremo tempore, vt patet Ioan. 12. & 13. ex quo apparet, iam tunc abrogasse quæ dixerat Matthæi 10. *Nolite possidere aurum, &c.* SECUNDO obijciunt, hoc fuisse præceptum, non consilium Euangelicum, proinde non pertinere ad mendicantes, qui se dicunt consilium sequi. TERTIO, Apostoli ex Domini ordinatione, ex iustitia petebant à populo victum, vt patet ex illo Matthæi 10. *Dignus est operarius mercede sua.* Et ex 1. Corin. 9. *Qui militat suis stipendiis vnquam?* ergo non mendicabant. At non isti mendicantes non petunt, nec petere possunt victum ex iustitia.

Ad PRIMUM respondeo, siue ad tempus, siue non ad tempus vitam illam Christus instituerit, inde rectissime colligi, 30 esse licitam, & sanctam, & imitatione dignissimam eam vitam, nisi fortè Christus ad tempus vitam illicitam instituerit. Præterea non est verum, Christum reuocasse vnquam illam institutionem, quoad modum viuendi; reuocauit quidem id quod dixerat: *In Giam Gentium ne abieritis.* At illa documenta de non possidendis pecuniis in zona, &c. nunquam reuocauit, vt patet ex 1. Corin. 9. Quando autem ait Luc. 22. *Nunc qui habet sacculum, tollat, similiter & peram, &c.* non iubet vt hoc faciant, sed prædicat illis, tempore passionis suæ futuros eos in tali timore, & perturbatione, in quali sunt ij, qui non fidunt vlli amico, & idè sibi ipsi prospiciunt.



ant, & tunicam vendunt, vt gladium emant. Neque oculi Domini ci repugnant illis verbis: *Nolite possidere aurum, &c.* Nam, vt Nicolaus exponit in cap. Exiit, de verborum significatione, in Sexto, Dominus vtramque vitam exemplo suo approbare voluit, nimirum illam quæ nihil habet, neque in particulari, neque in communi, excepto simplici vsu rerum donatarum: & rursus illam, quæ aliquid habet saltem in communis, sed vnâ instituendo, non destruxit alteram.

Ad SECVNDVM dico, illa verba non esse præcepta, sed consilia, & instructionem ex parte Apostolorum, & aliorum prædicatorum, & simul esse ordinationem, & præceptum, ex parte populorum, vt pater ex declaratione Pauli 1. Corinth. 9. vbi dicit, Dominum ordinasse, vt qui Euangelium annunciant, de Euangelio viuant. ex quo colligit, teneri populum ad alendos Euangelistas, & simul dicit, se nō vsum fuisse hac potestate. ex quo patet, non fuisse præceptum prædicatoribus, vt viuerent ex populi sumptibus.

Ad TERTIVM dico, Apostolos ex Domini ordinatione potuisse aliquando ex iustitia petere à populo sumptus, aliquando ex æquitate, aliquando ex sola caritate. Pro quo nota ex Aristot. lib. 8. Ethic. cap. 13. duplicem esse iustitiam; vnâ legitimam; alteram moralem. Legitima dicitur, quando ex lege, aut pacto vnus cogitur alteri aliquid soluere. Moralis dicitur, quando sine pacto, aut lege vnus laborat pro alio, ita vt confurgat obligatio quædam compensandi laborem, sed tamen non possit eum compellere ad eiusmodi compensationem. iam Dominus ordinauit eos qui Euangelium annunciant, de Euangelio viuere.

Hæc ordinatio respectu fidelis populi & ordinariorum, pastorum, est præceptum iustitiæ in rigore. quando enim constituitur aliquis pastor, potest populus eum cogere ad spiritualia ministranda, & pastor potest cogere populum ad temporalia danda, & hoc modo poterant Apostoli tanquam Episcopi cogere Christianos ad sumptus faciendos; At respectu populi infidelis, vel pastoris non ordinatij, illa ordinatio non inducit rigorem iustitiæ, sed quandam æquitatem, seu moralem iustitiam, & hoc modo Apostoli quando prædicabant Iudæis ipso Christo viuentē, non poterant cogere populum ad sumptus faciendos; nam nec populus



susceperat Euangelium, & Apostoli nondum erant Pastores ordinarij; nam adhuc tenebantur Iudæi agnoscere Sacerdotes Aaronicos, & eis decimas soluere. itaque Apostoli accipiebant sumptus ex morali iustitia, vel petebant ex caritate.

Iam religiosi mendicantes, qui mittuntur à summo Pontifice ad prædicandum, & Sacramenta ministranda, poterant facere pactum cum ipso Pontifice, vel cum populo de sumptibus accipiendis, & tunc ex rigore iustitiæ illos peti-  
 10 uissent. poterant etiam mitti à Pontifice eo modo quo Christus misit Apostolos ad Iudæos, antequam lex vetus cessasset, nimirum ut ex quadam æquitate peterent sumptus; nam  
*dignus est operarius mercede sua*, & qui Euangelium annunciat, de Euangelio vivere debet. non enim Christus dixit, qui est ordinarius Euangelista, dignus est mercede sua, sed *dignus est operarius*, id est, quicumque id operatur licet, dignus est mercede sua. & hæc fuit expressa sententia Augustini de opere Monachorum, ca. 21. visum tamen est melius tam Pontifici mittenti, quam ipsis qui mittuntur, ut non peterent vltimo modo ex iustitia, vel æquitate, sed solum ex caritate, sicut  
 20 ipsi non ex debito, sed ex caritate ministrant spiritualia.

TERTIO & VLTIMO probatur ex euentu, nam hoc genus vitæ innumeris signis, & prodigiis confirmatum est, quæ Deus edidit per Sanctos Franciscum, & Dominicum auctores huius vitæ, deinde ab eo tempore, conuersio Gentilium, confutatio hæreticorum, pietas populi Christiani, conseruatio Theologiæ, & innumera alia bona ordinibus mendicantium maxima ex parte accepta referenda sunt.

## CAPVT XLVI.

30

*Soluuntur obiectiones.*

At in contrarium obiiciuntur plurima argumenta, sed omnia reducuntur ad lex. PRIMVM est, quia mendicitas iure diuino, & humano prohibita est; nam de iure diuino patet Deut. 15. *Omni-  
 no indigens, & mendicus non erit inter vos.* De humano patet  
 ex C. de mendicantibus validis, lib. 11. cap. 25.

RESPONDEO, quantum ad legem diuinam, sine dubio non prohiberi ea lege mendicationem, vel mendicitatem, cum



cum in eodem capite habeatur: *Non deerunt pauperes in terratua, &c.* Nec valet responsio Lyrani, qui dicit in prioribus verbis prohiberi publicos mendicantes, in posterioribus vero agi de pauperibus, qui etsi indigent aliorum auxilio, tamen non debent mendicare, sed debet eis à diuitibus prouideri. Non valet ista solutio; nam utrobique est *אֲכִירָךְ*, quod propriè significat mendicum, & ad verbum verti poterant, non deerunt mendici in terra tua, sicut suprà dixerat: *Mendicus non erit inter vos.* Et præterea apud Iudæos multi erant mendici, ut patet Luca 16. de Lazaro, Luca 18. de cæco secus viam mendicante, Ioan. 9. de alio cæco mendicante, Actor. 3. de claudo mendicante ad portam templi speciosam.

Ad illa igitur verba: *Non erit mendicus inter vos*, respondeo dupliciter. PRIMò, illis verbis non prohiberi mendicantem, sed promitti tantam vbertatem rerum, ut nullus sit futurus mendicus. qui sensus maximè conuenit Hæbræo textui, sequitur enim immediatè: *Quia benedicet tibi Dominus Deus tuus.* Neq; repugnat hæc promissio illis verbis: *Non deerit mendicus in terratua, &c.* Nam promissio erat conditionata. Sicut enim sequitur post illam promissionem: *Si tamen audieris vocem Domini Dei tui, & custodieris vniuersa quæ iussit.* Et quoniam sciebat Deus istam conditionem non seruandam, prædicit, nunquam defuturos mendicos, & monet, ut illis benefaciant.

SECUNDò dici posset cum B. Thoma in opusculo contra impugnantes religionem, hac lege prohiberi mendicationem, non ex parte mendicantium, sed ex parte diuitum. Non enim Deus prohibet pauperibus mendicationem, cum infrà dicat, non deerunt mendici; sed præcipit diuitibus, ut quantum est in se, prouideant ita pauperum necessitatibus, ut nulli cogantur mendicare. Melior est tamen prior solutio; nam si Dominus iussisset diuitibus, ut non paterentur mendicos, peccassent diuites in populo Iudæorum, qui reuera mittebant mendicos tempore Christi, & tamen nunquam de hoc reprehensi leguntur à Christo, neq; ab Apostolis. Præterea, si Dominus ibi prohibuit diuitibus, ne permitterent mendicos, quomodo ibidem præcipit diuitibus, ut mendicis eleemosynam faciant? Porro lex civilis loquitur de illis, qui mendicant, ut ociosè viuant, vel ut lucrentur, &c.



cum nullam adferant populo vtilitatem. vnde ibidem inertes dicuntur.

Argumentum SECVNDVM. Scriptura passim derestatut mendicitatem, vt causam multorum malorum, Prouer. 30. dixit ille cum quo est Deus: *Mendicitatem & diuitias ne dedero tibi, tribue tantum victui meo necessaria, ne forte satius illiciar adnegandum, & dicam, quis est Dominus? aut egestate compulsus furer, & periurem nomen Dei mei.* Ecclesiast. 17. *Propter inopiam multi deliquerunt.* Psal. 36. *Non vidi iustum derelictum, nec semen eius quarens panem.* Psal. 108. *Nutantes transferantur filij eius, & mendicent.*

RESPONDEO, loquuntur hæc loca de inuoluntaria mendicitate; qui enim mendicat coactus, & animum habet ad opes, ille facile furatur, & peierat, &c. Quanquam ad primum locum possunt dari duæ aliæ solutiones. PRIMÆ est, sapientem loqui in persona infirmorum, quales sunt plurimi in Ecclesia. Illis enim nocent nimix opes, & similiter nimia egestas. Viris autem perfectis qui sciunt cum Paulo abundare, & penuriã pati, tam opes plurimæ, quàm etiam summa egestas sunt instrumenta virtutum, vt patet de Iob, qui vtrumque expertus est. Vnde Chrysostomus hom. 18. in epist. ad Heb. & Ambrosius serm. 8. in Psal. 118. dicunt, hæc verba Salomonis conuenire hominibus Testamenti veteris, quia imperfecti erant.

SECUNDA solutio est, à sapiente hoc loco recusari non quamlibet mendicitatem, sed illam solùm, quæ est exposita periculo, qualis non est religiosorum mendicantium; illi enim certò sciunt sibi non defutura necessaria, tum ob Christi promissionem, Matth. 19. *Centuplum accipiet, & vitam æternam possidebit,* & Marci 10. *Centies tantum nunc in tempore hoc: tum ob populi deuotionem, à quo non dubitant se recepturos temporalia, cum ei ministrent spiritualia. Immo videntur religiosi ad literam petere, quod sapiens petit, nec enim volunt diuitias, & ided eas relinquunt, nec tamen volunt mendicantem periculosam, qua moriantur fame, & ided dicunt, tribue tantum victui meo necessaria.*

Illud autem Psalm. 36. *Non vidi iustum, &c.* difficile est; nam Elias iustus erat, & tamen quærebat panem, cum diceret viduæ: *Adfer mihi, obsecro, buccellam in manu tua.* 3. Reg. 17. & Dauid quæsiuit panem ab Achimelech, 1. Reg. 21. & Lazarus



zarus quærebat micas panis, Lucæ 16. Hieronymus & Augustinus exponunt de pane spirituali. Caietan. & Lyranus dicunt loqui Psalmum de eo, quod fit ut in plurimum. TITELMANNVS optimè dicit debere referri illud *derelictum*, etiam ad *semen quarens panem*, ut sit sensus; non vidi iustum derelictum, neque semen eius quarens panem, derelictum. Vel cetè ibi quærere, non significat quærere quomodocunque, sed quærere cum anxietate & labore, ut illi faciunt, qui diu quærunt, & vix inueniunt. Vnde in Hebræo est verbum in Piel *וַיִּשְׁקַח*, quod significat quærere diligenter.

Argumentum TERTIVM. Opes moderatæ necessariæ sunt, vel saltem valde vtilis ad vitam beatam & perfectam in hac vita ducenda; nam Ecclesiastæ 7. dicitur: *Melior est sapientia cum diuitiis, et utilior videtibus solem: sicut enim protegit sapientia, sic protegit et pecunia. Act. 20. Beatus est dare, quam accipere.* Et Arist. lib. 1. Ethic. cap. 8. dicit opes esse necessarias ad felicitatem.

RESPONDEO, opes & egestatem habere sua commoda & incommoda; nam opes profunt, quia materiam præbent liberalitatis, & quia liberant à sollicitudine quærendi victum, tamen obsunt quatenus adferunt magnam sollicitudinem eas conseruandi, dispensandi, &c. Contrà; paupertas prodest, quatenus præbet materiam patientiæ, & liberat à sollicitudine conseruandi, & distribuendi pecunias; sed obest, quatenus affert sollicitudinem quærendi victum. Verum omnibus consideratis, videtur esse maius bonum, quod adfert voluntaria paupertas, quàm id, quod adferunt diuitiæ; & minus malum, quod paupertatem comitatur, quàm id, quod comitatur diuitias, & præsertim iis, qui ex officio euangelizare, & Sacramenta ministrare debent. Et propterea Dominus Apostolis eiusmodi vitam consuluit, Matth. 10. & ipsi etiam Apostoli, Act. 6. testantur, se non parum impedi à verbo Dei, & oratione, si opes Christianorum dispensare debeant.

Ad illud autem Ecclesiastæ respondeo, non voluisse eum dicere, meliorem esse sapientiam cum diuitiis, quàm sine diuitiis, sed meliorem esse sapientiam cum diuitiis, quàm sine sapientia diuitias. Ita Titelmannus, & rectè; nam in Hebræo non habetur melior, sed bona est sapientia cum diuitiis: quod non potest dici, quia sit mala sine diuitiis, sed



quia sine ipsa malæ sunt diuitiæ, & hoc probat, cum ait: *Sicut enim protegit sapientia, sic protegit pecunia.* Sed in hoc differunt, quod sapientia vitam tribuit possessori suo, q. d. et si pecunia protegit in hoc mundo à multis afflictionibus: tamen sola sapientia vitam præbet, & ideo sine sapientia parum aut nihil profunt diuitiæ.

Ad illud Act. 20. dico, ceteris paribus, beatius esse dare omnia sua simul propter Christum, & accipere postea aliquid modicum, quàm parum dare, & nihil accipere; & similiter  
10 beatius esse accipere temporalia, vt possis expedire, & commode dare spiritualia, quàm nihil accipiendo impediri à spiritualibus dandis.

Ad locum Aristotelis respondeo. PRIMVM, loqui eum de humana felicitate, quæ multis rebus indiget; nam felicitas Christiana, nec ipsa in se eget ullis terrenis opibus, cum tota in Deivisione consistat, nec ad eam adipiscendam valde necessariae sunt opes, cum melius humilitate & patientia, quàm opibus ad regnum perueniatur æternū. DEINDE addo,  
10 & uxorem ac liberos habere, & Rempub. vnā cum aliis gerere velit. Eiusmodi autem hominibus negari non potest, quin opes necessariae sint. Si quis autem velit sibi soli viuere, & contemplationi vacare, huic certè Aristoteles opes necessarias esse minimè iudicabit, modò is habeat vnde viuat sine dispendio contemplationis.

Argumentum QVARTVM. Redigere se ad extremam inopiam est vitium; nam virtus consistit in medio, vitia in extremis, sed dare aliquid est medium, nihil dare est extremum. Præterea confirmatur ex Paulo 2. Corin. 8. *Si voluntas promota est, secundum id, quod habet, accepta est, non secundum id, quod non habet. Non enim est alia sit remissio, vobis autem tribulatio, sed ex aequalitate.*

RESPONDEO, medium in virtutibus, excepta iustitia, non considerari penes ipsas res absolute, sed cum ordine ad rationem, & omnes circumstantias. Verbi gratia, nō est medium in temperantia, comedere vnum panem, & extrema comedere duos, aut nullum; sed mediū est tantum panis accipere, quantum ratio dicat, tibi hoc tempore conuenire; vnde quod tibi est medium, alteri erit extremum. Sic ergo dare omnia, extremum est & vitiosum homini patrifamilias, qui



qui ex officio alere debet uxorem, filios, seruos, &c. At ei, qui statuit mundo renunciare, & soli orationi & prædicationi instare, planè medium est omnia dare: & extrema erunt dare aliquid solum, & nihil dare, & per hoc soluitur confirmatio; nam Paulus alloquitur homines seculares vxoratos, &c.

DICES; dare omnia vel est medium ei, qui vult mundo renunciare, ante votum; vel solum post votum. si ante votum, ergo peccabit ille, si non det omnia, etiam si nullum habeat votum paupertatis; nam medio virtutis opponuntur extrema vitiorum. si solum post votum, ergo mendicitas non potest voueri; nam nihil rectè vouetur, nisi quod ex se iam est virtutis actus. RESPONDEO, consilia Euangelica ante votum, non esse actus specialium virtutum, sed esse actus perfectos virtutum communium, vt liberalitatis, castitatis, obedientie. Porro actibus perfectis non opponuntur actus vitiosi, sed actus minus perfecti; & medium actus perfecti, non habet extrema vitiosa, sed extrema minus perfecta; at post votum iidem actus iam sunt actus necessarij specialium virtutum, quibus opponuntur vera vitia specialia.

Argumentum QUINTVM. Qui se spontè redigit ad mendicantem, exponit se periculo fame moriendi, tentatque Deum, cum sibi ipse auferat media ordinaria ad vitam conseruandam, nec potest dicere, panem nostrum quotidianum da nobis hodie; nam ei responderet Dominus, quid à me petis panem, cum tibi dederim antea, & tu illum abieceris?

RESPONDEO, ille diceretur exponere se tali periculo, qui omnia sua daret, quando probabiliter sciret, nihil se postea inuenturum: at religiosi certam spem in Deo ponunt sibi nihil defuturum, quandoquidem Christus id promisit, & experientia longa idem testatur. Neq; tentant Deum; nam medium ordinariū ad vitam est cibus & potus, siue sit proprius, siue donatus ab alio: ille ergo reiecit media ordinaria, qui aut non vult comedere, aut non vult panem accipere, nisi per miraculum, vt illis accidit, de quibus Cassianus collat. 2. cap. 6. Nec prohibentur dicere, panem nostrum, &c. Immo ipsi maxime hoc dicere possunt, quandoquidem sibi nihil retinuerunt, vt Christum sequerentur. Si enim dicat aliquis Rex cui opulento, relinque hinc tuas possessiones, & veni mecum ad bellum: certè ille iure poterit a Rege petere panem quotidianum.



Argumentum SEXTVM. Religiosi mendicantes, iniuriam faciunt veris pauperibus; nam Lucæ 14. dicitur: *Cum facis prandium, voca pauperes, debiles, claudos, cecos, qui non habent retribuere tibi, & beatus eris.* Hoc loco, inquit Armacanus, Dominus non iubet vocari pauperes quoscunque, sed pauperes debiles, claudos, vel cecos, neq; etiam debiles quoscunque, sed debiles pauperes; nam pauperes non debiles, possunt retribuere laborando; debiles non pauperes, possunt retribuere pecuniis dando. Præterea, ordo caritatis postulat, ut semper detur eleemosyna magis egenti, magis autem egent pauperes debiles, quàm fortes, quales sunt religiosi, non igitur licet religiosis eleemosynas petere, nisi forte ægrotent.

RESPONDEO, si argumentum aliquid concluderet, non soli religiosi mendicantes, sed etiam omnes Clerici & Monachi, qui ex possessionibus viuunt, & non sunt debiles, claudi, vel cæci, peccarent; nam possessiones donatæ monasteriis, & Ecclesiis, quid sunt aliud quàm eleemosynæ? ridiculum autem est, non fraudari pauperes à Clericis & Monachis, qui accipiunt in eleemosynam redditus multorum millium aureorum, & fraudari à mendicantibus, qui accipiunt vnum panem.

Ad locum ergo Euangelij dico, Dominum velle vocari pauperes, siue sint debiles, siue non; legendum est enim cum distinctione, voca pauperes, debiles, &c. nam Apostolus Act. 24. dicit, se attulisse eleemosynam pauperibus Christianis, qui erant in Hierusalem, quos certum est non fuisse omnes cecos, vel claudos. Et cum Dominus ait: *Voca eos qui non habent retribuere tibi*, non intelligit eos, qui nullo modo possunt retribuere. Tales enim nulli ferè sunt; nam etiam pauperes claudi possunt retribuere aliquod obsequium, sed intelligit eos, qui nō possunt reuinitare ad simile conuiuium, vel commodè aliquid aliud donare, & proinde à quibus nihil sperari solet. Sic enim ait: *Noli*, inquit, *vocare amicos & vicinos diuites, ne forte ipse te reuinitent, & fiat tibi retributio.* Porro, pauperes omnes, etiam qui validi sunt, & suis laboribus victum quærunt, tales sunt, ut non possint retribuere; nam cum vix sufficiant sibi, quomodo poterunt conuiuiō diuites excipere, aut eis munera largiri?

Ad illam rationem dico, ceteris paribus, dandam esse eleemosynam semper magis indigenti, alioqui magis danda est



est propinquiore, & meliore, & cui debetur ex iustitia, &c. Porro, tribus de causis potest fieri, ut sit danda eleemosyna potius religioso minus indigenti, quam non religioso magis indigenti. ex Hieronymo in fine libri contra Vigilantium.

PRIMO, si is dederit verè omnia sua pauperibus: debetur enim illi victus ex bonis pauperum, non solum ex caritate, sed etiam aliquo modo ex iustitia.

SECUNDO, si laboret pro populo concionando, sacra faciendo, &c. nam & huic debetur aliquo modo ex iustitia, licet is non petat, nisi ex caritate.

TERTIO, ratione perfectionis monasticæ; nam danda est semper eleemosyna potius meliori. quia verò non possumus iudicare de internis, danda est potius proficenti maiorem sanctitatem, quam proficenti minorem, quando non constat de mala vita religiosi. Excipitur tamen semper

extrema necessitas cuiusunque pauperis; illa

enim semper præponitur minori necessitati.







# LIBER TERTIVS

## DE LAICIS SIVE

### secularibus.

#### CAPVT PRIMVM.

##### *Ordo totius Disputationis.*

10 **D**ISSERVIMVS DE DVOBVS MEMBRIS Ecclesiæ, id est, Clericis, & Monachis; super est vt dicamus de tertio, id est, de Laicis, siue secularibus, & simul de membris ab Ecclesia præcis, id est, de Hæreticis, quæ omnia ad disputationem de Magistratu politico reuocari possunt.

Tota hæc Disputatio sex quæstionibus continetur. Primum enim, de ipsa politica potestate agendum est. Deinde, de officio eius in rebus politicis. Tertio, de officio eius in causâ religionis.

De PRIMO sunt quæstiones duæ. Prima; An ista potestas sit res bona, & proinde Christianis licita. Secunda; An per peccatum amittatur.

30 De SECUNDO sunt duæ quæstiones. Prima, de officio Magistratus in conseruanda Republica ab improbitate ciuium per leges, & iudicia, tam ciuilia, quàm criminalia, id est; An liceat Christianis leges condere, iudicia exercere, & gladio ferire noxios, qui sunt actus proprii Magistratus. Secunda, de officio Magistratus in protegendâ Republica ab hostibus externis, id est; An liceat Christianis bella gerere, & huic addemus quasi corollarium propter Lutherum; An liceat bellare contra Turcas.

De TERTIO sunt aliæ duæ quæstiones. Prima; An ad Magistratum pertineat cura religionis; An verò permittere possit,



possit, ut quisq; credat, ut voluerit. Secunda; An Magistratus debeat hereticos ab Ecclesia iudicatos, & damnatos punire, tam in libris eorum, quàm in facultatibus, & in personis, etiam usque ad mortem.

CAPVT SECVNDVM.

*Proponitur prima questio; An politica potestas sit bona, & Christianis licita.*

**E**ST vna ex præcipuis hæresibus Anabaptistarum, 10  
& Trinitariorum huius temporis; Non licere Christianis gerere Magistratus, nec debere esse villo modo inter Christianos prætoria, tribuna-  
lia, iudicia, ius gladij, &c. Ministri, qui in Translyvania, Tri-  
nitate, & Incarnationem, & paruulorum Baptismum op-  
pugnant; ediderunt anno M. D. LXVIII. Albæ Iuliæ, An-  
titheses Christi veri & falsi; quarum VII. est; Christum fal-  
sum habere in sua Ecclesia Reges, Principes, Magistratus,  
gladios; Christum verum nihil tale in sua Ecclesia pati posse.

Argumenta eorum hæc sunt, vel certè esse possunt. PRIMUM, ex Scriptura, Matth. 17. *Reges Gentium, a quibus acci-  
piunt tributa, &c. ergo liberi sunt filij.* Et Luc. 22. *Reges Gentium  
dominantur eorum, non sic erit inter Vos.* Rom. 13. *Nemini quid-  
quam debeatis, nisi ut inuicem diligatis.* 1. Cor. 7. *Pretio empi-  
estis, nolite fieri serui hominum.* 2. Cor. 8. *Vnus Dominus.* Ephes.  
4. *Vnus Dominus, vna fides, vnum Baptisma, vnus Deus.*

SECUNDVM, ab exemplis; nam plerique Principum abu-  
tuntur potentia, & non solùm non profunt, sed etiam obstant  
Reipub. ut patet in ipso initio mundi de Cain Genes. 4. de fi-  
liis Principum Genes. 6. qui accipientes varias vxores, corru-  
pti sunt omni scelere, & eorum caussa postea venit diluuium.  
Item de Nemrod, Pharaone, Nabuchodonosor, & de Saul,  
Roboam, & ceteris; nam post diuisionem regni, ex Regibus  
Israël nullus fuit bonus.

TERTIVM, à fine; nam Magistratus permissus fuit Iudæis  
propter imperfectionem temporis. erant enim pueriludæi,  
& ideo Regi debebant ab alio, ut patet Gal. 4. at nos viri su-  
mus perfecti, & vnctio docet nos de omnibus.

QUARTVM, ab efficiente; nam ista potestas non est à Deo  
introducenda, sed ab hominibus tyrannicè usurpata; quis enim  
fecit



fecit Nemrod Regem? quis Nabuchodonosor? quis Ninus? quis Alexandrum? quis Iulium Cæsarem? quis alios? hinc laudatur ille pyrata, qui respondit Alexandro, ego quia cum paruo ligno discurro, pyrata dicor; tu quia cum magna classe orbem terrarum spoliās, Imperator diceris. Augustinus lib. 4. de ciuitate Dei, cap. 4. ex M. T. lib. 3. de Repub.

QVINTVM, ab origine; nam Deus creauit hominem liberum, & per peccatum introducta est subiectio; ergo cum a peccato per Christum liberati simus, etiam à subiectione esse debemus. Antecedens patet; nam Gen. 1. non dicitur, Dominamini hominibus, sed: *Dominamini piscibus maris, &c.* Item mulier nunc non subiicitur viro, nisi politica subiectione, & tamen hæc subiectio per peccatum introducta est, vt patet Genes. 3. *Sub Viri potestate eris;* & præterea ante diluuium primus, qui condidit ciuitatem, & inchoauit regnum politicum, fuit Cain, vt ex Genes. 4. deducit Augustinus lib. 15. de ciuitate Dei, cap. 1. post diluuium primus fuit Nemrod Genes. 10.

Denique id clarè docent Patres. AVEVSTINVS lib. 19. de ciuitate Dei, cap. 15. rationalem factum ad imaginem suam, noluit Deus nisi irrationalibus dominari, non hominem homini, sed hominem pecori; inde primi iusti Pastores magis pecorum, quàm Reges hominum constituti sunt, vt hinc etiam insinuet Deus, quid ordo postulet creaturarum, & quid meritum exigeret peccatorum. GREGORIUS lib. 21. moral. cap. 11. Omnes homines natura æquales genuit, sed variante meritorum ordine, alios aliis dispensatio occulta postponit, ipsa autem diuersitas, quæ accessit ex vitio, rectè est diuinis iudiciis ordinata, vt quia omnis homo iter vitæ non æquè graditur, alter regatur ab altero; similia habet in Pastoral. part. 2. cap. 6.

Hanc hæresim non solum Catholici omnes execrantur, ac præcipuè B. Thomas in opuscul. 20. & omnes Philosophi, sed etiam Philippus Melancthon in locis, cap. de civili Magistratu, & Ioannes Caluinus lib. 4. Instit. cap. 20. acerrimè, & fusissimè oppugnant, & Lutherus ipse in visitatione Saxonica, etsi ab ipsis verbis in Babylonica captiuitate, cap. de Baptismo, occasionem sumpserunt Anabaptistæ.

Nos eam quinque argumentis refellemus; nam tot etiam sunt aduersariorum fundamenta. Primò, ex Scripturis.

Secundò



Secundò, ex exemplis Sanctorum. Tertiò, ex fine seu necessitate. Quartò, ex causa efficiente. Quintò, ex origine.

CAPVT TERTIVM.

*Ex Scripturis asseritur politicus Magistratus.*

**Q**VANTVM ad PRIMVM, Scriptura Testamenti veteris plena est testimoniis. Exod. 22. Iudices populi à Deo ipso vocantur Dij, sicut etiam Psal. 81. *Deus stetit in Synagoga Deorum, in medio autem Deos diudicat*; cuius vocabuli rationem explicat Iosaphat 2. Paralip. 19. ubi dicit iudices non hominum, sed Dei iudicia exercere, id est, loco Dei iudicare. Et similiter Deuter. 1. monet Moyses iudices populi, ut iuste iudicent, quia Dei iudicium est. & Christus Ioannis 10. *Si illos dixit Deos, ad quos sermo Dei factus est, quem Pater sanctificavit, & misit in mundum, &c.* Vbi Christus vult dicere; Si Principes Deus vocat Deos, quia ad illos mandatum diuinum factum est, ut iudicent loco suo, cur non magis, &c. non enim quadrat quod alij dicunt, vocatos Deos eos omnes, quibus Deus loquutus est; si ergo Principes vocantur Dij, quia locum Dei tenent, non potest reprehendi munus Principum, nisi reprehendatur Dei ipsius munus.

Præterea Deuter. 17. describit Moyses leges Regi futuro, & in libro Iudicum, cap. ult. in vltimis verbis reddere volens Spiritus sanctus causam omnium malorum, quæ acciderunt illo tempore, dicit: *In diebus illis non erat Rex in Israël, sed unusquisque, quod bonum sibi videbatur, hoc faciebat.* In eodem libro Iudicum, & in lib. Regum passim habemus Deum excirasse Israël iudices, aut Principes, per quos populum liberaret, Prouerb. 8. *Per me Reges regnant.*

Respondent Anabaptistæ, Iudæis fuisse permisos Magistratus propter imperfectionem, at aliam rationem esse Testamenti noui.

At contrà; nam in primis Prophetæ prædixerunt omnes Reges terræ seruituros Christo, & Ecclesiæ: quod non potest fieri, nisi in Ecclesia sint Reges Psal. 2. *Et nunc Reges intellegite, erudimini, qui iudicatis terram, apprehendite disciplinam;* secundum Hebræum *וְיִשְׁכַּחמוּ בְּיָדְךָ בְּנֵי אָדָם* osculamini filium, quem



in eodem Psalmo Scriptura vocat Messiam; item Psalm. 71.  
*Adorabunt eum omnes Reges terra, omnes Gentes seruient ei.*  
 Isaia 60. *Ambulabunt Gentes in lumine tuo, & Reges in splendore oris tui.* Et cap. 49. *Erunt Reges nutricij tui, & Regina nutrices tue, & cultu in terra demisso adorabunt te, & pulueres pedum tuorum lingent;* quod certè impletum videmus in Constantino, Theodosio, Carolo Magno, & aliis, qui adorauerunt sepulcra Apostolorum, & Martyrum, & Ecclesias dila-

- uerunt, & protexerunt.
- 10 Præterea, Christus, prædicans Euangelium regni, inter alia dixit: *Reddite quæ sunt Cæsaris Cæsari,* Matth. 22. & Paulus Rom. 13. iubet, vt *Omnis anima potestatibus sublimioribus subdita sit, non enim est potestas nisi à Deo, &c.* Et ibidem ter repetit, Principes seculares, quibus tributa redduntur, esse ministros Dei. quo loco vitur etiam Irenæus lib. 4. cap. 70. Item 1. Tim. 2. iubet Apostolus nominatim orari pro Regibus. quo loco vitur Tertullianus in Apologet. cap. 31. quia calumniabantur Ethnici Christianos, quod magistratibus nolent parere; at certè si Euangelium non ferret magistratum, oporteret orare pro destructione Regum & Principum.
- 20 Ad Tit. 3. *Admone illos principibus & potestatibus subditos esse,* & 1. Petr. 2. *Deum time, Regem honorifica,*

SED respondent, ex his testimoniis probari, oportere nos parere Regi Ethnico, non autem licere Christianis regnā possidere, & Magistratus gerere. Quibus nos respondemus, PRIMVM, non esse mirum in Testamento nouo non fieri multam mentionem magistratuum; nam Christus non venit constituere regnum politicum, sed regnum spirituale, & cœleste; & similiter Apostoli in hoc regno spirituali commendando, & propagando occupati fuerunt, politicum reliquerunt, vt antea erat.

30

ADDIMVS præterea; Licet non expressè Scriptura noui Testamenti approbet in Ecclesia Magistratum politicum, tamē euidenter colligi ex adductis testimoniis; nam si Christianis licet subesse Regi Ethnico, cur non potius Regi Christiano? & si licet Christiano subesse, cur non præesse? cū subesse videatur magis contra libertatem Euangelicam, quàm præesse.

DENIQUE, si Christianæ libertati repugnaret subiectio, vel præfectura ciuilis, magis repugnaret Ecclesiastica, quia  
 Chri



Christiana libertas magis pertinet ad Christianum, ut est ci-  
uis Ecclesie, quàm ut est ciuis mundi: At non repugnat Chri-  
stianæ libertati præfectura, vel subiectio Ecclesiastica, ut pa-  
tet ex illo Matth. 24. *Quis putas est fidelis servus & prudens,*  
*quem constituit Dominus super familiam suam?* Et ex illo Ro-  
man. 12. *Qui præest in sollicitudine.* Et ex illo Hebr. 13. *Obedite*  
*præpositis vestris;* Neque igitur repugnat præfectura, vel subie-  
ctio politica. Atque hinc soluitur primum argumentum con-  
tra allatum.

Ad PRIMUM ergo dicendum est, Christum eo loco de se-  
ipso tantum loqui, & rectissime probare se, quia Filius Dei  
summi Regis esset, non fuisse obligatum soluere tributum  
vlli Principi. alioqui ipse idem iussit reddi censum Cæsari,  
Matth. 22. & Apostolus Rom. 13. *Cui tributum,* inquit, *tribu-*  
*um, &c.*

Ad SECUNDUM, eo loco Christus instituit Ecclesiasti-  
cum Magistratum, & eum distinguit à politico, & à politico  
corrupto, cui pompæ, superbia, fastus annexa esse solent,  
qualem etiam politicum Magistratum, si intelligamus pro-  
hibitum esse Christianis, nihil absurdi dicemus; ibi enim  
non reprehenditur regnum, sed modus regnandi.

Ad TERTIUM, non vult Paulus dicere, non sinatis vos  
obligari vlla lege, sed soluite maturè omnia debita; præce-  
dit enim: *Reddite omnibus debita, cui tributum, &c.* Et quia  
soliis amoris debitum nunquam ira reddi potest, quin sem-  
per teneamur amare, ideo ait: *Nemini quidquam debeatis, nisi*  
*ut inuicem diligatis.*

Ad QUARTUM dico, fieri seruum hominis, eo loco signi-  
ficare seruire homini propter hominem tantum; nam alio-  
qui ibidem Paulus horratur seruos, ut etiam si possint fieri  
liberi, tamen magis eligant seruitutem. & Gal. 5. *Servite,* in-  
quit, *inuicem.*

Ad VLTIMUM dico, ibi nomen Domini propriè accipi,  
quomodo non conuenit nisi Deo, nec propterea tolluntur  
Reges, & Principes, qui non propriè domini sunt, sed mini-  
stri Dei, qui vnus verus est Dominus, nullus enim est titulus  
maior; nam verus Dominus duas habet conditiones, quæ  
nulli creaturæ conueniunt. Vna est, ut possit pro libito vtire,  
cuius est dominus, & eam augere, minuere, mutare, anni-  
hilare, &c. Altera, ut nulli seruiat, id est, nulla re indigeat, sed



seipso sufficiat ad omnia, vt rectè notat Augustinus lib. 8. de Gen. c. 11. & deducit ex Psal. 15. *Dixi Domino, Deus meus estis, quia bonorum meorum non eges*; nam in Hebræo est, dixi Domino, Dominus meus *אֲדֹנָי*. & hinc est quod LXX. interpretes vbiq; nomen propriū Dei *יהוה* reddiderunt per *κύριος*; & Hieronymus per Dominum. hinc etiam Augustinus, vt Tertullianus refert in Apologetico, cap. 34. nunquam se Dominum appellari passus est, quodd intelligeret hunc titulum soli Deo conuenire, & è contrario reprehenditur à Suetonio incredibilis arrogantia Domitianus, quodd in Amphitheatro sibi acclamari libenter audiret: *Domino, & Dominae feliciter*, & quod iuberet de se scribi: *Dominus, & Deus noster*. *fit fieri iubet.*

## CAPVT QVARTVM.

*Idem asseritur exemplis Sanctorum.*

30 **S**ECVNDA ratio sumitur ab exemplis; nam si res mala esset principatus, nunquam viri sancti eum gessissent; at habemus in Scriptura plurima exempla sanctorum Principum, vt Melchisedech Regis Salem, Iosephi Patriarchæ, qui toti Ægypto vtilissimè præfuit, Moysis, Iosue, omnium ferè Iudicum, Dauidis, Salomonis, Ezechia, Iosaphat, Iosia, Danielis, Mardochei, Nehemia, Machabæorum, & aliorum.

In Testamento nouo videmus Ioan. 4. Regulum credidisse in Christum, nec tamen iussum renunciare principatus; & similiter Act. 13. proconsulem conuersum à Paulo, non propterea deposuisse Magistratum. Videmus deinde à S. Fabiano Papa & Martyre, & à tota Ecclesia admissum fuisse Philippum Imperatorem, nec illi imperatum, vt deponeret imperium, vt ex historia Eusebij lib. 6. cap. 25. colligitur.

Quod autem non sit in Testamento nouo maior copia exemplorum, ratio est, quia Deus voluit Ecclesiam suam inchoare ab hominibus pauperibus, & vilibus, vt dicitur 1. Cor. 1. ne putaretur augmentum Ecclesiæ opus humanum, si fauore Principum creuisset. immò è contrario voluit Deus primis CCC. annis vt Ecclesia totis viribus oppugnaretur



Ab Imperatoribus totius mundi, ut inde ostenderet, opus suum esse Ecclesiam, & plus posse illam patiendi, quàm possent illi cruciando.

Vnde Augustinus in epist. 50. dicit Deum voluisse primo tempore impleri illam partem Psal. 2. *Aspicerunt Reges terram, &c.* Deinde sequenti tempore illam aliam: *Et tunc Reges intelligite.* sicut reuera impletum videmus in Constantino, & successoribus eius; siquidem videmus Constantinum diuinitus edoctum, & vocatum à Deo singulari miraculo, ut Eusebius refert lib. 1. de vita Constantini. at si res mala esset principatus, quare Christus ipse Constantinum ad Ecclesiam vocasset? Vbi nota obiter dissonantiam circa hanc historiam; nam in historia Ecclesiastica Eusebij à Rufino vers. lib. 9. cap. 9. habetur Constantinum per soporem vidisse signum crucis in cœlo, & deinde Angelos ei dixisse: *In hoc vince*; At lib. 1. de vita Constantini Eusebius refert, in itinere eum corporeis oculis vidisse supra solem signum crucis cum illis literis: *In hoc vince*, & idem signum à toto exercitu conspectum, & noctu postea ei apparuisse Christum, qui mysterium explicuerit, atq; hæc omnia se ab ipso Constantino coram audiuisse. Itaque verisimile est quod in historia habetur à Rufino additum fuisse. Alia plurima exempla addi possent Iouiniani, Gratiani, Theodosij iunioris & senioris, Caroli Magni, Ludouici Pij, Othonis I. S. Henrici Imperatoris, S. Ludouici Regis Francorum, aliorumque multorum, qui vel in Britannia, vel in Hungaria, vel in Boëmia, vel in aliis regionibus sanctissimè regnauerunt.

Ad argumentum in contrarium dico PRIMO, falsum esse Principes ut plurimum esse malos; hic enim non agimus de regno in particulari, sed de politico principatu in genere, 30 qualis Princeps fuit Abraham, & alij; sicut ergo fuerunt mali Principes, Cain, Nembrod, Ninus, Pharaon, Saül, Hieroboam, & alij Reges Israël; ita è contrario fuerunt boni Principes, Adam, Noë, Abraham, Isaac, Iacob, Ioseph, Moses, Iosue, omnes ferè Indices, & plurimi Reges Iuda.

SECUNDO dico, exempla malorum Principum non probare malum esse principatum, sæpe enim mali abutuntur rebus bonis; at exempla bonorum rectè probant, principatum esse bonum, quia homines boni non utuntur rebus malis; præterea, etiam Principes mali plus prosunt sæpe, quam



quàm obsint, vt patet de Saule, Salomone, & aliis; denique  
 vtilius est Reipub. malum Principem habere, quàm nullum;  
 vbi enim nullus est, non potest diu consistere Respub. dicen-  
 te Salomone Proverb. 11. *Vbi non est gubernator, corrumpet popu-  
 lus;* & vbi est, licet malus, conseruatur vnitas populi. Vide B.  
 Thomam in opusc. 20. cap. 6. lib. 1.

TERTIO dico, quòd in Regibus Israël nullus fuerit bo-  
 nus, ad insignem Dei prouidentiam pertinere; Deus enim id  
 permittere voluit, quia rebellio illa Israelitarum à tribu Iu-  
 10 da, significabat schismata Hæreticorum ab Ecclesia, vt E-  
 cherius docet in fineli. 3. super librum Regum. sicut enim  
 inter Catholicos sunt boni, & mali; at inter Hæreticos nul-  
 lus potest esse bonus; ita quoq; inter Reges Iuda multi fue-  
 runt boni, multi etiam mali. Ex Regibus Israël nullus omni-  
 no inuentus est bonus.

## CAPVT QVINTVM.

*Idem asseritur ex fine principatus.*

10 **T**ERTIA ratio ducitur à fine. Principatus politi-  
 cus adeo naturalis, & necessarius est humano  
 generi, vt tolli non possit, quin natura ipsa de-  
 struatur; hominis enim natura est, vt sit animal  
 sociale; nam bruta quidem sunt à natura ita instructa, vt pos-  
 sint sibi singula sufficere, homo autem tam multis rebus in-  
 diget, vt solus viuere nullo modo possit; nam bruta nascun-  
 tur vestita, & armata, & estimati uam habent ita determina-  
 tam ad omnia, quæ sibi conueniunt, vt naturaliter sine villo  
 doctore statim nouerint nidos ædificare, alimenta querere,  
 30 & medicinam etiam sibiipsis facere; at homo nascitur sine  
 vestibus, sine domo, sine alimentis, omnium rerum egenus,  
 & quanquam habet manus, & rationem, quibus omnia in-  
 strumenta parare potest, ramen singula longum tempus re-  
 quirunt, & adeo longum, vt sit impossibile sibi vnum homi-  
 nem sufficere ad omnia, præsertim cum nascamur rudes, &  
 artes magis doctrina, quàm experientia discantur; ergo ne-  
 cesse est, vt simul viuamus, & vnus alium iuuet.

PRAETEREA, etiamsi quisq; sufficeret sibi ad viuendum,  
 ramen nunquam sufficeret ad protegendum se ab impetu  
 ferarum, & latronum, sed ad hoc necesse est conuenire, &  
 collatis



collatis viribus resistere; & licet sufficeret sibi etiam contra hostes, tamen semper maneret rudis, & expers sapientiæ, & iustitiæ, multarumq; aliarum virtutum, cum tamen ad hoc nati sumus, vt mentem & voluntatem præcipuè exerceamus; nam scientiæ, & artes longo tempore, & à multis inuentæ sunt, & sine doctore percipi non possunt; iustitia autem non nisi in societate exerceri potest, cum sit virtus constituens æquitatem inter plures.

Denique, donum loquendi, & audiendi, id est, percipiendi distinctè verba, quorsum homini collatum est, si debeat solitarius viuere: Itaque rectè Aristoteles lib. 1. politicorum, ca. 2. dicit, hominem natura ciuile esse animal, magis quàm sint apes, & grues, & quæcunq; animalia, & si quis solitarius viuatur, aut esse bestiam, aut Deum, id est, aut minus, aut maius homine; neque id est contra Eremitas nostros. Nam qui penitus solitarij vixerunt, vt Paulus primus Eremita, Maria Magdalena, Maria Ægyptiaca, & si qui sunt alij, dici possunt aliquid amplius homine habuisse, non natura, sed gratia; nam non sine miraculo alebantur à Deo, vt notum est; ceteri autem etsi in solitudine degerent, tamen frequentes simul conueniebant, & Abbatibus suis subiecti erant, vt in disputatione de Monachis demonstrauius.

Iam verò si natura humana socialem vitam requirit, certè requirit etiam regimen, & rectorem; nam impossibile est multitudinem diu consistere, nisi sit, qui eam contineat, & cui sit curæ bonum commune: sicut in vnoquoque nostrum nisi esset anima quæ contineret & coniungeret partes, & potentias, & elementa contraria, ex quibus constamus, statim omnia soluerentur. vnde Prouerb. 11. *Vbi non est gubernator, populus corruet.* deinde societas est multitudo ordinata, non enim dicitur societas multitudo confusa & dispersa; ordo autem quid aliud est, quàm series quædam inferiorum & superiorum? Necessariò igitur rectores habendi sunt si societas futura est.

Ex hac ratione soluitur TERTIVM argumentum Anabaptistarum; falsum enim assumunt, cum dicunt, regimen politicum permissum Iudæis ob imperfectionem eorum, nobis autem non conuenire, quia vnctio doceat nos de omnibus; nam vnctio hoc imprimis docet esse necessarium, habere rectorem; nec sufficit scire omnia, sed oportet etiam



multa facere, & parare, quæ non possumus sine aliorum auxilio.

Et præterea hinc deducitur falsum esse, quod M. T. dicit in primo de inuentione, fuisse olim tempus, quo homines vagarentur more bestiarum, deinde à sapiente quodam, & eloquente homine vi eloquentiæ persuasos conuenire, & simul viuere. quod idem etiam hoc tempore dicere solent quicumque eloquentiam laudandam suscipiunt. At reuera nunquam fuit, nec esse potuit, tale tempus. Nam Adam sapientissimus fuit, & sine dubio non permisit homines vagari more bestiarum, & Cain filius eius ædificauit etiam ciuitatem materialem: ante Cain, & Adam nulli fuerunt. Sed non mirum Ciceronem, & alios Ethnicos talia dicere; nam Ethnici quia putabant mundum fuisse ab æterno, & tamen videbant omnes artes esse nouas, & non exstare memoriam nisi paucorum annorum, inde suspicati sunt, longissimo tempore homines vixisse more ferarum, & solum exstare memoriam rerum gestarum ab eo tempore, quo cœperunt homines simul degere; sed Christiani, qui ex testimonio Dei didicerunt, mundum creatum fuisse ante annos nondum sexies millenos, & primos homines vrbes continuò habere cœpisse, mirum profectò est, cur dicere audeant, longissimo tempore homines sine rectore, & sine ciuitatibus more ferarum vixisse.

## CAPVT SEXTVM.

*Idem asseritur ratione ducta ab efficiente.*

30 **Q**UARTA ratio ab efficiente sumitur; Nam certum est politicam potestatem à Deo esse, à quo non nisi res bonæ, & licitæ procedunt. id quod probat Augustinus in toto sermone 4. & 5. lib. de ciuitate Dei; Nam sapientia Dei clamat Prouerb. 8. *Per me Reges regnant; Et infra: Per me Principes imperant.* Et Daniel. 2. *Deus cæli regnum, & imperium dedit tibi, &c.* Et Daniel 4. *Cum bestiis, feris quæ erit habitatio tua, fenum, & bos, comedes, & rorare cæli infunderis, septem quoque tempora mutabuntur super te, donec scias quod dominetur excelsus super regnum hominum, & cuiusque voluerit det illud.*



Sed hic obseruanda sunt aliqua. PRIMO, politicam potestatem in vniuersum consideratam, non descendendo in particulari ad Monarchiam, Aristocratiam, vel Dimocratiam, immediatè esse à solo Deo; nam consequitur necessariò naturam hominis, proinde est ab illo, qui fecit naturam hominis; præterea hæc potestas est de iure naturæ, non enim pendet ex consensu hominum; nam velint, nolint, debent regi ab aliquo, nisi velint perire humanum genus, quod est contra naturæ inclinationem. At ius naturæ est ius diuinum, iure igitur diuino introducta est gubernatio; & hoc videtur propriè velle Apostolus, cum dicit Rom. 13. *Qui potestati resistit, Dei ordinationi resistit.*

SECUNDO nota, hanc potestatem immediatè esse tantamquam in subiecto, in tota multitudine; nam hæc potestas est de iure diuino, at ius diuinum nulli homini particulari dedit hanc potestatem, ergo dedit multitudini; præterea sublato iure positiuo, non est maior ratio cur ex multis æqualibus vnus potius, quam alius dominetur. igitur potestas totius est multitudinis; deniq; humana societas debet esse perfecta Respub. ergo debet habere potestatem seipsam conservandi, & proinde puniendi perturbatores pacis, &c.

TERTIO nota, hanc potestatem transferri à multitudine in vnum vel plures eodem iure naturæ; nam Respub. non potest per seipsam exercere hanc potestatem, ergo tenetur eam transferre in aliquem vnum, vel aliquos paucos. & hoc modo potestas Principum in genere considerata, est etiam de iure naturæ, & diuino, nec posset genus humanum, etiam si totum simul conueniret, contrarium statuere, nimirum vt nulli essent principes vel rectores.

QUARTO nota, in particulari singulas species regiminis esse de iure gentium, non de iure naturæ; nam pendet à consensu multitudinis, constituere super se regem vel consules, vel alios magistratus, vt patet: & si causa legitima adsit, potest multitudo mutare regnum in aristocratiam, aut dimocratiam, & è contrario, vt Romæ factum legimus.

QUINTO nota, ex dictis sequi, hanc potestatem in particulari esse quidem à Deo, sed mediante consilio, & electione humana, vt alia omnia, quæ ad ius gentium pertinent. ius enim gentium est quasi conclusio deducta ex iure naturæ per humanum discursum; Ex quo colliguntur duæ differentię



inter potestatem politicam, & Ecclesiasticam: vna ex parte subiecti, nam politica est in multitudine, Ecclesiastica in vno homine tanquam in subiecto immediatè: altera ex parte efficientis, quòd politica vniuersè considerata est de iure diuino, in particulari considerata est de iure gentium; Ecclesiastica omnibus modis est de iure diuino, & immediatè à Deo.

Ex his ad argumentum *QVARTVM* Anabaptistarum respondeo. *PRIMO*, argumentum solùm probare de regno in particulari, non de ipso principatu in vniuersum; nos autem hoc loco principatum in vniuersum, non certam aliquam eius formam constituere volumus.

Addo *SECUNDO*, sæpissimè regna esse iusta & iniusta; à Deo, & non à Deo; nam ex parte ipsorum occupantium & inuadentium, regna sunt latrocinia, & iniusta, & proinde non à Deo; tamen ex parte diuinæ prouidentiae quæ vitur malè intentione hominum, & illam ordinat vel ad peccata punienda, vel remuneranda bona opera, vel ad alios bonos fines, regna illa sunt iusta, & legitima. Deus enim interdum  
 10 admirabili ratione prouidentiae suæ, ita quibusdam regna adimit, quibusdam largitur, vt & qui regno cadit, iustissimè cadat, nec tamen iustè possideat, qui regnum inuadit; daturus etiam ipse suo tempore illius inuasionis iustissimas poenas. Ac longè alia ratione Deus filiis Israël Palæstinam tradidit possidendam, quàm illam eandem vel Salmanasar, vel Nabuchodonosor postea tradiderit. Siquidè filij Israël, duce Iosue, laudabili obedientia cum Palæstinis pugnabant, illis quæ ad interuentionem deletis, terras eorum sibi vendicabant. Salmanasar verò, & Nabuchodonosor, detestabili sacrilegio, Dei populum captiuum ducebant; neque enim imperio Dei, sed prauæ suæ cupiditati obsequi volebant; tametsi Deus ipsis etiam ignorantibus utebatur ad id quod iustissimè fieri volebat.

Explicant hanc rem accuratè S. Augustinus libro de gratia, & libero arbitrio, cap. 20. & 21. & Hugo Victorinus lib. 1. de Sacramentis parte 1. cap. 29. nec desunt Scripturarum testimonia. Nam Isai. 10. sic legimus: *Affur virga furoris mei, & baculus ipse est, in manu eorum indignatio mea: ad gentem fallacem mittam eum, & contra populum furoris mei mandabo illi, ut auferat spolia, & diripiat prædā, & ponam illum in concul-*



caionem, quasi lutum platearum; ipse autem non sic arbitrabitur, & cor eius non ita existimabit, &c. Vbi loquitur de Salmannasar, & Senacherib, qui animo iniquo occupauerunt regiones Israël; tamen Deus, illis nescientibus, vsus est eorum opera ad puniendum Israëlitas.

Sic Isa. 45. Hæc dicit Dominus Christo meo Cyro, cuius apprehendi dexteram, & subiiciam ante faciem eius Gentes, & dorsa Regum Terrarum. Ego ante te ibo, & gloriosos terra humiliabo, &c. propter seruum meum Iacob, & Israël electum meum; & vocavi te nomine tuo, assimilavi te, & non cognouisti me. Ex quo loco 10 apparet Cyrum acquisiuisse sibi Monarchiam ex cupiditate dominandi, & non propter Dei obsequium: & tamen Deum illi affuisse, & Monarchiam, quam quærebat, illi dedisse, vt ipse liberaret populum Israël de Babylonica captiuitate.

Hierem. 27. Ego dedi omnes terras istas in manu Nabuchodonosor Regis Babyloniæ serui mei; Insuper & bestias agri dedi ei, & seruiant illi, & seruiant ei omnes Gentes, & filio eius, & filio filij eius, donec veniat tempus terra eius, & ipsius, & seruiant ei Gentes multæ, & Reges magni; Gens autem, & regnum, quod non seruiant 20 Nabuchodonosor Regi Babyloniæ, & quicumque, non curauerit colulum suum sub iugo Regis Babyloniæ, in gladio & in fame & in peste visitabo super Gentem illam ait Dominus omnipotens. Et tamen quis dubitat, quin Nabuchodonosor mala intentione subiecerit sibi tot regna?

Ezechiel quoque ait, cap. 29. Nabuchodonosor Rex Babyloniæ seruire fecit exercitum suum seruitute magna aduersus Tyrum, & merces non est reddita ei de Tyro pro seruitute, qua seruiuit mihi aduersus eam. Et infra: Dedi ei terram Aegypti pro eo quod laborauerunt mihi, ait Dominus Deus. 30

Sic Romani non propter Deum, sed cupiditate gloriæ quærebant Monarchiam, vt B. Aug. ostendit prolixè lib. 5. ciuit. Dei, cap. 12. & tamen Deus Monarchiam eis donauit, tum, vt mercedem redderet bonis eorum operibus moralibus, vt idem Aug. docet lib. 5. cap. 15. ciuit. Dei, tum etiam, vt per vocationem omnium Gentium sub vno principatu pararetur via Evangelicæ predicationi, vt B. Leo dicit serm. 1. de sanctis Petro & Paulo.

Adde tamen, quod etiam si initio, qui regna constituerunt, fuerint inuafores, vt plurimum: tamen successu temporis fi-



unt vel ipsi, vel successores eorum legitimi Principes, quia populi paulatim consentiunt. hoc modo regnum Francorum nunc omnium cōsensu legitimum est, licet initio Franci iniuste Gallias occupauerint. Atq; idem dici potest de regno Hispanico, quod ab inuasiōe Gothorum cœpit; & de regno Anglorum, quod cœpit ab iniusta occupatione Anglosaxonum; & de ipso Imperio Romano, quod à Iulio Cæsare patriæ oppressore constitutum est; quod tamen postea adeo legitimum esse cœpit, vt Dominus dixerit Matth. 22.

10 *Reddite quæ sunt Cæsari, Cæsari, &c.*

## CAPVT SEPTIMVM.

*Idem asseritur ex antiquitate.*



VINTA ratio sumitur ab origine; Nam etsi subiectio seruilis cœpit post peccatum Adæ, tamen politicus principatus fuisse etiam in statu innocentia; & probatur PRIMO, quia etiam tunc homo fuisse naturaliter animal ciuile, & sociale, ac proinde rectore opus habuisset.

20 SECUNDO ex ipsa creatione; nam idè Deus fecit mulierem ex viro, & non creauit simul multos viros, sed vnum tantum, ex quo omnes alij nascerentur; vt indicaret ordinem & præfecturam, quam inter homines esse volebat, vt Chrysostomus obseruat hom. 34. in 1. ad Corinth.

30 TERTIO, quia in illo statu fuisse disparitas sexuum, statuum, ingeniorum, sapientia; & probitatis; ergo & præfectura ac subiectio; nam in humana societate debuit esse ordo. Rectus autem ordo postulat, vt inferior à superiore regatur, & minus bonus à meliore: quod autem hæc diuersitates tunc etiam locum habuissent, sic ostendi potest.

In illo statu fuisse generatio, vt patet Gen. I. *Crescite, & multiplicamini*, ergo & lèxus disparitas, quæ necessariò præcedit generationem, & disparitas ætatum, quæ necessariò sequitur generationem, & disparitas sapientia; & probitatis, quæ sequitur ætatem disparitatem; non enim fuissent nati homines perfecti in illo statu, sed debuissent paulatim discere, & proficere. Fuissent quidem omnes nati in gratia Dei, & cum maiori cognitione, quam nunc, vt Augustinus docet



lib. i. de Baptismo paruulorum, cap. 38. at sine dubio non fuissent tam perfecti, quàm adulti; & inter ipsos adultos poterant per liberum arbitrium alij magis, alij minus applicari addiscendum.

Denique ingeniorum varietas oritur ex varietate corporum; fuissent autem tunc corpora varia magnitudine, forma, robore, & similibus, vt patet, quia illa corpora non erant exempta à legibus naturæ, & egebant cibo, aëris inspiratione cœlorum influxibus; fuisset igitur etiam tunc ingeniorum diuersitas. Vide B. Thomam i. parte, quæst. 96. & 105.

QUARTO inter Angelos est præfectura, & subiectio, cur ergo inter homines non fuisset in statu innocentia? certè Beelzebub dicitur princeps Dæmoniorum, Matthæi 12. qui sanè principatum nō acquisiuit peccando, sed retinuit quem antè habebat in eos Angelos, qui eum sequuti sunt. & Apocalypsis, cap. 12. dicitur: *Michaël & Angeli eius*. denique Dionysius, cap. 9. cœlestis Hierarchiæ, dicit primam Hierarchiam Angelorum præesse, & imperare secundæ, & secundam tertiæ. & B. Greg. hom. 34. in Euang. dicit nomina principatum & dominationum in Angelis, apertè significare, quòd alij alijs præsunt.

Ex his ad argumentum QUINTVM respondetur, non pugnare libertatem, in qua creati sumus, cum politica subiectione, sed solum cum despotica, id est, cum vera & propria seruitute, differt autem politica subiectio à seruili, quod subiectus seruiliter, est, & operatur propter alium; subiectus politice, est, & operatur propter se; seruus regitur non in sui, sed in Domini sui commodum; ciuis regitur in commodum suum, non in commodum magistratus; sicut è contrario Princeps politicus, dum regit populum, non suam, sed populi utilitatem quærit, Tyrannus autem, & Dominus, non populi, sed suam quærit, vt Arist. docet lib. 8. de moribus, cap. 10. Itaque reuera si vlla est seruitus in politico principatu, magis propriè seruus dici debet qui præest, quàm qui subiectus est, vt docet August. lib. 19. ciuit. cap. 14. & hoc ad litteram significat illud Domini Matth. 20. *Qui voluerit inter vos primus fieri, erit omnium seruus*; quomodo Episcopi seruos se plebium suarum, & summus Pontifex seruum seruorum Dei se nominat.

Ad PRIMUM locum ex cap. I. Gen. dico, ibi agi de principatu



paru despotico; sic enim dominari debuit homo piscibus maris, & volatilibus cœli, aliisque animantibus.

Ad SECUNDVM dico, mulierem tam ante peccatum, quàm post, sociam & subiectam esse viro; sociam in generatione, subiectam in gubernatione. Illud autem: *Sub Viri potestate eris*, non significat quameunque subiectionem, sed involuntariam, & cum tristitia ac timore, qualem vt plurimùm experiuntur mulieres coniugaræ; ita docet B. Augustinus li. II. Genes. cap. 37. *Neq, enim*, inquit, & ante peccatum aliter factam fuisse, decet credere, mulierem, nisi & Vir ei dominaretur, & ad eum ipsa seruendo conuerteretur, sed rectè accipi potest hanc seruitutem significatam, quæ cuiusdam conditionis est potius, quàm electionis.

Ad TERTIVM, fateor, Cain primùm ædificasse materiam ciuitatem, sed non propterea sequitur ibi cœpisse politicum regimen; nam etiam sine ciuitate materiali potest esse Respublica & principatus; neq; negari potest, quin Adamo subiecti fuerint filij & nepotes eius.

Ad QVARTVM dico, Augustinum loqui de seruitute propriè dicta, vt ex toto illo capite patet, vbi inter alia sic ait: *Conditio seruitutis iure intelligitur imposita peccatori, &c.* Neque obstat quod Augustinus ibidem dicit, inde primi iusti, Pastores magis pecorum, quàm Reges hominum constituti sunt, vt hinc etiam insinuet Deus, quid postularet ordo creaturarum, & quid exigat meritum peccatorum; nam hoc loco respicit ad abusum nominis regij, quo interdum accipitur pro despotico principatu; nam vt idem Aug. ait lib. 5. de ciuit. Dei, cap. 12. Rex dicitur à regendo & consulendo, non à regnando atq; dominando; & hoc modo Abraâ, Isaac, & Iacob Reges dici potuissent: tamen quia fastus humanus Regè dici putat à regnando & dominando; vnde est illud Domini Luc. 22. *Reges Gentium dominantur eorum*, ideo primi iusti, Pastores pecorum potius, quàm Reges hominum dicti sunt.

Ad QVINTVM dico, Gregorium non loqui de principatu politico simpliciter, sed adiuncto metu, & tristitia, & timore, &c. quæ per peccatum inuenta sunt. & cum ait, omnes homines natura esse æquales, & per peccatum fieri inæquales, & ideo vnum ab altero regi debere, non intelligit homines natura esse æquales sapientia vel gratia, sed æquales in essentia & specie humana; ex qua æqualitate rectè colligitur,



tur, non debere vnum alteri dominari, quomodo homo dominatur bestiis, sed solum debere vnum ab altero regi politice. Vnde ibidem subdit: *Nam contra naturam superbire, est ab equalibus sibi timere*; quia verò peccatores per peccatum similes fiunt bestiis, & degenerant ab ea naturæ integritate, in qua creati fuerant; ideo ibidem Gregorius dicit, rectè post peccatum vnum alteri dominari cœpisse, cum terrore minando & puniendo, quod in statu innocentie non fuisset.

CAPVT OCTAVVM.

10

*Principatum siue dominium in impiis esse posse.*



QVOD SECUNDO loco proposuimus, videlicet principatum in impiis esse posse, facile probare poterimus. Ac primùm occurrit error Armacani, qui lib. 10. quæstionum Armenicarum, cap. 4. docet, titulum præcipuum dominiorum esse gratiam Dei, siue iustitiam & caritatem: alios autem titulos omnes in hoc fundari, & qui iustitia & gratia Dei carent, nullum habere verum dominium. Eundem errorem eodem tempore docuit Ioannes VViclef, quem refellit optimè Thomas VValdenſis lib. 2. doctrinalis fidei, cap. 81. & sequentibus, vsque in finem libri, & postmodum errorem eundem asseruit Ioannes Hufſ, vt pater ex Concilio Constantiensi, sess. 15.

Argumenta eorum erant tria. PRIMVM ex Scriptura Oſeæ 8. *Ipsi regnaverunt, & non ex me, Principes exstiterunt, & non cognoui, argentum suum & aurum suum fecerunt sibi idola, & intererunt.* Vbi Dominus improbat dominia improborum, Regum, & dicit, se non dedisse ea illis, & causam reddit, quia idola sibi fecerunt. SECUNDVM argumentum ex illo Eccles. 10. *Regnum à Gente in Gentem transfertur propter iniustitias.* Argumentum TERTIVM, ex ratione, quia non est dominium, nisi à Deo; Deus autem nullo modo conferret dominia improbis, tum quia hostes eius sunt, tum etiam, quia videretur approbare abusum; abutuntur enim omnes impij sua potestate.

Hic error facile refellitur. PRIMO, Scripturis, Sap. 6. *À Domino data est potestas vobis, & cum essetis ministri regni illius*

non



non recte iudicasti, &c. Isa. 45. *Hac dicit Dominus Christo meo*  
*Cyro, &c. Hieremia 27. Ego dedi, inquit Dominus, omnes ter-*  
*ras istas in manu Nabuchodonosor Regis Babylonis, &c. Et Da-*  
*niel 2. Tu es Rex Regum, Deus cæli dedit regnum tibi, &c. Et*  
*Rom. 13. & 1. Pet. 2. Apostoli Petrus & Paulus docent, Regum*  
*potestatem esse à Deo, & illis obediendum, cum tamen nul-*  
*li tunc essent Reges, nisi infideles.*

SECUNDO, ex Cōcilio Constantiensi sess. 8. & 15. vbi hunc errorem Ecclesia damnauit.

10 TERTIO, ex Augustino, qui lib. 5. de ciuitate Dei, cap. 21. *Qua cum ita sint, inquit, non tribuamus dandi regns atq; imperij potestatem, nisi Deo Verè, qui dat felicitatem in regno cælorum solis piis, regnum Verò terrenum & piis, & impiis, sicut ei placet, cui nihil inusurpe placet. Et infra: Qui dedit, inquit, Mario, ipse & Cæsari, qui Augusto, ipse & Neroni, qui Vespasiano & Galba, & filio suauissimis Imperatoribus, ipse & Domitiano crudelissimo, & ne per singulos ire necesse sit, qui Constantino Christiano, ipse Apostata Iuliano.*

20 QUARTO, ratione; nam dominij fundamentum non est gratia, sed natura; homo enim quia factus est ad imaginem Dei, ac proinde mente ac ratione præditus est, ideo dominatur rebus inferioribus, vt ex 1. cap. Gen. deduci potest; at natura in infidelibus manet, licet gratia careant, igitur & dominia vera habere possunt. Ad hæc, cum gratia & iustitia sit occultissima, & nemo sciat de se, vel de alio, an sit verè iustus, si gratia esset titulus dominiorum, sequeretur, nullum dominium esse certum. Ex quo nasceretur incredibilis confusio & perturbatio inter homines. Neque argumenta eorum aliquid concludunt.

30 AD PRIMUM dico, illis verbis non improbari à Deo Reges malos, sed improbari quòd Iudæi voluerint habere Regem, cum Deus esset Rex eorum; nam, vt exponit B. Hieronymus, in hoc cap. 8. Osee explicat causas, propter quas populus Israël tradendus erat in captiuitatem, & vnam dicit esse, quia voluerunt habere Regem; alteram, quod fecerunt sibi idola. Quòd autem valde peccauerint, volentes Regem habere, perspicuum est ex lib. 1. Reg. cap. 12. vbi post electum Saulem in Regem, Samuel sic ait ad populum: *Stare, & Vide-  
 terem istam grandem, quam facturis est Dominus in conspectu  
 vestro. Nunquid non mesistis triticum est? hodie et inuocabo Dominum,*



*Et dabit vobis & pluuia; & scietis, & videbitis, quia grande malum feceritis vobis in conspectu Domini, potentes super vos Regem.*

Ad SECUNDUM dico, transferri regna de Gente in Gentem propter iniustitiam, quia Deus propter peccata Regum sæpe donat victoriam hostibus eorum, sed non propterea eo ipso, quo peccant, ius regni amiserunt.

Ad TERTIUM dico, Dei benignitatem decere, ut etiam hostibus suis beneficiat, ut legimus in Euangelio Matth. 5. *Solem suum oriri facit super bonos & malos, & pluit super iustos & iniustos.* neque propterea approbat abusum. Non enim donat regna impiis, ut eis abutantur, sed vel ut beneficentia sua inuitati conuertantur à peccatis suis, ut B. Hieronymus exposuit in illud Isaia 45. *Hec dicit Dominus Christo meo (Cyro): Ego ante te ibo, & gloriosos terra humiliabo, portas aereas conteram, & sectes ferreos confringam, & dabo tibi thesauros absconditos, & arcana secretorum, & scias, quia ego Dominus, &c.* vel ut remuneret quædam benefacta eorum, ut B. Augustinus docet lib. 5. de ciuit. Dei, cap. 15. vel denique, quia interdum hoc merentur peccata populorum, ut idem Augustinus docet lib. 5. de ciuit. Dei, cap. 19. ex illo Iob. 34. *Qui regnare facit hominem hypocritam propter peccata populi.* Idem ramen Augustinus lib. 19. de ciuit. Dei, cap. 21. dicit, apud infideles non posse esse iustitiam, nec iura, nec verum populum, aut Remp. &c. sed vocat veram iustitiam, & vera iura, quæ ducunt ad vitam æternam. vide lib. 5. in Iulian. cap. 3.

## CAPVT NONVM.

*Proponitur quæstio de potestate magistratus.*

**S**EQVITVR TERTIA quæstio; Liceatne Christiano magistratui leges condere, iudicia exercere, & punire improbos. Sunt autem duo errores refellendi. PRIMVS est VValdensium & Anabaptistarum, qui hæc omnia negant. Argumenta verò eorū sunt, quod legum obligatio tollat Christianam libertatem; iudicia autem prohibeantur Matth. 5. *Si quis soluerit tecum iudicio contendere, & tunicam tuam tollere, da ei & pallium.* Et I. Corint. 6. *Delictum est in vobis, quod iudicia habetis inter vos. cur non magis fraudem patimini? quare non magis iniuriam accipitis?* Deni-



Denique, punire gladio interdictum videatur Christianis Matthæi 5. *Dicitur est antiquis, oculum pro oculo, dentem pro dente, ego autem dico vobis non resistere malo*; constat autem in lege veteri non fuisse permissum, nisi magistratui, pœnam rationis inferre, ergo hoc ipsum Christus prohibet, quæ etiam Marth. 26. ait: *Omnes, qui acceperint gladium, gladio peribunt.*

10 SECUNDVS error Caluini est, qui etsi lib. 4. Instit. cap. 20. probat contra Anabaptistas, in Ecclesia debere esse leges ciuiles, iudicia & gladium, tamen lib. 4. Instit. cap. 10. §. 5. asserit leges ciuiles non obligare in conscientia: quod antea illum docuerat Ioannes Gerson de vita spirituali, lect. 4. & Almain de potestate Ecclesiastica, quæst. 1. cap. 10. Rationes hæ sunt.

PRIMA, quia potestas politica est temporalis, ergo nihil ei cum conscientia. SECUNDA, quia finis legum ciuiliū est pax externa. TERTIA, quia Princeps non iudicat de inter-  
nis. QUARTA, quia Princeps non potest inferre pœnam spiri-  
ritualē, ergo nec ad illam obligare. QUINTA, quia Prin-  
20 ceps non potest absolvere, ergo nec ligare. SEXTA, quia bis puniretur idem peccatum, semel hic, semel in alio seculo. SEPTIMA, quia Princeps vt plurimum non intendit obligare ad culpam. OCTAUA, quia potius debemus præuicari grauiſſimam legem ciuilem, quàm leuiſſimam diuinam, vt illam de non mentiēdo officiosè; at ista non obligat, nisi ad venialem culpam, ergo illa ad nihil obligat; nam si obligaret ad peccatum, præcipuè mortale, oporteret potius cauere mortale, quàm veniale.

30

## CAPVT DECIMVM.

*Prima Propositio.*

ICET Christiano Principi leges condere. Probatur; nam in primis proprium est Principis leges condere, iuxta illud Prouerb. 8. *Per me Reges regnant, & legum conditores iusta decernunt.* Et Isaia 33. *Dominus Rex noster, Dominus Legifer noster.* nam Regis est iubere, & iubendo dirigere. Porro lex est ipsa iussio & regula, ergo si Christiani esse possunt Principes, certè etiam possunt leges condere; & confirmatur ex Augustino lib. 19. de



de ciuit. Dei, cap. 17. *Ciuitas*, inquit, *cælestis*, dum apud terrenam ciuitatem, velut captiuam vitam sua peregrinationis agit, iam promissione redemptionis, & dono spirituali, tanquam pignore accepto, legibus terrena ciuitatis, quibus hac administrantur, quæ sustentanda mortali vita accommodata sunt, obtemperare non dubitat. Et infra: Hac ergo cælestis ciuitas dum peregrinatur in terra, ex omnibus Gentibus cines euocat, atque in omnibus linguis peregrinam colligit societatem, non curans quidquid in moribus, legibus, institutisq; diuersum est, quibus pax terrena vel conquiritur, vel tenetur, nihil eorum rescindens, 10 vel destruens, immò etiam seruans, ac sequens.

SECUNDO PROBATVR ex necessitate legum ciuiliū; Christiani ex eo quòd Christiani sunt, non desinunt esse homines, & ciues, & proinde membra Reipub. temporalis, ergo debent habere regulam aliquam actionum suarum humanarum, qua dirigantur in commerciis, & consuetudine cum aliis hominibus; non sufficit autem lex naturalis, quia solū principia generalia ostendit, neque ad particularia descendit; non sufficit etiam lex Euangelica, quia illa tractat solū de rebus diuinis & cælestibus, vt notum est; lex 10 autem diuina politica Testamenti veteris iam cessauit; solū enim conueniebat vni illi populo Iudæorum, & in illo statu: ergo necessaria est alia aliqua regula humana, nimirum arbitrium Principis, aut lex ciuilis auctoritate Principis constituta. Et quanquam arbitrium Principis aliquo modo sufficere possit, quando Princeps est sapiēs, & populus est exiguus; tamen absolutè necesse est, populum regi legibus, non solo arbitrio Principis, si rectè regi debeat. Quòd interdum sufficiat arbitrium Principis, patet, quia antiquiora sunt regna, quàm leges. Iustinus lib. i. hist. dicit, olim populos sine vllis legibus, solo Principum arbitrio, gubernari solitos; & ex Lii lib. 3. constat, Rom. Rempub. ad annos CCC. sine legibus gubernatam. Denique, antiquissimus legislator vel est Moyses, vt Iosephus contendit in 2. lib. contra Appionem, vel certè Phoroneus qui CCC. annis Mose fuit antiquior, vt Eusebius in Chron. & August. lib. 18. ciuit. Dei, cap. 3. docent. Atqui ante Phoroneum constituta sunt regna Assyriorum, Argiuorum, Ægyptiorum, & aliorum. 30

Quòd autem melius sit regi populum legibus, quàm solo Principis arbitrio, immò quòd sit hoc aliquo modo necessarium,



sarium, affirmat Aristot. lib. 3. polit. cap. 11. Et probatur PRIMO, quia facilius est inuenire vnum vel duos bonos & sapientes, quam plurimos. Si Respub. debeat regi arbitrio boni Principis, indigebit infinitis bonis Principibus, quorum vnus alteri succedat; at si gubernetur legibus, sufficit semel fuisse aliquos, vel vnum sapientem, qui legem fecerit.

SECUNDO, qui leges condunt multi sunt, & diligenter eas examinant; at Princeps est vnus, & saepe repente iudicare debet.

10 TERTIO, qui leges fecerunt, sine amore & odio iudicant; nam de rebus absentibus iudicant, Princeps de praesentibus iudicat, vbi locum habent amici, propinqui, munerum, terrores, &c. vnde iudiciū legum est iudiciū solius rationis; iudiciū hominis est iudiciū rationis & libidinis, id est, hominis & bestiae.

QUARTO, iudiciū Principis etiam si rectissimum sit, vix vnquam caret suspitione, inuidia, querelis, maledictis; at iudiciū legis his omnibus caret, quippe quod scitur non posse corrumpi muneribus.

20 QUINTO, gubernatio per leges potest longissimo tempore eadem perseverare; at iudicia hominum saepe mutantur.

SEXTO, gubernatio per leges potest reduci ad artem, & facilius effici; non autem gubernatio ad arbitrium hominis.

SEPTIMO, melior est gubernatio Principis per se, quam per vicarios; at gubernatio sine legibus necessariò requirit multos vicarios, qui omnes ad arbitriū suum iudicent; quando autem per leges gubernatur, ipse Princeps omnia per se iudicare censetur, cum eius legibus iudicetur.

30 TERTIO PROBATUR; nam si non liceret Principi Christiano legibus obligare populum, id esset propter libertatem Christianam, sed hoc dici non potest. nam tantum abest, vt lex opponatur libertati Christianae, vt potius opponatur seruituti contrariae eidem libertati, id quod ostendo ex ipsa natura libertatis Christianae; nam libertas Christiana opponitur seruituti peccati, Ioan. 8. Amen, amen dico vobis, qui facit peccatum, seruus est peccati; seruus autem non manet in domo in aeternum; filius manet in aeternum; si ergo vos filius liberaueritis, Seruè liberi eritis, Et Rom. 6. Liberati a peccato, serui facti estis iusti.



*iustitia.* Vocatur autem hæc iustificatio à peccato libertas quædam, quia qui in peccato est, donec non liberatur per gratiam, non potest velle bonum ordinatum ad vitam æternam; habet quidem liberum arbitrium, quia potest ex pluribus malis eligere vnum, & etiam eligere bonum morale; at eligere bonum diuinum non potest, nisi saltem liberari incipiat per Dei gratiam præuenientem, quia captiuus tenetur à Diabolo ad ipsius voluntatem, vt dicitur 2. Tim. 2. at liberum arbitrium liberatum per gratiam potest bonum diuinum velle, & facere. Sed maior adhuc libertas erat in statu innocentie, quia tunc homo poterat nullum vnquam velle malum, quod nunc etiam iusti non possunt; maxima autem erit in cælo, vbi non poterimus velle vllum malum.

Itaq; triplex est gradus libertatis, sicut etiam triplex gradus vitæ corporalis. PRIMVS est Beatorum, qui sic poterunt viuere, vt non possint mori, & sic poterunt bene agere, vt non possint peccare.

SECUNDVS fuit Adami & Eux in statu innocentie, qui sic poterant viuere, vt possent etiam nunquam mori, & sic poterant bene agere, vt possent etiam nunquam peccare.

TERTIVS noster, qui sic possumus viuere, vt non possimus aliquando non mori: & sic possumus bene agere, vt non possimus non peccare saltem venialiter; infra hos tres gradus non est quartus, nisi non viuere, & non bene agere, qui gradus ad damnatos pertinet. vide Augustinum lib. de cor. & grat. cap. 11. Cum ergo libertas consistat in eo, vt possimus eligere bonum & reicere malum, manifestum est, legem non pugnare cum libertate; non enim impedit quominus possimus eligere bonum & reicere malum, sed contra potius inuat; nam præbet materiam exercendæ libertatis. At seruituti rectè opponi dici potest lex, quia non potest impleri à seruo peccati. vnde Paulus Rom. 7. *Quid ergo, inquit, legem destruximus per fidem absque, sed legem statuumus.* vide Aug. de spiritu & littera, cap. 30.

Probatur SECUNDO hoc idem. Lex diuina nõ pugnat cum libertate, ergo nec lex humana. Antecedens patet, nam Adâ liber creatus est, & tamen lex ei imposta fuit, vt non videretur ligno scientiæ boni & mali, Gen. 2. probatur consequentia; nam lex diuina & humana quoad obligationem sunt omnino æquales, vt patebit in sequenti capite.



## CAPVT XI.

## Secunda Propositio.

**E**x ciuili non minus obligat in conscientia, quam lex diuina, etsi minus firma & stabilis sit hac. quam illa. Explico, lex diuina & humana differunt quoad firmitatem, quia diuina non potest abrogari ab homine, humana potest; at quoad obligationem, non differunt, vtraque enim obligat in conscientia, nunc ad mortale, nunc ad veniale peccatum pro rerum ipsarum grauitate; ita vt nullo sit melior regula ad discernendum, vtrum lex humana obliget ad mortale, an ad veniale, quam cogitare legem illam esse diuinam, & videre, si diuina esset, quomodo obligaret.

Probatur PRIMO, obligatio vel est essentia, vel propria passio legis, ergo omnis lex & à quocunque feratur, siue à Deo, siue ab Angelo, siue ab homine, & homine siue Episcopo, siue Rege, siue patre, eodem modo obligat. Probatur 2<sup>o</sup> sequentia à simili; nam quia hominis essentia est, rationale esse, & propria passio esse risibilem, omnis homo est rationalis & risibilis, siue sit creatus à solo Deo, vt Adam, siue à Deo ex alio homine, vt Eua, siue ab hominibus genitus, vt Cain. Antecedens patet, nam lex est regula morum, regulæ autem proprium est intrinsecè ita dirigere, vt recessus ab ipsa sit peccatum in moribus, sicut recessus à regula in naturalibus dicitur peccatum naturæ, vt sunt monstra, & recessus à regula in artibus est peccatum artis.

Vbi notandum est, quod sicut res ceteræ, quoad existentiam, pendent ab agente, non quoad essentiam, essentiæ enim sunt æternæ; sunt enim quædam participationes possibiles diuinæ essentiæ: ita etiam lex, quoad existentiam, pendet à legislatore; non enim erit lex, nisi dicatur ab eo, qui habet auctoritatem. at quoad essentiam non pendet, quod enim lex obliget est quid æternum, & immutabile, & participatio quædam legis æternæ Dei, quæ est prima & summa regula; & hoc videretur voluisse dicere B. Augustinus lib. 22. contra Faustum, cap. 27. cum ait: *Peccatum est dictum, & factum, & concupiscentum contra æternam Dei legem.* Nam siue quis præuaricetur legem naturalem, siue positiuâ, siue diuinam, siue



sive humanam, semper peccat contra legem æternam, quia omnis lex est legis æternæ participatio. Et quanquam non potest fieri, ut aliqua vera lex non sit à Deo, cum lex non possit condi, nisi ab habente potestatem, & non sit potestas nisi à Deo, Rom. 13. tamen si (per impossibile) esset lex non à Deo, adhuc obligaret ad culpam, sicut si (per impossibile) homo existeret non factus à Deo, adhuc esset rationalis.

Probatur SECUNDO, nam si lex obligaret solum, quia divina, omnes leges diuinæ æqualiter obligaret, ut patet, nam eadem esset ratio obligationis in omnibus. At hoc est falsum, nam magis obligat lex, non occides, quam lex, non furaberis; & magis lex, non furaberis, quam lex, non mentieris; & lex, non mentieris, quam lex, non loqueris verbū ociosum.

Præterea TERTIO, ostensum, illa lex diuina magis obligat, cuius violatio est magis contraria fini legis, id est, caritati, ideo enim peius est occidere, quam furari, quia magis contra caritatem; & ideo mortale est mentiri perniciosè, veniale est mentiri officiosè, quia illud est contra caritatem, hoc verò præter caritatem; sed lex humana etiam habet pro fine caritatem, & ordinat media ad hunc finem. quod enim ait Apostolus 1. Timoth. 1. *Finis præcepti est caritas*, de omni præcepto intelligitur, & patet; nam lex civilis iusta, semper est vel conclusio, vel determinatio legis diuinæ moralis: ergo habent eundem finem, & solum in hoc videntur differre, quod lex humana dirigit actus humanos in ordine ad actus externos dilectionis, id est, ad pacem & cōseruationem Reipub. lex autem diuina dirigit etiam in ordine ad internos actus caritatis: igitur eadem est ratio legis diuinæ & humanæ, quod attinet ad obligationem.

SED OBIICTES, si ex natura rei, & ex ordine ad caritatem; sumitur grauitas peccati, superflue sunt leges. nam æquè obligat ante legem ac post legem ad id fugiendum, quod natura sua lædit caritatem, & ad id faciendum, quod est necessarium ad cōseruandam caritatem.

RESPONDEO, negatur consequentia; nam si lex non adsit generaliter aliquid præcipiens, aut prohibens, multa quæ sunt malavni, non erunt alteri mala. verbi gratia, si lex non sit, quæ prohibeat gestare arma, erit malum gestare arma ei, qui facile prouocatur ad iram, & qui habet inimicos, quibus cupit nocere, at non erit malum homini pacifico, &



qui solum cupit seipsum defendere; tamen si id lex prohibeat, iam est malum omnibus; lex enim non debet respicere, quid huic aut illi sit bonum vel malum, sed quid prosit, aut obstat Reipublicæ. PRAETEREA plurima sunt necessaria vel noxia bono communi, quæ tamen non sunt bona, vel mala ulli in particulari, nisi lege præcipiantur, vel prohibeantur. Verbi gratia, tributum necessarium est Regi; tamen si lex non adsit, non est necessarium ut ego solvam; nam parum prodest meum solum tributum Regi, neque ad me pertinet videre, quibus rebus indigeat Respub. & sic possent omnes dicere. Similiter noxium est Reipub. exportari aurum ex provincia, at non est noxium notabiliter, quod ego solus exportem meum aurum, & sic omnes dicere possent; Lex ergo necessaria est, quæ generaliter præcipiens & prohibens, publicæ utilitati prospiciat.

QUARTO, lex diuina positiua ideo obligat ad peccatum, quia constituit actum, quem præcipit in genere virtutis, cum antea non esset; nam si Iudas non ex contemptu, sed ex cibi appetitu moderatè comedisset carnem suillam in lege prohibitam, sine dubio peccasset, non autem peccasset contra obedientiam, quia non ex contemptu, ergo contra temperantiam; at moderatè vesci carne suilla, ex se non est contra temperantiam, sed res quædam indifferens, ergo lex fuit, quæ illam abstinentionem fecit actum temperantiæ necessarium. At hoc idem videmus in lege humana; nam lex diuina non alia de causa facit esse actum virtutis cum, qui ex se erat indifferens, nisi quia est regula morum ab eo posita, qui habuit auctoritatem præcipiendi. Sed homo etiam potest præcipere, & regulas morum constituere, ut supra ostendimus, potest igitur homo lege sua constituere actum, alioqui indifferentem, in genere virtutis; proinde pares sunt lex diuina & humana, quoad obligationem.

QUINTO, lex diuina & humana ita differunt, ut lex Regis & Proregis, siue lex Pontificis & eius Legati. Aristæ obligant eodem modo, & solum differunt firmitate, ergo & illæ. Propositio patet; nam Scripturæ passim testantur, Reges esse ministros Dei, & ab illo habere auctoritatem, & loco eius iudicare, Prouerb. 8. Sap. 6. Rom. 13. 1. Petri 2. Assumptio etiam patet; nam auctoritas Proregis est à Rege, & Legati à Papa. & experientia idem testatur, & confirmatur ex sanctis Patri-



Patribus Augustino & Bernardo. Augustinus in titulum Psa. 70. *Vbi, inquit, hoc iubet pater, quod contra Dominum non sit, sic audiendus est quomodo Deus, &c.* Certum autem est, maiorem esse Regis, quam patris auctoritatem, vt idem Aug. dicit serm. 6. de verbis Domini. Bernardus tract. de præcep. & disp. *Sine Deus, sine homo Vicarius Dei mandatum quodcumque tradiderit, pari profecto obsequendum est cura, pari reuerentia deferendum, Vbi tamen Deo contraria non precipit homo; vbi clarè dicit, differre leges ex parte materie, non autem ex parte præcipientium.*

AT OBIICIET; nam B. Bernardus ibidè loquens de mandatis hominum, dicit, iusta sine culpa non negliguntur, sine crimine non contemnuntur, vbiq; enim & culpabilis neglectus, & contemptus damnabilis est: vbi videtur dicere, legem humanam nunquā obligare ad culpam mortalem, nisi ratione contemptus. RESPONDEO, loquitur de præceptis rerum leuium, in talibus enim non potest esse crimen, nisi ratione contemptus. Nec enim possunt Prælati pro arbitrio obligare ad culpam mortalem.

Sexto probatur, quia videtur implicare contradictionem, posse Principes obligare ad pœnam, & non ad culpam, siquidem culpa & pœna relatiua sunt. & B. August. dicit lib. 1. retract. cap. 9. *Omni pœna si iusta est, pœna peccati est.* Et in epist. 105. & alibi, Deum ipsum fore iniustum asserit, si quemquam damnet innoxium. Quomodo igitur possunt Principes damnare ad mortem eos, qui leges suas prauaricantur, si illi nihil peccauerunt? si culpam in conscientia non contraxerunt?

DICES; quomodo ergo regulæ quorundam religiosorum obligant ad pœnam, & non ad culpam? RESPONDEO, obligant non per modum legis, sed per modum conuentionis & pacti, vt leges purè pœnales. Nec illa est propriè pœna, sed pœnalis afflictio suscepta in auxilium spiritus.

SEPTIMO & vltimo ex doctrina Apostolorum; nam Rom. 13. Paulus multis modis id asserit. PRIMO, cum ait: *Omni anima potestatibus sublimioribus subdita sit, non enim est potestas nisi à Deo.* SECUNDO, cum ait: *Qui potestati resistit, Dei ordinationi resistit.* TERTIO, cum ait: *Qui autem resistunt, ipsi sibi damnationem acquirunt.* Id enim de æterna dānatione exponunt Patres Græci & Latini in hunc locum. QUARTO, cum ait:



ideo necessitate subditi estote. QVINTO, cū ait: *Nō solum propter iram, sed etiam propter conscientiam.* SEXTO, cū ait: *Ministri enim Dei sunt.* 1. Petri 2. *Subiecti estote propter Deum,* id est, non solum timore pœnæ. Ad argumenta in contrarium.

Ad PRIMVM, SECVNDVM, & TERTIVM respondeo, ex eo, quod potestas politica est temporalis, & eius finis est pax exterior, & homo non iudicat de internis, rectè colligi, eam non posse obligare, nisi ad actus temporales & exteriores; non autem, non posse obligare in conscientia; nam et si ista  
10 regula dirigat actus exteriores, tamen quia regula est, ab ipsa deuiare, peccare est.

DICES, quomodo potest lex, vel potestas temporalis producere effectum spirituale, id est, ligare conscientiam? RESPONDEO, licet potestas politica & eius lex dicantur temporales ratione obiecti, quia versantur circa temporalia, & exteriora; tamen in se res sunt spirituales. Præterea ligare conscientiam, nō est aliquid efficere in rem spirituale, sed solum imperare alteri, & sic imperare, vt si is nō obediat, peccet, & testimonio propriæ conscientiæ intelligat, vel intelligere possit, se peccare. Itaque quicumq; potest iubere, potest  
20 ligare conscientiam, etiam si is de internis non iudicet, nec scrutetur conscientiam alterius.

Ad QVARTVM & QVINTVM dico, Principem non posse inferre pœnam spirituale & æternam, nec posse dimittere eiusmodi pœnam, & tamen posse obligare ad illam; quia id facit auctoritate Dei, qui ei concessit vnum, & non alterum; sicut si Rex permetteret Proregi obligare subditos ad pœnam capitis, & tamen non permetteret ei per se exercere iustitiam, vel cōdonare supplicium. Vel dicendum est, legem po-  
30 liticam obligare ad pœnam æternam, non vt est lex hominis, sed vt est lex ministri Dei. Qui enim ministrum Dei offendit, simul etiam Deum ipsum offendit; quocirca si (per impossibile) Deus non esset in rerum natura, lex politica obligaret in conscientia, & eius præuaticatio peccatum esset, sed nulla sequeretur præuaticatorem pœna spiritualis, aut æterna damnatio.

Ad SEXTVM dico, non esse absurdum, idem peccatum puniri à pluribus, & pluribus in locis, quando plures offendit, sicut videmus homicidis sæpe abscindi manus in eo loco, vbi eadem patrarunt, & deinde in loco publicæ iustitiæ abscindi caput.

Ad



Ad SEPTIMUM dico, ex intentione legislatoris pendere; an velit reuera imperare, & veram legem condere; an verò solum ostendere quid agendum sit, sine alio imperio: sed si velit seridè imperare, & veram legem condere, non est in eius potestate impedire, quin lex obliget ad mortale, aut veniale, pro rei magnitudine.

Ad VLTIMUM dico, quod legi diuinæ cedat humana, quando simul seruari nequeunt, non esse causam, quia humana non obliget ad peccatum, sed quia lex humana minus firmiter statuta est; in tali enim casu desinit esse lex, & proinde etiam obligare. Vide quæ diximus in lib. 4. de Pontifice; & præterea Ioannem Driedonem in 3. lib. de libertate Christiana; Adrianum quodlibeto 6. Franciscum Victoriam in relectione de potestate ciuili; Alphonsum à Castro lib. 1. de potestate legis pœnalis, cap. 4. & Dominicum à Soto lib. 1. quæst. 6. art. 4. de iustitia & iure.

CAPVT XII.

Tertia Propositio.



**I**UDICIA publica exercere non est illicitum

Christianis. Probatur PRIMO, quia proprium est Principis iudicare; Scriptura enim ferè coniungere solet Regem & Iudicem, Psal. 2. *Et nunc Reges intelligite, et erudimini, qui iudicatis terram.* Isai. 33. *Dominus Rex noster, Dominus Legisfer noster, Dominus Iudex noster.* Hierem. 23. *Regnabit Rex, & sapiens erit, & faciet iudicium & iustitiam in terra.* Si ergo licet Christianis habere Principem, cur non & Iudicem?

SECUNDO, quia nihil prodesse leges, si nulla esse deberent iudicia: at leges tolli non debent, vt suprà ostensum est, igitur nec iudicia.

TERTIO, Scriptura vtriusq; Testamenti iudicia admittit; sic enim legimus Deuter. 16. *Iudices & Magistros constitues in omnibus portis tuis, & iudicent populum iusto iudicio.* 1. Cor. 6. *Secularia iudicia si habueritis, contemptibiles qui sunt in Ecclesia, hos constituire ad iudicandum, sic nõ est sapiens qui squam in vobis, qui iudicare possit fratrem suum?* Vbi Apostolus monet Corinthios, vt in iis causis, in quibus non tenebantur necessariò adire tribunalia Gentilium, constituerent inter



se iudicem. Neq; difficile erit argumenta soluere, quę initio posita sunt. Ad illa igitur verba Matt. 5. *Si quis voluerit recurre iudicio contendere, & tunnicam tuam tollere, relinque illi & pal- lium.* Respondeo cum S. Augustino in epist. 5. ad Marcellinum, ea solum intelligi debere secundum animi preparatio- nem; nam ibidem Dominus ait: *Si quis te percusserit in unam maxillam, praebe illi & alteram.* Et tamen idem ipse Dominus Ioan. 18. percussus in maxilla, non prębuit alteram, sed dixit: *Cur me caedis?* Quo exemplo docuit, quemadmodum præce-  
 10 pta intelligenda sint.

Ad verba Apostoli 1. Cor. 6. *Delictum est in vobis, &c.* dico PRIMO, vocem *delictum*, Græcè esse *ἥμαρτιαν*, quod non pec- catum, sed imperfectionem significat, & sic exponit Theo- doretus. Dico SECUNDO, si delictum significet peccatum, vt exponunt Chrysostomus & Ambrosius in hunc locum, & Augustinus in Enchirid. cap. 78. & lib. 2. de sermone Domini in monte, cap. 15. & conc. 24. in Psal. 118. dico, inquam, vocari delictum, non quod in se peccatum sit, sed quia vt plurimum non caret peccato; vel ratione finis, vt quando litigatur ex  
 20 auaritia; vel ratione mediij, vt quando litigatur cum odio, rancore, iurgijs; vel ratione iniustitię, vt quando miscentur doli & fraudes; vel ratione scandali, vt accidebat Corinthiis, qui cum offendiculo Gentiliam litigabant. Dico TERTIO, non reprehendi iudicia ex parte iudicis, sed ex parte litigan- tium. Itaq; etiam si peccatum esset litigare, non tamen pec- catum esset iudicare; iudicia enim finem imponunt litibus, quod est bonum.

## CAPVT XIII.

30

## Quarta Propositio.

**L**ICET Christiano magistratui gladio punire  
 perturbatores publica quietis. Probatur PRI-  
 mo Scripturis; nā in lege naturę, Moysi, & Evan-  
 gelica habemus præcepta, & exempla huius rei. Nam Gen. 9.  
 Deus ait: *Qui effuderit humanum sanguinem, fundetur sanguis  
 illius.* Quę verba non possunt sonare prædictionem, quia  
 prædictio huiusmodi sæpe esset falsa, sed ordinationem &  
 præceptum. Vnde Chaldaica paraphrasis vertit: *Qui effude-  
 rit sanguinem cum reſtibus, ex ſemetiſa iudicis fundetur sanguis  
 illius.*



*illius.* Genes. 38. dixit Iudas: *Produce eam, & comburatur.* Vbi Iudas Patriarcha tanquam princeps familiæ adiudicauit adulteram ad ignis supplicium.

In lege Moïſis plurima ſunt præcepta, & exempla Exod. 21. *Qui percuſſerit hominem ſolens occidere, morte moriatur.* Et ipſe Moïſes, Iſue, Samuel, Dauid, Helias, aliiq; 55. viri plurimos occiderunt. Matt. 26. *Qui acceperit gladium, gladio peribit.* Quæ verba non poſſunt rectè intelligi, niſi hoc modo; Omnis, qui eadem iniuſtam fecerit, debet à magiſtratu pariter occidi. reprehendit enim Dominus Petrum, non quod iuſta deſenſio ſit illicita, ſed quod non tam ſe aut Dominum defendere, quàm iniuriam Domino factâ vlciſci veller, cùm ramen ipſe non haberet publicam auctoritatem, vt rectè exponunt Auguſtinus tract. 112. in Ioan. & Cyrillus lib. 11. in Ioan. cap. 35. præterea Rom. 13. *Si male egeris, time, non enim ſine cauſſa gladium portat, miniſter enim Dei eſt.* Apoſtolus dicit datum gladium à Deo principibus contra facinoroſos, ergo ſi in Eccleſia tales reperiuntur, cur gladio feriri nō poterunt?

SECUNDO probatur ex Patrum testimoniis. INNOCENTIUS 1. in epiſt. 3. ad Exuperium, cap. 3. interrogatus, an poſt Baptiſmū liceret magiſtratu gladio animaduertere in ſon-  
res? Reſpondet, omnino licere. HILARIUS in can. 32. ſiue in cap. 26. Matth. dicit licere occidere in duobus caſibus, nimirum ſi quis iudicis fungatur officio, aut in ſui deſenſionem vtatur gladio. HIERONYMUS in cap. 22. Hieremiæ: *Homicidas, inquit, & ſacrilegos, & venenarios punire non eſt effuſio ſanguinis, ſed legum miniſterium.* AVGVSTINVS lib. 1. de ciuitate Dei, cap. 21. *Nequaquam contra hoc præceptum fecerunt, quo dictum eſt; Non occides, qui perſonam gerentes publica poteſtatis ſceleratos morte punierunt.*

VLTIMO probatur ratione; nam ad bonum principem, cui bonum commune tuendum commiſſum eſt, pertinet impedire, ne partes, quæ ſunt propter totum, illud corrumpant, & ideo ſi non poteſt omnes partes integras ſeruare, potius debet vnā partem amputare, quàm ſinere vt bonum commune pereat; ſicut agricolæ amputāt ramos & ſarmēta, quæ officiunt viti, vel arbori, & medicus amputat membrā, quæ totum corpus inficere poſſent.

Ad rationem Anabaptiſtarum ex Matt. 5. *Oculum pro oculo, &c.* duæ ſunt ſolutiones. VNA, quod lex vet<sup>9</sup>, quia dabatur homi-



hominibus imperfectis, permiserit vindictæ appetitum, & solùm præceperit ne maior expeteretur quàm fuerit iniuria; non quod petere vindictam sit licitum, sed quod sit minus malum expetere moderatam, quàm immoderatam: porro Christum, qui perfectiores instruebat, hanc permissionem sustulisse. ita Augustinus lib. i. de sermone in monte, cap. 35. & contra Adimantum, cap. 8. & idem sentit Chrysostomus & Hilarius in hunc locum: sed quia in Leuitico, cap. 39. prohibetur vindicta: *Ne queras ultionem*; & in Ecclesiastico, cap. 10 28. legimus: *Qui vindicari vult, à Domino inueniet vindictam*; rectius fortasse respondebimus cum S. Thoma, & S. Bonauentura, & aliis nonnullis in 3. sentent. dist. 30. Dominum, cum ait: *Audistis, quia dictum est antiquis, oculus pro oculo, etc.* non reprehendere legem illam, nec prohibere Magistratum infligentem pœnam talionis, sed reprehendere prauam Pharisæorum expositionem, & prohibere priuatis hominibus desiderium, & postulationem vindictæ. Deus enim Exod. 21. & Leuit. 24. sanctam legem constituit, vt Magistratus pœna talionis afficiat sceleratos; Pharisæi inde deducebant, licere

20 priuatis hominibus appetere vindictam; sicut ex eo quod lex dicebat: *Diliges amicum tuum*, deducebant licere odisse inimicos: Christus autem docet istas esse legis corruptiones, & oportere diligere etiam inimicos, & non resistere malo, sed potius paratos nos esse debere, si opus sit, ad vertendam alteram maxillam ei, qui vnâ percussit. & quod alloquatur Dominus priuatos homines, patet ex iis, quæ sequuntur. sic enim Dominus ait: *Ego autem dico vobis, non resistere malo, sed si quis te percussit in maxillam vnâ, etc.*

Est autem obseruandum, cum dicitur, *non resistere malo*, 30 non prohiberi iustam defensionem, sed repercussionem; iubet enim Christus, ne ferias eum qui te percussit, vt Theophylactus rectè docet. ille autem dicitur ferire, qui ferit vt noceat, non ille qui ferit vt se tueatur; ac breuiter non defensio, sed vindicta prohibetur, iuxta illud Rom. 12. *Non vos defendentes carissimi*, id est, non vos vlciscentes. sic enim est in Græco ἐκδικῶντες, vnde sequitur: *Sed date locum iræ, scriptum est enim: Mihi vindictam, & ego retribuam*. Sed nec ipsa vindicta simpliciter prohibetur, si petatur à legitimo iudice, & petatur ad bonum finem; nimirum, vel quia spes est emendandum hac pœna malefactorem, vel quia non aliter posset



posset reprimi, & impediri eius malitia, & pergeret nocere, si impunitus dimitteretur; solum ergo prohibetur vindicta, quam priuati homines per se exercere volunt, & quam petunt à iudice ex desiderio nocendi inimico, & satisfaciendi propriæ iracundiæ atque odio.

## CAPVT XIV.

*Licere Christianis aliquando bella gerere.*

**S**EQVITVR quæstio QVARTA, quæ est de bello. 10  
 Continet autem hæc disputatio partes tres. Primum enim demonstrandum erit, licita esse aliquando Christianis bella. Secundò, explicandæ causæ iusti belli. Tertiò, propter Lutherum, probandum erit rectè Christianos aduersus Turcas arma sumere.

Acvt à PRIMO incipiamus, antiqua hæresis fuit Manichæorum, qui bellum ex natura sua illicitum asseriebant, & ideo Mosem, Iosue, Dauidem, & ceteros veteris instrumenti Patres, qui bella gesserunt, tanquam impios accusabant, vt B. Augustinus refert lib. 22. contra Faustum, cap. 74. & sequentibus. 20  
 Eandem hæresim nostro seculo aliqui excitant; ac in primis Erasmus cum alibi, tum præcipue in annotationibus ad cap. 3. & 22. Lucæ, proluxa disputatione contendit bellum esse vnum ex malis, quæ tolerantur, & veteribus Iudæis à Deo permissum, Christianis autem à Christo & Apostolis interdictum.

Cornelius quoque AGRIPPA in libro de vanitate scientiarum, cap. 79. artem bellandi à Christo prohibitam esse affirmat. Idem etiam sequutus est Ioannes Ferus lib. 4. commentariorum in Matthæum, exponens illud 26. cap. *Qui acceperit gladium, gladio peribit.* 30  
 Idem docent Anabaptistæ, vt testatur Melanchthon in locis Theologicis, capite de Magistratu. Idem etiam tribuit Ioanni Oecolampadio Alphonsus à Castro, verbo Bellum, quod mirum mihi videtur, cum Zvinglius eius collega adeo probarit bellum, vt in prælio pugnans perierit, & similiter Caluinus lib. 4. Instit. cap. 20. & Melanchthon, vbi supra, & ceteri hæretici huius temporis, verbo & opere doceant esse bellandum.

Nos autem, vt semper docuit Ecclesia tota, & verbis, & exemplis, dicimus bellum ex natura sua non esse illicitum, &



& non solum Iudæis, sed etiam Christianis fas esse bellum gerere, modo conditiones seruentur, de quibus postea dicemus. Id quod probatur Scripturæ testimonio, Iudicum 3. *Ha sunt gentes, quas Dominus dereliquit, ut erudiret in eis Israël: & omnes qui non noverant bella Chananaeorum, & postea discerent filij eorum certare cum hostibus & habere consuetudinem praeliandi.* Hæc sanè verba non permissionem, sed absolutam Dei voluntatem ostendunt. ITEM I. Reg. 15. *Hæc dicit Dominus exercituum, recensui quæcumq; fecit Amalech Israël, nunc ergo vade & percuti Amalech, & demolire universa eius, non parcas ei, &c.* Hic etiam non permissionem, sed præceptum videmus, & similium plenum est Testamentum vetus. Item Luc. 3. *Interrogabant eum, & milites dicentes, Quid faciemus?* Et ait illis, *Neminem concutatis, neq; calumniam faciat illi, & contenti estote stipendiis vestris.* An baptistæ apud Melancthonem dicunt Ioannem permisisse bellum Iudæis, ut imperfectis: Christum autem longè aliter docuisse.

AT CONTRA; nam Ioannes præparabat viam Domino, non ergo debuit permittere id quod Christus mox ablaturus erat; nam nec illi potuissent uti ea concessione, cum eodem anno venerit Christus, & prohibuerit bellum, ut ipsi volunt; & præterea poterant suspicari homines Christum & Ioannem non convenire inter se, quod absurdissimum fuisset. RESPONDET aliter Erasmus, hæc dici militibus, non ut ea seruantes bene viuerent, sed ut minus malè viuerent, ut videtur etiam explicare Theophylactus.

AT CONTRA; nam Ioannes præmiserat: *Facite fructus dignos penitentia, & omnis arbor non faciens fructum bonum, in ignem mittetur, &c.* Inde compuncti publicani & milites perierunt, quis esset fructus bonus, quem facere deberent: vel ergo Ioannes eos decepit, vel possunt milites saluari, si seruent quod Ioannes illis præcepit.

Ad Theophylactum dico duo. PRIMO, eum non dicere bellum esse malum, sed solum dicere Ioannem hortatum esse turbas, quæ erant innocentes, ad opera bona, id est, ad communicanda bona sua cum aliis: Publicanos autem & milites, qui non erant capaces huius perfectionis, & non poterant facere bonum supererogationis, hortatum esse ut desisterent à malo. Putauit enim Theophylactus dare unicam non habenti, ei qui habet duas, esse opus consilij, & super-



supererogationis, alioqui non vocaretur turbas, quibus hoc dicitur, innocentes, nec distingueret hoc opus tanquam bonum à malo; nam si præceptum sit non retinere duas tunicas, retinere erit malum.

Dico SECUNDO, Theophylactum non rectè exponere hunc locum; nam vocat turbas innocentes, quibus Ioannes dicit: *Gemina à Siperarum, & facire fructus dignos penitentia.* Et præterea habere duas tunicas, est retinere superflua, vt Hieronymus dicit quæst. 1. ad Hedibiam, peccatum autem est retinere superflua. præterea Matth. 22. Dominus docuit tributum Cæsari esse soluendum; at certum est tributum non deberi Regibus, nisi vt possint alere milites in defensionem Reipub. quod exponit Apostolus Rom. 13. *Ideo, inquit, & tributa præstatis, ministri enim Dei sunt in hoc ipsum seruientes, nimirum vt gladio puniant perturbatores publicæ pacis: id enim præmiserat: Non sine causa gladium portat, Deo enim minister est, & index iræ.*

Probat SECUNDO exemplis Sanctorum, qui bella gesserunt; nam si bellum esset malum, certè à sanctis non gereretur. In veteri Testamento Abraham, Mosem, Iosue, Ge-  
deonem, Samsonem, Dauidem, Iosiam, Machabæos magna cum laude bella gessisse legimus. In nouo Testamento Matthei 8. Centurio cum diceret Christo: *Habeo sub me milites, & dico huic, Vade, & Vnde, &c.* eius fidem Dominus laudauit, non vt militiam desereret præcepit. Act. 10. Cornelius item Centurio dicitur: *Vir iustus, & timens Deum.* Ità vt etiam Angelum videre meruerit, nec postea cum à S. Petro viam salutis doceretur, dictum est ei, vt militiam desereret.

DEINDE post Christi in cælum ascensionem semper fuisse Christianos aliquos verè sanctos & Deo gratos in militia, etiam sub Ethnicis principibus, docet Tertullianus in Apologetico, cap. 5. vbi refert miraculum insigne à Christianis militibus factum, cum sub M. Aurelio in Germania bellum gererent, qui certè vel non militassent, si hoc esset malum, vel si militassent, nō ita Deo grati fuissent, vt etiam miracula facere possent. Vide hist. Eusebij lib. 8. c. 4. & li. 9. c. 10. Docet etiam Basiliius in oratione de laudibus XL. militum Martyrum, fuisse multos Sanctorum in castris gentilium Imperatorum, & similiter Gregorius Nazianzenus orat. 1. in Iulianum, yltra medium, DENIQUE Constantinum, Theodosium Valen-



Valentinianum, Carolum Magnum, S. Ludouicum Regem Gallia, S. Mauritium cum sua legione Thebeorum, aliosq; plurimos S. Christianos bella gessisse constat, quos S. Episcopi nunquam reprehenderunt, immò Theodosius consuebat de euentu belli Ioannem Abbatem, vt Augustinus refert lib. 5. de ciuitate Dei, cap. 26.

TERTIO probatur, quia Deus saepe iusta bella adiuuat, quod nullo modo faceret, si bellum esset illicitum; nam mala permitti possunt, sed non etiam ad ea facienda auxilium  
 10 dari. Genes. 14. Abrahæ cum debellasset quatuor Reges cum solis CCC. XVIII. famulis suis, dictum est à Melchisedech: *Benedictus Deus excelsus, quo protegente hostes in manibus suis sunt.* Exod. 17. ad preces Moïsi Deus dedit victoriam Hebræis contra Amalech. Iosue 10. pugnante Iosue Sol stetit, & Dominus pluebat de cælo lapides magnos, & plures occidit Deus lapidibus grandinis, quam filij Israël hastis, & gladiis. 2. Machab. 10. Angeli in specie equitum pro Machabæis pugnabant, & cap. 15. legimus Deum non secundum armorum potentiam, sed prout ipsi placet, dare dignis victoriam.

20 Constantinum Dei auxilio miraculis euidenter ostensis, vicisse in bellis testatur Eusebius in vita Constantini, & lib. 9. histor. cap. 9. Cum Theodosio S. Ioannem, & S. Philippum Apostolos palàm pugnasse contra hostes eius testatur Theodoretus lib. 5. hist. cap. 24. pro Theodosio iuniore pugnasse Angelos contra Saracenos scribit Socrates lib. 7. cap. 18. de Clodoueo vide Gregorium Turonicum lib. 2. hist. Francorum, cap. 30. Honorij exercitum diuino miraculo victoriam incredibilem de Gorthis retulisse scribit B. Augustinus lib. 5. de ciuitate Dei, cap. 23. innumerabilia exempla similia re-  
 30 ferri possent.

Probatur QVARTO ratione; Licet Reipub. defendere ciues suos ab internis hostibus pacis, eos necando variis generibus suppliciorum, ergo etiam licebit bello atque armis, quando alia via non potest, defendere eosdem suos ciues ab hostibus externis: quia vt possint conseruari Respublica, necessarium est vt omnes hostes tam internos, quam externos arcere possint. & cum hoc sit ius naturæ, nullo modo credibile est, per Euangelium esse sublatum.

Probatur VLTIMO testimoniis Patrum. TERTVLLIANVS in Apolog. cap. 42. *Nauigamus*, inquit, & nos *Societatem*.



Et militamus, & rusticamur, & mercamur. S. Gregorius Nazianzenus orat. 3. de pace: Licet, inquit, & trinusque temporis habenda sit ratio, quandoquidem iuxta illius legem atque auctoritatem praeclare interdum bellum suscipitur, quando tamen licet, propensiores ad pacem esse debemus, hoc enim sublimius est, & diuinius.

S. Ioannes Chrysostomus homil. in Euangel. de nuptiis, Ioan. 2. ex variis: Militiam, inquit, praelexis, & dicitis, non possum esse pius: Centurio nonne miles erat, nihilque nocuit illum suam militat

B. Ambrosius sermon. 7. Non militare, delictum est, sed propter pradam militare, peccatum est. Et lib. 1. de officiis, cap. 40. & 41. numerat inter virtutes, bellicam fortitudinem, & eam nostris non defuisse multis exemplis probat. Item in oratione de obitu Theodosij, vehementer Theodosium à laude bellica commendat.

B. Augustinus epist. 5. ad Marcellinum: Nam si Christiana disciplina, inquit, omnia bella culparet, hoc potius militibus consilium salutis petentibus in Euangelio diceretur, Et abicerent arma, seque militia omnino subtraherent: dictum est autem, neminem concusseritis, nulli calumniam feceritis, sufficiat vobis stipendium vestrum. Quibus proprium stipendium sufficere debere praecepit, militare & triq. non prohibuit. Et epist. 207. ad Bonifacium: Noli, inquit, putare neminem Deo placere posse, qui armis bellicis ministrat, etc. Idem docet lib. 22. contra Faustum, c. 74. & sequentibus, & li. 6. quaestionum in Iosue q. 10.

B. Gregorius lib. 1. epist. cap. 72. ad Gennadium: Sicur, inquit, excellentiam vestram hostilibus bellis in hac vita Dominus victoriarum fecit luce fulgere, ita oportet eam inimicis Ecclesiae eius omni sinacitate mentis, & corporis obuiare, &c. Et cap. 73. Si non ex fidei merito, ex Christiana religionis gratia, tanta excellentia vestra bellicorum actuum prosperitas eueniret, non summo opere miranda fuerat, sed cum futuras (Deo largiente) victorias non carnali providentia, sed magis orationibus praenuntiis, fit Et hoc in stuporem veniat, quod gloria vestra non terreno consilio, sed Deo de super largiente descendat.

Gregorius Tironicus lib. 5. hist. cap. 1. Virnam & vos Reges in his praelia, in quibus parentes vestri, excerceretis, & gentes vestra pace contenta vestris viribus premerentur.



B. BERNARDVS in serm. ad milites, cap. 3. *At Verò Christi milites, inquit, securi praeliantur praelia Domini sui, nequaquam metuentes, aut de hostium cade peccatum, aut de sua nece periculum, quandoquidem mors pro Christo vel ferenda, vel inferenda, & nihil habeat criminis, & plurimum glorie mereatur.*

AT CONTRA obiiciunt, PRIMO Scripturas, ac primum Deut. 32. *Mea est ultio, & ego retribuam.* Et Rom. 12. *Non vos defendentes carissimi; scriptum est enim, mihi vindictam, & ego retribuam.* RESPONDEO, vindictam, quam exercent publicæ personæ, rectè vocari vindictam Dei, Dei enim ministri sunt in hoc ipsum seruientes. vnde Paulus postquàm dixerat in fine c. 11. ad Rom. *Mihi vindictam, & ego retribuam* Subdit in principio, cap. 13. *Si male egeris, time, non enim sine causa gladium portat, minister enim Dei est, vindex iram ei qui male agit.*

ADDUNT deinde illud Isaïæ 2. *Constabunt gladios suos in vomeres, & lanceas suas in falces, non leuabit gens contra gentem gladium, nec exercebuntur ultra ad praelium.* quæ de tempore Christiano prædicta sunt. RESPONDEO, solum hoc loco prædicitur altissima pax futura, eo tempore, quo nascetur Christus, vt B. Hieronymus exponit, & impletum esse scimus tempore Augusti Cæsaris. Illud enim (vltra) non significat, in æternū, sed in longum tempus. præterea etiam si non esset hoc impletum, nihil inde concluderetur; nam non prohibet Isaïas bellum, si sint hostes, qui nos infestent, sed prædicit futurum, vt nulli sint hostes. Donec igitur sunt hostes, etiam bellum geri potest. Potest etiam dici prædictum esse regnum Christi fore regnum pacificum, quandoquidem non est de hoc mundo, nec temporalia curat, & in hoc distingui à regno Iudaico, quod bello, & cædibus firmandum, & conseruandum fuit.

DEINQUE obiiciunt illa verba Matth. 5. *Si quis te percusserit in unam maxillam, præbe ei & alteram: & dilige inimicos vestros: benefacite his, qui vos oderunt.* Et Matth. 26. *Qui acciperit gladium, gladio peribit.* Quibus similia sunt illa Rom. 12. *Nulli malum pro malo reddentes, & non vosmetipsos vindicantes carissimi, &c.*

RESPONDEO, eadē argumenta obieisse Iulianum apostatam olim Christianis, vt Gregorius Nazianzenus refert orat. 1. in Iulianum, procul à medio. Dicimus autem primò, hæc



hæc omnia, siue præcepta, siue consilia dari priuatis hominibus; non enim Dominus vel Apostolus præcipit iudici, vt non puniat eum, qui alteri fecit iniuriam, sed præcipit vnicuique; vt proprias iniurias æquo animo ferat: bellum autem ad publicam iustitiam, non ad priuatam vindictam pertinet: & sicut dilectio inimici, ad quam omnes tenentur, non impedit iudicem, aut carnificem ab officio suo; ita etiam non impedit milites & imperatores à suo.

Dico præterea, etiam priuatis hæc non semper esse præcepta, sed interdum præcepta, interdum consilia; præcepta sunt semper in animi præparatione, ita vt sit homo paratus præbere alteram maxillam, & auferenti tunicam dare etiam pallium potius, quàm Deum offendere, sed re ipsa hoc præstare præceptum est, quando necessitas honoris Dei id exigit, aliàs solum est consilium, & aliquàdo ne consilium quidem, vt si ex eo quod præbeam alteram maxillam nulla sequitur utilitas, nisi quod ille iterum peccat. Ita respondet Gregorius Nazianzenus loco notato, & Augustinus epist. 5. ad Marcellinum.

SECUNDO obijci possunt tria decreta Ecclesiæ. PRIMVM est in Concilio Nicæno can. 11. vbi grauissima iniungitur poenitentia iis, qui militiam, cui renunciauerant, repetierint. SECUNDM est in epistola B. Leonis 90. ad Rusticum, & habetur etiam can. Contrarium de poenitentia dist. 5. *Contrarium*, inquit Leo, est Ecclesiasticis regulis post poenitentia actionem redire ad militiam secularem. Et infra: *Non est liber à Diaboli laqueis, qui se militie mundanæ soluerit implicare.* TERTIVM est Gregorij, eadem dist. canone, Falsas, vbi dicitur eos, qui exercent negotium, quod sine peccato non potest exerceri, non esse capaces poenitentia, nisi negotio eiusmodi renuncient, & ponit Gregorius exemplum de milite.

RESPONDEO ad PRIMVM, agi de iis, qui ob confessionem fidei priuati fuerant cingulo militari à Diocletiano, vel à Licinio, & postea repetebant cingulum, parati negare fidem. Vide Zonaram, & Balsamonem in eum canonem, & Ruffinum lib. 10. hist. cap. 6. & quæ nos scripsimus de hac re lib. 2. de Conciliis, cap. 8.

Ad SECUNDM & TERTIVM dico, agi de iis, qui occasione militiæ multa peccata commiserant, quiq; propterea



pœnitentiam egerant. Isti enim malè faciunt, si ad malitiam redeunt, in qua experti sunt, se sine peccato viuere non posse, non ex vitio militiæ, sed ex proprio, & tunc præcipuè malè faciunt, quando imperatum ei fuerat à sacerdote, ne ad militiam redirent. Et quod reuera isti canones non prohibeant absolute militiam, patet ex fine illius canonis, falsas, vbi potestæquam dictum fuerat malè facere eos, qui post pœnitentiam ad militiam redeunt, subditur, nisi consilio religioso- rum Episcoporum pro defendenda iustitia.

10 TERTIO obijciuntur ab Erasmo plura loca Patrum, quibus addimus duo, vnum Tertulliani, alterum Hieronymi. Tertullianus libro de corona militis, vltra medium, quaerit, an Christiano militia conueniat? & respondet: *Credimus ne, inquit, humanum Sacramentum diuino superinduci licere? & an alium Dominum respondere post Christum licebit in gladio conuersari, Domino pronunciante, gladio periturum, qui gladio fuerit usus? & praelio operabitur filius pacis, cui nec litigare conueniet?*

RESPONDEO, Tertullianum non damnare militiam tanquam per se malam. Quod patet PRIMO, ex locis supra citatis, ex Apologetico, cap. 5. & 42.

20 SECUNDO, quia in hoc libro de corona militis fateretur eos, qui milites erant ante Baptismum, posse manere milites etiam post Baptismum, & solum docet non debere ad militiam accedere post Baptismum eum qui liber est: *Plani, inquit, si quos militiæ prauentis fides posterior inuenit, alia conditio est, & eorum, quos Ioannes admittebat ad lauacrum, & Centurionum fidelissimorum, quem Christus probat, & quem Petrus catechizat, at, dum tamen suscepta fide, atque signata, aut deserendum statim sit, & multis actum, aut omnibus modis cauitandum,*

30 *ne quid aduersus Deum committatur.*

TERTIO patet, quia causæ præcipuæ, quas reddit, cur Christiani non debeant militare, sunt propter periculum idololatriæ, tunc enim omnes ferè principes Gentiles erant. Itaque per accidens iudicabat Tertullianus malum esse bellum eo tempore: *Excubabit, inquit, pro templis, quibus renunciant? & cœnabit illic? & bi Apostolo non placet? & quos interdum exorcismis fugauit, noctibus defensabit? vexillum quoque, portabit amulum Christo, & c.* Porro aliæ rationes eius supra positæ solum congruentiæ sunt, vt patet,



HIERONYMVS in epistola ad Ageruchiam de Monogamia: *Olim, inquit, bellatoribus dicebatur, accinge gladiū tuum super femur tuum potentissime: nunc Petro dicitur, conuertere gladium tuum in saginam, &c.* RESPONDEO, vult dicere, in Testamento veteri bella fuisse imperata Deo, & necessaria ad terram promissionis capiendam, & conseruandam: in Testamento nouo non esse imperata bella, sed potius pacem, quia ad regnum cœlorum acquirendum non sunt arma necessaria: non tamen hinc sequitur, non posse Christianos, vt ciues temporalis Reipub. bella gerere cum iis, à quibus iniu- 10 riant acceperunt.

Præter hæc obiicit ERASMVVS aliquot alios Patres, ac primum Origenem, qui li. 2. contra Celsum paulò ante medium dicit, Christum omnia bella sustulisse: & tractat. 7. in Matth. exponens obiter illud Luc. 22. *Qui non habet gladium, vendat tunicam & emat gladiū.* Dicit perniciosum esse hunc locum iis qui carnaliter eum intelligunt, qui reuera putant esse tunicam vendendam ad emendum gladium.

RESPONDEO, in priore loco nihil esse pro Erasmo; cum enim Origenes dicit, Christum sustulisse omnia bella, non 20 intelligit Christum prohibuisse bella, sed providentia sua generalem pacem mundo attulisse tempore natiuitatis sue, immò ibidem aliquid est contra Erasmus: dicit enim Origenes, propterea Dei providentia factum esse, vt veniente Christo omnia Romano Imperatori subiecta essent, quia si multi fuissent reges, necessaria etiam fuissent bella, quibus alij aliorum iniurias propulsarent. IN posteriore etiam loco nihil dicitur contra bellum; fatemur enim non ita crasse verba Domini intelligenda, vt debeat vnusquisq; necessariò vendere tunicam, & emere gladium, sed solum modo illo 30 loquendi Dominum explicare voluisse, in talibus angustiis, & necessitate Apostolos futuros tempore passionis, qualem patiuntur iij, qui vt se defendant, vendunt tunicam, & emunt gladium.

Sed quid hinc colligitur contra bellum? An quia Dominus hoc loco nō iussit, vt Apostoli verè gladios emerent, ideo intelligetur prohibuisse bellum? quod item Origenes ait hom. 15. in Iosue, non esse Christianis carnalia bella peragenda, significat militiam Christianam sub Imperatore Christo



non esse carnalem contra homines, vt fuit militia Iudæorum sub Iosue, sed spiritualem contra Demones, non tamen hinc sequitur non licere Christianis, vt sunt ciues politicae Reipub. bella gerere.

Ad eundem modum soluuntur quæ Erasmus affert ex Chrysostomo, Basilio, & Theophylacto, ex cathena B. Thomæ in cap. 22. Lucæ, solum enim docent non iussisse Apostolis, vt verè gladios emerent.

DEINDE obiicit Ambrosium, qui lib. 10. in Lucam exponens illud; Qui non habet, vendat tunicam, & emat gladium: O Domine, inquit, cur emere me iubes gladium, qui ferire me prohibes? cur haberi præcipis, quem setas promi? nisi fortè set sit parata defensio, non sitio necessaria, & videar potuisse vindicare, sed noluisse; lex tamen referre non setat, & ideo fortè esse Petro duos gladios offerenti, sat est, dicit, quasi licuerit scilicet ad Euangelium, set sit in lege æquitatis eruditio, in Euangelio bonitatis perfectio. RESPONDEO primò, nihil hoc loco dici de bello, quod publica auctoritate exercetur, sed de priuata defensione, vel vltione. Secundò dico etiam priuatam defensionem, secundum Ambrosij sententiam, non pertinere ad prohibitionem præcepti, sed ad perfectionem consilij, vt illa verba clarè indicant, vt sit in lege æquitatis eruditio, in Euangelio bonitatis perfectio.

ITEM obiicit Erasmus Augustinum, quem dicit non sibi constare, & si alicubi belli patrocinium suscepit, tamen alibi contra bellū scripisse; nam in Psal. 37. scribit: Non orare debemus, set moriantur inimici, sed set corrigantur. Et epist. 5. ad Marcellinum multa scribit contra bellum, in epistola verò 138. & alibi supplicat eidem Marcellino, vt hæreticos Donatistas citra sanguinem puniat.

RESPONDEO, videtur Erasmus pueros putasse, cum quibus agebat; quid enim hæc ad propositum faciunt? nam in Psal. 37. reprehendit odium inimici, quo aliqui Deum orant pro morte inimicorum. quis autem negat esse malum optare mortem inimico ex odio, & cupiditate vindictæ? tamen optare mortem inimico, & etiam inferre secūdum ordinem iustitiæ malum non est, si fiat non odio hominis, sed amore iustitiæ, & communis boni. In epistola verò 5. nihil est contra bellum, sed potius pro bello, vt suprà citauimus, nec scio quid



quid Erasmus somniauerit. In epist. 158. supplicat iudici pro vita sceleratorum, qui iam tenebantur captiui, & crimen fatebantur, quod Episcopi etiam modò facere solent. sed quid hoc ad bellum? num quicumq; supplicat, ne latro aliquis suspendatur, continuò bellum prohibet?

OBICIT etiam exemplum S. Martini, qui, vt Sulpitius in eius vita refert, Iulianol Imperatori dixit: *Donatium tuum militaturus accipiat, ego Christianus sum, mihi pugnare non licet.* RESPONDEO, non satis fideliter verba S. Martini Erasmus retulit, non enim ait: *Ego Christianus sum, mihi pugnare non licet*, sed, *hactenus militavi tibi, nunc patere vt militem Deo, Christi ego miles sum, mihi pugnare non licet*; quibus verbis non significauit se tantum esse Christianum, sed etiam voto, & proposito Monachum. id significat illud, patere vt militem Deo, & Christi ego miles sum. vnde paulò antè Sulpitius scripserat S. Martinum post Baptismum susceptum adhuc duos annos militasse, non quod non cuperet statim seculo renunciare, sed quia tribunus militum, cui ipse contubernalis erat, promiserat se etiam exacto tribunatu seculo valedicturum, id est, cum ipso Monachum futurum. Itaq; non Christiano, sed Monacho bellum interdictum asseruit, cum ipse Christianus existens duos iam annos militauisset.

POSTREMO sic Erasmus instat, arma Ecclesiæ sunt gladius verbi Dei, scutum fidei, galea salutis, lorica iustitiæ, iacula orationum, vt Apostolus docet ad Ephes. 6. non ergo ferro & armis Christiani pugnare debent.

RESPONDEO PRIMO, Apostolus non describit bellum contra homines, sed contra dæmones, vt patet ibidem: *Non est nobis colluctatio, &c.* SECUNDO dico, præcipua Christianorum arma esse fidem & orationem, sed non propterea etiam arma ferrea non esse necessaria; nam Exod. 17. legimus Mose orante, & Iosue pugnante, victoriam Israëlita Deo donatam contra Amalech; & Machabæos scimus orationibus, & armis pugnauisse, & Augustinus scribit ad Bonifacium, epist. 194. *Arripe manibus arma, oratio antepulset auctoritas.* Et eidem Bonifacio scribit epistol. 207. *Alij pro vobis orando pugnant contra inuisibiles inimicos, vos pro eis pugnando laboratis contra visibiles barbaros.*



At, inquiunt, bellum opponitur paci, sed pax est bona, & effectus caritatis, igitur malum est bellum. **R**ESPONDEO, bellum sic paci opponi, vt sit etiam medium ad pacem, sed hoc interesse inter bellum iustum & iniustum, quod bellum iniustum opponitur paci bonæ, & ducit ad pacem malam, & paci malæ, & ducit ad pacem bonam, sicut vulnera Chirurgi contraria sunt sanitati malæ, & imperfectæ quam habent ægroti, sed ad bonam, & perfectam sanitatem, tanquam ad finem perducunt.

## CAPVT XV.

*Quot sint, & quæ iusti belli conditiones.*

**B**ELLI iusti conditiones quatuor numerare solent, qui hæc tractant. Auctoritatem legitimam, causam iustam, intentionem bonam, & modum conuenientem. Sed de singulis seorsim dicendum est.

**P**RI<sup>20</sup>MA igitur conditio est auctoritas legitima. dicit enim S. Augustinus lib. 22. contra Faustum, cap. 75. *Ordo ille naturalis mortaliū paci accommodatus hoc poscit, & suscipiendi belli auctoritas, atque consilium penes principem sit, exequendi autem iussa bellica ministerium milites debeant paci, salutique communi.* Et ratio idem probat; nam priuati homines, & qui superiorem habent, si ab aliquo iniurias accipiant, possunt ad superiorem confugere, atque ab eo iudicium petere, at principes si ab aliis principibus aliquid patiantur, non habent commune aliquod tribunal, ad quod illos accusent, & <sup>30</sup>ideo licet eis bello iniurias publicas propulsare.

Residet autem hæc auctoritas indicendi belli, secundum communem sententiam, in omnibus principibus, & populis, qui in temporalibus superiorem non habent, quales sunt Reges omnes, item Respub. Venetorum & similes, &c. Item nonnulli Duces & Comites, qui nulli subsunt in corporalibus: non autem Duces & Comites, qui subsunt regibus immediate; qui enim subsunt aliis, non sunt per se capita Reip. sed potius membra. **N**O<sup>T</sup>A tamen hanc auctoritatem non requiri



requiri ad bellum defensuum, sed solum ad offensuum; nam defendere se unicuique licet, non solum principi, sed etiam priuato, at indicere bellum, & inuadere hostem, solius est supremi capitis.

SECUNDA conditio est causa iusta; non enim sine causa bellum indici potest, nec etiam propter quodcunque peccatum, sed tantum propter iniuriam propulsandam. Ita B. August. q. 10. in Iosue: *Iusta bella, inquit, definiri solent, quæ eliciuntur iniuriis, si qua Gens vel ciuitas, quæ bello petenda est, vel vindicare neglexit, quod à suis improbe factum est, vel reddere, quod per iniuriam ablatum est.* Ratio autem huius est, quia princeps non est iudex, nisi hominum sibi subditorum, ergo non potest quæcunque peccata aliorum hominum punire, sed solum ea, quæ cedunt in detrimentum populi sibi subiecti; nam etsi non est iudex ordinarius aliorum, est tamen defensor suorum, & ratione huius necessitatis efficitur etiam quodammodo iudex eorum, qui suis iniuriam fecerunt, ita ut possit eos gladio punire.

Est verò obseruandum, causam belli debere esse non leuem, neque dubiam, sed magnam, & certam, ne fortè plus incommodi bellum afferat, quàm sit utilitas, quæ inde speratur; si autem dubia sit, distinguendum est de principe, & militibus; nam princeps ipse sine dubio peccat; nam bellum est actus iustitiæ punitiæ, iniustum est autem punire aliquem causa nondum probata: milites autem non peccant, nisi constaret certò bellum esse illicitum; debent enim subditi parere superiori, nec debent discutere imperia eius, sed potius præsumere debent principem suum bonam causam habere, nisi manifestè contrarium nouerint: sicut etiam cum dubia est culpa alicuius particularis, peccat iudex, qui eum damnat, non carnifex, qui damnatum occidit; non enim tenetur carnifex discutere sententiam iudicis. ita docet Bonifacius Papa in Sexto, de regulis iuris, regula 25. *Quod quis, inquit, mandat facit iudicis, dolo facere non videtur, cum habeat parere necesse.* Et B. Augustinus lib. 22. contra Faustum, cap. 75. *Hoc etiam, inquit, fit & iustus, si forte sub rege sacrilego militet, rectè possit illo iubente bellare, cuius pacis ordinem seruans, cui quod iubetur, vel non esse contra Dei præceptum, certum est, vel & verum sit, certum non est, ita & si fortasse reu-*



*regem faciat iniquitas imperandi, innocentem autem militem ostendat ordo seruiendi.*

NOTA tamen hoc intelligi de militibus, qui sunt obligati ei principi, qui bellum gerit, quales sunt subditi eius, & etiam ij, qui ordinarij ab eo stipendium habent etiam tempore pacis, non autem de aliis qui aliunde adueniunt cum est bellandum; qui enim non sunt obligati militare, non possunt tuta conscientia ad bellum accedere, nisi sciant bellum esse iustum: qui autem nihil cogitant, sed parati sunt militare, siue bellum sit iustum, siue non, modò stipendium habent, ij in statu damnationis versantur.

TERTIA conditio est intentio bona. Nam cum finis belli sit pax & tranquillitas publica, non licet bellum suscipere propter alium finem. unde grauius peccant tam reges, quam milites, qui vel ut noceat alicui, vel ut imperium dilarent, vel ut exerceat fortitudinem bellicam, vel alia de causa bellum suscipiunt, quam propter commune bonum, etiam si auctoritas legitima, & causa iusta non desint. ita B. AUGUSTINUS in epistola ad Bonifacium comitem, quæ est 207. *Pacem, inquit, habere debet voluntas, bellum necessitas, & liberet Deus à necessitate, & conseruet in pace; non enim pax queritur & bellum geratur, sed bellum geritur & pax acquiritur. esto ergo etiam bellando pacificus, & eos, quos expugnas, ad pacis unitatem vincendo perducas. Et lib. 22. contra Faustum, cap. 74. Nocendi cupiditas, & discendi crudelitas, impacatus, atq; implacabilis animus, feritas rebellandi, libido dominandi, & si qua similia, hæc sunt, quæ in bello iure culpantur.*

Sunt autem duo notanda. PRIMO, quoniam bellum est medium quoddam ad pacem, sed valde graue, & periculosum, ideo non esse mox inferendum bellum, cum causa existit, sed esse prius procurandam pacem aliis rationibus faciliioribus, nimirum pacifice petendo ab hostibus debitam satisfactionem. Deuteron. 20. *Si quando accesseris ad expugnandam ciuitatem, offeres ei primum pacem, &c.* Et B. Augustinus epist. 207. ad Bonifacium: *Pacem habere debet voluntas, bellum necessitas.*

SED quæret aliquis, quid si hostis nolit initio satisfacere, sed paulò post bello iam inchoato petat pacem, & satisfactionem offerat, an tenebitur alter a bello cessare. Caieta-



nus verbo Bellum, dicit quod non tenetur cessare quando bellum iam est inchoatum, quamquam teneretur antea quam inchoaretur acceptare satisfactionem. Sed (meliori iudicio saluo) dicendum videtur, quod ex iustitia nunquam tenetur, qui habet iustam causam, acceptare satisfactionem, nec ante bellum inchoatum, nec postea: tamen ex caritate utroque tempore tenetur, nisi per accidens aliud expediat. PRIORIS ratio est, quia princeps habens iustam causam belli, gerit personam iudicis respectu alterius principis, qui iniuriam fecit, iudex autem non tenetur ex iustitia condonare mortem reo, etiamsi offerat satisfactionem, quamquam possit condonare ex misericordia, si sit supremus iudex, verbi gratia, Rex non tenetur donare vitam furi, etiamsi restituat, etsi ex misericordia potest. Ratio POSTERIORIS est, quia bellum est gravissimum supplicium, & quo non solum punitur qui peccavit, sed etiam per accidens multi innocentem involuntur: ideo Christiana caritas semper id videtur exigere ut à bello cessetur, quando qui nocuit debitam satisfactionem offert, nisi forte per accidens aliud expediat, id est, nisi talis sit hostis contra quem pugnatur, ut bono communi expediat cum vel subiectum esse alteri, vel funditus interire, quales erant Amorrhæi, quos Deus iussit penitus deleri, Deuter. 20.

SECUNDO notandum, differre hanc tertiam conditionem à duabus primis, quod illæ si desint, faciunt bellum esse iniustum, hæc verò si desit, facit bellum esse malum, sed non iniustum propriè. qui enim sine auctoritate vel sine iusta causa bellum movet, non solum contra caritatem, sed etiam contra iustitiam peccat, & non tam est miles, quam latro: qui vero auctoritatem, & causam iustam habet, & tamen amore vindictæ vel augendi imperij, vel propter alium finem malum bellat, non agit contra iustitiam, sed solum contra caritatem, nec est latro, sed malus miles.

Ex quo deducitur, quod cum solum deest hæc tertia conditio, non tenentur milites, nec reges ad ullam restitutionem, sed solum ad poenitentiam: cum autem deest prima vel secunda, tenentur omnes ad restitutionem damni illati, nisi excusentur ignorantia invincibili: ignorantia enim crassa, & culpabilis, sicut à peccato non excusat, ita nec à restitutione,



tutione, vt habemus capite finali de iniuriis & damno dato. qui autem laborat ignorantia inuincibili, non tenetur restituere donec ea ignorantia laborat; at cum cognouerit bellum fuisse iniustum, tenetur restituere, non damnum tempore belli illatum, sed si quid habet alienum ex illo bello: & si nihil habet in specie, sed tamen rebus venditis factus est ditior, tenetur restituere tantum, quantum est ditior factus; nam res aliena retineri non potest, etiamsi propter ignorantiam sine peccato acquisita sit, sed reddi debet vel Domino si  
10 scitur, vel pauperibus.

QUARTA conditio est, modus debitus, qui in eo præcipue consistit, vt nulli innocentini nocatur, quod explicuit Ioannes Baptista Luc. 3. *Neminem concutatis, nulli calumniam faciatis, contenti estote stipendiis vestris.* Quibus verbis prohibet iniurias, quas milites inferre solent innocentibus aut vi, aut fraude, vel in persona, vel in bonis. cum dicit: *Neminem concutatis*, prohibet iniuriam, quæ aperta violentia inferitur personæ, vt cum rusticos cadunt, nisi ad nutum obediant. cum dicit: *Nemini calumniam faciatis*, prohibet iniuriam  
20 quæ fraudibus, & calumnia inferitur, vt cum dicunt aliquem esse proditorem vel hostem, etiamsi contrarium nouerint esse verum, & eo nomine vel ipsi eum spoliant, aut occidunt, vel deferunt ad ducem, vel præfectos. cum verò addit: *Contenti estote stipendiis vestris*, prohibet iniuriam, quæ alicui non in persona, sed in bonis inferitur, vt cum furantur, & rapiunt vnde cunq̃ue possunt, vel etiam exigunt, & extorqueunt ab iis à quibus non debent.

Est autem obseruandum, tria esse genera personarum, quibus milites damnum inferre non possunt secundum regulam Ioannis Baptiste. PRIMVM est eorum omnium, qui  
30 ad Rempub. hostium non pertinent: ex quo excusari non possunt milites, qui damnum inferunt ciuibz, aut rusticis amicis, apud quos hospitantur, vel per quorum loca transeunt, neque excusantur si dicant, sibi stipendia non solu; nam non propterea illis obligata sunt bona priuatorum ciuium, neque luere debet pœnam ciuis, aut rusticus, si rex aut dux peccat non soluendo stipendia militibus, nisi fortè iusta de causa damnati sint homines alicuius loci ad hanc pœnam, vt milites alant, quod tamen rarius accidit.



SECUNDVM est quorundam, qui etsi aliquo modo ad Rempub. hostium pertinent, tamen excipiuntur capite Innouamus, de tregua, & pace, vbi sic dicitur; Innouamus, vt Presbyteri, Monachi, conuersi, peregrini, mercatores, rustici euntes, vel redeuntes, vel in agricultura existentes, & animalia, quibus arant, & semina portant ad agrum, congrua securitate latentur. vbi nomine mercatorum non videntur intelligi ij, qui in ciuitate hostium resident, & sunt pars quædam ciuitatis, sed solùm ij, qui transeunt, vel ad nundinas veniunt, qui non sunt pars ciuitatis.

TERTIVM genus est hominum ineptorum ad bellum, quales sunt pueri, senes, mulieres. tales enim, etsi capi & spoliari possunt, quia sunt pars ciuitatis, tamen occidi iuste non possunt, nisi fortè casu & per accidens occidantur; vt cùm miles iaculatur in cuneum hostium, & fortè occidit puerum, aut mulierem, aut etiam sacerdotem, non peccat, sed tunc peccat, cùm ex intentione occidit, & potest, si velit, non occidere; nam & ratio naturalis hoc docet, & etiam Deus hoc iubebat Hebræis Deuter. 20. nimirum vt parcerent paruulis & mulieribus; & Theodosius grauiter ab Ambrosio reprehensus fuit, quod cùm punire vellet Thessalonicenses, sine delictu obuios quosque necari iussit, vt refert Theodoretus lib. 5. histor. cap. 17. & 18. QVOD si Moses aliquando iussit etiam mulieres, & paruulos occidi, vt patet Deuter. 2. & 3. & alibi, non propterea id etiam nostris militibus licet; nam ille Dei reuelatione clarè cognoscebat Deum sic velle, cui nemo dicere potest, cur ita facis?

CAPVT XVI.

*Licere bellum gerere Christianis contra Turcas.*

**N**AM verò quæstio de bello cōtra Turcas omitti potuisset, nisi Lutherus inter alia sua paradoxa etiā hoc protulisset, ac defendere conatus esset, non licere Christianis contra Turcas bellum gerere, vt patet ex articulo 34. in Bulla Leonis damnato. Luthero videtur assentiri Theodorus Bibliander in Chronologia



gia tabul. 13. vbi sic ait: *Urbanus, seu potius turbo sauisissimus, & spiritu malo homicidiis gaudente impulsus, bellum pro recuperanda Iudea commouit.*

Est autem obseruandum, Lutherum non negare bellum contra Turcas esse illicitum, quia putet in genere omne bellum esse illicitum; nam in assertione eiusdem articuli suadet, bellum contra Pontificem, quem Turcissimum Turcam esse dicit; neque quia existimet non habere Christianos iustam causam; constat enim omnibus, Turcas nullo iure occupasse regna Christianorum, & quotidie plura occupare velle: constat etiam eum extinguere cupere omnem religionem, & dare omnem operam, vt homines ex Christianis fiant Mahumetani. Denique constat & antiquos Pontifices, vt Urbanum II. Paschalem II. Eugenium III. & alios multos, necnon generalia Concilia, vt Lateranense, Lugdunense, Viennense, & alia, generale bellum indixisse Mahumetanis, & sanctum Bernardum, aliosque sanctos viros concionibus publicis excitasse populos ad hoc bellum, & sermonem miraculis confirmasse, vt ipsemet B. Bernardus modestè indicat initio lib. 2. de consideratione, nec aliquid horum Lutherus negat; sed sunt alia tres causae cur senserit non licere contra Turcas bellare.

PRIMA, quia voluntas Dei esse videtur, vt à Turca, tanquam flagello quodam puniamur, neque licet nobis Dei voluntati resistere. quod autem ista sit voluntas Dei, probat in assertione art. 34. ab experientia, quæ docuit hactenus nihil Christianis profuisse bellum contra Turcas.

Sed hæc prima causa parum valet; nam etsi voluntas Dei sit, vt peccata nostra per Turcam puniantur, tamen non est voluntas Dei, vt Turca non resistamus, immò voluntas eius est, vt resistamus. id quod ex fine probatur. non enim Deus permittit Turcam in nos sauire, vt pereamus, sed vt conuertamur, tunc autem ad conuersionem perducimur, cum Turcæ nos oppugnanti resistere conamur, resistendo laboramus, laborando nostram infirmitatem agnoscimus, atque inde ad Deum toto corde reuertimur, & eius auxilium imploramus. Itaque ex fine, quo Deus permittit Turcam in nos sauire, sequitur manifestè ipsum velle, vt Turcæ resistamus. PRÆTEREA, ita flagellum Dei est bellum Turcæ, sicut pe-

stis,



lis, fames, hæresis, fomes, peccata, & similia, nemo autem tam est stultus, qui ideo putet non esse quærenda medicamenta contra pestem, neque terram colendam ne moriamur fame, neque hæresi & fomiti resistendum.

Neque verum est quod Lutherus dicit, experientiam docere nihil nobis prodesse bellum contra Turcas, nam ut mittam plurimas victorias de Turcis relatas, certè cum primum arma illata sunt in terram promissionis, felicissimo euentu Hierusalem à nostris recuperata fuit, & regnauerunt Christiani annis LXXXVIII. & semper plura, & plura recuperabant, donec oriri cœperunt inter ipsos Christianos Principes contentiones, quemadmodum & nunc Turca plura occupat ob discordiam nostrorum, quam sua virtute, & harum discordiarum potissima causa fuit Lutherus ipse. Nam ut ex Ioanne Cochleæ patet in actis Lutheri anni M. D. XXVI. Hungaria periit, quia Germani à Rege Hungariæ vocati in auxilium, maluerunt Lutheri parere tunc concionanti contra bellum in Turcas, quam cogitare quid bonum commune postulet. Saltem hoc boni habet bellum, quod impeditur Turca ne tantum noceat quantum vellet, nisi enim hætenus cum copugnatum esset, iamdudum ille omnia obtineret.

SECUNDA causa eius est, quia Ecclesiæ utilior est tribulatio, & persecutio, quam victoria, & tranquillitas. unde in sermone de Matrimonio reprehendit Ecclesiæ consuetudinem, qua orat pro pace, & quiete, cum potius pro tribulationibus orandum esset. SED respondemus, tribulationem, & persecutionem esse quidè vilem, sed periculosam, & ideo non expetendam, sed tolerandam, cum aliter fieri non potest. Unde Matth. 6. iubemur orare: *Et ne nos inducas in tentationem*. Et 1. Tim. 2. Apostolus iubet orare pro regibus, ut quietam & tranquillam vitam agamus. Et B. Augustinus lib. 10. Confessionis, cap. 28. dicit, miseras tolerandas, non amandas, nec desiderandas, & petendas.

TERTIA causa, eaque præcipua fuisse videtur, odium Pontificis, tanto enim odio Pontificem aliquando Lutherus persequabatur, ut planè optaret videre Turcam occupantem omnia regna Christianorum, ut saltem eo modo nomen Pontificis extingueretur, neque hoc fuisse votum, ac desiderium.



desiderium eius nos diuinamus, sed ex verbis eius colligimus; nam in libro ad nobilitatem Germaniæ, cap. 25, dicit, nullum esse pulchrius regimen vsquam, quàm apud Turcas, qui legibus Alcorani gubernantur, nullum autem turpius, quàm apud Christianos, qui iure canonico, & ciuili reguntur. & in assertionione articuli 34. dicit, Pontificem, & Pontificios esse multò peiores, & truculentiores Turcis, & stultum esse pugnare pro peioribus Turcis contra meliores, & in epistola quadam contra duo mandata Imperialia: Oro inquit, cunctos pios Christianos, ne illo modo sequamur, Sel in militiam ire, Sel dare aliquid contra Turcas, quandoquidem Turca decies prudentior, probiorq; est, quàm sunt Principes nostris. Quibus verbis quid aliud suadere conatus est, quàm esse inuandos Turcas contra Christianos?

Sed hæc sententia tantam absurditatem, & impietatem continet, vt ipse idem Lutherus postea, cùm ille ardor non nihil deferuisset, planè contrarium scripserit. Sic enim ait in libro de visitatione Saxonica: *Clamant*, inquit, aliqui predicatorum temerariè, non resistendum esse Turca: hic sermo seditionosus est, qui neque ferri, neque permitti debet; tenentur igitur potestates resistere Turcis, qui non solum cupiunt provincias deuastare, uxores, ac liberos violare, & interficere, verùm etiam iura provincie, cultum Dei, omnemq; ordinationem bonam abrogare ac tollere. Idcirco debent Principes ob id præcipuè belligare, &c. & Ibidè: Multò, inquit, tolerabilis foret viro bono videre filiorum suorum interitum, quàm Turcis eos moribus imbuti: Turca enim nullam prorsus honestatem Sel sciunt, Sel curant. Hæc ille.

30

## CAPVT XVII.

*Ad magistratum non pertinere iudicium de Religione.*



VINTA sequitur questio de officio magistratus politici in causa religionis. Tres in hac parte sunt errores. PRIMVS eorum, qui nimis multum tribuunt magistratibus, vt Brentij in prolegomenis, Philippi in locis capite de magistratu, & aliorum, qui reges esse



esse volunt non solum custodes & defensores religionis, sed etiam iudices & magistros. Dicunt enim ad eos, ut ad præcipua Ecclesiæ membra pertinere, iudicare controuersias fidei, præsidere Conciliis generalibus, constituere ministros, & pastores, & similia.

In quem errorem multa disputauimus in controuersis de iudice controuersiarum, de summo Pontifice, & de Conciliis, ubi ostendimus Reges habere primum locum inter Christianos, ut Christiani homines sunt, id est, ut sunt ciues terræ ciuitatis, non ut sunt ciues Sanctorum, & domestici Dei, 10 ac ut Ecclesiæ membra sunt. Sic enim primum locum habent Episcopi, & præcipue summus Pontifex, secundum Presbyteri, tertium Diaconi, alique ministri Ecclesiastici, vltimum Laici, inter quos etiam Reges & Principes numerantur.

Vnde CHRYSOSTOMVS homil. 83. in Matthæum allocuens Diaconos: *si Duxquispiam si consul ipse, si is, qui diadema ornatur, indigne adeat, cohibe, & coërce, maiorem tu illo habes potestatem.* Et GELASIUS in epistola ad Anastasium Imperatorem: *Nosti, inquit, fili clementissime, quod licet præstas 20 deas humano generi dignitate rerum terrenarum, tamen præstibus diuinarum deuotus colla submitis, atque ab eis causas tue salutis expectas, inque sumendis cælestibus Sacramentis, eiusque competere disponendis, subdi te debere cognoscis religionis ordine potius, quam præesse. Nosti itaque, inter hæc ex illorum te pendere iudicio, non illos ad tuam redigi posse voluntatem.*

Denique, Christus Ecclesiam regendam Petro & Episcopis commisit, non Tiberio, & eius præfectis, & per annos CCC. sine ullis Regibus Christianis, exceptis paucissimis, qui vel breuissimo tempore imperarunt, ut Philippus Cæsar, 30 vel solum in aliqua prouincia, ut Lucius Rex Britannorum,

Ecclesiæ a solis Episcopis & Presbyteris optime gubernata est. vide cetera lo-

cis citatis.



FINH

CAPVT



## CAPVT XVIII.

*Ad magistratum pertinere defensionem Religionis.*

**S**ECUNDVS error est aliorum, qui ad alterum extremum deflecentes docēt, Reges debere curare Rempublicam suam, & pacem publicam; de religione autem non curare, sed permittere singulis ut sentiant prout voluerint, & viuant ut voluerint, modo non perturbent pacem publicam. In hoc errore fuerunt olim Ethnici, qui omnes religiones approbant, & omnium Philosophorum sectas adnitebant, ut Augustinus dicit lib. 18. de ciuit. Dei, cap. 31. vnde B. Leo serm. 1. de SS. Petro & Paulo: *Hæc autem ciuitas, inquit, ignorans suæ promotionis auctoritatem, cum penè omnibus dominaretur Gentibus, omnium Gentium seruebat erroribus, & magnam sibi videbatur assumpsisse religionem, quia nullam respuebat falsitatem.* Et Themistius Philosophus, ut refert Socrates lib. 4. hist. ca. 27. Valenti Imperatori persuadere conatus est, Deo gratam esse sectarum varietatem, dum ita pluribus modis colitur, & plaris fit, dum difficilius cognoscitur. Item hæresiarcha quidam nomine Rhetor apud Augustinum libro de hæresibus, cap. 72. omnes sectas veras esse docuit.

Deniq;, hanc libertatem voluerunt & obtinuerunt Germani anno M.D.XXVI. quando Principes Imperij Spiræ congregati ediderunt quoddam INTERIM, & nunc idem feruntur in Flandria petere. quorum argumenta quatuor præcipuè sunt. Vnum, quod fides sit libera. Alterum, quod sit donum Dei. Tertium, quod experientia doceat cogendo nihil profici. Quartum, quod Christiani semper Iudæos tolerauerint, cum tamen Christi hostes sint.

At hic error perniciosissimus est, & sine dubio tenentur Principes Christiani non permittere subditis suis libertatem credendi, sed dare operam, ut ea fides seruetur, quam Episcopi Catholici, & præcipuè summus Pontifex docet esse tenendam. Probatui PRIMO Scriptura, Prou. 20. *Rex qui sedet in solio iudicij, dissipat omne malum intuitu suo.* Item: *Dissipat impios Rex sapiens.* Porro impios esse hæreticos negari



non potest. Item Psal. 2. *Et nunc Reges intelligite, erudimini, qui iudicatis terram, seruite Domino in timore.*

AUGUSTINUS in epistola 50. *Aliter seruit, inquit, Rex Deo, quia homo est, aliter quia Rex est; quia homo est, ei seruit viuendo fideliter, quia vero etiam Rex est, seruit, leges iustas precipientes, & contraria prohibentes, conuenienti vigore sanciendo: sicut seruauit Ezechias, lucos & templa idolorum destruendo: sicut seruauit Iosias, talia & ipse faciendo: sicut seruauit Rex Ninuitarum, vniuersam ciuitatem ad placandum Dominum compellendo: sicut seruauit Darius, idolum frangendum in potestatem Daniels dando: sicut seruauit Nabuchodonosor, omnes in regno suo positos à blasphemando Deo lege terribili prohibendo. Et ibidem subiungit: Quis mente sobrius Regibus discat; Nolite curare in regno vestro, à quo teneatur, vel oppugnetur Ecclesia Domini vestri: non ad vos pertineat in regno vestro, quis velit esse siue religiosus siue sacrilegus: quibus non potest dici, Non ad vos pertineat in regno vestro, quis velit esse pudicus, quis impudicus.*

Præterea in Testamento nouo Apoc. 2. reprehenditur Angelus Pergami, quod haberet apud se aliquos tenentes doctrinam Nicolaitarum, & Angelus Thiatyre, quod permitteret Iezabel seducere seruos Dei. Ex quibus colligitur, notitiam esse Ecclesiæ, mixtionem hæreticorum cum Catholicis. Rom. 16. iubentur Christiani declinare hæreticos. Gal. 5. *Vinam, inquit, abscindantur.* Tit. 1. *Increpa illos dure & sancte sint in fide, ergo Reges, qui sunt Ecclesiæ nutricij, Isa. 49. non debent permittere istam confusionem.*

SECUNDO probatur testimoniis Pontificum & Imperatorum. LEO epist. 75. ad Leonem Augustum: *Debes, inquit, Imperator incunctanter aduertere regiam potestatem tibi non solum ad mundi regimen, sed maxime ad Ecclesiæ praesidium esse collatam, & ausus nefarios comprimendo, & quæ benè sunt statuta, defendas, & veram pacem his, quæ sunt turbata, restituas.*

ANASTASIUS II. Papa in epist. ad Anastasium Imperatorem: *Hoc, inquit, præcipue in sinu serenitatis tuæ, & cum causis Alexandrinorum patuerint pijsimis auribus vestris, ad Catholice & sinceram fidem eos auctoritate, sapientia, diuinisq; vestris mandatis redire faciatis.* Similia habet Gregorius lib. 9. epist. 60. ad Regem Angliæ. lib. 11. epist. 44. ad Leontium Augustam, Similia habet Agatho in epistola ad Constantinum IV.



Porro Imperatores pij idem senserunt; nam THEODOSIVS L. cunctos populos, C. de summa Trinitate, & fide Catholica, radicatus euulsit libertatem credendi, quam alii qui Principes permiserant, ac iussit omnes credere eo modo, quo Romanus Pontifex docet esse credendum. VALENTINIANVM iuniorem laudat Ambrosius in oratione funebri, quod Romæ repetenti antiquam libertatem in religione, vt colere posset sacrificiis Deos, fortissimè restiterit. Similiter MARTIANVS C. eodem, L. Nemo, seuerè prohibet, ne quis  
 10 ea, quæ sunt in Conciliis Episcoporum definita, reuoluat, aut de iis publicè disputare præsumat.

CONSTANTINVS Magnus initid quidem imperij permisit libertatè religionis omnibus, vt patet ex historia Eusebij lib. 10. cap. 5. tamen postea iussit claudi templa idolorum & solam Christianam religionem vigere, vt Optatus refert li. 2. cont. Parmen. quem filij sunt imitati, Constans & Constantinus, vt Augustinus refert epist. 166. & (apud Rufinum lib. 10. ca. 5.) exilium minatus est Constantinus iis omnibus, qui non acquiescerent Nicæni Concilij definitioni.

20 Quilibet libertatem credendi concesserunt tres inueniuntur. IOVINIANVS, qui tamen ne Catholicos cum hæreticis misceret, grauiter admonitus est à Cœcilio Antiocheno, vt scribit Socrates lib. 3. cap. 21. VALENS Imperator Arianus omnibus hæreticis & Ethnicis liberam permisit religionem, vt scribit Theodoretus lib. 4. ca. 22. Deniq; IULIANVS Apostata, qui ideo permisit libertatem, quia sic sperabat posse interire Christianismum; sic enim ait Augustinus epist. 166. *Julianus, inquit, desertor Christi & inimicus, hæreticis libertatè perditionis permisit, & tunc Basilicas hæreticis reddidit, quando*  
 30 *templa Daemonis; eo modo putans, Christianum nomen posse perire de terris, si Enitati Ecclesiæ, de qua lapsus fuerat, inuideret, & sacrilegas dissensiones liberas esse permitteret.*

Probatur TERTIO rationibus. PRIMO, potestas temporalis & spiritualis in Ecclesia non sunt res disiunctæ & separata, vt duo regna politica, sed sunt coniunctæ, ita vt vnum corpus faciant; vel potius ita se habent, vt corpus & anima in vno homine; est enim potestas spiritualis quasi anima, & temporalis quasi corpus, vt Nazianzenus docet in oratione ad populum timore percussam, ergo debet potestas temporalis



ralis spiritali seruire, eamque ab hostibus suis protegere ac defendere, ac (vt B. Gregorius ait, li. 2. epist. 61.) terrenum regnum cœlesti famulari; sed Ecclesiæ exitialis est hæc libertas; nam vinculum Ecclesiæ est vnius fidei confessio, ad Ephes. 4. *Vna fides*, & ideo dissensio in fide, Ecclesiæ est dissolutio. debent igitur Principes hanc libertatem nullo modo permittere, si fungi munere suo volunt.

SECUNDO, quando apud Iudæos vera religio florebat, non poterant Reges permittere libertatem religionis, ergo multo minus debent permittere Reges Christiani; non enim minus ordinata debet esse Ecclesia, quam fuerit Synagoga. Antecedens patet Deuter. 17. vbi ex sententia iudicis politici iubentur occidi, qui non obediunt Sacerdoti. Et cap. 18. Pseudoprophetæ similiter exterminari iubentur; & idem patet exemplis, quæ affert Augustinus epist. 50. de Ezechia, Iosaphat, Iosia, & aliis piis Regibus, qui destruebant lucos, & templa idolorum, & seuerè puniebant idololatrias, & populum ad cultum veri Dei compellebant. Quod autem paulo ante Christi tempora cœperint permitti variæ hæreses, ac præcipuè Sadducæorum, qui negabant resurrectionem, non est mirum, quia Synagoga tunc ad interitum propinquabat, nec habebat Regem vere Iudæum, qui ista curaret, sed Idumæum Herodem, Pontifices autem nihil poterant.

TERTIO, libertas credendi perniciofa est etiam temporali bono regnorum, & publicæ paci, vt patet primùm ex Gregorio lib. 4. epist. 32. vbi dicit, Reipublicæ ciuilis incolumitatem, ex Ecclesiæ pace pendere. DE INDETATIONE; nam vbi seruatur fides & obedientia Deo, ibi etiam seruatur Principi; nam fides ipsa hoc docet & exigit. ITEM dissensio in fide parit animorū & voluntatum dissensiones: omne autem regnum in seipsum diuisum, desolabitur; & experientia nostri temporis adeo manifestè hoc ostendit, vt frustra id probare nitamur.

QUARTO, libertas credendi perniciofa est illis ipsis, quibus conceditur; nam libertas credendi nihil est aliud, quam libertas errandi, & errandi in re omnium periculosissima; nam fides vera non est, nisi vna, Ephes. 4. *Vna fides*; ergo libertas ab ista vna fide recedendi, est libertas in errorum barathrum ruendi. Sicut ergo salubriter non permittitur ouibus liber-



tas vagandi per montes, & salubriter non liberatur gubernaculo, nec sinitur liberè à quolibet vento circumferri navis; ita quoque salubriter non conceditur populis libertas credendi, posteaquam vni veræ fidei se adiunxerunt. Argumenta solvantur in sequenti Quæstione.

## CAPVT XIX.

10 *Non posse conciliari Catholicos cum hæreticis.*

ERTIVS error est Gregorij CASSANDRI in libro de officio pij viri, vbi docet, debere Principes inuenire rationem pacis inter Catholicos, Lutheranos, Calvinistas, &c. Sed interim dum non inveniunt, debere permittere vnicuique suam fidem, modò omnes recipiant Scripturam & Symbolum Apostolicum. Sic enim omnes sunt vera Ecclesiæ membra, licet in particularibus dogmatibus dissentiant. Similia docuerunt olim pacificantes, auctore Zenone Imperatore, de qua re vide Euagrium, libro tertio, capite decimo quarto & tricesimo. Item Apelles, qui apud Eusebium libro quinto historiæ, capite decimo tertio dicebat, non esse discutendam rationem fidei, sed sat esse credere in crucifixum. Hic est manifestus error, & contra eum scripsit ex Catholicis Doctoribus Ioannes à Louanio, ex hæreticis Ioannes Calvinus.

30 Potest autem facilè refelli hæc sententia; primùm enim, non possunt Catholici, Lutherani, & Calvinistæ eodem modo conciliari; nam in ipso Symbolo non convenimus, exempli gratia, per articulum: *Descendit ad inferos*, diuersissima intelligimus; nos enim credimus, Christi animam à corpore separatam, secundum substantiam suam descendisse ad Limbum Patrum; hæreticorum alij, volunt descendisse Christum ad inferos, nihil esse aliud, quàm sepultum fuisse; alij passum dolores inferni. Similiter articulum: *Credo*

*Sano*



*Sanctam Ecclesiam*, diuersis modis intelligimus. Et illud etiā *Sanctorum communionem*; nam de singulis Sacramentis sunt controuersiæ. Denique de illo: *Remissionem peccatorum*, maxime dissentimus.

DICET Cassander, fat est, quod omnes fateamur, Symbolum esse verum, & illud recipimus.

Contrā; PRIMO, Symbolum vnum est, & non in verbis, sed in sensu est fides, non ergo habemus idem Symbolum, si in explicatione dissidemus; præterea si sufficeret verba Symboli recipere, nulli ferè veterum hæreticorum iure damnati fuissent. Nam Ariani, Nouatiani, Nestoriani, & alij ferè omnes verba Symboli Apostolici recipiebant, sed quia in sensu dissensio erat, ideo damnati, & ab Ecclesia Catholica ciecti fuerunt.

SECUNDO, fundamentum Cassandri est falsum; non enim possunt vera membra Ecclesiæ vocari Lutherani & Calvinistæ, etiamsi in Symbolo nobiscum conueniant; nam præter illam fidem requiritur subiectio ad legitimum caput Ecclesiæ à Christo constitutum, & communicatio cum aliis membris; Ecclesia enim est vnum corpus visibile, & proinde caput & membra habet visible, nec potest dici membrum, quod à capite & corpore reliquo separatum est. Certè Aërius, etiam quoad sensum, in Symbolo conueniebat cum Catholicis, tamen quia volebat subesse Episcopo, & ceteris membris communicare, ab Epiphanio & Augustino in Catalogo hæreticorum ponitur, & Cyprianus libro 4. epist. 2. dicit, Nouatianum esse extra Ecclesiam, quia non volebat subici Pontifici Cornelio, etiamsi nullam aliam hæresim introduxisset.

TERTIO, Cassander ita disputat, quasi inter Catholicos, Lutheranos, & Calvinistas solum dissensiones sint de ritibus & caerimoniis humanis; at multa dogmata sunt maximi momenti, in quibus dissentimus, quæque non habentur expresse in Symbolo, & propter quæ nulla pax sperari potest inter Catholicos, & Lutheranos. Nam verbi gratia, nos dicim⁹,

HHhh 4.

Missam



Missam esse diuinissimum cultum Dei; illi dicunt esse horrendam idololatriam: similiter inuocare Sanctos nobis est pietas, illis impietas, &c.

QUARTO, sancti Patres docuerunt nos, vt non solum fidei Symbolum, sed etiam omnia alia dogmata fidei licet minuta videantur, inuiolata seruemus, nec propter hæreticos villo modo immutari patiamur, Gal. 2. Paulus dicit, se nec ad horam cedere voluisse falsis fratribus. Et cum olim Ariani pererent a Catholicis, vt saltem vnā vocem omitterent, quæ non habetur in Scriptura, nec in Symbolo Apostolorum, vel vna litera immutarent, id est, non dicerent *ὁ μὸς ὁ τοῦ*, sed *ὁ μὸις ὁ τοῦ*, & si hoc fieret, pacem pollicerentur; Catholici noluerunt, & Imperatori scripserunt, nefarium esse de rebus iam definitis aliquid immutare; & si quid iustarum sanctionum fuerit immutatum, non propterea pacem futuram; nec enim apud eos pacem esse posse, qui pacis iura nescirent. vide Theodoretum lib. 2. histor. cap. 18. & 19. vel Trip. lib. 5. cap. 21. & 23. & hoc verum esse patuit in Concilio Ariminensi; nam cum simplices Catholici ab Arianis decepti, nomen *ὁ μὸς ὁ τοῦ* tollendum esse decreuissent, mox Arianis toto orbis terrarum prædicauerunt, se vicisse, & non contenti sustulisse vocem *ὁ μὸς ὁ τοῦ*, & per ea substituisse *ὁ μὸις ὁ τοῦ*, paulo post ipsum *ὁ μὸις ὁ τοῦ*, in *ἐτερος ὁ τοῦ*, id est, dissimilis substantiæ, transformarunt, vt Theodoretus refert lib. 2. histor. cap. 21.

Hinc Basilius roganti Præfecto Valentis Imperatoris, vt tempori pareret, & non tot Ecclesias, propter paruam dogmatum subtilitatem, vexari pareretur, respondit: *Qui diuini inmutati sunt eloquiis, corrumpere de diuinis dogmatibus, ne etiam quidem syllabam patiuntur, sed pro his, si contingat, omnes etiam moris species amplectuntur.* Vide Theodoretum lib. 4. cap. 17. historiæ Ecclesiasticæ. Eadem constantia præditi fuerunt Eustachius & Sylvanus, quibus cum Imperator exilium minaretur, nisi vocem, *ὁ μὸς ὁ τοῦ*, abrogarent, responderunt, potestatem habes puniendi, non tamen nos Patrum statuta destruimus. vide hist. Tripart. lib. 5. cap. 24.

Denique GELASIVS in epistola ad Euphemianum, perenti hæretico, vt Papa eis condescenderet, id est, aliquid remitteret



mitteret de religione Catholica, pacis gratia, eleganter eius petitionem irritat: *Cum autem, inquit, dicis, condescendere nos debere vobiscum: interim iam vos descendere, aut descendisse monstratis; Unde, quaeso, vel quò ista descensio est? & ex superiore quodam loco ad inferiora quaque depositos, à Catholica, Apostolicaque communione ad haeticam, damnatamque prolapsos videris, cognoscitis, non negatis; sed etiam in superiore manentes sede, vultis impelli, condescendere nos vobiscum inuitatis ad ima de summis; nos coascendere vos nobiscum rogamus ad summa de imis.*

QVINTO, non potest liberum esse credere in vno quolibet dogmate, quin eadem ratione liberum esse debeat in omnibus, etià in iis, quæ in Symbolo Apostolico continentur; nam vna est regula fidei indubitata, & certa in omnibus quæ creduntur, nimirum verbum Dei per Ecclesiam explicatum. Si ergo credo Ecclesiæ tradenti mihi Symbolum Apostolorum, quod non scio aliunde esse Apostolorum, nisi quia Ecclesia dicit; eadem ratione credere debeo Sanctos inuocandos, quia eadem Ecclesia hoc dicit; vel si hoc possim non credere, eadem ratione possum non credere, Symbolum illud esse Apostolorum.

SEXTO, opinio ista Cassandri noua est, & ab ipso primùm excogitata, vt ipse initio fatetur, suspecta igitur haberi debet. Vt enim pulchrè docet Vincentius Lyrinensis in suo opusculo contra prophanas nouitates, suspicione carere non potest, quod nouum est, cum vera fides vna sit, & antiquissima.

SEPTIMO, ista opinio facit veram Ecclesiam omnino occultam & inuisibilem; immò ex solis adulatoribus & simulatoribus conflatam; nam Cassander dicit, ad veram Ecclesiam requiri duo, fidem in Christum, & pacem cum hominibus, & inde deducit eos, qui hostiliter insectantur Catholicos, vel Lutheranos, non esse de Ecclesia, sed eos solùm, qui cum omnibus pacem habent: ergo illi, qui sunt de Ecclesia, non possunt esse nisi occulti, & qui cum Catholicis simulant se hostes Lutheranorum, & cum Lutheranis hostes Catholicorum; nam Catholici non patiuntur in suo grege vltos, qui ostendunt vltro signo externo, se fauere Lutheranis: inter Lutheranos quoque, etsi permittuntur in iisdem prouinciis



omnes sectæ, tamen nulla secta in suo grege patitur amicos aliarum sectarum, ut notum est: ergo isti pij, & pacifici viri necessarij sunt omnes ficti & simulati, aliud ore profitentes, aliud in corde calantes, & similes Herodi, qui cum Ethnicis erat Ethnicus, cum Iudæis Iudæus; nam & Cæsari templum erexit, & simul Deo vero, ut Iosephus refert lib. 15. Antiquit. cap. 13. & 14.

Adde, quod fatetur Cassander, suos istos collegas esse paucos & occultos, sed hinc apparet, eos non posse Ecclesiam constituere; nam Ecclesia est manifesta & visibilis adeo, ut à Domino Matth. 5. dicatur ciuitas supra montem posita. Denique, vera Ecclesia sine Pastoribus esse non potest, ad Ephes. 4. isti autem homines occulti nullos pastores habent, nec habere possunt, dum ita manent occulti; proinde nullam Ecclesiam habent.

## CAPVT XX.

*Libros hæreticorum abolendos esse.*

20 **OSTREMA** restat quæstio de poenis hæreticorum, quas post Ecclesiæ iudicium & declarationem, Principes politici infligere possunt ac debent. Incipiemus autem à libris eorum, ac breuiter ostendemus, libros hæreticorum iure interdici, & exuri. Id igitur probatur PRIMO ex antiqua & perpetua consuetudine, non solum Christianorum, sed etiam Ethnicorum.

PRIMO, refert Valerius Maximus lib. 1. cap. 1. quod cum Romæ reperti fuissent libri quidam, qui non nihil videbantur soluere religionem, Prætor Urbanus, ex auctoritate Senatus, in conspectu populi eos cremauit. Marcus Tullius li. 1. de natura Deorum refert, Protagoram Abderitem quod libros noxios religioni scripssisset, Atheniensium iussu, urbe atque agro exterminatum, librosque eius in concione combustos.

DEINDE, tempore Apostolorum, refert Lucas Actorum 19. multos ab Apostolis conuersos libros curiosos & vanos contulisse, & combussisse coram omnibus; & Clemens lib. 1. constituit. Apostol. cap. 7. dicit, Apostolos prohibuisse initio fidelibus libros Gentilium, & falsorum Prophetarum. Scribit



bit etiam Eusebius lib. 7. hist. cap. 6. Dionysium Episcopum Alexandrinum, qui floruit circa annum CC. L. à fidelibus reprehensum, quod libros hæreticorum legeret.

CONSEQUENTE postea tempore, creuit zelus fidelium contra libros hæreticorum; Nam Nicænum Concilium libros Arii igni adiudicauit, vt Nicephorus testatur lib. 8. cap. 18. & Constantinus id exequutioni mandari iussit, proposita poena capitis, si quis libros Arii occulasset, vt patet ex epistola eius apud Socratem, lib. 1. cap. 6. & Nicephorus lib. 8. cap. 25. Scribit etiam Socrates lib. 1. cap. 24. Marcellum Antiochianum damnatum fuisse, quod libros suorum errorum comburere nolisset; non enim recipiebantur ad poenitentiam hæretici, nisi prius libros suos combussissent.

CIRCA eadem tempora Epiphanius in Synodo Cypri coacta, vetuit libros Origenis legi, vt Socrates lib. 6. cap. 9. historiæ refert, & Concilium Carthagenense IV. canon. 16. permittit solis Episcopis, vt tempore necessitatis libros hæreticorum legant. Non diu postea cum Nestorij hæresis in Concilio Ephesino damnata fuisset, libri quoq; Nestorij in eodem Concilio interdicti fuere, & à Theodosio Imperatore exuri iussi, vt Liberatus refert cap. 10. Breuiarij, & exstat adhuc lex Theodosij, L. Damnato, C. de Hæreticis. Circa idem tempus prodiit lex Honorij & Theodosij, qua iubentur Mathematici omnes suos libros, in quibus aliquid est aduersum Catholicæ religioni, in oculis Episcoporum cremare, L. Mathematicos, C. de Episcopali audientia. PARI ratione in Concilio Chalcedonensi damnantur libri Eurychetis, & ab Imperatoribus Valentiniano & Martiano seuerâ lege prohibetur, ne vllus eos legere, aut habere audeat, sed omnes diligentissimè quæsitî cremetur, vt patet ex Concilio Chalcedonensi, act. 3. & ex ipsâ lege, quæ adhuc exstat L. Quicumque, §. Nulli, & §. Omnes, C. de Hæreticis.

Eodem tempore B. Leo in epistol. 91. ad Turbium, cap. 15. & 16. interdixit lectionem librorum hæreticorum quorundam, & addidit eos Episcopos, qui eos in domibus fidelium haberi sinerent, hæreticos censendos; paulò post Gelasius in Concilio LXX. Episcoporum, vt habetur dist. 15. can. 5. Romana, proposuit indicem hæreticorum, quorum libros à fidelibus vitandos esse dicit.



Postmodum in V. Synodo damnato Anthymo, damnatur etiam eius libri, & Iustinianus Imperator grauem penam statuit, nimirum amputationis manuum in eos, qui eiusmodi libros describunt, ac iussit ubique comburi. habetur hæc constitutio in prima actione Synodi V. & in Nouellis, constit. 42. B. Gregorius lib. 14. moralium, cap. 32. refert iussu Tyberij Imperatoris, crematum librū Eutychij, quem ipse Gregorius hæresis conuicerat.

In VII. etiam Synodo, act. 5. interdiciuntur & comburi  
 10 iubentur libri hæreticorum, & can. 9. excommunicantur, qui libros hæreticorum legunt. Concilium Constantiense sess. 8. confirmat decretum Concilij Romani, quo interdicta fuerat lectio librorum Ioannis VViclef. Denique, Concilium Tridentinum indicem librorum hæreticorum fieri iussit, ut omnes scirent, qui libri cauendi & exurendi essent. Ex quo apparet, semper eandem fuisse consuetudinem in Ecclesia.

Accedit etiam in argumentum huius rei, quod nulli ferè exstant libri veterum hæreticorum. quomodo enim eua-  
 20 nuerunt tot volumina Valentini, Marcionis, Arij, Eunomij, Nestorij, Pelagij, & aliorum, quibus sancti Patres respondent?

Probatur SECUNDO ratione; nam colloquia hæreticorum sunt periculosissima, & ideo diligenter vitanda, ergo multò magis libri sunt noxij & pestilentes, ac vitandi. Ad Romanos 16. *Rogo autem Vos, fratres, ut obseruetis eos, qui dissensiones & offendicula præter doctrinam, quam Vos didicistis, faciunt, & declinate ab eis; nam per dulces sermones & benedictiones seducunt corda innocentum.* 2. Timoth. 3. *Hos deuota.*  
 30 *Tit. 3. Hæreticum deuota. 2. epist. Ioan. Si quis uenit ad Vos, & hanc doctrinam non affert, nolite recipere in domum, nec Ane ei dixeritis.*

S. IRENAEVS lib. 3. cap. 3. *Tantum, inquit, Apostoli, & horum discipuli habuerunt timorem, & neq. verbo tenus communicarent alicui eorum, qui adulterauerant Veritatem.*

S. CYPRIANVS lib. I. epist. 3. ad Cornelium: *Declinent, inquit, fortiter, & euitent dilectissimi fratres nostri uerba, & colloquia eorum, quorum sermo ut cancer serpit. Et infra: Nullum cum talibus commercia, nulla conuiuia, nulla colloquia misceant*



secedant, simusque ab eis tam separati, quam sunt illi ab Ecclesia profugi.

S. ATHANASIVS de S. Antonio in eius vita: Nunquam, inquit, Manichæis, aut aliis hæreticis saltem amicabilia verba largitus est, denunciando talium amicitiam, atque sermones, perditionem esse animæ. Sic etiam Arianes detestabatur, & omnibus diceret, nec iuxta eos quidem esse accedendum. Et ipse B. Antonius iam moriturus: Hæreticorum, inquit, & schismaticorum venena vitæ, meumque circa eos odium sectamini. scitis ipsi, quod nullus mihi, nec pacificus quidem sermo cum eis unquam fuerit. S. AVGVSTINVS in epist. 62. Hæreticum, inquit, sicut vitandum monemus, ne infirmos, & parvulos fallat, ita non abnuimus quibuscumque modis possumus corrigendum, &c. S. LEO serm. 18. de passione Domini: Vixere, inquit, hæreticorum vitæ colloquia, nihil vobis commune sit cum eis, qui solo sunt nomine Christiani. Hæc ille.

IAM igitur, si tantopere vitanda sunt colloquia hæreticorum, quantum magis libri? nam oratio in libris scripta, est magis composita, & artificij plena, quam quæ in colloquiis vsurpatur. DEINDE, est semper ad manus; nam conciones & colloquia sunt rara, & verba ore prolata mox transeunt; at verba in libris manent perpetuò, & semper nobis adsunt, nobiscum peregrinantur, nobiscum domi sedent. PRAETEREA libri magis sparguntur; potest enim aliquis per libros toti ferè orbi terrarum simul loqui, & multorum domos & cubicula libri penetrant, quos auctor libri nunquam vidit, & ad quos fortè nunquam admitteretur. DENIQUE, experientia idem docet; nam Ioannes VViclefus viua voce paucissimos peruerit; docuit enim solum in Anglia, & ibi penè nullos reliquit sui erroris hæredes: at per libros totam Boëmiam peruerit. vide Cochlæum in historia Hussitarum.

AT contra obiiciunt. PRIMO, quia multa bona sunt in libris hæreticorum, & stultum videtur, propter aliqua mala priuare se etiam bonis: & confirmatur, quia alioqui multorum Patrum scripta comburenda erunt. Item, quia Ecclesia tolerat libros Gentilium, Iudæorum, Turcarum, & veterum etiam hæreticorum, vt Origenis, Tertulliani, Eusebij, Pelagij.

RESPON-



RESPONDEO, veritatem quidem non esse negandam, tamen nec legendam in libris hæreticorum; nam, ut ibi est, nocet, non prodest. Scribit B. Gregorius lib. 5. moral. cap. 11. hoc esse proprium hæreticorum, ut veris falsa permisceant, & bonis mala; nam si sola falsa & mala dicerent, ab omnibus repellerentur; si sola vera & bona, hæretici non essent. Itaque omnia miscent, ut ex malis bona inficiant, & per bona mala sua abscondant; quæ etiã causa est, cur Christus & Apostoli prohiberent Dæmones vera dicere, ne videlicet per ea vera fidem sibi acquirerent, & postea falsa etiam illis crederentur. Luca 4. *Dominus non sinebat Dæmones dicere; Tu es Christus Filius Dei.* Et Actor. 16. Paulus prohibuit Diabolo dicere: *Isi homines serui Dei excelsi sunt, qui annunciant vobis Evangelium salutis.*

Præterea, etiam non decet, ut veritas ab hæreticis suscipiatur, qui hostes sunt veritatis: ut scribit Gellius lib. 18. cap. 3. apud Lacedæmonios, cum de summa Reipublicæ ageretur, vir quidam disertus & doctus, sed improbus & impurus, optimam sententiam dixit, quæ cum placeret omnibus, & iuxta eam decretum faciendum videretur, & tamen ferre non possent, ut optimum consilium turpitudine auctoris fœdaretur, electus est vir quidam grauiissimus, qui omnium consensu eandem sententiam diceret, & nulla prioris habita mentione, huius sententia in decretum referretur.

Ad PRIMAM confirmationem de scriptis Patrum, respondeo in primis, Patres non esse hostes Ecclesiæ, & eorum errata non hæreses, sed humanos esse errores. Præterea, errores Patrum esse errores extinctos & mortuos, qui nocere non possunt; nam error nocet quamdiu defenditur pertinaciter: Patrum autem errores non fuerunt detecti, dum Patres ipsi viuerent, alioqui enim vel ipsi eos emendassent, vel ab Ecclesiâ eiecti fuissent: sed post mortem eorum detecti, notatiq; sunt, & ab omnibus improbat, sicut etiam ab ipsis improbarentur, si viuerent.

Ad illud de Gentilibus dico, eos tolerari, quia non nocent, cum sint errores mortui; nulli enim nunc sunt, qui non rideant dogmata Gentilium; nec vnquam audimus Christianos deprauatos libris Gentilium, deficere ad Gentilismum, ut quotidie deficiunt ad hæreticos; quia verò tempore Aposto-



Apostolorum multierant, qui propugnabāt dogmata Gentilium; Clemens scribit interdictos fuisse Gentilium libros, lib. 1. Constitut. cap. 7. & eadem de causa prohibentur libri Gentilium in Concilio Carthaginensi IV. cap. 16.

Ad illud de Iudæorum & Turcarum libris dico, libros Iudæorum & Turcarum melioris conditionis esse, quam hæreticorum; illi enim sunt aperti hostes Christianorum, nec fallunt sub nomine Christiano, ut hæretici faciunt. Itaque etiam simplicissimi quique nōrunt discernere dogmata Iudæorum & Turcarum a Christianis dogmatibus; discernere autem hæreses non possunt, nisi homines valde docti. Præterea etiam Iudæorum & Turcarum libri prohibentur, quando continent blasphemias in Christum, aut iudicantur perniciosi Christianis, ut patet de Talmud Iudæorum.

Ad illud de Origene, Tertulliano, Eusebio, Pelagio dico, eorum libros permitti, quia hæreses illæ sunt extinctæ, & libri illi profant propter antiquitatem.

Argumentum SECUNDUM, ex Paulo, qui 1. Thess. 5. dicit: *Prophetias nolite spernere, omnia probate, quod bonum est, tenete.* est enim sensus; Si quis futura prædicat, vel Scripturas interpretetur, aut verbo, aut scripto, nolite reiicere, sed audite, vel legite, & quod Catholicæ fidei consonum est, accipite, reliquum omittite.

RESPONDEO, Apostolus loquitur de prophetia & scriptis, quæ nondum constat, an sint bona vel mala, & talia non vult reiici, nisi prius examinata; sed quādo scriptum aliquod iam est examinatum, & constat esse malum, vult omnino reiici, & talia sunt scripta omnia, quæ nobis prohibentur; sunt enim probata, id est, examinata omnia, & ideo prohibita, quia mala reperta sunt.

Deinde, licet Apostolus ad totam Ecclesiam scribat, tamen nō vult omnia fieri ab omnibus, sed ab iis, qui possunt, & quibus ex officio incumbit, sicut cū ad Vniuersitatem aliquam mittuntur articuli aliqui suspecti examinandi, non ad omnes, qui sunt in Vniuersitate, pertinet eos examinare, sed solum ad Magistros, vel quos ipsi designauerint; ita igitur cū Apostolus iubet, in Ecclesia examinari prophetias, & Scripturarum interpretationes, certè non vult hoc



hoc fieri à sartoribus & cementariis, sed ab Episcopis, & aliis, quos Episcopi sibi adiungunt.

A L I V D argumentum sumunt ex testimoniis quatuor veterum Patrum, Dionysij Alexandrini, Theophyli, item Alexandrini, B. Hieronymi, & Gelasij; nam D I O N Y S I V S, vt scribit Eusebius lib. 7. historię, cap. 6. cū reprehenderetur quōd libros hereticorum legeret, respondit, se visionem habuisse, qua sibi dicebatur: *Lege omnia, quę in manus tuas veniunt, valebis enim omnia expendere & probare.* T H E O P H I L Y S quoque cū argueretur quōd Origenem legeret, respondit, vt Socrates refert lib. 6. historię, cap. 15. se legere, vt quod bonum est exciperet, quod malum respiceret. Beatus H I E R O N Y M V S in epistola ad Alexandrum & Minerium, dicit, se legere libros hereticorum, vt bona inde excerpatur, etiam si sciat, aliquos propterea de se murmurare.

G E L A S I V S in tomo de vinculo anathematis, probare volens, posse Concilium Chalcedonense partim recipi, partim non recipi, affert exemplum librorum hereticorum, qui partim recipiuntur, partim reiiciuntur, & allegat illud: O m n i a probate, quod bonum est tenete.

Ad hoc vltimum respondeo, exemplum Gelasij in eo consistere, quod sicut in Concilio Chalcedonensi quędam erant bona, quędam mala; & quędam recipienda, quędam reiicienda, ita & in libris hereticorum: non tamen vult dicere, posse recipi libros ipsos hereticorum propter vera admixta, sicut recipitur Concilium Chalcedonense; nam alia ratio est Concilij sanctorum Patrum, alia librorum hereticorum, vt diximus, quanquam veritas ipsa inserta libris hereticorum bona sit, & recipienda, si tamen alibi reperiat; verba eius hæc sunt: *Nunquid nam in ipsorum hereticorum libris non multa, quę ad Veritatem pertineant, posita leguntur? Nunquid nam ideo Veritas refutanda est quia illorum libri sibi prauitas inest, refutantur? Aut ideo prauis libri, suscipiendi sunt eorum, quia Veritas, quę illic inserta est, non negatur?*

Ad alia respondeo. P R I M V M, ex his locis colligi, semper in Ecclesia fuisse morem vitandi lectionem librorum hereticorum, alioqui enim nemo istos Patres reprehendisset. Dico S E C V N D O, semper concessum fuisse, & modò etiam concedi Episcopis, & aliis multis lectionem librorum hereticorum,



ticorum, & ideo non mirum, si Dionysius & Theophilus, qui Patriarchæ erant, & S. Hieronymus, qui semper doctissimus est habitus, poterant suo iure omnes libros legere. Dico TERTIO, nullam tunc fortasse fuisse legem vniuersalis Ecclesiæ, sed solum consuetudinem de non legendis libris hæreticorum, exceptis libris Arii; at nunc lex est Ecclesiæ vniuersalis, cui parendum est.

CAPVT XXI.

*Posse hæreticos ab Ecclesia damnatos, temporalibus pœnis, & etiam morte mulctari.* 10

**H**OANNES Hufs artic. 14. in Concilio Constantensi, sess. 15. recitato, asseruit, non licere hæreticum incorrigibilem tradere seculari potestati, & permittere comburendum. Idem Lutherus in artic. 33. & in assertionem eiusdem. Nec nouus est error; nam etiam Donatistæ olim idem docuerunt, vt Parmenianus, Petilianus, & Gaudentius, vt Augustinus testatur lib. 1. contra epistolam Parmeniani, cap. 7. Lib. 2. contra literas Petiliani, cap. 10. Lib. 2. contra epistolam Gaudentij, cap. 17. & 26. & epist. 50. ad Bonifacium. 20

Contrarium docent omnes Catholici, & aliqui etiam ex hæreticis. Nam Calvinus posteaquam Michaëlem Seruentum tanquam hæreticum publicè supplicio extremo affecisset, & ab aliis sectariis argueretur, libellum edidit, in quo demonstrat, licitum esse in hæreticos gladio animaduertere. Benedictus quoque Arctius in historia de supplicio Valentinii Gentilis, eundem Gentilem ob hæresim iure cæsum à Bernensi Magistratu, contendit. Fusiùs verò id ipsum docet Theodorus Beza in libro de hæreticis à Magistratu puniendis. 30

Nos igitur breuiter ostendemus, hæreticos incorrigibiles, ac præsertim relapsos, posse ac debere ab Ecclesia relictis, & à secularibus potestatibus, temporalibus pœnis, atq; ipsa etiam morte mulctari.

Probat PRIMO Scripturis. Scriptura veteris Testamenti Deuteron. 13. seuerissimè iubet falsos Prophetas, qui



suadent colere Deos alienos, sine vlla misericordia occidi, & cap. 17. postquam dixerat, vt in rebus dubiis consuleretur summus Sacerdos, mox subdit: *Qui autem superbierit, nolens obedire Sacerdotis imperio, ex sententia iudicis moriatur.* Et rursum cap. 18. Propheta falsus interfici iubetur. Et re ipsa legem hanc seruauerunt Helias, Iosias, Iehu, & alij, qui falsos Prophetas plurimos occiderunt, vt patet 3. Reg. 18. & 4. Reg. 10. & 23. nullum est autem ferè discrimen inter nostros hæreticos & falsos Prophetas illius temporis, nec solum S. Reges & Prophetæ blasphemos morte multarunt, sed etiam Nabuchodonosor (vt dicitur Daniel. 3.) edictum constituit, vt quicumque blasphemaret Deum Danielis, id est, verum Deum, interficeretur, & domus eius vastaretur; in quo edicto Deo vero obsequium iustissimum fecit, vt B. Augustinus dicit in epist. 50. & alibi.

In nouo Testamento habemus in primis Matth. 18. posse Ecclesiam eos, qui obedire nolunt, à se reicere, & habere vt Ethnicos & Publicanos, ac proinde permittere eos potestati seculari, tanquam non amplius Ecclesiæ filios. Habemus deinde Rom. 13. secularem potestatem, posse scelestos homines gladio punire: *Non enim, inquit, sine causa gladium portat, minister enim Dei est, & index in iram, &c.* Ex quibus duobus locis aperte colligitur, licitū esse hæreticos, qui omnium iudicio sunt rebelles Ecclesiæ & publicæ pacis perturbatores, ab Ecclesia abscindi, & à seculari iudice morte multari.

PRÆTEREA Christus & Apostolus eius hæreticos iis rebus comparauerunt, quæ sine controuersia ferro & igni repelluntur; nam Matth. 7. Dominus ait: *Attendite à falsis Prophetis, qui veniunt ad vos in vestimentis ouium, intrinsecus autem sunt lupi rapaces.* Act. 20. Ego scio, quoniam intrabunt post discessum meum lupi rapaces; nomine luporum certum est hæreticos intelligi debere, vt pulchrè explicat S. Ambrosius in commentario ad initium capitis decimi B. Lucæ; ac lupi rapaces optimo iure occiduntur, si aliter abigi non possunt; pluri enim faciendæ est vita ouium, quam mors luporum. Item Ioan. 10. *Qui non intrat per ostium in ouile, sed ascendit aliunde, ille fur est & latro.* Vbi nomine furis & latronis intelliguntur hæretici, & omnes seductores, ac sectarum inuentores, vt Chrysostomus & Augustinus exponunt; fures autem



autem & latrones, quomodo puniantur, notum est. Item 2. Tim. 2. hæresis comparatur cancro, qui non curatur medicamentis, sed ferro excindi debet, alioqui perpetuò serpit, & totum corpus corrumpit. DENIQUE Christus Ioan. 2. flagello coëgit negociatores egredi templum. Petrus Act. 5. Ananiam, & Saphiram, quia mentiri ausi fuerant Spiritui sancto, occidit. & Paulus Act. 13. falsum Prophetam, qui proconsulem à fide impedire conabatur, cæcitate percussit.

Probatur SECVNDO sententiis & legibus Imperatorum, quas Ecclesia semper probavit. Constantinus I. Imperator ad petitionem Nicenæ Synodi Arium cum aliquot sociis in exilium relegavit, ut auctor est Sozomenus lib. 1. cap. 20. historiæ; item Donatistas supplicio affecit, ut Augustinus refert li. i. contra epistolam Parmeniani, cap. 7. & in epist. 166. ad Donatistas, ubi enumerat multos Imperatores optimos, qui severissimas leges tulerunt contra hæreticos, & unum solum Iulianum Apostatam hæreticis fuisse.

Deinde Theodosius, Valentinianus, Martianus, & alij religiosissimi Imperatores leges tulerunt in hæreticos, quibus eos interdum aliquot libris auri, interdum omnibus bonis, interdum exilio & verberibus, interdum ultimo supplicio mulctari voluerunt, ut patet C. de hæreticis. L. Manichæos. L. Ariani, L. Quicumque, qua ultima lege, quæ est Valentiniani, & Martiani iubentur occidi omnes, qui prava docere tentant; qui verò eos docentes audiunt, aliquot libris auri mulctari. Iustinianus apud Paulum Diaconum lib. 16. lege edita omnes hæreticos de finibus totius imperij eiecit, concessis trium mensium ad conversionem induciis; deinde Michaël Imperator apud eundem Paulum Diaconum lib. 24. capitalem poenam in hæreticos constituit.

Probatur TERTIO legibus Ecclesiæ, cap. Ad abolendam, & cap. Excommunicamus, extra de hæreticis, & in Sexto de hæreticis, cap. Super eo, definit Ecclesia, hæreticos incorrigibiles seculari potestati tradendos, ut ab eis debito modo puniantur. Item Constantiense Concilium sess. 15. damnavit sententiam Ioannis Hufs; & ipsum Ioannem & Hieronymum de Praga tradidit seculari potestati, à qua ambo exusti fuerunt; denique Leo X. articulum Lutheri damnavit.



Probatur QVARTO testimoniis Patrum. CYPRIANVS libro de exhortatione martyrij, cap. 5. postquam retulerat ex Deut. 13. necandos esse Pseudoprophetas, subdit: *Si hoc in Testamento Veteri fiebat, nunc magis faciendum esse.*

HIERONYMVS in illud Galat. 5. Modicum fermentum totam massam corrumpit: igitur, inquit, *scintilla statim et apparuerit extinguenda est, et fermentum a massa vicina remouendum; secunda putrida carnes, et scabiosum animal a canis ouium repellendum, ne tota domus, massa, corpus, et pecora, ardeat, corrumpatur, putrescat, intereant.* Arius *una scintilla fuit, sed quia non statim oppressa est, totum orbem eius flamma popu-*  
lata est.

AVGVSTINVS lib. 2. retract. cap. 5. & in epist. 48. & 50. retractat, quod aliquando senserat, non esse vi cogendos hæreticos ad fidem, & prolixè probat id vtilissimum; semper tamen excipit supplicium mortis, non quod illos hoc non mereri putaret, sed tum quia hoc decere Ecclesiæ mansuetudinem existimabat, tum etiam quia nondum vlla exstabat lex Imperatorū, qua hæretici iuberentur occidi; illa enim Lex, *Quicumque, C. de hæreticis, paulò post mortem Augustini*  
lata est.

Quod autem Augustinus existimauerit, iustum esse, si hæretici occiderentur, perspicuum est; nam lib. 1. contra epistolā Parmeniani, cap. 7. ostendit, quod si punirentur morte Donatistæ, iustè punirentur. Et tractat. 11. in Ioan. *Occidunt, inquit, animas, affliguntur in corpore, sempiternas mortes faciunt, et temporales se perpèti conqueruntur, etc.* Vbi dicit falsò illos conqueri, quod occiderentur ab Imperatoribus: tamen si etiam verum esset, adhuc iniustè conquererentur. Deniq; in epist. 50. ad Bonifacium dicit, Ecclesiam quidem nolle vllum hæreticum occidi, tamen sicut domus David non potuit habere pacem nisi Absalon exstingeretur, & David pater regni mærorem mortis filij consolatus est: sic cum legibus Imperatorum contra hæreticos sequitur aliquorum mors, Ecclesiam dolorem materni cordis lenire ac sanare tantorum liberatione populorum.

S. LEO in epist. 91. ad Turbium, cap. 1. Merito, inquit, *Pastres nostri, sub quorum temporibus hæresis hac nefanda prorupit, per totum mundum instantè egere, et impius furor ab omni*  
Ecclesiis



Ecclesiapelleretur; quando etiam Principes mundi hanc sacrilegam amentiam ita detestati sunt, ut auctorem eius, ac plerosque discipulos legum publicaram ense prosternerent; & profuit diu ista districtio Ecclesiastica lenitati, quæ et si sacerdotali contenta iudicio, cruentas refugit soliones, seueris tamen Christianorum Principum constitutionibus adinuatur, dum ad spirituale nonnunquam recurrunt remediū, qui timent corporale supplicium. OPTATVS Mileuitanus lib. 3. respondens calumniæ hæreticorum, qui ægerimè ferebant duos ex suis à Machario præfecto interfectos: *Videtis*, inquit, à Mose, & Phinee, & He-<sup>10</sup> lia, & Machario similia esse facta, quia ab omnibus Sinus Dei vindicta processit.

S. GREGORIUS lib. I. epist. 72. ad Gennadium Exarchum Africae, laudat eum, quòd magno zelo hæreticos armis persequeretur, & hortatur, ut pergat.

S. BERNARDVS serm. 66. in Cantica: *Melius*, inquit, proculdubio gladio coercerentur, illius videlicet, qui non sine causa gladium portat, quàm in suum errorem multos trancere permittantur; Des enim minister ille est, & index iram ei, qui malè agit: mirabantur aliqui, quòd non modò patienter, sed etiam la-<sup>20</sup> ti, & videbantur, ducerentur ad mortem; sed qui minus aduertunt, quanta sit potestas Diaboli, non solum in corpora hominum, sed etiam in corda, quæ semel permissus possederat. Nonne plus est sibi met hominem inuicere manus, quàm id libenter ab alio sustinere?

ProbatUR VLTIMO ratione naturali. PRIMÒ, hæretici excommunicari iure possunt, ut omnes fatentur, ergo & occidi. ProbatUR consequentia, quia excommunicatio est maior pœna, quàm mors temporalis. Augustinus lib. I. contra aduers. Legis & Prophetarum, cap. 17. dicit, horribilius esse; <sup>30</sup> tradi Saranæ per excommunicationem, quàm gladio feriri, flammis absumi, ferisue subigi ad deuorandum.

SECUNDO, experientia docet non esse aliud remedium; nam Ecclesia paulatim progressa est, & omnia remedia experta; primò solum excommunicabat; deinde addidit multam pecuniariam, tum exilium; vltimò, coacta est ad mortem venire; nam excommunicationem contemnunt hæretici, ac dicunt esse fulmina frigida: si mineris multam pecuniaria, nec Deum timent, nec homines reuerentur, scientes



non defuturos stultos, qui illis credant, & à quibus alantur; si in carcerem concludas, vel in exilium mittas, corrumpunt vicinos verbis, & longè positos libris, ergo solùm remedium est, mittere illos maturè in locum suum.

TERTIO, falsarij omnium iudicio merentur mortem; at hæretici falsarij sunt verbi Dei.

QUARTO, ex ratione Augustini epist. 50. grauius est non seruare fidem hominem Deo, quàm sceminam viro, sed hoc morte punitur, cur non illud?

QUINTO, tres causæ sunt, propter quas ratio docet homines occidendos esse, quas pulchrè describit Galenus in libro, cuius titulus est, quòd mores animi corporis temperamentum sequantur, circa finem libri.

PRIMA causæ est, ne mali honis noceant, nèue innocentes à nocentibus opprimantur; atque hinc iustissimè omnium iudicio occiduntur homicidæ, adulteri, latrones.

SECUNDA est, vt paucorum supplicio multi corrigantur, & qui noluerunt prodesse Reip. viuendo, prosunt moriendo; atque hinc videmus etià iustissimè omnium iudicio quædam horrenda flagitia morte puniri, licet proximis non noceant, nisi exemplo, vt Necromantiam, quædam nefanda & contra naturam; ista ideo grauissimè puniuntur, vt ceteri intelligant, immania esse scelera, & non audeant similia perpetrare. TERTIA est, quia ipsis hominibus, qui occiduntur, sæpe vtile est occidi, quando videlicet semper sunt peiores, & non est probabile vnquam eos ad sanitatem mentis reuersuros.

Hæ autem rationes omnes suadent hæreticos occidendos; nam primùm nocent proximis magis, quàm vllus pirata vel latro, quando quidem animas occidunt, immò tollunt fundamentum omnis boni, & Rempub. tumultibus replent, qui necessariò religionum diuersitatem sequuntur.

Deinde, plurimis prodest eorum supplicium; multi enim, quos impunitas faciebat torpentes, supplicia proposita excitant, vt cogitent qualis sit hæresis, quam sequuntur, & videant ne fortè vitam præsentem miserè finiant, & ad futuram beatitudinem non perueniant. Itaq; & B. Augustinus in epist. 48. testatur, plurimos conuersos esse, postquam leges

Impe-



Imperatorū non sinebant hæreticos impunitos, & nos quotidie idem videmus fieri in locis, vbi viget inquisitio.

Deniq; hæreticis obstinatis beneficium est, quod de hac vita tollantur; nam quò diutius viuunt, eò plures errores excogitant, plures peruertunt, & maiorem sibi damnationem acquirunt.

## CAPVT XXII.

*Soluuntur obiectiones.*

**S**UPEREST argumenta Lutheri atq; aliorum hæreticorum diluere. Argumentum PRIMVM, ab experientia totius Ecclesiæ: *Ecclesia*, inquit Lutherus, *ab initio sui usq; huc nullum combussit hæreticum*; ergo non videtur esse voluntas spiritus, vt comburantur.

RESPONDEO, argumentum hoc optimè probat, non sententiam, sed imperitiam, vel impudètiā Lutheri; nam cum infiniti propemodum vel combusti, vel aliter necati fuerint, aut id ignorauit Lutherus, & tunc imperitus est, aut nō ignorauit, & impudens ac mendax esse conuincitur; nam quod hæretici sint sæpe ab Ecclesia combusti, ostendi potest, si adducamus pauca exempla de multis. Priscillianus heresiarcha cum sociis, à Maximo Christiano Imperatore necatus est, vt S. Hieronymus in libro de viris illustribus testatur, & de Donatistis occisis meminit Optatus li. 3. contra Parmenianum.

Basilii quidam Magus, ac proinde hæreticus; nam vix vlli sunt verè Magi nō hæretici, Romę combustus est à Christiano, & Catholico populo, vt B. Gregorius testatur lib. I. Dialogorum, cap. 4.

Rursum alius Basilius auctor hæresis Bogomilorum ab Alexio Comneno Imperatore publicè exustus est, vt scribit Zonaras in vita Alexij.

Tempore etiam B. Bernardi, quod hæretici vltimo supplicio afficerentur, testatur ipse in Cantica serm. 66. Temporibus Innocentij III. fuerunt aliquādo simul exusti C. LXXX. hæretici Albigenes, cum antea & verbis, & miraculis eos S. Dominicus conuicisset, & multos eorum socios conuertisset. Scribit rem totam B. Antoninus 3. parte, tit. 19. cap. 1. §. 4. historia.



Ac ut alios infinitos omittam, Ioannes Hufs, & Hieronymus de Praga in Constantienſi Concilio ab Imperatore Sigifmundo exuſti fuerunt.

Respondet Lutherus ad hoc vltimum exemplum; Ego de hæreticis loquor, Hufs autem, & Pragenſis non fuerunt hæretici. CONTRA. Saltem Priscillianus, & Bogomiles, & Albigenſes fuerunt hæretici, Præterea Ioannes Hufs, & nobis Catholicis, & ipſi Luthero hæreticus fuit; quod nobis, notum eſt: quod Luthero, probatur; nam Lutherus in lib. contra Regem Angliæ aſſerit impium eſſe, & blaſphemum negare verum panem in Euchariftia cum corpore Domini: & ipsum, atq; Catholicum, negare conuerſionem panis in corpus. At Ioannes Hufs vſque ad mortem in contraria ſententia fuit, & proteſtatus eſt in ea fide ſe mori, credens firmiſſimè panis conuerſionem in corpus Chriſti, ut Ioannes Cochleus refert lib. 2. de hiſtoria Huſſitarum, pag. 76.

Argumentum SECUNDUM. Experientia teſtatur, non proſici terroribus. RESPONDEO, experientia eſt in contrarium; nam Donatiſtæ, Manichæi, & Albigenſes armis proſigati, & extincti ſunt. Item Auguſtinus teſtatur plurimos conuerſos ſuo tempore ob metum pœnæ, epiſt. 48.

Argumentum TERTIUM. Eccleſia tolerat Iudæos, cur non hæreticos? Respondeo PRIMO, Iudæi nunquam ſuſceperunt fidem Chriſtianam, hæretici ſuſceperunt. SECUNDO, Iudæi religionem colunt, quam Deus inſtituit ſaltem pro tempore, hæreticæ, quam Diabolus inuenit. TERTIO, ſectæ Iudæorum Eccleſiæ utilis eſt, quia eorum libri ſunt prophetiæ noſtrarum rerum, & eorum cærimoniarum figuræ noſtrorum myſteriorum, & hinc probamus Gentilibus nos non finxiſſe hæc vaticinia, quandoquidem ſervantur à noſtris inimicis; denique Iudæi non conantur pervertere Chriſtianos, ut plurimum, ſicut faciunt hæretici. Vide Concilium Toletanum IV. can. 55. & 56. & Auguſtinum in Pſal. 59. Item Bernardum in epiſt. 322. ad Spirenſes, & 323. ad Episcopum Moguntinum.

Argumentum QUARTUM, ex Iſaiæ 2. *Conſtabunt gladios ſuos in vomeres, & lanceas ſuas in falces.* RESPONDEO, non eſt ad propoſitum; nam ut B. Hieronymus exponit, deſcribit Propheta tempus aduentus Meſſiæ, ac dicit futurum tempus altissi-



altissima pacis, ita vt homines cōuertant instrumenta militiæ in instrumenta agriculturæ, & non exerceantur vltra, id est, in longum tempus ad prælium; hoc autem tempus impletum est in Christi natiuitate; nunquam enim fuit tam generalis, & tam diuturna pax in toto orbe, quàm tempore Augusti. DEINDE, si verum est nunquam futura in Ecclesia bella, vt Lutherus ex hoc loco deducit, manifestum erit apud Lutheranos nō esse Ecclesiam, qui & inter se, & cōtra Catholicos grauissima bella mouerunt, quale fuit illud contra Carolum V. in quo captus fuit Dux Saxonie & Lantgrauis. 10

Argumentum QUINTVM, ex Isaia 11. *Non occident, & non nocebunt in omni monte sancto meo.* RESPONDEO, argumentum est contra ipsum Lutherum; nam non dicit Propheta quod Catholici non occident hæreticos, sed potius contrā, quod hæretici non occident, & non nocebunt Catholicis; loquitur enim Propheta de leonibus, & vrsis, & serpentibus, regulis, aliisque venenatis bestiis, de quibus dixerat: *Et deletabitur infans ab obere super foramine assidis, & in cauerna reguli mittet manum suam, &c.* His autem bestiis Diabolus, & hæretici eius ministri significantur, vt Hieronymus, & Cyrillus exponunt, ac dicit, quod non occident, neque nocebunt in omni Ecclesia; tamen si enim hæretici videntur Ecclesie nocere, tamen reuera non nocent, sed eam exercent, & in sapientia, ac patientia proficere faciunt.

Argumentum SEXTVM. Matth. 18. Dominus constituit, vt hæretici haberentur pro Ethnicis & Publicanis, non vt comburerentur. Et Paulus ad Tit. 3. iubet hæreticum vitari, non occidi, ergo non licet eos occidere. RESPONDEO, Christum quidem, & Paulum hoc loco non præcepisse, sed nec prohibuisse, vt comburerentur hæretici: ac proinde nihil ex hoc loco deduci. & hæc est solutio, qua ipse etiam Lutherus vti consuevit; nam in lib. 2. contra Carolstadium, obiicienti Carolstadio, cur vocaret Sacramenta, quæ Christus non præceperat sic vocari; respondit Lutherus, & quare tu prohibes ea vocari Sacramenta, quæ Christus non prohibuit vocari; præterea Christus & Paulus nusquam iubent adulteros, & falsarios occidi, suspendi fures, comburi latrones, & tamen id fieri, & rectè fieri, neque Lutherus negare auderet.

Argumentum SEPTIMVM. B. Martinus apud Sulpitium lib.



lib. 2. sacræ historiæ, circa finem, vehementer redarguit Idacium, & Ithacium Episcopos, qui procurabant mortem Priscilliani hæretici apud Imperatorem; eosdem etiam tanquam ingentis criminis reos propter eandem causam ibidem Sulpitius accusat.

RESPONDEO, duabus de causis merito accusari illos Episcopos. PRIMO, quia causam Ecclesiasticam ad Imperatorem deferrebant; nam Priscillianus accusatus apud Concilium, prouocauit à Concilio ad Imperatorem, & hoc Episcopi permiserunt, & de hac re ait B. Martinus, nouum, & inauditum nefas est, ut causam Ecclesiæ iudex seculi iudicaret. SECUNDO, quia Episcopi illi assumpserunt officium accusatoris in causa sanguinis; etsi enim Episcoporum est hæreticos excommunicare, & relinquere iudici seculari, & hortari etiam iudices, ut munere suo fungantur, non tamen decet Episcopum accusatorem agere. Quod autem Sulpitius putauerit iuste Priscillianum occisum cum sociis, patet ex illis verbis eius: *Hoc modo, inquit, homines luce indignissimi primo exemplo necati sunt.*

20 Argumentum OCTAVVM, I. COR. II. Oportet hæreses esse, & qui probati sunt, manifesti fiant, ergo non debent extirpari. RESPONDEO, sensus illius sententiæ est, posita nequitia Diaboli, qui semper hæreses seminat, & natura hominum corrupta, atque ad malum propensa, & postremo diuina permissione, necesse est in mundo hæreses inueniri, sicut dicimus, oportet in horto esse aliquas malas herbas, & sicut Dominus ait: *Necesse est ut veniant scandala*, Matth. 18. Itaque non iubet Apostolus ut hæreses seminemus, vel ut eas pro viribus non extirpemus, sed solum prædicit id quod semper in 30 mundo erit: sicut scandala tollere, & malas herbas de horto extirpare iustissime conamur, licet sciamus nunquam omnia scandala tollenda.

Argumentum NONVM, Lucæ II. Discipulis cupientibus comburere Samaritas, Dominus ait: *Nescitis cuius spiritus estis.* RESPONDEO, Primum latissima differentia est inter Samaritas illos, & hæreticos; illi enim nunquam promiserant se Christi religionem seruaturos, sed tunc primum eis offerebatur, & ideo compellendi non erant; at hæretici promiserunt, professiq; sunt se Christi fidem seruaturos, ideo merito



ritò compelluntur. Deinde Iacobus & Ioannes non tam zelo salutis animarum, quàm amore vindictæ cupiebant Samaritas comburi, & ideo meritò arguuntur. Ecclesia verò zelo salutis animarum, quas hæretici peruertunt, eos persequitur, quo zelo ipse Christus bis flagello eiecit ex templo vendentes oves & boues: *Et mensas nummulariorum subuertis*, Ioan. 2. & Matt. 21. Petrus occidit Ananiam & Saphiram, Acto. 5. Paulus tradidit fornicarium *Satana in interitum carnis*. 1 Cor. 5. vt omittam Mosem, Phinees, Heliam, Mathathiam, & alios, qui zelo Dei plurimos occiderunt.

Argumentum DECIMUM, Matth. 13. *Sinite strag, crescite & ad messem*. Hic aperte Dominus de hæreticis loquitur, & prohibet eos occidi, vt Chrysostomus hunc locum exponens ait, vt etiam Cyprianus lib. 3. epist. 3. ad Maximum, & Urbanum, vbi de hac parabola loquens dicit, soli Domino concessum esse, vel fictilia vasa confringere, vel zizania euellere.

RESPONDEO, nomine zizaniorum non intelliguntur soli hæretici, sed omnes homines mali, vt patet ex ipsa Domini explicatione, ait enim: *Bonum semen, filij sunt regni, zizania filij nequæ*. Et infra: *Sicut ergo colliguntur zizania, & igni comburuntur, sic erit in consummatione seculi. Mittet filius hominis Angelos suos, & colligent de regno eius omnia scandala, & eos qui faciunt iniquitatem, & mittent eos in caminum ignis*. Cum autem prohibet Dominus extirpari malos, non prohibet ne iste, aut ille occidatur, sed prohibet ne boni conentur omnes malos vbique extirpare, & nullum omnino permittere, id enim fieri nõ posset sine ingenti clade bonorum, & hoc est quod Dominus ait, ne fortè cum eis eradicetis simul & triticum. Itaque parabola generalis est, & solum docet nunquam futurum ante mundi consummationem, vt omnes mali eradicentur.

Cum autem in particulari quæstio est vel de hæreticis, vel de furibus, vel de aliis malis; An sint extirpandi; semper considerandum est, iuxta rationem Domini, an id possit fieri sine detrimento bonorum; & si quidem potest fieri, sunt procul dubio extirpandi: si autem non possunt, quia vel non sunt satis noti, & periculū est ne plectantur innocentes pro nocentibus; vel sunt fortiores nobis, & periculum est ne si



eos bello aggrediamur, plures ex nobis cadant, quàm ex illis, tunc quiescendum est. Ita respondet Augustinus lib. 3. contra epistolam Parmen. cap. 2. hunc locum explicans sibi à Donatistis obiectum. Neque aliud Chrysostomus docet, ut patet ex his verbis: *Dominus, inquit, prohibet euelli zizania, ne forte simulcum zizania herbam etiam tritici euellant; nam si tunc trucidarentur hæretici, atrox, & irreconcilabile bellum orbi inferretur.* Porto Cyprianus non de hæreticis, sed de malis Christianis in ea epistola hanc parabolam intelligit, nec tamen prohibet occidi scelestos, sed dicit solius Domini esse discernere malos à bonis, & frumenta à zizaniis omnino purgare.

Argumentum VNDECIMUM. Ioan. 6. cum multi ex discipulis recessissent, Dominus ait: *Vultis & vos abire?* Ergo sic etiam Ecclesia facere debet.

RESPONDEO, negatur consequentia. PRIMO, quia illi non obligauerant se ad manendum, sicut hæretici se per Baptismum obligauerunt. SECUNDO, quia decebat ut Christus, qui venerat iudicari non iudicare, non per se suas iniurias vinceretur, sed eas vindicandas filiis suis spiritualibus relinquere, cuius rei figuram habemus in David, qui quousque vixit, nunquam occidi voluit Semei, qui sibi maledixerat, sed tamen in morte præcepit Salomoni, ut ipse peccatum illud non relinqueret in ultum, 3. Reg. 2.

Argumentum DODECIMUM. Fides est donum Dei, nemmo igitur ad eam compelli potest. RESPONDEO, sic eam esse donum Dei, ut etiam sit actus liberi arbitrij, alioqui etiam castitas, & ceteræ virtutes sunt dona Dei, & tamen rectè puniuntur adulteri, homicidæ, latrones, & coguntur castè, ac iuste vivere. Sapientia quoque est donum Dei, & tamen scriptum est Prover. 29. virga, & correptio tribuunt sapientiam. Denique fides est donum Dei, sed Deus hoc donum conseruat variis modis, quorum vnus correptio est.

Argumentum DECIMUM TERTIUM. Dominus attribuit Ecclesiæ gladium spiritus, quod est verbum Dei, non autem gladium ferri, immò Petro volenti gladio ferreo ipsum defendere, ait: *Mitte gladium tuum in vaginam*, Ioan. 18.

RESPONDEO, Ecclesia sicut habet Principes Ecclesiasticos, & seculares, qui sunt quasi duo Ecclesiæ brachia, ita du-



os habet gladios, spirituales, & materiales, & ideo quando manus dextera gladio spirituali non potuit hæreticum conuertere, inuocat auxilium brachij sinistri, vt gladio ferreo hæreticos coërceat. & hoc fortasse significauit Dominus, cum prohibuit Petrum, qui erat futurus Princeps Ecclesiasticorum, vt gladio ferreo.

S. BERNARDVS lib. 4. de consideratione: Quid, inquit, tu denuò & surpare gladium tentas, quem semel iussus es ponere in vaginam? quem tamen qui tuum negant, non satis mihi videntur attendere Verbum Domini, dicentis sic; Conuertere gladium tuum in vaginam, tuus ergo & ipse, tuo forsitan nutu, & si non tua manu euaginandus. alioquin si nullo modo ad te pertineret & is, dicentibus Apostolis; Ecce duo gladij hic, non respondisset Dominus, satis est, sed nimis est; & ergo, ergo Ecclesia & spiritualis scilicet gladius, & materialis, sed is quidem pro Ecclesia, ille, Verò & ab Ecclesia exercendus est: ille sacerdotis, is militis manus, sed sanè ad nutum sacerdotis, & iussu Imperatoris. Hæc ille. Posset tamen breuius dici, solum prohibuisse Dominum vsum gladij priuata auctoritate; tunc enim Petrus nondum Pontifex, sed discipulus erat.

Argumentum DECIMUM QUARTVM. Ecclesia non parcat hæreticis nisi semel, Apostolus autem ad Tit. 3. iubet, vt bis ad minimum hæreticis parcatur.

RESPONDEO, etsi nunc tam Latini, quàm Græci codices constanter habeant: *Post unam & alteram correptionem*. Tamen olim in Græcis & in Latinis penè omnibus, non habebatur, nisi: *Post unam correptionem deuita*. vt pater ex Irenæo li. 3. cap. 3. Tertul. de præscript. Cyprian. lib. 3. ad Quirinum, cap. 78. Ambrosio & Hieronymo in hunc locum Apostoli. Itaque incertum est quæ sit vera lectio. Dico præterea, Apostolum non loqui de venia danda hæretico conuerso, sed de admonitione, quæ præmittitur antequam hæreticus excommunicetur per sententiam iudicis. hoc autem Ecclesia seruat non solum in hæreticis, sed etiam in omnibus aliis, quos excommunicat, semper enim duas admonitiones vt minimum præmittit.

Argumentum DECIMUM QUINTVM. Hæretici sunt extra Ecclesiam: *At nihil ad nos de iis, qui foris sunt*, I. Corint. 6. RESPONDEO, sunt extra Ecclesiam, sed cum debito atque obli-



obligatione manendi intus, & ideo cogi possunt vt redeant, sicut cogimus oues, quando de grege fugerunt.

Argumentum DECIMUM SEXTUM. Contra mansuetudinem Ecclesiæ esse videtur velle mortem hæreticorum.

10 Respondeo PRIMO, non est contra mansuetudinem Ecclesiæ, quia tenetur misereri filiorum suorum, & tunc verè immitis & crudelis esset, si mallet parcere lupis, quàm ouibus. SECUNDO, quia Ecclesiæ experta est omnes alias rationes, antequam ad vltimum supplicium inferendum adduci posset; nam initio, vt supra diximus, solum excommunicabat, deinde videns hoc non sufficere addidit penam pecuniariam, tum amissionem omnium bonorum, postea exilium, tandem huc deuenit, vt satis patet ex variis legibus antiquorum Imperatorum, in C. tit. de hæreticis.

Argumentum DECIMUM SEPTIMUM. Fides est libera. RESPONDEO, liberum duobus modis accipitur. VNO modo ab obligatione, quomodo dicimus liberum est vouere castitatem, intrare religionem, & non est liberum frangere votum, egredi religionem; & hoc modo fides in iis, qui eam nunquam receperunt, libera est ab obligatione humani iuris, sed non diuini, & ideo homines non cogunt, Deus tamen puniet. at in iis, qui eam in Baptismo professi sunt, non est libera ab obligatione nec iuris diuini, nec humani, & ideo cogunt homines, vt ea seruetur. ALTERO modo sumitur liberum, vt distinguitur contra necessarium, & hoc modo liberum est non credere, sicut liberum est alia peccata committere, sed hæc libertas non impedit, quin homines malè agentes puniantur, immò potius exigit vt puniantur; nam si liberum est credere, & non credere, ergo potuit credere & manere in Ecclesiâ, sicut debuit; & quia non fecit, meritò puniatur. ita respondet S. Augustinus in epist. 50. ad Bonifacium, & li. 2. contra epistolam Gaudentij, cap. 11. *Datum est homini, inquit, liberum arbitrium, sed ut si esset malè faciens, fieret malè patiens.*

Argumentum DECIMUM OCTAVUM. Nunquam Apostoli brachium seculare contra hæreticos inuocauerunt. RESPONDET S. Augustinus in epist. 50. & alibi, Apostolos id non fecisse, quia nullus tunc erat Christianus Princeps, quem inuocarent. tunc enim implebatur illud Psal. 2. *Assiste-*



vunt Reges terra, & Principes conuenerunt in Unum aduersum  
 Dominum, & aduersus Christum eius. At postquam tempore  
 Constantini cœpit illud impleri, quod sequitur in eodem  
 Psalmo: Et nunc Reges intelligite, erudimini, qui iudicatis ter-  
 ram, seruite Domino in timore. Mox Ecclesia  
 auxilium secularis brachij im-  
 plorauit.

*Finis quinta Controuersia generalis.*

LAUS DEO, VIRGINIQUE MATRI MARIE.

ERRATA.

Folio 42. Ver. 16. μάρτυροι. 61. 22. ministro. 64. 23. Quod. 65. 10. Or-  
 dinarios. 72. 22. doceret. 97. 17. l. Eum qui. 98. 15. non sit saltem.  
 128. 11. eum esse Unum. 150. 19. potest. 154. 16. Concilium. 245. 29.  
 qui. 291. 25. Villicus. 304. 40. Solebat. 306. 39. dele Ad. 316. 7.  
 מוקש & 8. רקוש. 322. 2. Hieronymi. 329. 34. denegatur. 355.  
 18. abiecto. 445. 2. petentes. 450. 12. nulla.



Capitulum de ...

... in ...  
...  
...  
...  
...

...  
...

...  
...

...  
...

...  
...  
...  
...  
...

...  
...  
...  
...  
...

...  
...  
...  
...  
...

...  
...  
...  
...  
...

...  
...  
...  
...  
...



